

84040



Mag. St. Dr.

P

Nat




XII. 6. 9.

44
30

84040

III



SIMONIS STAROVOLSCI
Canonici Cracouiensis meritisimi.
INSTITVTO
R V M
Rei Militaris,
LIBRI VIII.
Quorum

- I. *Generalem belli descriptionem continet.*
- II. *Ducis qualitates, & officia comprehendit.*
- III. *Delectum militum, disciplinamq; eorum edocet.*
- IV. *Classicum sonat, & acies instruit.*
- V. *Navale praelium describit.*
- VI. *Solertia Ducum facta ostendit.*
- VII. *Subruēdarū, atq; defendēdarū urbiū rationes monstrat.*
- VIII. *Dubia nō nulla ad mil. tarē prudentiam spectātia resoluit.*



*Bibliotheca Maioris Collegij
Universitatis Cracouiensis.*

C R A C O V I Æ,
*In Officina Christophori Schedelij, S. R. M. Typogr:
Anno Dñi, M. DC. XXXIX.*

SIMONIS STATIONARII

INSTRUMENTUM

R. V. M.

1511

LIBRI VIII



Universitätsbibliothek Bonn

1511

Illustrissimo Adolescenti

IOANNI ZAMOSCIO

Veteris & Noui Zamoscij
DOMINO.

Magni Cancellarij, Thomæ, Filio.
Magni Exercituum Imperatoris, Ioannis,
Nepoti. Magnæ in Patria expectationis Ciui,
PRÆFECTO CALVSSIENSI.

Simon Starouolscius Perpetuam in omnibus Felicitatem. P.



Optimus olim Patriæ no-
stræ Senator, Optimi quon-
dam Imperatoris, Aui tui pa-
terni, tam in studiorum exer-
citatione Patauij in Italia, fidissimus comes,
quàm in Amplissimo Regni Poloniae Sena-
tu, in administratione negotiorum Reipub.
per-

11 2



perpetuus Collega, Laurentius Goslicius,
Episcopus Posnaniensis, Illustr. Domine,
prudentissimum de Optimo Senatore libel-
lum scribens, prudentissimè volumine secū-
do effatus est. *Ea inquit, negligere quæ ad ciues
felicis & pacatos efficiendos, quæ item ad seditiosos reprimendos
pertinent, non modò stultum & ignominiosum, verum etiam im-
pium & sceleratum est indicandum.* Cum autem ni-
hil magis ciues efficiat felices, quam bona,
& ex præscripto legum, Reip. gubernatio;
nihil pacatiores Regni incolas, militesque
iplos, quàm diligens castrorum disciplina;
quæ & ignauos reddit in acie fortes, & sedi-
tiosos in hybernis facit obtemperātes. Pro-
inde, vt Patriam pro virili iuuare possimus,
nil magis ex pietate esse putauimus, quàm
de militari institutione Tractatum ciuibz
nostris conscribere, seu verius à peritis hu-
ius artis magistris desumpta præcepta, no-
strorum quoque hominum exemplis illustra-
ta, tyronibus proponere, quatenus tenacis-
simum hoc Reipub. vinculum Disciplinam
Militarem, olim à maioribus nostris diligen-
tissimè obseruatam, à teneris statim annis le-
gen-

gendo imbibant, & postea ubi ad militiam animum adplicuerint, re ipsa eam exequantur. Optimus enim quisque, qui Patriæ defendendæ incensus studio, nobilem ex armis gloriam quærit, nihil magis volupe habet, quam suis obedire Ducibus, seruire castrorum leges, discere belli artem, assiduè meditari armorum exercitationem, proq; gloria gentis & victoria de hoste, nullum laborem, nullum periculum extimescere. Et huiusmodi viros gloriosos, cum omni ferè sæculo Patria nostra tulreit compluers, tum præcipuos Imperatores, ex incylta prosapia Tuâ Illustrissime Domine, Tarnouiosillos, Ostrogios, atque Magnum Ioannem Zamoscium Auum tuum. Quorum nomina, & res bello fortiter gestæ, cum potissimum inter præclara exempla hoc libro recenseantur, cui is æquius dicari poterat, quàm Tibi? qui & sanguinem ab illis ducis, & spiritus generosos? Vnde, & indolem tantā, & fortunas habens, facilè cum Deo bono poteris, magna spe immortalitatis accensus, factis virtutem ipsorum axaugere, cæterosq; coætaneos tu-

os, vel autoritate, vel exemplo, ad similes
conatus excitare. Quod uti quantociùs fa-
cias, Deus Te seruet incolumem, Iuuenum
decus, Gentis ornamentum, Solatium Fa-
miliæ. Vale.

PRÆLOQVIVM

Ad Beneuolum Lectorem.

DEberem sanè, Lector Amicissimè, ad militarem prudentiam accedere cum excusatiuncula mei, quòd de ea differam, non miles, sed umbraticus homo; quòdq; sciam longissimo inter se dissidere intervallo, locum tenere Philosophi, & munere fungi Ducis; scitè docendi in schola, & aciem aptè instruendi rationem nosse; scientia, qua instructi sunt sapientes, & experientia quam viri militares habent, præditum esse; posse temperare calamum, & posse vibrare hastam; libris stipatum esse, & oculos contra instructam aciem hostium rectos tenere. Nam qui summa cum eloquentia, cum Phormione Ephesino, de rebus differant bellicis, multi reperiuntur, at quibus satis sit animi, ad vitam cum iam res poscit, in aleam mittendam, pauci sunt omninò. Sed quia tamen vel non militis officio prælia inspexi, periculis interfui, & qui bellis præerant ad tempus adhæsi; & quos vel ipse Annibal audire nihil abnuat, allocutus sum: deq; rebus ad prælia spectantibus iudiciosè scribentes toties peruolui: propterea non ingenij mei, aut virium fiducia, de prudentia Militari differere aggredior, sed opinione sapientissimorum virorum, qui partim interfuerunt, & præfuerunt bellis, partim in Senatu, populoq; illo versati sunt, ubi assidua materies, & agitatio harum rerum fuit. Ideo quicquid illi audierunt, viderunt, attrectarunt, & quod caput est, cum iudicio obseruarunt atque conscripserunt, id ego modernis, & antiquorum casibus respersum, atque saluberrimis monitis & consilijs exornatum, in præsentis aui usum, connotare volui, hocq; singulari Tractatu demonstrare institui, quomodo hæc ars Militaris, plus quàm Draconis Leges, plurimo humani generis sanguine scripta, docet pugnae ordinem eleganter constituere; commodè adoriri hostem, instare, premere, circumuenire, leuâ dextraq; ferire; ad Ducum signa dimicare, proferre gradum,

Ad Lectorem.

sustinere impetum, resistere urgentibus, premere cedentes, ictus incutere, incussos euitare, aut clypeo excipere ac contemnere; acriterque in hostem consurgere, inuehi equo, urgere stimulis, moderare frænis, & omnem in partem circumflectere; ingerere tela, vibrare lanceas, contorquere hastam, vultus, latera, terga ferire, proque loco & tempore adoriri, nec priusquam desperata victoria de fuga cogitare: fugientes autem insequi, mactare, capere, exarmare, diripere, profligare; suos reducere, recolligere, exercitum instaurare, & desperata victoria ad spem vindictæ animum succendere; & quæ reliqua sunt militum, Ducumque officia. Instruit quoque de adparandis classibus, de fabricandis nauibus, extruendis arcibus, muniendis castris, locandis præsidijs, extruendis vallibus, compingendis aggeribus, euacuandis fossis, suffodiendis cuniculis, fabricandis Machinis, deligendis armis, oppugnandis mœnibus, comportandis commeatibus, consingendis dolis, struendis insidijs, varijsque scire uti Strategematibus. Præterea obsidere ciuitates, iacere tela, fremere tormentis, ad mouere machinas, perfodere muros, concutere turres, replere fossas, occupare mœnia, parare incendia, diruere arces, diripere aut conseruare vrbes, subuertere oppida, vastare agros, deportare indigenas, conseruare ciues, trucidare vel incarcerare rebelles & seditiosos, occupare Prouincias, firmare Regna, constituere Imperia. Quæ singula distinctim Hisce Octo Libris tractaui, non ut Sagatis aut Paludatis præcepta dem, sed ut ex magno consiliorum aceruo pauca seligam, & velut specimen præferam in exemplum, rudibus & imperitis. Tu Candide Lector, pro tua prudentia, meliora prome, deteriora corrige, & si in re aliqua lapsi sumus, ignosce, quia homines sumus, & hæc tyronibus tantum scripsimus. Vale.



APPROBATIO.

EGO M. Iacobus Vstiensis S. Theo. & I. V. Doctor & in Alma Academia Cracouien: Professor per Diæcesim Crac: Ordinarius librorum Censor SIMONIS STAROVOLSCI LIBROS OCTO INSTITVTORVM REI MILITARIS VNO opere comprehensos, cum nil fidei Catholicæ moribusq; bonis dissonum contineant castra autem sequentibus cognitu perulites, cæteris lectu iucundi sint futuri, imprimi & in lucem edi, concedo facultatem.



M. IOANNIS CYNERSCI RACHTAMOV I

Collega Maioris, Regii Professoris

In VIII. Lib. Institutorem Rei Militaris,

Clariss. & Excellentissimi Domini,

SIMONIS STAROVOLSCI

Viri in omni genere Scientiarum, iuxta laboriosissimi,
atque Foelicissimi.

N V O E T I K O N.

Sarmaticus postquam conspexit in agmine
Mauors

Pralia, magnanimis sic reparata Viris,
Obstupuit! doctas mox laudauitq. Phalanges:
Ergo Viri faustum ludite dixit opus.

Sic vos non vobis miscetis pralia, sic vos
Non vobis, properum praecipitatis iter.
Regna simul, Regesq. pios, populosq. fre-
quentes,

Sauo seruatis hoc modo ab excidio.

Nā calamo celeri miscet qui pralia Achates,
Ille mihi immensas accumulabit opes!
Ille mihi facilesq. refinget ad arma Polonos,
Ille mihi nullo sanguine bella dabit.

Ille mihi insones acies, fortesq. Dynastas
Consilio armabit, moribus, ingenio.

Vniute concordēs nostrā sine felle Camana,
Et calamis hostes pungite fœdis fragos.

Pūgite fœdis fragos, calamis si non datur armis
Hostes, o calamis pungite ritē pijs.

Pungite fœdis fragos hostes, & Spartacum a-
trocem

Fraude doloq. potens, qui opprimit im-
peria.

Opprimit & Christi Patriam: Sacrumq. se-
pulchrum,

Totq. greges hominum (prò pudor) vsq.
tenet!

Non vi, non armis, non milite, sed ratione.

Publica res geritur, Consilioq. Ducum.

En STAROVOLSCIADES luci monu-
menta sacrauit,

Et certam docuit non sine laude viam.

Quo Dux imperio, vel qua statione valeret

Miles? delectus quis sit ad arma Virum?

Debeat ut Iuuenis rigidam triuisse Pala-
stram?

Et noctem in somnes mittere in excubias.

Debeat ut pernicis equi conualuere gyros,
Atq. Scythā cursu frangere praecipitē.

Debeat ut superare famē, superare labores,
Et scire, & facere, & fortia quaq. pati.

Quis nervus belli? qua visq. potentior armis?
Opprimat ut luxus militis officium.

Castra loco ut tempestiue ponenda salubri,
Quēis caput ad primum fluminis vnda
fluat.

Qua campis acies, qua fraudi accommoda
vallis,

Qua via difficilis, quo & superanda
modo?

Vt prabenda vigil, tuto custodia vallo,

Ne secura quies damna pudenda ferat.

Sitq. ubi densari cuneos, ubi cornua tendi
Æquius, & celeri frangier arte Gethas.

Seu sit opus pāsus Aquilā protēdere in alas,
Seu sit opus Lunam cornua acuta dare.

Seu sit opus quadratum acies ut currat in a-
gmen:

Seu sit opus pressam cingat ut orbe viā.

Hostes qua mora perfringat, quid rebus in
arctis

Dux gerat. Hoc docuit Doctor in arte
potens.

At vos magnanimi, fortissima pectora, Ciues,
Fontibus his vestrum promite consilium,

Promite consilium: rebus succurrere seseis
Hac vos nō aliā cōditione decet. (Martis,

Tu quoq. parue Zamosciades, spes inclyta
Spes generis, Patria praesidiumq. tua

Disce ab auo Magni vestigia plena laboris
Disce sed inuideas, bella trophæa, decus.

Disce, Patris similes meritis cōiungere honores,
Et pietatis opes, matris ab ingenio.

Sic & auo similis, patrisq. simillimus haeres
Augebis summas posteritatis opes.

ELENCHVS CAPITVM

Vniuscuiusque Libri.

LIBER PRIMVS

De Descriptione Belli.

Cap. I.	De bello in genere.	fol. 1
II.	De definitionibus & diuisionibus belli.	5
III.	De suscipiendo bello.	7
IV.	De causis belli.	9
V.	De diuisione artis bellicæ.	11
VI.	De procurando Numinis auxilio in bello.	14
VII.	De apparatu belli.	18
VIII.	De praeventione in bello.	19
IX.	De apparatu pecuniæ ad bellum.	23
X.	De apparatu com meatuum ad bellum.	26
XI.	De apparatu armorum.	29
XII.	De apparatu virorum.	31
XIII.	De gerendo bello.	34
XIV.	De consilio bellico.	37
XV.	De occasione captanda in bello.	42
XVI.	De mora facienda in bello.	47
XVII.	De prodigijs in bello.	48
XVIII.	De fama belli.	53
XIX.	De finiendo bello.	55

LIBER SECVNDVS

De Officio Ducis, & qualitatibus illius.

Cap. I.	De constituendo Duce militia.	58
II.	De officio Ducis.	92
III.	De qualitatibus requisitis in bono Duce.	63
IV.	De scientia Ducis.	66
V.	De experientia Ducis.	67
	VI. De in.	

Elenchus

VI.	De ingenio & industria Ducis.	69
VII.	De vigore & alacritate Ducis.	72
VIII.	De magnanimitate & fortitudine Ducis.	74
IX.	De temperantia & abstinencia Ducis.	76
X.	De comitate & affabilitate Ducis.	78
XI.	De diligentia & labore Ducis.	80
XII.	De exemplo Ducis.	82
XIII.	De prudentia atq; providentia Ducis.	83
XIV.	De fortuna seu felicitate Ducis.	84
XV.	De auctoritate ac reputatione Ducis.	87

LIBER TERTIVS.

De Disciplina militari.

Cap. I.	De militia in genere.	91
II.	De divisione militiae.	94
III.	De delectu militum.	96
IV.	De exercitijs militum.	100
V.	De operibus & labore militum.	106
VI.	De ordine seruando in militia.	108
VII.	De officio Tribuni, seu legionis Praefecti.	112
VIII.	De officio cohortis Praefecti.	113
IX.	De officio Praefecti Turmae.	114
X.	De officio Praefecti Castrorum.	116
XI.	De officio Praefecti Fabrorum & Tormentorum.	117
XII.	De buccinatoribus & tympanistis.	118
XIII.	De calonibus & lixis.	121
XIV.	De mercede conductis.	123
XV.	De ordinatione & dispositione castrorum.	124
XVI.	De munitione castrorum.	128
XVII.	De tessera militari.	133
XVIII.	De vigilijs, & excusatoribus.	137
XIX.	De commeatu & pabulo.	140
	XX. De fru-	

Capitum.

XX.	<i>De frugalitate castrensi.</i>	142
XXI.	<i>De ornatu & vestitu militum.</i>	146
XXII.	<i>De reformatione militis à pugna desueti.</i>	149
XXIII.	<i>De itineribus faciendis.</i>	151
XXIV.	<i>De gubernanda sanitate exercitus.</i>	161
XXV.	<i>De cauenda seditione militum.</i>	164
XXVI.	<i>De conciliando militum amore.</i>	169
XXVII.	<i>De transitu fluuiorum.</i>	171
XXVIII.	<i>De disciplina castrensi.</i>	174
XXIX.	<i>De coërtione militari.</i>	179
XXX.	<i>De exemplis punitiois.</i>	182
XXXI.	<i>De prohibendis aut permittendis duellis.</i>	185
XXXII.	<i>De præmiis & honoribus militaribus.</i>	188
XXXIII.	<i>De æmulatione militari.</i>	193

LIBER QVARTVS.

De Acierum instructione, & Pugna.

Cap. I.	<i>De exploratione hostium.</i>	197
II.	<i>De hostiliū castrorū metatione cōsiderāda.</i>	203
III.	<i>De nuncijs admittendis aut emittendis.</i>	205
IV.	<i>De transfugis recipiendis.</i>	208
V.	<i>De varia instructione acierum.</i>	211
VI.	<i>De tempore eligendo ad pugnam.</i>	223
VII.	<i>De loco eligendo ad pugnam.</i>	225
VIII.	<i>De alacritate pugnandi.</i>	228
IX.	<i>De metu militum.</i>	231
X.	<i>De adhortatione facienda ad milites.</i>	235
XI.	<i>De acie hostium turbanda.</i>	238
XII.	<i>De terrendo hoste.</i>	240
XIII.	<i>De officio militum in acie.</i>	243
XIV.	<i>De committendo prælio.</i>	246
XV.	<i>De resistendo virtuti atq; dolis hostium.</i>	253
XVI.	<i>De non desperando, si vel pars, vel totus exercitus fugerit.</i>	257
	XVII. <i>De inf.</i>	

Elenchus

XVII.	<i>De insidijs locandis.</i>	261
XVIII.	<i>De officio Ducis pugna dirempta.</i>	264
XIX.	<i>De præda ex hostibus capta.</i>	268
XX.	<i>De captiuis humaniter excipiendis.</i>	270
XXI.	<i>De interfectis honestè sepeliendis.</i>	272
XXII.	<i>De recedendo ab hoste.</i>	273
XXIII.	<i>De effugiendo, cum securè recedere non poteris.</i>	277
XXIV.	<i>De cladibus acceptis sarciendis.</i>	279
XXV.	<i>De inducijs faciendis.</i>	283
XXVI.	<i>De Imperatorũ hinc inde collocationibus.</i>	285

LIBER QUINTVS.

De bello Nauali.

Cap. I.	<i>De apparatu naualis belli.</i>	290
II.	<i>De modo fabricandarum nauium.</i>	292
III.	<i>De diuersitate nauium.</i>	296
IV.	<i>De telis tormentisq; naualibus.</i>	299
V.	<i>De notitia locorum in mari.</i>	302
VI.	<i>De signis tempestatum.</i>	304
VII.	<i>De pugna nauali Marte aperto committenda.</i>	306
VIII.	<i>De insidijs in bello nauali collocandis, aut euitandis.</i>	308

LIBER SEXTVS.

De Strategematibus.

Cap. I.	<i>De Strategematis in genere.</i>	311
II.	<i>De ijs, quæ facienda sunt ante pugna.</i>	314
III.	<i>De ijs, quæ facienda sunt in pugna.</i>	339.
IV.	<i>De ijs, quæ facienda sunt post pugnam.</i>	346

LIBER 7.

Capitum.

LIBER SEPTIMVS.

De Oppugnatione & Defensione urbium.

Cap. I.	<i>De exstuen- dis munitionibus</i>	354
II.	<i>De praesidijs collocandis.</i>	358
III.	<i>De prouidendo necessaria ad defensionē.</i>	362
IV.	<i>De facienda obsidione.</i>	367
V.	<i>De machinis ad oppugnationem</i>	377
VI.	<i>De faciendis cuniculis.</i>	380
VII.	<i>De faciendo assaltu.</i>	382
VIII.	<i>De propugnatione inclusorum.</i>	386
IX.	<i>De defensione oppidanorum cum hostis irruerit ciuitatem.</i>	397
X.	<i>De proditoribus urbium.</i>	399
XI.	<i>De ciuitatibus subactis.</i>	401

LIBER OCTAVVS.

De Dubijs circa rem militarem.


Quæst. I.	<i>Vtrum expediat ipsum Principem ire ad bellum?</i>	406
II.	<i>Vtrum expediat ipsum Ducem belli im- miscere sese pugna?</i>	414
III.	<i>Vtrū expediat Ducē belli esse perpetuū?</i>	418
IV.	<i>Vtrum externum an terrigenam Ducem creare oporteat?</i>	425
V.	<i>Vtrum melius sit, seuerum Ducem esse, an comem?</i>	429
VI.	<i>Vtrum Dux locuples, an pauper sit eligendus?</i>	432
VII.	<i>Vtrum Dux ex illustri, an verò obscura familia esse debeat?</i>	436

VIII. *Vtrum*

Elenchus

VIII.	<i>Vtrum iuuenis Imperator, sit eligendus, an verò senex?</i>	441
IX.	<i>Vtrum Dux dicendi peritus, an verò ignarus eloquentiae esse debeat?</i>	446
X.	<i>Vtrum ex agris, an verò ex urbibus miles sit legendus?</i>	450
XI.	<i>Vtrum extraneus miles sit mercede condu- cendus, an verò ex subditis dilectus?</i>	454
XII.	<i>Vtrum pedites, an verò equites magis sint necessarii?</i>	461
XIII.	<i>Vtrum vires maritimae praestent copiis terrestribus?</i>	466
XIV.	<i>Vtrum praestantius sit Marte aperto decerta- re, an verò ciuitates munitas ex- pugnare?</i>	472
XV.	<i>Vtrum superuentibus & insidijs, an publico Marte configi praestet?</i>	479
XVI.	<i>Vtrum liceat uti Strategematis?</i>	486
XVII.	<i>Vtrum consultus sit domi hostem expectare, an verò ei occurrere?</i>	489
XVIII.	<i>Vtrum munitiones exstruere sit necesse?</i>	494
XIX.	<i>Vtrum munitiones in montibus positae, sint meliores ijs, quae sunt sitae in plano?</i>	501
XX.	<i>Vtrum numero sum, an mediocrem exerci- tum sit melius?</i>	503
XXI.	<i>Vtrum omnes, an verò plures armis tecti debeant esse?</i>	509
XXII.	<i>Vtrum expediat milites auro & argento uti?</i>	513
XXIII.	<i>Vtrum litterae iuuent rem militarem?</i>	517





SIMONIS STAROVOLSCI
INSTITVTORVM
Rei Militaris.

LIBER PRIMVS
De BELLO.

CAPVT PRIMVM.

De Bello in genere.



Vandoquidem omnis militaris prudentia circa bellum est, ideo primum de bello in genere, postea de eius partibus in specie agemus: quamuis Cornelius Agrippa, disciplinam istam summoperè repræhendat, & bellum nihil aliud esse dicat, quam commune multorum homicidium ac latrocinium; nec aliud milites, quam stipendiarios, & in Reipub: exitium, armatos latrones. Et per consequens, disciplinam quoque bellicam, non nisi in hominum perniciæ occupatam, non alium finem quærere, quàm vt famosos orbis euerfores, strenuosq; homicidas faciat; transformetq; homines in ritus ferarum, moresq; belluarum. Proinde pacem summopere commendat; nec arma sumere suadet, nisi cum necessitas cogit. Quod ipsum intellexit Marcianus Imperator Byzantinus, qui teste

Zonara, dicere solitus erat. *Imperatori non capienda esse arma, dum pacem agere licet.* Cæterum quia pax non nisi armis paratur & conseruatur, propterea necessaria sunt arma & bellum quandoque. Atque hunc ob finem laudauit militiam diuinus ille Plato, qui & pueros hanc discere, adultosq; statim armatæ militiæ tradi iubet. Et Cyrus inclytus ille Rex, illam non secus atque agriculturam, summè necessariam esse aiebat. Quis enim est qui non sentiat, quanta gloriæ monumenta pariantur armis? quamq; magnæ sæpè vtilitates proueniant? Armis siquidem vim repellere, vlcisci iniurias, inimicos profligare, socios amicosq; defendere, tueri fines, propagare demum imperium possumus. Armis acquirimus gloriam, assequimur honores, adipiscimur nobilitatem. Armis obtinemus præmia, laudes, immortalitatem. Vnde ipse Africanus Scipio apud Ennium gloriatur, quod per sanguinem hostium atque cædes viam sibi ad cælum aperuerit. Cui & Cicero adsentit, inquiens & Herculem eadem via cælos conscendisse; vt taceam apud Romanos tot coronarum genera ex militia, ciuiliū, muralium, obsidionalium, naualium; tot militaria dona, armillas, hastas, phaleras, torques, annulos, statuas, imagines, templa, ouationes, triumphos, consulatus, panegyricos, obeliscos, & infinitos laudationum & honoris perpetuò propagandi modos. Qui igitur desiderat pacem, præparet bellum: qui victoriam cupit, militem imbuat diligenter: qui secundos optat euentus, dimicet arte, non casu; qui gloriam immortalem assequi vult, in militari sese prudentia quàm maximè exerceat. Iam autem primi Lacedæmonij experimenta pugnarum de euentibus colligentes, artem præliorum scripsisse affirmantur, vsque eo, vt rem militarem, quæ virtute sola, vel certè fælicitate creditur contineri, ad disciplinam, peritiæq; studia reuocarent, ac magistros armorum (quos Tacticos appellauerunt) iuuentutem suam, vsum varietatemq; pugnandi præcipere edocere. Horum sequentes instituta Athenienses,

non

non solum rei bellicæ, sed etiam diuersarum artium industriam exercuerunt. Sed præcipuè Romani, vtrorumque imitando exempla, Martij operis præcepta, & vñ retinuerunt, & litteris prodiderunt: inter quos Flavius Renatus Vegetius comprimis, deinde Sextus Iulius Frontinus, postmodum Ælianus & Modestus. tum antiquior multò Cato ille Censorius, Cornelius Celsus, & Paternus, tandem Polybius, Higinius, Xenophon, Xenocrates, Onofander, Leo Imperator Constantinopolitanus, Volturius. Et ex recentioribus, Nicolaus Machiauellus, Iacobus Comes Purliliarum, Iacobus Priluscus, Mathias Stricouius, Franciscus Petrarcha, Dominicus Cyllenius, Carolus Theti, Brancatius, Franciscus Patricius, Aurelius Cicutus, Sixtus Arcerius, Hieron Cataneus, Marcus Girolamus, Achilles Tarduccius, alijq; infiniti. Sed qui pleniore manu militaria tractarunt nostra iam ætate, sunt, Iustus Lipsius Belgij decus, Ioannes à Chokier discipulus eius, Isaacus Casabonus, Dominus de lix Noue, Scipio Amiratus, vir multiformi doctrina eruditus, & Io. Antonius Valtrinus veteris militiæ Romanæ peritissimus. Multa quoque de militia Romana scribit in sua Historia Liuius, Ammianus. A. Gellius, Suidas, Festus, Agellius, & Alexander ab Alexandro. Quanquam igitur adeò deploratam nostram militiam esse videam, vt ad antiquam virtutem nullo modo reuocari possit, tamen in gratiam eorum, qui antiquitatis studio delectantur, ea quæ ex supradictis scriptoribus connotaueram, recentioribus exemplis adornata, litteris comprehendere statui. Habent enim hoc supra antiquitatem nostri sæculi bella, quòd, sicuti geruntur armatis diuersâ religionis animis, infestis nouo telorum genere corporibus, validis aliâ munitione vrbibus; ita longè quàm prisca, nostris hominibus ad imitandū promptiora sunt. Et licet Sarmatia nostra, multorum opinione, prima sit hodierni Martis gloria, nusquam tamen militia aut ingeniosior, aut affluentior, aut diuturnior, quam in Belgio. Planè vt aperto hic ludo ac-

A 2

curren-

currentes undique populos erudire Mars videatur. Et hominum uirtus, operum molitio, varietas & copia quantum modo angustias Belgici tractus non egreditur? Quare ne omnino impossibile videatur armorum disciplinam, cuius usus intercidit reparari posse, doceamur exemplis Alexandri Emessij, Ambrosij Spinolæ, Mauricij & Henrici Nassouiorum, qui è libris antiquorum repetita arte, ita eam in Belgio auctoritate sua firmauerant, ut ex ea tanquam ex equo Troiano prodierint, tot bellorum Duces, tot machinarum inuentores, tot fabricandarum arcium magistri, tot militarium præceptorum doctores. Quorum communi consensu, hæc generalia de bello habentur axiomata.

In omni bello & expeditione, quicquid tibi prodest, aduersario noceat: quod illum adiuvat, tibi semper nocumento erit.

In omni bello, nil ad arbitrium aduersarij facere aut dissimulare debemus, sed id solum agere, quod nobis utile iudicamus.

In bello, qui plus in angariis vigilauerit, plusq; in exercendo milite laborauerit, minus periculum sustinebit.

In bello miles in aciem nunquam producendus est, cuius antea experimenta non cæperis.

Melius est hostem domare inopia, aut superuentibus, quam proelio, in quo amplius solet fortuna potestatis habere, quam uirtutis.

Dux & Princeps antequam susceperit expeditionem belli, præparet primo pecuniam, commeatum, munitiones fortes, equos, classes, milites, & arma tam offensiuæ, quam etiam defensiuæ.

In bello, capta ab hostibus iure gentium capientium sunt; sed tamen animaduertat, ut mobilia tantum capientibus singantur, immobilia uero fisco Principis, aut populi victoris. Similiter machinæ & tormenta omnia cum suis instrumentis aut

Princeps subditos suos quam maximè artem bellicam edoceat, ut quam libertas retinetur, dignitas gentis propagatur, & conser-

conseruatur imperium. Et meritò; Hac enim sola steterunt olim florentissima Regna & Imperia. Hanc quondam relictis doctrinis omnibus Spartani, postea coluere Romani. Hanc hodie quoque Turci, Persæ, Mogoritæ, Narfingani, cæteri; barbari putant esse seruandam, quia cætera omnia in hac arte consistere, aut per hanc assequi se posse confidunt. Per hanc hodie dum stant inuicti Scythæ, & à nemine vnquam subiugati Poloni. Per hanc florent Monomotapæ, late dominantur Abyssini, multis Regibus imperant Chineses, regnant Syani, Hispani nouum Orbem, & infinitas insulas possederunt. De hac quoque & nos, iam in specie agamus; quandoquidem ea, quæ antea seruabantur, nunc ex vsu libris; discenda sunt.

C A P V T II.

De Definitionibus & Diuisionibus belli.

Bellum, vt Lipsio placet, est vis & arma in Principem, aut populum alienum. Vel vt Albericus Gentilis definit. Bellum est publicorum armorum concertatio. De qua sigillatim inquirere consentaneum duximus, stultum existimantes, cum minimis de rebus homines diligenter inquirant, ambigant, perscrutentur; de his tam amplis, tam necessariis, non ante periculum facere accuratissime velint, quàm certamina subeant. Igitur vt methodum ad cognitionem habeant, dico.

Duplex esse Bellum. Externum & Internum. Externum seu Finitimum est. cum contra limitaneos & vicinos nobis populos arma sumimus. Internum seu Civile bellum est cum vnius gentis populi inter se armis decertant.

Vtrumque istud duplex est. Offensiuum & Defensiuum. Offensiuum bellum est, illud quod inferimus vicinis nostris vtrò; vel sumimus arma in Principem nostrum, aut in

ter sese spontè. *Defensuum verò est istud* quo vicinorum, aut Principis proprii iniuriâ à nobis propulsamus. De hoc utroque bello nota prouerbiū illud commune. *Hispanus propria defendit. Gallus aliena inuadit. Polonus nusquam offendit.* Toties enim ad ligam Christianorum Principum, contra Turcam, communem hostem, Reges Poloniae vocati, nusquam accedere voluerunt, eo quod cum Ottomanis pacem perpetuò conclusam habuerint. Et quamuis nuperrimè aliquoties fuerint ab eo armis læsi, nihilominus Inuictissimus Rex noster Vladislaus IV. à Transyluano Principe, Regulis vtriusque Myfiæ, atque ipso Præcopensium Tartarorum Chano, assiduis precibus sollicitatus, noluit prior pacem violare.

Iterum bellum vtrumque duplex est Aliud Terrestre, & aliud Nauale. *Terrestre est* cum terra, pedes aut in equis præliatur. *Nauale est.* cum mari, aut fluuijs classe decertatur, siue cum vicinis, siue inter sese. Et hoc sanè vltimo modo trifariam. Vel cum in Principem arma mouentur. Vel cum Optimates inter se decertant. Vel denique cum plebs contra Procures & nobilitatem insurgit. Prioris motus exempla, cum alias passim in Historijs obuia, tum sufficit modernum bellum Germanicum ante viginti ferè annos à rebellibus subditis contra Ferdinandum II. Imperatorem pertinacissimo odio susceptum. Secundi motus exemplo sunt duodecim Palatini in Polonia, qui Regnum inter se partiti, factionibus primum, & studijs partium laborarunt, tandem ambitione exagitante, dum quisque rem suam priuatam & potentiam augere studeret, armis inter se decertarunt. Postremi denique, cum Græcarum ciuitatum olim populus multa exempla dedit, tum Florentinorum atque Genuensium historiæ, inter alias Italiæ vrbes, sunt plenissimæ. Sed quaecunque bellum sit, tota eius tractatio reducenda est, ad tria hæc præceptorum capita. *Suscipiendi. Gerendi, & Finiendi.* Horum aliquid si negligis, aut perperam administras, vix est vt bono euentui vnquam lites.

CAPVT III.

De suscipiendo Bello.

QVia bellū, vt dicit Demosthenes, contra hos est, qui legibus nequeunt coerceri: iudicia autē in ciues redduntur: vnde illud bellū dicitur esse iustū, quod est necessarium; illa arma gloriosa, quæ non ad innocentis sanguinis profusionem, sed ad sui suorumq; defensionem; non ad inuidiosas opes, minimeq; ferendam potentiam, sed ad Dei O. M. cultum gloriamq; propagandam Reges & Principes capiunt. Hinc rectē iustitia Romanorum laudatur, quod nemini bellum denunciarint, nisi per Feciales, seu legatos prius postulassent damnum sibi illatum resarciri: quo negato, tum demum bellum suscipiebatur, vt Festus & Varro testantur. Indicare autem bella populis, nec Senatui, nec populo toti plenum ius erat, nisi cognitio & iudicatio sacerdotum publicorum interuenisset, quos vt memorauimus Feciales dicebant. Eorum arbitrio sumpta arma, posita arma: & religio, non solum iustitia, ea temperabat. Indicebant verò, vt scribit Iulius Aphricanus, proiecta in fines hostium hasta, postquam res suas per oratores ritē repetitas non obtinuissent. Posterioribus demum sæculis, non hastam, sed gallinaceum proijciebant, pugnace animali pro bellico signo videntes. Iusta igitur ex causa suscipiatur bellum, & rebus prius legitimē repetitis, quia sic animosiores fiunt milites, & spem vincendi atque vindicandi habent. Spes verò addita suscitatur iras. Et subditi pro causa iusti, promptius subueniunt Principi de proprio, quamuis non sufficiat publicum ærarium. Quapropter pulchrē Poëta. *Frangit, & attollit vires in milite causa.* Sed nulla res magis addit animos, quam spes posita in Deo, cum vel pro defensione Religionis Christianæ, vel pro defensione patriæ geritur bellum: quandoquidem fraudulenter ac impiē quæsitæ res, eadem sorte defluunt,

fluunt, qua petuntur; & ut Curtius inquit. Nulla quaesita scelere potentia diuturna est. Alexander Magnus usque in Indiam gloriae tantummodo inanis causa imperium extendit, quod post mortem eius, inter tot Principes diuisum, nunquam postea coaluit. Senatus, populusque Romanus orbis olim dominus, propter neglectam iustitiam nunc feruit: & à quo antea Reges & prouinciæ ius petebant, ei hodie una cum libertate dignitas omnis & auctoritas erepta est. Nuper Gustauus Sueciæ impietate hæretica arma mouerat in Catholicos, & ambitione regnandi, seduxerat Principes Germaniæ, dementauerat vrbes liberas, vicinos & remotos Reges vexauerat, sanguinem effuderat toties, & tandem spiritum ipsum; quia tamen iniusta procedebat via, omnia ad pristinos dominos, quæ quaesierat, rediëre. Res Ottomanicæ similiter scelere patratae, ab annis aliquot iam nutant, imminetque eis Nemesis, quæ lentam puniendi moram, supplicij grauitate compensabit. Quod si itaque Principes illi sempiterno honore censentur esse digni, qui armis legitimis libertatem subditorum suorum & pacem defendunt: imperiaque sua non modo in integro conseruant, sed etiam iustis ex causis amplificant. Multo maiore gloria & immortalitate coronandi sunt, qui veram fidem Catholicam tuentur à barbaris, & propagant eam sanguine suo, pro tota Christianitate sese opponendo cum omnibus subditis suis, ad honorem Dei. Qualiter faciebat Constantinus Magnus, bella gerendo contra paganos. Carolus Magnus contra Arrianos Longobardos, Gottofredus Bullionius, & Galliæ Reges, pro liberatione Terræ Sanctæ, contra Saracenos, Reges Hispaniarum olim contra Mauros, postea contra Noui Orbis gentiles, Reges Poloniæ, contra Tartaros, Moschos, & Turcas, alijque Principes religiosissimi contra alios hostes Ecclesiæ Sanctæ, idque variis ex causis. de quibus videamus capite sequenti.

CAPVT IV.

De causis suscipiendi Belli.

OMnia quidem bella iusta ex causa debere suscipi diximus, quia exitus illorum non in viribus nostris, neq; in calliditate consistit, sed in arbitrio fortunæ, & manu Dei. Ac propterea lex erat Athenis peruetus. *Senatui bellum suscipere fas neutiquam esto, nisi iustum iniustumue sit, prius à Philosophis ponderetur.* Quia tamen plerumque initia bellorum ex ambitione & malitia proficiscuntur humana, ideo simul vtrasque, tam iustas, quam iniustas, ob meliorem informationem lectoris congesimus, vt sciat bellum ad eius quidem arbitrium, qui istud cupit inchoari, verum non eiusdem arbitrio componi posse: & parum omninò Regibus aut Dynastis prodesse militum numerum, pecuniarum abundantiam, machinarum bellicarum molem, quando ob delicta illorum diuersum voluntas diuina decreuit.

Bella itaque suscipiunt Principes. *Primo.* vt possint affecurare limites Imperij sui. Et sic Græcanici Cæsares contra Parthos infestantes Imperium Romanum multoties arma sumpserunt, & feliciter pugnarunt. Basilusq; Magnus Moscorum Dux sæculo superiore à Tartaris vexatus, bellum contra eos suscepit, & Astracanensibus, Sibirijs, Kasanensibus, Resanensibusq; subiugatis, non modò pacem suis Russis fecit, sed & imperium longè amplificauit. *Secundo* vt possint imperia sua dilatare. qualiter olim faciebant Romani, nunc verò Turcæ, & Hispani in Indijs. *Tertio.* Vt amissa possint recuperare. Sic Stephanus Rex Poloniæ à Moscouitis recuperauit Polocensem Satrapiam & prouinciā Liuonicam, Sigismundus III. Smolenscum & Ducatum Seueriensem. *Quarto.* Vt possint noua regna, & nouas prouincias acquirere, ignotosq; populos & insulas aperire. Vt faciebat Emmanuel Rex Portugaliæ, & nunc faciunt Reges Hi-

ges Hispaniæ. *Quinto* Ut defendant confœderatos suos, ut facit Rex Galliæ conseruare volens in suo statu Hollandos, reliquosq; rebelles Imperio Romano, & Sabaudix Duci. *Sexto* Ut suppetientur consanguineis suis, quali modo nunc Rex Hispaniarum, iuuat Imperatorem, tanquam fratrem, & caput Augustissimæ domus suæ Austriacæ. *Septimo* Ut conseruare possint Religionem Catholicam. quo fine Carolus V. bellum gessit contra Luteranos, & nuperrimè Ludouicus XIII. Rex Galliæ, maiorum suorum exemplo, contra Hugonotos & Protestantes. *Octauo* propter gloriam acquirendam. ut Alexander Magnus, contra Persianos & Indos. *Nono* propter ambitionem meram, ut Iulius Cæsar contra ciues suos. *Decimo* propter vltionem, & vindicationem contemptus. ut Coriolanus contra eosdem Romanos conciues suos. *Vndecimo* propter iustitiam, & authoritatem suam tuendam, ut nimirum rebelles subditos ad obedientiam redigant, sicuti Rex Catholicus facit contra Batauos, & Imperator Ferdinandus II. faciebat contra Bohemos. *Duodecimo* propter conseruationem libertatis, vti fecerunt Senenses & Pisani cum à Florentinis inuaderentur. *Tredécimo* propter conseruationem Patriæ & Christianitatis, vti facimus Poloni aggressi à barbaris Machometanis. *Vltimo* ut discordes ciues bello externo occupent. Ita Cimon videns iuuentutem Atheniensem inquietam esse, ducentas triremes armavit, & duxit eas contra Persas, ut ciuilibus bellis quassatam patriam exoneraret. Nam facilius est semper inter turbulentos consensus ad bellum, quàm in pace ad concordiam. Et propterea nunc Iberi domi quieti manent, quia grauib; bellis foris sunt occupati, contra Turcas nimirum, Mauros, atque Hæreticos hic in Europa; in Indijs verò contra Arabes, Calecutienses, atque Gentiles Varios Noui Orbis. Galli autem è contra, pacem habentes cum omnibus vicinis, assiduè superioribus annis tumultuabantur inter se domi. Quod Othomanni præcauendo, secundum præscripta

scripta Machometis, semper bella gerunt cum vicinis populis, vel in hac, vel in illa parte. Quia nulla magna ciuitas (dicebat Annibal) quiescere potest; si foris hostem non habet, domi inuenit: vt præualida corpora, ab externis causis tuta videntur, sed suis ipsa viribus onerantur.

C A P V T V.

De Diuisione artis Bellicæ.

VT leuissimis ex causis bella famosissima nata esse reperi-
mus; sic à militaribus viris, *quinque præcipua munera bel-
li*, constitui videmus. *Castra nimirum mouere. Metari.
In campo manum conferere. Propugnare vrbes. Et Arces for-
tissimas oppugnare.* Quæ vt singula exactius cognoscamus,
vniuersalem artis bellicæ diuisionem, præmittamus.

*Ars igitur belli diuiditur dupliciter. in Apparatum vi-
delicet, & Actionem ipsam.*

*Apparatus diuiditur quadrifariam In Viros. Arma.
Commeatum. & Pecuniam.*

Quantum ad primum. *Viri militares, alij sunt Præfe-
cti, qui imperant. Alij verò Prinati, qui obediunt, & exe-
quuntur mandata Præfectorum suorum.*

*Præfecti in tres Ordines diuiduntur. in Supremum
belli Ducem. In Vicarios illius Generales. Peditum, E-
quitum. Castrorum & Tormentorum. Et in Regentes
minores, puta Chiliarchas, Tribunos, Alarum Ductores,
Cohortium Præfectos, Centuriones, & eorū vices gerentes.*

*Prinati quoque seu gregarij milites similiter trifariam di-
uiduntur, In Pedites. Equites. & Classiarios.*

Pedites item in Mercenarios, & Naturales, seu incolas
proprijs, qui citius artem discunt, fidelius pro patria pu-
gnant, & melius suis Præfectis obediunt.

Equites quoque, seu proprii, seu mercede conducti, di-
uiduntur.

uiduntur in Cataphractos & Leuiter armatos: in quibus, sicut & in peditibus, hæc quinque consideranda sunt. *Ars. Aetas. Educatio. Patria, & Statura.* de quibus suo loco.

ACTIO verò seu vsus armorum, maximè exercetur in itineribus peragendis, in castris metandis, & in prælijs faciendis.

Itinera sunt vel procedendo cum exercitu; vel retrocedendo ab hoste: in vtroque motu isto, obseruanda imprimis est *notitia locorum*, per quæ proceditur: *secretum temporis*, quò, & quando mouendum: & *ordo* seu modus ipse procedendi.

Notitia locorum percipitur, vel per ipsum Ducem; venando, peregrinando, & considerando loca ex lectione, & picturis: vel per submissas personas; hoc est, per Speculatores; qui sint fideles, & periti locorum, atque linguarum; vel per Recognoscitores; qui sint prudentes, & audaces; ne fortè propter metum vna res videatur ipsis pro alia.

Secretum mouendorum exercituum conseruatur, non promulgando tempus cuiquam suæ motionis, vtrum de die, an de nocte procedere velit: & locum, quò mouere intendit; etiam officialibus & Præfectis, non nisi sub sigillo communicando.

Modus denique mouendorum castrorum fit per terram, vel per aquam.

In terra considerandus est primùm ipse miles, postea inimicus, denique iter seu via. *Respectu militis*, aut fiunt impedimenta ob multitudinem curruum, camellorum, infirmorum, & calonum; aut perturbatio ordinum, si quid vltra arma necessaria, aut victum secum portauerint. *Respectu inimici* fit consideratio legitima, vtrum sit remotus, aut vicinus, aut iam in acie. *Respectu denique itineris*, vtrum per planiciem, & securè sit procedendum: an verò per sylvas, montes, saltus, aut paludes, vbi expectandus esset inimicus, vel in aperto, vel in occulto, vel in stricto loco; idq; aut à fronte, aut à tergo, aut denique à latere vtroque. Per

Per aquam denique tranando, videndum est, vtrum fluuij sint, aut mare. Illi, aut superantur per pontes; siue portatiles, siue fabricatos ex occasione: aut per naues: aut per vada; diuidendo fluuios per canales, seu ponendo equitatum supra peditatum, ob retinendum impetum aquarum. Per mare verò, vbi tantum transitur nauibus, vel Liburnicis, vel onerarijs, vel scaphis minutioribus, considerandum est, quomodo excedendum est in littoribus, aut portubus hostilibus; idq; exemplo Magnorum Architalassorum, qui multa hac in re Stratagemata fecerunt. Et hæc in procedendo obseruanda.

Retrocedendo verò, seu de die, seu de nocte; cum toto, aut diuiso exercitu; vitandæ hostium insidiæ, militum consternatio, & confusio, itineris aberratio, dispositorum subfidiorum amissio, aut deuiatio.

At in metatione castrorum, considerandus est situs loci: forma metationis: materia fortificationis.

In loco spectandum vtrum sit sanus, & ob salubritatem aëris, & ob salubritatem aquarum: Vtrum abundans frumento, pabulo, lignis: & vtrum securus, ob amplitudinem commodam, & ob tenacitatem terræ, ad facienda valla, aut propugnacula.

In forma castrorum spectanda circularitas, quæ est capacissima figura, sed minus fortis ad defendendum: quadrangulus aptissimus ad fortificandum; vel aliqua alia figura situi accomodata, & apta muniri, ita, vt Dux ipse habeat locum præ omnibus securum; pedites aggeribus & propugnaculis vicinum; equites portis proximum, & ad erumpendum aptissimum: munitiones & artifices, medium.

In materia fortificationis ponuntur communissime, stipites arborum, & cespites terræ. Apud Polonos, ex tempore locantur currus in circuitum; & in absentia istorum, consuetudo est Cosachorum, vt circumuenti equites munitionis loco, equos in circuitum caudis & frænis inter se colligant, ipsi verò pedes propugnent.

In præliis denique peragendis, conſiderandum eſt, quid ante prælium; quid in ipſo prælio; & quid denique poſt prælium faciendum. de qua re, toto libro ſexto tractabimus.

C A P V T V I.

De Procurando Numinis auxilio in Bello.

PRiſci Gentiles omnes, copias ſuas domo nuſquam educabant ad bellum, niſi priùs & luſtratas & puras putarent, ſecundum ea, quæ, vel legibus ſacris, ſancita, vel à variis præſcripta habebant, omnem publicæ alicuius maculæ, aut impietatis conſciētiam proijcientes, vt in Mindaro Lacedæmonio, alijsq; teſtatur Xenophon lib. 1. Rer. Græca. & de Tullo Rege, Fabio, Manlio, cæterisq; Liuius lib. 1. Dec. 1. & de Machabæis D. Chryſoſtomus in Pſal. 43. his verbis. *Cum ergo aciem dirigerent, & ſuas animas reducerent, fundebant aduerſarios, non armis ſidentes, ſed loco omnis armaturæ, pugna cauſam ſufficere ducentes. Ad bellum ante euntes, non Tragædias excitabant, non Pæanas canebant, ſicut nonnulli faciunt, ſed Dei ſupremi auxilium inuocabant, vt adeſſet, opem ferret, manum præberet, propter quem bellum gerebant, pro cuius gloria decertarent.* Quod ſi ita Gentiles & Iudæi, multo magis proſectò Chriſtianum Imperatorem decet, educere exercitum reconciliatum Numini Diuino. Theodoſius Imp. hac in parte laudandus eſt maximè, qui bellum aduerſus Eugenium Tyrannum ſumpturus, illud auſpicatus fuerat à precibus, quas per legatos efflagitabat à Ioanne Anachoreta, cuius in futuris rebus explorandis virtutem ſatis perſpectam habebat, vt teſtatur celeberrimus ille Cardinalis Baroniſ. Sed & noſtri Poloni, non niſi ritu Catholico expiati, ad prælium procedere ſolent, ſub protectione Ducis cæleſtium exercituum, Diui Michaëlis Archangeli, certam Confraternitatem obſeruantes; cuius ſedes Leopoli in Ruſſia, apud

pud Fratres Minores. S. Francisci, vulgò de Obseruantia appellatos, habetur; & vt plurimum omnes ferè milites nostri, ieiunium in pane & aqua, singulis diebus Sabbatiuis, in honorem Sospitatricis suæ Diuæ Theorocon peragunt. Maiores autem nostri Hymnum à Diuo Adalberto Apostolo Poloniae & Archiepiscopo Gnesnensi compositum, in eius laudem, ad prælium eundo cantare solebant; atque ita eius iuuamine, hostes suos vincebant. Nostraq; ætate Carolus Chodkieuicius eximius Virginis Mariæ cultor, quoquo die Sabbatiuo, sacrosanctam Synaxim fumere solebat; inq; suo tentorio, quolibet die & Matutinas & Vespertinas preces, ac si in Monasterio ipso, ab iisdem Fratribus Religiosis de Obseruantia, decantari curabat. Qui ad pietatem Imperatoris attenti, aut modulationes sacras aliquas, aut Litanias & orationes pias, tum cum ille pugnaret aduersus hostem, concinnere in more habebant. Consimilem in modum legimus, Ducem Mercurium bello contra immanissimum Christiani nominis hostem, nunquam manum cum eo conferuisse, quin prius copias suas diuino Numini reconciliaret. Idem prodidit, & de Ioanne Tarnouio Supremo exercituum Regni Poloniae Duce, magnæ facundiæ vir Stanislaus Orechouius. Sed & nuperrimè, cum Smolenscum à centum triginta millibus Moschorum, & aliorum transmarinorum populorum obsideretur, strenuæ virtutis & immortalis memoriæ Vir Woiewodzki, cui urbis defensio commissæ fuerat, nusquam diem omisit, qua Sacrum Missæ officium non audiret, nusquam vel ex muris propugnabat, vel facta excursionem, manus cum hostibus conferebat, nisi prius in templis Litanis sacræ & preces decantari incæpissent. Atque ita diuino semper adiutus auxilio, velut pecora absque omnium suorum damno occidebat: quamuis ad defensionem tantæ urbis, quæ tribus & quadraginta propugnaculis munita est, vix cum ciuib; seu oppidanis quinque millia hominum haberet; nihilominus tamen septem in locis muro ab hostibus aperto,

aperto, urbem concreditam sibi, usque in aduentum Sere-
nissimi Regis Vladislai. IV. fortiter seruauit. Futurus ex-
emplo urbium Præfectis, & bellorum moderatoribus, non
in Polonia solum sed in toto Orbe Christiano, tum ob eximi-
am pietatem, tum ob egregiam fortitudinem & fidem: nam
& hæc in viro Nobili muneribus ab hoste, & magnis pollici-
tationibus tentata fuit. Rectè igitur Dio Halicarnasseus.
*Neque certamen seu prælium in bello, nec aliud quippiam maio-
ris momenti, aut periculi in bello, vel pace, ante inuocatum Dei
Numen est à Principe, vel à Duce certandum* quod omnia se-
cundum voluntatem illius, non verò ad arbitrium nostrum
fiant. Et iustitia quidem duce, bella suscipere Principes, &
prudencia comite gerere possunt, at exitus illorum in fortu-
næ arbitrio, non in viribus, neque in calliditate consistit.
Propterea veteri instituto Romani Duces, suscepta expediti-
one celebri, mox aliquid memorabile Romæ se facturos in
honorem Deorum suorum solebant promittere: quemad-
modum M. Furius Camillus, contra Faliscos & Capenates
mouens, splendida Dijs Romæ sacrificia fecit, & si victor re-
uerteretur, Aedem se conditurum amplissimam vouit. Et
victor reuersus, non modò templum quod vouerat condi-
dit, sed omnibus etiam quæ de præda & triumpho ipsi obti-
gerant, opibus illud locupletauit. Cumq; nonnulli obnite-
rentur Duces, animum Dijs consecrare, pecunias verò mili-
tibus diuidere oportere dictitantes. Ego inquit vt homo v-
nicum à Dijs triumphum petij, ipsi verò, vt Dij, multos mihi
dederunt: quamobrem iustum mihi videtur, vt si in pro-
mittendo parcus fui, in præstandis promissis largus sim. Vt
enim ego gratias illis immortales pro multis, quæ mihi supra
votum dederunt egi, sic longè ipsis gratissimum erit, quic-
quid ultra promissum dedi. Id quod satis etiam nunc Hæ-
retici ipsi intellexerunt, qui Catholicas nostras ceremonias
aspernantur. Nam licet diuersarum inter se opinionum
sint, nec quidquam, de bonis operibus, ad implorandam
cæle-

cælestem gratiam sentiant, Traiectum tamen aliasq; Brabantiae vrbes sub Rege Hispaniarum oppugnaturi, ieiunia & preces triduanas in omnibus Confoederatis Prouincijs indixerant, priusquam in campum mouissent; reuersiq; victores, cum vbique palsim, tum Hagæ præcipuè condignas Deo grates publicis supplicationibus edictis referebant. Quos simili Numinis conciliatu, paulò remotiore ætate Dux ALBANVS deuicerat: is LVDOVICI Nassouij castra ad Geringam in Frisia Orientali aggressurus, iusserat LOPESIVM Figueroam periculi ac belli summam attentare, inuadereq; tormentorum hostilium suggestum (nam & situ, & ingenio ita munita Nassouij castra fuerant, vt infinitum planè exercitum contemnere tutò possent. Vnde miraculo similis ea victoria fuerat, Priusq; Quinti Pontificis precibus à Deo impetrata dicebatur) stratus ille cum sua cohorte humi, ad Deum preces primo fudit, Deiq; Matrem in auxilium euocauit, atque ita per cœnum ac paludes enisus, viam reliquis cohortibus Hispanicis aperuit, insignemq; illam de Hæreticis victoriam peperit, ad quam humana vi comparandam non defuisse quoque victricem illam opem è cœlo solita Hispanorum pietas testatur. Verumenimuerò & ad priscam militiam in officio continendam, magnum erat momentum religio, priusquam Euangelij lux illuxisset Orbi, tum iuramentum quoque à militibus præstitum, cum in bellum ducerentur. Nam quicquid errassent, non tantum ea quæ ab hominibus metuenda, sed etiam quæ à Dijs iratis extimescenda essent, ipsis ob oculos ponebantur; quæ quidem res, præsertim si Numina intermischerentur, sæpius priscorum temporum Ducibus ad victoriam facilem viam aperuere. Atque idem præstarent quoque hætenus, si religio cordi esset, atque obseruaretur: maximè si miles sacramento obstrictus, desisteret exscoriare miseros agrestes, dedisceret spoliare Tempia Deo dicata, Clerum non vexaret angarijs, non violaret virgines sacratas, non prædaretur in agris suis; sed stipendio contentus, spolijs viueret de hoste. C CA.

CAPVT VII.

De Apparatu Belli.

QVia non ſtatim vel cum iuſta cauſa ſeſe offert deſcendere licet in Martium hunc campum, ideo deliberatione prius opus, eaq; lenta; poſtmodum apparatu, Virorum, Armorum, Annonæ & Pecuniarum: tandem conſilio prudenti & occasione commoda. Nam ſcire debet Imperator omne bellum ſumi facile, cæterum ægerrimè deſinere: nec in eiufdem poteſtate initium & finem eſſe. Iam autem finis belli iuſtus eſſe non poteſt, niſi cum illud ſuſcipitur propriè propter tranquillitatem ſubditorum, aut tutelam ſociorum noſtrorum. Sunt enim iniqua illa omnia bella, quibus ambitio & auaritia cauſæ; hoc eſt, profunda cupido imperij & diuitiarum: quod in magnis animis ingenijsq; plerumque contingit, quibus pulchrum videtur ex omni occasione quærere triumphum. Quia igitur belli itidem ſicut & pacis ſua iura ſunt, iuſteq; ea non minus quàm fortiter gerere oportet; ea propter in ſuſcipiendo eo, duo hæc ſerio obſeruanda ſunt; vt iniuſtitia omnis, & temeritas, ab eo abſint: quia & temere in acie verſari, & nulla iuſta habita cauſa, manu cum hoſte conſigere, immane quiddam & belluarum ſimile eſt. Et propterea ſi ſapit Imperator, quidquid præter opinionem euenire in bello poteſt, priuſquam ingrediatur conſideret, & tempeſtiuè militem exerceat, conſilium bellicum conſtituat, occaſioni ſit intentus, pacem cum alijs vicinis conſtituat, amicitias Principum potentiorum, & urbium munitiorum ante bellum ſuſceptum maturè conciliet, exploratores in terram hoſtilem dimittat, ſeditiones & diſcordias inter aduerſarios concitet. Arma omnis generis, & machinas bellicas præparet, mæchanicos undique ad ſe conuocet ingenioſos, pontes, naues, trabes, ligones, ſeras, catenas, reſtes, currus, equos, aurigas, inſtrumentaq; vniuerſa bellica paret. Commeatum, pabulumq; in hor-

reis

reis habeat, sicq; disponat ut facile ad castra sua, siue terra, siue aqua conduci queat. Maximè verò vim pecuniarum in stipendia, speculatores, urbium proditores, & corruptionem mercenariorum, si qui apud aduersarios merebunt, inq; varios euentus belli, tempestiue colligat: quia nusquam minùs quàm in bello euentus respondent; & ut Linius inquit, simul parta, ac sperata decora, vnius horæ fortuna euertere potest. Vtergo profligatum exercitum, amissaq; castra, subito, priusquam hostis animum in te sumat, restaurare possis, omnia ad bellum necessaria, antequam arma moueas, præpara. Et hoc illud est, quod Cicero dicit. *Felix ciuitas, quæ tempore pacis prouidet bella.* Sed de his requisitis, paulò infra, singulis capitibus.

CAPVT VIII.

De Praeuatione in Bello.

POSTquam omnia necessaria paraueris ad bellum, haberisq; iustam causam mouendi arma in hostem, is *præcipuus modus bellandi erit, habere inimicum longè à tuis prouinciis, & non expectare eum domi suæ, sed præuenire priusquam ille intruxerit exercitum suum, & in suo regno eum oppugnare.* Ita fecit CAROLVS Sudermanus nostra ætate, qui factus à SIGISMUNDO III. Poloniæ Rege in Suecia Gubernator, ut ausus est Regni diadema, modo illicito, capiti suo imponere, ita non expectato in Suecia SIGISMUNDO, qui Regnum sibi debitum minimè pateretur eripi à Patruo, magno animo in Liuoniam traiecit, & SIGISMUNDVM nil minus, quàm in Regno Poloniæ sibi inferri bellum, cogitantem, imparatum aggressus est, & prouinciam occupauit vacuam præsidijs, securam pacis, & prorsus inualidam ad resistendum sibi. Atque ita bellum trans mare gerens, Sueciæ Regno in pace fruebatur, sicut deinceps & filius eius GVSTAVVS ADOLPHVS, qui postquam intellexisset Polonos legem tulisse, ut sit libe-

rum Regi SIGISMUNDO bellum in Sueciam parare, eòq; vel filium suum, vel Ducem aliquem è portu Dantiscano mittere; præoccupare statuit, & belli sedem in Prussiam transtulit, vt Suecia sua securè frueretur. Effecitq; præuentione ista, vt & militem ex prouincijs nostris, & annonam, & pecunias haberet, nostrisq; rebus omnibus, contra nos in bello vteretur. Sed hoc idem faciebant quoque olim & Romani: obseruantq; modo Turcæ; illi, edocti suo damno ab Annibale, qui in Italiam insperatè per Alpes intrauerat: isti, à Tamerlane Scytha, cui obuiam ad fines Armeniæ ire, indigna res videbatur, quòd nimium suæ potentix fiderent Scytham posse maiorem illis exercitum habere. Cum autem præuenis aduersarium tuum, & bellum in eius prouincias inferis, hæc præcipua commoda assequeris. *Primo* redivisum eum priuas, quos inde habere poterat; nam vel dissipantur incolæ inde ob metum belli, vel inclusi vrbibus sedent, nullum tamen Principi suo tributum iam soluunt, sed de parato spendere in proprios vsus tenentur, vt vitam solummodò seruent. *Secundo* priuas eum commeatu, quem tu inde pro tuis militibus habere poteris, tempestiuè omnia in vrbes conducendo. Ita fecerat GUSTAVVS in Liuania, dum nos bello Turcico occuparemur, & postea conuersi in eum debebamus commeatum procul ex Lituania nostris militibus conducere, cum ille occupata prouincia vacua præsidio, commeatum omnem in vrbes comportasset. Cumq; bellum deinceps inopinatò in Prussiam transtulisset, nos similiter commeatum ex Polonia Vandalo secundo demittere nostris exercitibus cogebamur. *Tertio* Præoccupata prouincia florem iuventutis illius in militiam assumes, exaugelq; exercitum tuum. *Quarto*. per incolas prouinciæ illius trahes ad te alios ex alijs prouincijs; præsertim si non sunt contenti regimine Principis sui. Ita faciebat vbique GUSTAVVS, cum & Polonos tarde consulentes, & Imperatorem moras neccentem semper præueniret bello, qui exiguas suas copias, i-

ta auxerat flore Germaniæ, ut pro eo, duodecim Duces, diuersis in locis, bellum simul gererent. Quia & loca munitiora partim per prodicionem, partim armis occupauerat; & ubi opus fuerat passus omnes maturè præcluserat atque muniuerat; & Regum populorumq; diuersorum potentiam in societatem belli attraxerat, more GENSERICI Regis Vandalorum, qui cum à BASILIO Patritio fuisset profligatus, ne ei quid peius accidisset, persuaferat Ostrogottis, Vissogottis, atq; etiam Bulgaris, ut alijs à partibus vnâ secum Imperium Romanum inuaderent, cui deinceps tali societate per longum tempus grauis fuerat.

Itaque priusquam bellum aggrediaris, considerandæ tibi sunt causæ, quæ te ad id impellunt, ut præuenias: tum tuæ & aduersarij vires; quæ potissimum consistunt, tum in amicitia & fœderibus aliorum Principum; tum in re pecuniaria, quæ iuxta vetus verbum, belli neruus est; tum deniq; circumstantiæ attendendæ sunt loci temporisq;, ut nimirum inquiras quomodo aditum tibi parare queas ad hostes, & quorum populorum beneuolentia; tum quanto tempore bellum sit duraturum, ne quod CLEOMENI Lacedæmoniorum, & ANTIGONO Macedonum Regi accidit, tibi eueniat, qui quod minùs ad has circumstantias attenderunt, non tam hostem oppugnarunt, quam in se concitarunt, maxima cum suorum strage & calamitate. Quod ipsum acciderat quoque GVLIELMO Orangio, qui ingenti cum exercitu contra Hispanos in Germania collecto, ita inopinatò Mosam traiecerat propè Ruremundam, quo ALBANVM præuenire posset ad Traiectum hærentem, ut ALBANVS Burlamontium renunciantem transisse iam hostes, interrogauerit. *Num putaret hostiũ aciem, phalangem animum esse, quæ Mosam transuolasset?* quia tamen in Brabantia nullius vrbs amicitiam sibi conciliauerat, nullos ex incolis ad belli societatem traxerat, subsistere idcirco haud poterat, & facilè ab Albano usque in Galliam eiectus fuerat; cum quo iusto prælio decerta-

re, licet maioribus copijs, non audebat, eo quod causæ suæ non fideret. Tunc enim exercitui contra hostes socius bellorum Deus est, cum ob iustam & legitimam causam suscipiuntur: ipsiq; milites in adeundis periculis promptiores erunt, cum manifestè scient æquiritatis ratione sumpta esse arma. Postquam enim perspexerint, se iniuriam non inferre, verum illatam propulsare, nullius impietatis conscij absoluta cum virtute, excelsoq; animo, militiæ sese vtrò dabunt. Ideoq; quotquot arbitrantur, diuinum numen ijs non succensere, qui bellum iniuste mouent, vel solum ista persuasione, etsi nihil ab hostibus scæuum sæuumq; obtigerit, metu solliciti pauent semper ac formidant. Expertus hoc GUSTAVVS, cum Prussiam intrasset, etsi nullum ibi militem Polonum esse sciebat, ab omnibus artamen sciscitabatur, cum è navibus exscenderet, Num aliquo in loco sint, aut in vicinia scriberentur hastati Poloni, quos vulgò Hussaros dicimus. Idem milites ipsius. Quippè facile credebant belli eventum, etsi in præuentione, nequaquam ei fælicem fore, à quo militat mala, & ambitiosa causa. Persæpè autem nonnulli arma mouent non mouenda, aut ira, odieuse incensi; aut prosperitatis alienæ inuidia instigatis communissimè autem cupiditatis causa. Verè Mithridates scripserat Arsaci, apud Romanos vnam, & eam veterem causam bellandi esse, profundam cupidinem Imperij & diuitiarum; adeò, vt libidinem dominandi causam belli habeant, & maximam gloriam in maximo imperio putent. Et cum omnium armis impares forent, virtuti dolum coniunxerunt, vt Orbem possiderent. Eos igitur quos vel auctoritate, vel opibus præualere, vel seruitio promptiores esse notauerant, socios & amicos vocarunt, vt tam specioso nomine ijs imponerent, eorumq; opera in expugnandis alijs vterentur. Cum interim idem incumberet seruitutis iugum à solo tributorum onere exemptis, & ad Romanorum arbitrium, etiam in amicissimos arma vertere cogarentur. Sic in Italia primùm, postea in Gallia,

lia, Hispania, Græcia etc. socios aliquos & confœderatos habuere, quorum viribus vicinos illis populos, non tantum expugnauere, sed & expugnatos continuerunt in fide, cum in perpetua quasi statione, pro Romanis contra affines, & gentiles suos excubarent. Hocq; pacto armorum suorum iniustitiam cautè celabant, cum non effrœni libidine imperandi, sed enormi aliqua iniuria accensi, bellum mouere viderentur, qui non in omnes sæuissent promiscuè, sed in aliquos: illiq; quibus parcebant, facilè sibi sinerent persuaderi, non tam ferro, quàm æquitate armari Romanos. Eodem astu utebantur Ottomanī, cum Bulgaros, Valachos, Moldauos, Hungaros atque Transylvanos sub tutelam suam accepissent. Eodem quoque cæperat vti GUSTAVVS, cum Germaniam in libertatem diceret se velle asserere, & omnibus ciuitatibus liberis, quæ eum velut seruatorem suum recipiebant, præsidia sua imponeret, castella in coercionem plebis urbanæ erigeret, à confœderatis Principibus pignoris loco munitiores arces etiam minis & vi, extorqueret, pecuniam vaserrimus impostor emungeret, omnes autem præuentione opprimeret, ac celeritate insperata. Non aduerterunt istud suum malum Hæretici, temeritate & pertinacia in Cæsarem occæcati, nisi tum cum ille periisset, & Duces illius, omnia ab eo possessa, sua esse dixissent.

C A P V T IX.

De Preparatione pecunie ad Bellum.

Apparatus belli vocatur, res necessariæ ad omnem usum belli, vti hæc sunt tria præcipuè, Pecunia, Commeatus, & Arma. Nam de viris alio dicemus. Hæc igitur tria, nisi iam ante, & ex præparato habes, frustra cogites de bello: nam in ipso bello hæc parare incommodum sanè, aut seruum. Imo odiosum, inquit Suada Belgica, & periculosum, quia violent-

violentia adhibetur in collationibus, maximè verò vectigalium & tributorum. Iam autem ut homines sine neruis ambulare non possunt, ita nec bellum sine pecunijs vsquam progredi potest: hæ motum, hæ spiritus vitales, hæ animam illi dant, & plerasque belli res nonnisi consilio & vi pecuniarum confici scias; alias absque ipsis arma etiam ipsa inualida esse puta. Verè Thucydides & prudenter. *Bellum non est in armis maximè, sed in expensis, & sumptibus, per quos efficacia arma redduntur: Itaque prouido Imperatori, antequam inchoetur bellum, de copijs expensisq; sollicitus debet esse tractatus.* Alias, aut bellum suscipere non oportet, inquit App. Claudius, aut gerere pro dignitate, & perficere quàm primum oportet. Et PHILIPPO Macedoni oraculum datum erat. Omnia eum vincere posse, si argenteis hastis pugnaret.

Bellum igitur orsurus Princeps, necesse est ut habeat pecuniam paratam, nec tum demum tributa imponat atque exactiones, cum iam hostis terram eius intrauerit: quia sic tardè accumulabit pecuniam, & vix poterit eam habere, armis vbique strepentibus. Siquidem tunc mercatura & negociatio omnis cessat, nulla telonia fiunt, nulla portoria soluuntur, nulla vectigalia imponuntur: & miseri prouinciales, tam à tuis militibus, quàm ab hoste oppressi, non habebunt unde exactiones persoluant. Hinc neruos Imperij, inquit DIO, pecuniam esse clamat VESPASIANVS. quod, ne dissoluetur absque hisce neruis, AVGVSTVS Cæsar, ut scribit SVETONIVS, separatum habebat ærarium militare, ut perpetuò, ac sine difficultate sumptus adtuendos limites suppeteret. Similiter SIGISMVNDVS I. Rex Poloniæ, assiduas excursions barbarorum in Russiæ prouincias considerans, constituit ærarium militare ex prouentibus suis, locumq; deputauit Rauæ in Masouia, ut ea pecunia perpetuò in limitibus Regni miles excubaret, qui hodiedum durat, & stipendia sua, absque alijs vectigalibus Reipublicæ, percipit. Turca quoque similem in usum, habet separatum ærarium, ut
dum

dum bellum inopinatè parte ab aliqua ingruit, statim ad reprimendum hostem ea pecunia militem submittere possit, donec exacta maiore pecunia à subditis, maiorem quoque eò exercitum mittat. Nam qui paratam pecuniam non habet, tempus in illo perdit, & occasionem victoriæ omittit; milites inobedientes habet, & rebus ferè infectis regreditur è bello, & aut pacem iniquis conditionibus impetrat, aut proventus suos militibus inter se confæderatis oppignorat, aut denique ab aduersario suo bello opprimitur.

Quia igitur neque quies gentium sine armis, neque arma sine stipendijs, neque stipendia sine tributis haberi possunt; ideo Princeps prouideat primo de pecunijs, antequam arma sumet; & Dux ab eo exercitui præpositus tempestiuè eum sollicitet de stipendijs & necessarijs ad bellum, ne fortè ob assiduos defectus, & non exsoluta stipendia, militem seditiosum & inobedientem habeat, atque ita deferatur ab illis, uti GEORGIVS Brandenburgicus, qui regnante Augusto in Polonia, exercitum in Prussiam duxerat, & postea vix decem suis comitantibus, Vestula non superata domum redierat: aut machinas, instrumentaq; belli non habens, inglorius ad Principem suum reuertetur, ut sæpiùs Baisis Turcarum accidit, qui ad terrorem solummodò sæpiùs contra nos, absque villo apparatu, belli, mittuntur. Dum autem pecuniam habet, caueat ne eam in sumptus vanos expendat, sed in necessarios tantum; neque eam donet personis inutilibus, qui operam tantummodò suam verbis pollicentur, re autem ipsa nihil præstant; sed ijs tantum qui bello promouendo, aut iuvando sunt apti. Hinc ALEXANDER Seuerus dicere solebat, *Malum pupillum esse Imperatorem, qui ex visceribus provinciarum homines non necessarios, nec Reipublicæ utiles pasceret.* & TIBERIUS. *Ærarium si ambitione exhauserimus, per scelera replendum erit.* bello præsertim reposcente sumptus diuersos. Quod considerans IACOBVS Triultius, peritissimus bellorum Dux, *tria requiri ad bellum*, dicebat. Primo.

D

pecu-

pecuniam. Secundo. *pecuniam.* Tertio. *pecuniam*, ad soluendum videlicet stipendia; ad comparandum instrumenta belli varia, & arma; ad soluendum exploratoribus, conductoribus, artificibus, Geometris, nautis, alijsq; vtilibus personis ad consequendam victoriam, & obtinendum finem belli. Quapropter non est confidendum in thesauro reposito, Sed omnibus ex partibus quærendum est à socijs & amicis subsidium; quia quilibet thesaurus limitatus est, & exhauritur facile; expensa autem bellica non habent limitationem & finem. Quare nisi te confœderati populi, ordinarij redditus, & facultates priuatorum assiduò iuuerint, sicut moris fuerat apud veteres Romanos; nunc verò apud Polonos, qui priuatis suis sumptibus maiorem ferè partem bellorum, quam publicum ærarium conficiunt; exhaurietur citò quicquid longo tempore congregatum fuit, vti experientia, etiam in ordinatissimis Rebus pub. testis est.

C A P V T X.

De Apparatu commeatum ad Bellum.

PRiùs est parare bellum, quàm exercere, inquit QVINTILIANVS: & inter apparatus reliquos, primùm diximus curandam esse pecuniam, quæ est spiritus vitalis belli; deinde Annonam, sine qua non dicam vincere non est, sed nec vivere. Nam qui frumentum, necessariumq; commeatum non præparat, vincitur sine ferro. *Et reliquis casibus*, inquit idem VEGETIVS, *potest in tempore subueniri; pabulatio & annona in necessitate non habent remedium, nisi ante condita.* Paranda igitur ea, & quidem in vsum duplicem. Militum, & Præsidiorum. Illi, dum in agmine & castris sunt, ne egeant, vt nuper accidit exercitibus Cæsareis in Burgundia, Gallicis in Brabantia, Polonicis in Valachia ad Chotimiam, & in Moscua ad Smolenscum. Ista, vt aduersus moras obsidionis annu-

annuis copijs firmentur, & non faciant deditioem fame co-
acti. Vnde culpae libet hodiernam incuriam, quòd & mu-
nitiones fortissimæ non sint annona prouisæ, in confinijs
præsertim, & bellodurante: *Et in castris passim, ut inquit LAM-*
PRIDIVS, mendicitas ad omnem desperationem vocat armatos.

In omni expeditione itaque curet Imperator, ut ei suffi-
ciat, victus, hostes frangat inopia, sic enim eum facillimè de-
bellabit. Prudenter ideo COLIGNIVS Franciæ Architha-
lassus, in conscribendo exercitu, à ventre incipiendum esse, id
est, de com meatu prius prouidendum dicebat: quia *perdiffici-*
le est, ut habet PLVTARCHVS in CATONE, ventri verba fa-
cere, nam os habet, aures non habet. Prius igitur quàm incho-
auerit bellum Imperator, pabula & frumentum, cæterasq;
annonarias species, maturè præparet, & in opportunis ad
rem gerendam, ac munitissimis locis conseruet. Quas verò
vrbes, aut munitiones putat posse ab hoste obsideri, in eis
amplior semper modus, quàm sufficit, aggregetur. Fre-
quenter enim necessitas geminatur, & obsidio sæpè fit lon-
gior, quàm putatur. Quare monendi vrgendiq; sunt pro-
uinciales, ut ante irruptionem hostium, seq; & sua mœnibus
condant, ne hostis quidpiam ad victum suum occupet, &
com meatu prouisus circumscindere non desinat, quos fame
sperat esse vincendos. Ita fecerat STEPHANVS Moldaviæ
Palatinus, Cum BAI AZETES II. arma in eum mouisset. vi-
ctum omnem in sylvas densissimas & rupes præruptas com-
portauerat, ne ab hostibus inueniri, aut capi possit; gramina
autem omnia in campis incipiens à Danubio vsque ad Ty-
ram igni consumpserat, ut Turcas pabulo priuaret, qui ma-
ximè equitatu pollent. Atque ita barbari rebus infectis ad
sua recesserant, quamuis numerosissimo cum exercitu venis-
sent in Valachiam, amissis pluribus de exercitu, qui comme-
atum quærentes vagabundi & dispersi, passim à Valachis
occidebantur. Disciplinam etenim non potest seruare ieiu-
nus exercitus, & ut ALEXANDER Imperator dicebat. *Mi-*

les non timet, nisi vestitus, armatus, calceatus, & satur, & habens aliquid in zonula. Galli quoque omnes segetes corruperant in campis, cum CAROLVS V. Imp. intrasset in Provinciam, & sic Hispanos fame valde affligerant. Vnde XENOPHON inquit, *non minus est boni ducis providere de com meatu militibus, quam tempore praelij prudenter aciem disponere.* Et ALEXANDER quidem Magnus in aciebus disponendis felicissimus fuit, in facienda verò prouisione victualium, non item cautus erat: nam cum siti totum penè exercitum in Susitana regione perdidisset, vix non amisit reliquum fame in India, ita vt de illo CVRTIVS dicat *Rex dolore simul ac pudore anxius, quia causa tantæ cladis ipse esset.* Igitur inter cætera, hyeme lignorum & pabuli, æstate aquarum vitanda est difficultas: frumenti verò potus & salis, omni tempore necessitas declinanda. Sed præcipuè cauendum est Imperatori, ne aduersariorum dolo, atque periurijs decipiatur provincialium incauta simplicitas, dum aut inducias simulant, aut te in loca deserta deducunt, qui nullam tecum prouisionem annuariam habes. Iam autem frequentius conventionum pacisq; simulatio credulis quam arma nocuerunt. Ideo COSMVS Medices videns dominium suum ita à natura montibus esse cinctum, vt eò com meatus non possit importari, nisi à parte illa, qua cum statu Ecclesiæ confinatur, curabat semper sibi amicos Pontifices Romanos fieri, ne tempore belli rei frumentariæ penuria laboraret. Ne autem ab alijs partibus aliquis intrando caperet victualia, aut corrumpet com meatus subditorum illius, statuit, vt quilibet frumentum suum ad munitiones asseruatum inferret: vnde licet inimicus ingressus fuerit in Imperium illius, non habens pabula & com meatus fame ipsa pelleretur inde.

Sed nec satis est, vt com meatum Imperator sub manu habeat, nisi manu vtatur restricta in dispensando, ne in eam reprehensionem incidat, quam subierunt M. LVPERCVS & N. RVFVS, paucis diebus absumptis, quæ aduersus necessita-

sita-

fitates in longum suffecissent. Aliarum siquidem rerum ad bellum spectantium matura prouisio est necessaria ad vincendum, sed panis est necessarius ad viuendum: proinde Dux belli primam curam habeat annonæ, eamq; tempestiuè comportatam parca manu distribuat, quia aliter, ante tempus illa consumpta, nihil etiam potentissimo exercitu efficiet. IULIUS Cæsar inter omnes qui in Orbe celebres fuerunt bellatores, hac in parte præcipuus fuit, nullamq; aliam rem maiore cum cura, aut prouidebat, aut dispensabat, quam rem frumentariam. Et cum ista sola diligentia inquit HISTORICVS, debellauit Gallias, quæ sanè inuincibiles fuerant. Cumq; Vercingentoriges sese inclusisset Alexiæ, cum octuaginta millibus armatorum, ille sciens quanto com meatu indigeret tantus exercitus, Alexiam vallo circumdedit, seq; à tergo similiter muniuit, ne à ferentibus suis suppetias vinceretur, benè sibi de com meatu & pabulo prouidit: & quamuis ducenta millia Gallorum à tergo eum oppugnassent, expugnari tamen nullo modo potuit, sed hos ferro, illos fame debellauit. Quid enim refert habere omnium necessariorum in bello & militis copiam, si panem non habeas? tum omnino, aut expeditionem omittere debes, aut aduersario tuo deditionem facere. Quapropter Romani per prouincias hunc in casum, vbique locis commodis & munitis habebant promptuaria plena omni frumento, carnibus, sale, & aceto; vnde vel nauibus, vel curribus subuehebant in castra, vel munitiones. Similiter faciebant in suo Regno Reges Peruani, licet pace fruerentur longissima. Faciunt modò & Veneti, & Hollandi, & omnes ferè ciuitates liberæ in Imperio, sed præcipuè Moscouitæ.

C A P V T X I.

De Apparatu Armorum.

Tertia præparatio ad bellum necessaria est Armorum, vt nimirum Armamentarium aliquod Princeps habe-

at, in quo ad certum numerum peditum, equitumq; tela & arma asseruentur. Itemq; tormenta, machinæ, pontes, funes, puluis, & quæ talia iuuandis viribus, hæc, aut prior ætas inuenit. Addo naues, & instrumentum omne nauticum, si regio eius maritima & portuosa. Nam subito ista ægrè parantur: & semel parata, non solum in bellum valent, sed ne sit bellum. Hinc LAMPRIDIVS inquit. *Nemo prouocare aude, aut facere iniuriam ei regno aut populo, quem intelligit expeditum atque promptum ad vindicandum.* Ergo qui desiderat pacem, præparet bellum, iuxta illud Ciceronis, *Felix illa ciuitas, quæ tempore pacis prouidet bella.* Et Dux belli à Principe suo ad expeditionem aliquam designatus, imprimis curet, ut sui milites armis, tam offensiuis, quam defensiuis optimè sint instructi: quæ Princeps tempestiuè præparet, & conseruet in loco tali, aptè ædificato, vnde facile possit in omnes regni sui partes deducere, grauiores præsertim machinas & instrumenta, quæ vel oppugnatio alicuius fortis loci, aut defensio requirit: tum quæ terrestri & nauali bello faciendo sunt pernecessaria. Nam tum temporis ea procurare, cum hostis contra te arma iam sumplerit, aut prouincias tuas intrauerit, est nimis tardè & periculosum. Quapropter veteres illi Athenienses habebant armamentarium semper plenum bellicis instrumentis in portu Leonis, quo corrupta usu diuturno arma, ad reficiendum remittebant, nouaq; statim per aquam Ducibus belli subministrabant, quotiescunque necessitas exigebat; aut non sufficiebant armamentaria minutiora, in confinijs Imperij, aut prouinciæ illius, in qua bellum gerebatur, opportunè posita. Itaque quoque Ægypti Reges, omnia bello necessaria instrumenta asseruabant in Alexandria. Reges Siciliæ, Syracusæ. Hispanus Barcellonæ. Turca Constantinopoli. Veneti in Candia, & Veronæ, minutiora: principalissimum autem, & ferè ad miraculum omnibus rebus instructissimum armamentarium habent Venetij. Duces Saxonie, Dresdæ. Et quælibet ferè ciuitas

in Germania, est benè prouisa de armis & munitionibus: inter quas vix non primatum habet ea in parte Dantiscum in Prussia, maximum numerum diuersorum artificum continens, qui breui tempore possent armare, vel maximum exercitum. Sed præcipuè hac in re valent istæ duæ ciuitates Italix, Mediolanum & Neapolis; vbi tanta copia rerum omnium, & materiæ armandorum militum, & tantus numerus artificum, vt integra regna vix ea præstare possent, quæ istæ duæ ciuitates paucissimis diebus præstarent, si modò liberalitas in præmiando accessisset. Quare LIVIVS eò impendi laborem dicit, ac periculum, vnde emolumentum atque honos speretur. Nihil non aggressuros homines, si magna conatis, magna præmia proponantur. Magnosq; ac ingeniosos homines fieri, magnis honoribus atque præmijs, experientia toties docuit. Vnde & Imperator belli, si magnus fieri rebus gestis exoptat, magnos ingenio & animo ad se homines euocet, armaq; prouideat tempestiuè; quæ, vel in qualitate considerantur, pro vsu nimirum, & genere belli: vel in quantitate, quæ tanta sit, vt pro diuersis casibus & cladibus, identidem miles armari, & bellum renouari queat.

CAPVT XII.

De Apparatu Virorum.

PRinceps bellum moturus, considerare debet, quali populo regnet, molli & delicato; an rudi, & ad bella gerenda prompto. Nam etsi manifesto constet, omnibus in locis, & ignauos, & strenuos nasci, tamen & hoc negare non possumus, quòd gens gentem præcedit, vel in fortitudine, vel in astu, cum ad prælia venit: & plaga cæli non ad robur corporum tantum, sed etiam animorum plurimum valet. Vnde Australes acutiores sunt ingenio, sed minùs audaces: Septentrionales cominùs congregi non abnuunt, sed minus
pru-

prudentia in rebus bellicis pollent. Igitur Princeps quam aptissimos eligat, tempestiuè in armis exerceat, prudenter in classes distribuat, strenuos Duces & experientia bellica illustres præficiat, & domesticum potius quam mercenarium militem habeat. Ab his autem qui tyrones probant & deligunt, in omnibus quidem staturæ magnitudinem, corporis robur, alacritatem animi, & agilitatem membrorum conuenit explorari, sed in quibusdam, linguarum peritia, litterarum cognitio, computandiq; vsus exigendus est, licet ad arma ferenda minus fuerint apti, vt alij speculatum ad hostes possent mitti; alij militarium numerorum, siue pecuniæ & rationum, curam diligentem habere; alij rem annonariam dispensare & in breuib; annotare; alij iudicijs præesse & animaduertere ne quis contra iustitiam prægrauetur in excubijs & angarijs; aut alicui præstetur immunitas contra leges militiae. Quod totum mercenarijs committere, alienigenis præsertim, non est securum, melius præstabunt subditi & naturales, si exercitentur. Et exercitantur quidem cum labore, præcipuè, in populo rudi, & apud quos vigentibus pacis officijs, procul aberat bellorum necessitas, tamen cum tempore & diligentia omnia perueniunt ad suam perfectionem: omneq; opus difficile videtur antequam tentes, cæterum si exercitati & prudentes viri delectui præponantur, celeriter manus bellis apta poterit aggregari, & diligenter institui, aptius & commodius quam ex mercenarijs. Sed nunc emunt militem, non legunt; propositaq; pecuniola conueniunt ad strepitum tympani, ignoti inter se, inquit LIPSIVS, ignorantescq; purgamenta vrbium suarum; quibus ob egestatem & flagitia, maxima peccandi necessitudo est: assueti atrocinijs, bellorum insolentes: atque vt vno verbo cum TACITO absoluiam, *quorum lingua vana, manus rapacissima, gula immensa, pedes fugaces, quæq; honestè nominari non possunt, inhonestissima.* Aut si qui melioris notæ inmixti, facile abripiuntur, & velut obducuntur à reliquâ illâ fece.

Duo itaque genera militum scribenda cenſeo. Ordinarios & Suſidarios. *Illos, qui aſſidue & velut ex munere atque arte militent:* quales fuerunt legiones Romanorum diſpoſitæ per confinia Imperij, in Pannonia aduerſus Dacos & Sarmatas; in Gallia Belgica, aduerſus Batauos & Cimbros; ad Rhenum, aduerſus Germanos; ad Tygrim, aduerſus Parthos, & pluribus alijs in locis. Tales quoque in Polonia habentur, qui in finibus Regni contra excuſſiones Tartarorum & Turcarum, perpetuis ſtipendijs aluntur, & qualiber æſtate in caſtris ſub tentorijs manent. *Iſtos, qui rarenter, quiq; domi ſint aliarum rerum.* Tales in Statu Pontificio ſunt, qui ſingulis annis luſtrantur, & ſi qua neceſſitas ingruit, ſubſidio ſtipendiarijs mittuntur. Tales & in ſtatu Veneto habentur, qui agros ſuos colunt, & cum vis belli ingruit, euocantur. In Polonia verò bello edicto, miles ad ſigna mercede euocatur, nobilitas verò totius Regni, ſtato tempore in ſuis prouincijs quiſque armati coram Palatinis comparent, & ſi Reipub. deſiderauerit ſalus, ſequuntur Regem, quocunque iuſſerit. *Priores itaque non multi ſcribantur, ſed formentur aſſidue omni armorum exercitio, diſciplina caſtrorum, uſuq; militiæ, ut ſint velut inuiſta quædam acies, & ipſa plerumque famâ, bella proſpicient.* Sic terrori habentur Ianitzari in Turcia, Nairi in Calecutto, & olim fuerunt Mamaluchi in Ægypto, qui per delectum ſcribebantur, ex Cyrcasijs præcipue aduecti, & à pueritia exercitati. Nunc Nairi meliores ſunt Ianitzaris, quia in agris educantur, & omnes ferè ſunt nobiles; iſti verò in vrbe amœniſſima, & ex plebe promiſcua; & non iam ex Europæis atque Chriſtianis tantum ut olim, ſed iam & ex Aſiaticis & Africanis, & genere Muſulmano. *Posteriores verò ſeu ſuſidarios ut imminente periculo prioribus illis citò in acie iungas; ſiue ut in præſidia diſtribuas oppidorum.*

Vtrique autem, tam Ordinarij quàm Suſidiarij, non paſſim proſectò, aut temere oblatis in militiam ſunt aſſumendi, ſed qui ad laborem & pericula apti. Proinde ſi for-

tem & felicem vis militiam habere, seriâ tibi inquisitione erunt reiiciendi aut capiendi; vti enim diximus, in omnibus locis & ignauos & strenuos contingit nasci, seligantur igitur cum iudicio, & exerceantur vtrique cum diligentia. Nam & populum Romanum nulla alia re videmus sibi Orbem subegisse terrarum, nisi armorum exercitio, disciplina castrorum, & usu militiæ: vnde & Gallorum multitudinem, & Germanorum proceritatem corporum, & Hispanorum numerum & vires, & Aphrorum dolos atque diuitias, & Græcorum denique artes & prudentiam deuicerunt, non alia fanè re, quàm bono ordine, & laborioso conatu; hoc est, solertes tyrones eligendo, ius armorum edocendo, ad famem, sitim, calorem, algorem, variasq; iniurias cœli assuefaciendo, disciplinamq; belli quotidiano exercitio roborando. Vt enim assiduo usu armorum, nascitur insolentia militum, sic longo ocio & pace generatur secordia & abiectio animi; propterea & insolentes frenabant laboribus castrensibus assidu- is, & socordes acuebant ad prælia perpetua meditatione armorum. *Scientia siquidem rei bellicæ, inquit VEGETIVS, dimicandi nutrit audaciam: nemoq; facere metuit, quod se benè didicisse confidit.*

C A P V T X I I I .

De Gerendo Bello.

NOtum fanè omnibus esse arbitror, eorum qui in arte bellica excelluerunt, multos ex Europa, paucos ex Aphrica, pauciores ex Asia prodijisse. Asia habuit NINVM, CYRVVM, ARTAXERXEM, MITHRIDATEM, ISMAELEM SOPHIVM, TAMERLANEM; paucos præterea cum his componendos. Ex Aphrica (omissa antiquitate illa Ægyptiaca) prodierunt IUGVRTHA, MASINISSA, ANNIBAL, MVLASSES, SERIFVS, & aliquot alij Carthagenensium Imperato-

ratores; qui tamen cum Europæis comparati, paucissimi occurrunt, præsertim qui scirent, & bellum gerere, & pugnare, quales in Europa plurimi sanè fuerunt: & si omnium adhuc eorum nomina constarent, Septentrionalium præsertim, quorum res gestas vetustas temporis obliuione sepeliuit, infinitus fuisset cathalogus in sola Sarmatia tantum: quamuis non quilibet eorum censendus fuisset inter eo summates, qui prudenter simul & feliciter bella gesserunt.

Aliud enim est bellum facere, & aliud pugnare: Ad pugnam & prælia facienda optimus erat ANNIBAL, ad bellum gerendum SCIPIO Aphricanus. Namque ANNIBAL in expeditione suscepta contra Romanos quatuor notabiles errores commisit. *Primum* quod obtenta apud Cannas victoria, non iuerit recta Romam, sed per APULIAM, ABRVTIVM, CALABRIAM, SAMNITES, aliasq; Italiæ prouincias duxerit victorem exercitum Capuam. *Secundum errorem* commisit, quod profligatis toties Romanis nescierit vti victoria, contra exhaustos, & animo ad desperationem inclinatos, & non obsederit urbem, reiectus semel tempestatibus cœli ab oppugnatione illius. Vnde VARRO scripsit ad Senatum ANNIBALEM sedere ad Cannas in captiuorum precijs, prædaq; alia æstimanda; victoriam nec victoris animo, nec magni Ducis more metientem; & vt FLORVS dicit. *Cum victoria posset vti, frui maluit.* *Tertium errorem commisit*, quod cum tantam acquisiuisset rebus gestis gloriam & famam, nihil aliud ageret, quàm tempus consumeret, in expugnatione vnius castelli, nomine CASILINI, minimè considerans, quod multa bella impetu valida, per tædia ac moras euauere. Et sic ille cum tempore Romanos effecit animosos & fortes, qui iam abiecto & desperato, vti diximus, animo fuerant, & viribus attritis resistere non poterant. *Quartum denique errorem commisit.* quod præter intentionem suam, necessitate coactus, in aciem aliquoties prodierit contra M. MARCELLVM. TITVM Sempronium, & CLAVDIVM Neronem, à quibus

profligatus fuit, nesciens discernere, qualis fuerit miles ipsius, delicijs Capuanis corruptus, & qualis Romanorum assiduo exercitio, & labore instructus. *Iam autem ille, inquit VEGETIVS, difficile vincitur, qui verè scit de suis, & aduersarij copijs indicare.* Vnde victus a SCIPIONE dixit. *Non praelio modo se, sed bello victum: nec spem salutis alibi, quam in pace impetranda esse.*

Qui igitur bellum gerere cupit, caueat diligenter, ne à tergo, ab alio vicino inuadatur. Ne omnes sumptus belli ipse sustineat, sed iuuetur à confœderatis. Ne militem & annonam totam ex proprijs provincijs, sed etiam ex hostilibus habeat. Ne tempus ocio perdat, sed continuò bellum promoueat. Ne vires in expugnatione minus vtilium castellorum consumat, sed loca principaliora petat. Ne coactus dimicet, sed aduersarium suum necessitate constringat. Ne diu bellum trahat, vt & sumptui parcere possit, & hostes continuis vexationibns efficiat bellicosos. Ne temerè confligat, sed priùs cognita aduersariorum natura: Nam perinde vt hostem validum deprehendet, sic bellum geret, si enim inferiorem, maturabit, si verò superiorem, moram interponet; quod præcipuum Ducis munus esse abundè ostendit SCIPIO Amiratus. Maximè autem videat, vt omnibus rebus ad bellum necessarijs benè instructus procedat, ne in ipso deinde progressu deficiat. Hinc IUSTINVS, laudando hac in parte PHILIPPVM Regem, dicit. *Cui maxime opes erant, instrumenta bellorum.* Sed his, ciuitates etiam nonnullæ modò, nemini Principum cedere videntur: cæterum Principes ipsi, qui bellum gerere possent, aut prudenter scirent, vix à tot sæculis parem GVSTAVO nominabunt, qui & pecunia aliena, & milite non suo, & annona ex hostico prouisa bella tot annis gessit, indies ditiores Sueciam suam præda Germanica faciens, nunquam de suo in militem quidquam elargiens. Quod totum sanè prudenti consilio efficiebat. vnde nos quoque de hoc, capite sequenti agamus.

CAPVT XIV.

De Consilio Bellico.

Periculo atque negotijs compertum est, ingenium in bello plurimum posse; magnosq; Duces plura consilio, quàm vi perfecisse. *Nam sine consilio, inquit Suada Belgica, omnes apparatus fumus, omnesq; viri & milites, funus.* Ideo Cæsar definiit, *Non minus esse Imperatoris consilio superare, quàm gladio.* Et Carthaginenses in crucem tolli Imperatores iuebant, qui sine consilio, etsi alioquin prospero & felici euentu, rem bellicam administraissent. Etenim existimabant, nec fallò, non tam numerofo exercitu, quàm multitudine consiliariorum bellicam rem administrari. Quæ tamen facultas inuentu perrara est in vna eademq; persona, quòd *difficillimum sit*, inquit SALVSTIVS, vt quis *prælio sit strenuus, & bonus consilio: quorum alterum ex prouidentia timorem, alterum ex audacia temeritatem adferre plerumque solet.* Quo adspectu FABIVS dixit. *Bono Imperatori haud magni momenti fortunam esse: mentem rationemq; dominari.*

Præcipua itaque ars & utilitas Ducis est, vt adhibitis ex vniuerso exercitu scientibus belli, & sapientibus viris, de suis & hostium copijs sæpiùs tractet (& quàm plurimum notet) omni adulatione summotâ; vtrum maiorem numerum pugnatorum ipse, an hostes habeant: vtrum ipsius, an aduersariorum homines, magis armati sint & muniti. Qui magis excitati: qui in necessitatibus fortiores. Vtra pars equites, vtra pedites habeat meliores. Qui plures loricas, aut toraces ferreos induerint: qui vtiliores equos adduxerint. Vtrum loca in quibus pugnandum est, inimicis an nobis, videantur commoda: nam si equitatu gaudemus, campos optare debemus: si pedite, loca eligere angusta, fossis, paludibus, vel arboribus impedita, & aliquoties montosa: cui magis victus abundet, quàm desit. Quia fames, vt dicitur, intrinsecus pugnat;

gnat; & vincit sæpiùs sine ferro. Debet itaque qui res magnas tentat, adhibita in consilium ratione, nullis affectibus corrupta, aut præiudicijs occupata, omnia momenta benè considerare, & vires partiũ accuratè nosse, ne errorem committat, qui serâ & inutili pœnitentia emendari non potest.

Inprimis autem considerabit, vtrum protrahi necessitatem expediat, vt faciunt Hispani, an celerius dimicari, vt exoptant Galli. Siquidem nonnulli populi exoptant expeditionem citò posse finiri, vt nostri Poioni; nonnulli volunt bellum longo tempore durare, vt Inferiores Germani. Nonnulli dilata expeditione in longum, penuria macerantur, vt Turcæ, qui nullos currus secum habent & commeatus, nisi quod dorfis Camellorum aut equorum attulerint; cum tamen ordinariè numerosissimos exercitus habere soleant. Nonnulli pluuijs, & frigiditate aëris inficiuntur, vt Germani. Nonnulli desiderio suorum reuocantur ad propria, vt Angli; aut nihil magnum facientes, per desperationem abire compelluntur, vt Hungari. Plurimiq; labore fracti & tædio, expeditiones suas deferunt, etiam fortissimis ex populis collecti; plurimi patriam suam produnt; plurimiq; sese hostibus dedunt. quia *aduersis rebus rarior fides est, & nudari incipit, qui copiosus aduenerat.*

Item pertinet nosse, qualis ipse aduersarius, vel eius comites optimatesq; sint, vtrum temerarij, an cauti; an audaces, an timidi; & scientes artem bellicam, an ex vlu temere pugnantes: quæ gentes cum his fortes, quæ ignauæ pugauerint. Nostra auxilia cuius fidei, qualiumq; sint virium: quos illius copix animos, quos habeat noster exercitus; quæ pars sibi magis victoriam promittat. Eiusmodi enim cogitationibus virtus augetur, aut frangitur; desperantibus autem crescit audacia adhortatione Ducis: etsi nihil ipse timere videatur, crescit animus, si ex insidijs, vel occasione aliquid fortiter fecerit; si hostibus aduersæ res cæperint euenire; si vel infirmiores, aut minus armatos ex inimicis potuerit superare.

re. Hinc Q. CURTIUS de ALEXANDRO Magno scripsit, quod ille sine consilio Ducum suorum nil prospere gesserit, præsertim sine consilio Parmenionis, de quo ita dicit, *Multa sine Rege prosperè, Rex sine illo, nihil magna rei gesserat.* Et Probus scribendo de XERXE dixit, *viçtus est magis consilio Themistoclis, quam armis Graciæ;* Et de Epaminunda, *unus homo pluris fuit, quàm uniuersa ciuitas.*

Consilio autem facto Imperator, sententiam semper sequatur moderatiorem, & quæ plurium sententijs comprobatur, non quæ temerariè & ab vno proponitur. Et ideo L. PAULVS, Imperatorem senem moribus dicebat esse oportere, significans moderatiora sequenda consilia: quod enim facilius commodiusq; probatur in prælijs, id admittere securius, præsertim si à pluribus peritis comprobetur. Sententia enim absque adstipulatore solitaria, molimine proprio facile labitur, ac deerrat; quæ verò consultorum cautionibus comprobatur, tuto ipsa constituitur. Sed neque adeo incertus, aut inops consilij Imperator sit, vt ipse sibi incredulus vsquequaque diffidat: nec tam pertinaciter arrogans, vt à nemine meliora promi posse existimet. Nam necessarium est, aut eum, qui cæterorum omnium consilij fidem semper habet, suis nunquã, multa sæpè inutilia peragere, aut qui neminem, vnũ præter se, audit, sæpenumero multa quoque peccare.

Et quia nulla consilia in bello meliora sunt, quàm illa quæ ignorauerit aduersarius antequam facias; ideo tutissimum in expeditionibus creditur, facienda nesciri. Ob hoc veteres Minotauri signũ in legionibus habuerunt, vt quemadmodum ille, in intimo, & secretissimo labyrintho abditus perhibetur, ita Ducis consilium semper esset occultum. Vnde legimus apud FOSSARDVM, boni iudicij scriptorem, Anglorum morem antiquitus fuisse, vt in expeditionem ituri, prius solemni sese adstringerent Consiliarij iuramento, nemini suscipiendi itineris cogitationem detegere. Quod institutum & laudabile fuit, & idoneum quod cæteræ postea
natio-

nationes imitarentur. Nam sicut qui cuniculos facit, ut arcem aliquam inuadat, si id non in secreto facit, nihil efficiet, nam statim hostis obuiabit; ita & in vniuersa expeditione belli, si non secreto consilia tua habes, facile conatus tuos omnes aduersarius subuertet, aut præueniet. Ideo ANTIGONVS Rex Asiæ, quæsitus à filio suo DEMETRIO quando moturus esset exercitum, cum indignatione respondit, *aut fortè putas te non posse audire sonum tubæ quando signum dabitur?* Et METELLVS Macedonicus quæsitus ab amico, quomodo bellum Hispanicum esset peracturus, respondit, *si indusum meum istud sciret statim comburerem illud.* Idem respondit PETRVS Rex Aragoniæ, MARTINO IV. Pontifici, quærenti, quemnam ob finem pararet classem? qua deinde ille Siciliam occupauerat, Gallis ex ea eiectis. Propterea CHILO dicebat, tria esse difficilia Principatum administranti. Iniurias sufferre. Tempora benè disponere, & Secretum conseruare; quia consiliarij, secretarij, & legati in aulis plurimi sunt, qui non omnes sciunt secretum tenere. Plura itaque in summa fortuna auspicijs & consilijs, quàm telis & manibus geruntur: & propterea felicius bella sua perficiebant Lacedæmonij, quàm Athenienses, Veneti, quàm Florentini, Hispani, quàm Galli. Portugallenses, quàm Mauri; & Angli, quàm Scoti.

Sunt autem belli consilia duplicia. *Recta, & Obliqua*, ut docet LIPSIUS. Illa quæ planam & militarem viam ineunt. Hæc, quæ occultam, & fraudium atque astus semita grassantur. Prioris generis sunt. Occasio. Fama. Exploratio. Mora. Celeritas. Prodigia. Locorum consideratio, Acierum instructio, Ducis alacritas, & alia plurima, de quibus loco suo & ordine singulis capitibus agemus. Posterioris verò generis sunt Stratagemata omnia, quorum vis propriè in arte solertiaq; posita proficit, tam vbi cauendus, quàm vbi opprimendus est hostis, de quo specialiter libro sexto agemus. Hic verò id ipsum tantum, quod antea diximus inculcamus,

in o.

in omnibus scilicet istis debere Imperatorem arcana habere sua consilia. Nam siue noctu, siue interdiu progredi velit, oppidum nimirum vel urbem, vel arcem, vel viarum transitus occupaturus, vel aliud quidpiam facturum, nisi celeriter, inscijsq; hostibus id faciat, irritum ac vanum fore prouidebit. Nemini igitur ante patefaciat, quò, aut cuius rei causa copias ducat. Nisi tamen Ducibus quibusdam indicandum id esse existimet. Sed cum primùm ijs locis appropinquare se viderit, rerumq; gerendarum occasio imminebit, tum quod agendum erit, hortetur ac demonstret, ut celeriter illud, breuiq; temporis momento perficiat. Nam simul ac ordinum ductores audiuerint, cæteri deinceps rescire poterunt. Demens autem ac vanus ille est, qui priusquam necesse sit, negotiorum arcana cum multitudine communicat. Quia tum præcipuè temporis scelerati quidam ad hostes malitiosè transeunt, quod ab illis, proditoris gratia, honores & præmia se adepturos sperant. Nec fieri potest, qui bellum, & seruis, & liberis, multas hinc inde transfugiendi præbeat occasiones. Hinc IULII Cæsaris mos & consuetudo erat, tabellas signatas dare, ut in tempore ijs perlectis locum certum peterent vniuersi. A quo more non abhorret factum illud HAMILCARIS Pœnorum Ducis, qui ut in Siciliam inopinatus appelleret, non pronunciauit quò proficisceretur, sed tabellas in quibus scriptum erat, quam partem peti vellet, signatas gubernatoribus tradidit, præcepitq; ne quis legeret, nisi vi tempestatis à cursu Prætoris navis abductus esset. Similiter quoque P. SCIPIO, si quam ciuitatem obsessurus esset, aliamue militarem expeditionem suscepturus, cunctos propositi sui finem volebat celatos, dum tempus esset destinata exequi, vel propalari. Eum nunc inter alios diligentissimè imitatur HENRICVS Nassouius Batauici exercitus Dux; quod & frater eius olim MAVRICIVS, & eius aduersarius MARCHIO Spinola faciebat.

CAPVT XV.

De Occasione captanda in Bello.

Occasionis captandæ ratio, non tantum in progressu belli obseruanda est, sed etiam in ipsa susceptione bellis quæ quidem vt legitima sit, hæc tria maximè requirit, Auctorem, Causam, Finem, quæ nihilominus occasioni seruire poterunt, quamuis iustitiam omnino postulent. Nam finis belli iustus esse non potest, nisi cum illud suscipitur propriè propter tranquillitatem subditorum, aut tutelam sociorum, qui, si violantur ab aduersario tuo, maximè tuendi erunt etiam cum ille bellum nolit, modò tu occasionem opportunam habeas, vti nimirum vicini Turcarum, licet habeant cum illis fœdus perpetuum, aut ad certum tempus conclusum, possunt ex tali opportunitate rumpere illud & vti occasione oblata, cum ille scilicet implicatus bellis Persicis pro consuetudine sua soleat Christianos Principes, leui aliqua incursione in dominium, ipsorum facta, ad terrorem vexare, vt scilicet credant eum felicem cum Persis progressum habere, & ita esse potentem, vt etiam pluribus in locis simul possit bellum inferre. Quapropter, ne eiusmodi occasionem, dum ille à Persis grauius premitur, nec de lege Machometana, veteriq; sua consuetudine, duobus in locis bellum gerere permittitur, aliquis Christianus Princeps omittat, licet subditi illius, non ab ipso Turca quidem, sed ab eius vasallo aliquo turbati fuerint, poterit bellum ipsi Turcæ, per indirectum quidem, illum ipsum Vasallum inuadendo prius, eo fine inferre vt subditos suos aut socios ab iniurijs barbari reddat securos, & quietos. Quanquam legitimus belli Auctor debeat esse ipse Princeps, non aliquis ex Proceribus illius: *nec enim cuiuslibet sanè, inquit LIPSIVS, fas aperire belli istas portas, sed ordo naturalis mortaliū paci accomodatus hoc poscit, vt suscipiendi belli auctoritas atque consilium penes Principes sit.* Tamen, cum vel conuen-

uentia, vel negligentia, vel etiam iussu aut suasu Principis minutiores isti Dynastæ, bellum occipiunt, & dant causas rumpendæ pacis, illo quasi inscio; videntur esse legitimæ rationes, ut tu Principi ipsi, tanquam auctori belli & turbationum, bellum tali ex occasione denuncies, & habita opportunitate eum inuadas, cum parte ab alia distractus fuerit, Ita fecit Turca, & Poloniæ toti bellum intulit, quod aliqui nobiles priuata auctoritate Valachiam turbassent, quamuis legitimam causam inferendi non habuisset, quod nimirum nos etiam à Scythis Præcopensis, illo sciente, & iubente fuimus vexati, qui tamen arma in ipsum non moueramus. Causa autem belli iusta, est Defensio imprimis, cum vi vis illata defenditur. *Hoc enim & ratio doctis, inquit CICERO, & necessitas barbaris, & mos gentibus, & feris natura ipsa præscripsit, ut omnem semper vim, quacumque ope possent, à corpore, à capite, à vita sua propulsarent.* Hæc autem defensio est duplex. Propria & aliena. *Propria est cum vim à te tuisq; arces, & libertatem, religionem, patriam, parentesq; armis tegis.* Aliena iterum duplex, cum aut à locijs, aut ab oppressis iniuriam propulsas. Hinc D. AMBROSIVS. *Fortitudo quæ per bella tuetur à barbaris patriam, vel defendit infirmos, vel à latronibus socios, plena iustitia est.* Sed est & Inuasio quoque iusta, ac licita causa capiendi arma, sed non omnis. Illa tantum, cum lacepsitus iniuria res tuas repetis; idq; cum ea conditione, ut ex formula veteri, prius mittas clarigatum, id est, res raptas clare repetitum, quia in eum, qui iure agere & satisfacere paratus est, nefas bellum sumere, tanquam in iniurium. At si abnuat, & res retinet, quid est quod contra vim sine vi fieri possit? Hinc LIVIUS, *lustum bellum, quibus necessarium: & pia arma, quibus nulla nisi in armis relinquitur spes.* Sed reuera hodie qui bellum gerunt, si legitima causa destituantur, prætexto aliquo verisimili sua facta excusant. & Turcis ius in orbem vniuersum dedit Machometes, Hispanis in Indias & Nauarram, Pontifex, Suecis in Germaniam zelus

oppressæ religionis Luteranæ; alijs aliæ causæ, sed occasio maximè, cum viderent res Imperij domestico tumultu implicatas esse.

Occasio siquidem in bellis amplius solet iuuare, quàm virtus; præsertim si captatur ex opportunitate. Vnde pulchrè LIVIUS, *puncto sæpè temporis maximarum rerum momenta verti*, dicit; quia nulla res maioris est momenti in rebus peragendis, quàm certa & determinata temporis periodus, quam opportunitatem vocamus. Hinc PROBUS, Epaminundam laudans dicit, *Temporibus sapienter utens*, id est, qui sciebat occasionem opportunè in rebus peragendis capere, sicut & PHILIPPVS Alexandri pater; qui cum videret ciuitates Græciæ esse inter se discordes, bellum contra eas mouit, & possedit, cum astutia, omnes, iuuando modò hanc modò illam, contra eius aduersarios, & vnamquamque demde debellatam subiiciendo suæ potestati. Ita & AMVRATES I. cum vidisset Principes Græciæ cum suo Imperatore bellum gerere, subsidia vtrisque dabat; & postea totam Græciam eius successores occuparunt, seseq; Bizantij Imperatores fecerunt. Idem Hungaris deinceps bellum intulerunt, cum Procures inter se discordes animaduertissent, & Regnum occuparunt. Cumq; temporibus IULII II. Christiani Principes contra Venetos arma confœderata sumpsissent, BAIAZETES II. inuadendæ Italiæ occasionem opportunam videns, miserat ad Venetos, offerendo eis suam protectionem & subsidia, vt sic intraret in prouinciam aliquam Italiæ, firmareq; possessionem paulatim posset, prudens ille Senatus, quid barbarus intenderet maturè præuidens, acceptare noluit, sed in diuino auxilio spem ponens, receptas sibi possessiones in Lombardia facile recuperauit. GVILELMVS quoque Orangius ab ALBANO toto Belgio cum exercitu suo eiectus, iterum scripto in Germania milite in prouincias intrauit, imminens occasione, cum ALBANVS molestâ tributorum exactione, & seueritate nimia, populorum animos à se

abalienasset; easq; belli faces intulit Belgio, quæ tot annorum spatio nullis vrbiū concidentium ruinis opprimi, nullisq; cruoris extingui fluminibus possunt. Vnde apud DIONEM affirmat CICERO, plura negotia occasionum opportunitate, quàm viribus feliciter expediri. Quare, qui ad præclara adspirat, in agnoscendis sagax, patiens in expectandis, & diligens in arripiendis occasionibus esse debet. Quas quia intelligunt Turcæ, & Hispani, tot sibi populos, tot prouincias subiecere, nunquam tam potentes futuri, si opportunitatem oblatam non fuissent amplexi.

Occasionem itaque in inferendo bello prætermittere non decet; vel si omiseris, alia aliqua ratione compensare stude. Sed in bello suscepto iam & cœpto, si omiseris, grauissimum damnum perenties, quia ibi iam non licet ociosum & socordem esse. Occasionem verò aliquando aut hostis, aut tua industria tibi exhibet. multi siquidem dum flumina traicerent, ab hoste ad omnia intento, deleti fuere, qui diuisam fluminibus alteram partem facile oppressit. Sic Cæsar olim Heluetiorum magnam partem deleuit, quod ea flumine à reliquis copijs discernetur. Sic nostris temporibus CHODKIEVICVS, MANSVELDIUM Ducem, pro CAROLO Sudermano militantem in transitu Dunæ oppressit cæpitq; ipsum. Multi præterea dum incautius excubias agerent in castris suis occisi. Multi profligati, dum sine ordine cum exercitu procederent. Multi celeritate præuerti, aut discordia deleti, aut aliqua alia ex occasione superati fuerunt. Et. Q. METELLVS Cos. in Sicilia bellum gerens aduersus HASDRUBALEM, ob eius ingentem exercitum, & centum triginta elephantos intentior, diffidentia simulata, intra Panormum copias tenuit, fossamq; ingentis magnitudinis ante se duxit: conspecto deinde exercitu HASDRUBALIS, qui in prima acie elephantos habuit, præcepit hastatis, tela in beluas iacerent, protinusq; se intra munimenta reciperent: ea ludificatione rectores elephantorum concitati, in ipsam fossam elephan.

phantos egerunt: quo ut primum illaqueati sunt, partim magnitudine telorum confecti, partim retro in suos acti totam aciem turbauerunt. Tunc METELLVS, hanc operiens occasionem, cum toto exercitu erupit, & aggressus à latere Pœnos cecidit, ipsisq; ut elephantis potitus est. PVBLIVS quoque Scipio in Lydia, cum die ac nocte imbre continuo vexatum exercitum Antiochi videret, nec homines tantum aut equos deficere, verum arcus quoque madentibus nervis inhabiles factos, exhortatus est fratrem, ut postero quamuis religioso die committeretur prælium; quam sententiam ex tali occasione, secuta victoria est. Hinc rectè POLYBIVS, *valet in omnibus humanis rebus & pollet occasio, sed maximè in bellicis. Itaque armatus intentusq; sis, ut neque tuæ occasione desis, neque suâ hosti des: id enim est viri & Ducis, non deesse fortunæ præbenti se, & oblata casu flectere ad consilium.* Sciebat hoc benè Q. FABIVS Maximus, qui L. PAVLO dicebat, intentus sis ad omnem occasionem, & omnia non properanti clara certaq; erunt; festinatio improuida est & cæca. Eius itaque exemplo superiore sæculo, intenti ad opportunitatem fuere præcipui Italiæ Duces, Prosper Columna, FRANCISCVS Maria Primus Dux Urbini, & FERDINANDVS Toletanus Dux Albanus, qui nusquam ad prælium descenderunt, nisi captata de hoste occasione; & arte potius vincendo, quàm viribus; quod quia olim non obseruabat POMPEIVS, nimium fidens potentiae & fortunæ suæ, ideo superatus fuit à Cæsare, qui in captandis occasionibus diligentissimus fuerat. Vnde de SVETONIO Paulino TACITVS scribit, *cunctator natura, ut cui cauta potiùs consilia cum ratione, quàm prospera ex casu placerent, quia in omni occasione prudentia adhibenda est Imperatori, non præceps consilium, aut temerarium factum. Ideo quid etiam mora in bellis valeat, videamus.*

C A P V T X V I.

De Mora facienda in Bello.

Non semper celerius factum in bellis probatur, interdum cunctatione vicisse Duces legimus: & AVGVSTVS Cæsar nihil minùs in perfecto Duce, quàm festinationem temeritatemq; conuenire arbitrabatur. Q. verò FABIVS Cunctator appellatus, tam constantis animi fuit, vt suum imperium minui per vanitatem populi maluit, quàm secunda fama, malè rem gerere. Hinc PROBVVS laudans IFICRATEM dicit. *Nusquam culpa malè rem gessit: semper consilio vicit.* Et TACITVS, *Potentiam cautis, quàm acrioribus consilijs tutius haberi.* Tutius siquidem bella longanimitate quàm impetu peraguntur: quia longanimitas consumit vires aduersarij cum tempore & occasione, impetus verò subiaceret dominio fauentis vel aduersantis fortunæ. *Sola itaque scelera impetu, bona consilia mora valescunt.* Præsertim cum aduersarius numero te nimium superat, moram prudenter adhibe, & prælium caue, nam vel commeatus ei, vel pecunia deficiet, vel seditio, (vt in multitudine fieri assolet) vel contagio castra illius inuadet, vel denique tempestates, properansq; hyems, ad propria eum reuocabunt; tu interim vteris occasione & opportunitate. Quam ne perdas, opus est vt ab alterius consilio non dependeas; nam si vel procrastinatione negligenti, vel exspectatione resolutionis à Principe tuo, tempus commodum omittes & occasionem elabi patierit, frustra fortunam tuam inculabis. Vnde manu strenuus ille Marchio Sauroanus dictitabat. *Duci interdicta decernendi facultate, ansam illi vt vincatur dari; at vt hostem vincat ac superet, omnino tolli.* Ideo FABIVS MAXIMVS in expeditione contra HANNIBALEM, Senatum Populumq; Romanum monuit per literas, vt ducem aliquem aduersus hostem adeo potentem bello præficerent, cui liberam pro re nata imperandi, decertandiq;

diq; potestatem darent: cuius consilio tum acquieuisse Senatum LIVIVS auctor est. Ita quoque HELVIDIVS PRISCVS apud TACITVM, cum legione mittitur, *rebus turbidis pro tempore ut consuleret*. Et TIBERIVS CÆSAR Drusum bello in Panonia præfecit *nullis certis mandatis, ex re consulturum*. Tum apud nos quoque STEPHANVS REX Zamolscium in Moscouia, nullis astrictum mandatis copijs præposuit; cæterum ille ipse ex Præfectis legionum, qui ætate, ordine, ac usu rei militaris cæteros antecedeabant, positis castris ad Ple-scouiam delegit, ad quos de secretioribus quibusque ac grauioribus rebus referret; præsertim, quid ipsi beneficij, temporis progressu, vel sperandum, vel amittendum in illa obsidione fuerat; siquidem milites sæpissimè bellum in longiùs protractum fastidiunt, laboribusq; consumpti signa tandem deferunt. Moram igitur prudentem Imperator in bello faciat, sed non ob socordiam suam, aut penuriam rerum ad bellum pertinentium; sic etenim aut coactus oblatam occasionem amitteret, aut imprudens commodum tempus ad res gerendas, inaniter consumeret.

C A P V T X V I I .

De Prodigijs in Bello.

Olim Imperatores ad bella auspicato procedebant, prodigijsq; è cælo territi interdum ab expeditionibus superfedebant. Et Romani sanè, teste ISIDORO, omne bellum tali ceremonia auspicabantur. Imperator ad campum Martium progressus, erigebat in præsentia suorum militum colossum, & versus prouinciam hostilem, hastam stans penes colossum proijciebat, quæ terræ infixæ, si recta stetit, Martem, belli dubium designabat: si verò inclinabatur versus hostes, cladem Romanis præfagebat; si denique versus urbem aut colossum inclinabatur, Romanis victoriam promit-

mittebat. De Atheniensium verò prælagijs, CAPITOLINVS scribit, quod bello edicto, duos homines armatos concurrere inter se iubebant publicè in foro, quorum vnus Atheniensium nomen & speciem præferebat, alter aduersariorum cum quibus bellum gerendum erat. vter vtri gladium eripuit, & lucta eum superauit, ille parti suæ victoriam præfagebat. Et hoc ante expeditionem susceptam faciebant; in ipso autem progressu belli, & ante pugnam generalem, hostiarum extra religiosè ipsi Duces inspiebant, & quidam obseruabant inde omnia belli & prælij, quidam contemnebant. Melius autem illis vtrisque isti faciebant, qui licet horum nihil crederent pro sua prudentia & magnanimitate, omnes tamen cohortium ductores ad extorum inspectionem aduocabant, vt ipsi deinde militibus suis animos adderent, ac renunciarent Dijs iuuantibus ac volentibus prælium iniri. Quia milites multo audaciores & alacriores esse solent, cum pericula subire se existimant Dijs auctoribus; ac singuli quasi victoriam certò adepturi, & signa & imperia pro virili parte obseruant.

Nobis Christianis, Haruspicum & Ariolorum vanæ prædictiones & ritus pro ridiculo habendi sunt; hoc est inspectio in extis, in certis figuris, scripturis, imaginibus, speculis, ceris, igne, aqua, libellis, notis, signis, characteribus, & lineamentis manus; quòd in his plerumque sit incantatio, & pactum cum mali genijs implicitum; aut vana & superstiosa obseruatio; quibus vt plurimum lethalis peccati nexu homines obligantur. Et ERICVS REX Suetiæ, his mirificè irretitus, tandem post tot victorias manus Ostanis euadere nequiuit. Melius Constantinus Magnus, de quo ita Optatus Mileuitanus scribit, *Auspicato hostiles turmas deuincebat, prius enim cor zelo honoris diuini, deinde pectus lorica obarmabat.* In Deo itaque Imperator confidat, & à pietate, gloriaq; Numinis auspicietur bellum; quem tamen nolim omnino contemptorem esse prodigiorum & fortuitorum. Nam a,

mat benignitas Numinis, inquit Ammianus, seu quod merentur homines, seu quod tangitur eorum affectione, his quoque rationibus prodere, quæ impendent. Sic nostra ætate Cracouiæ vidimus Tartaris in Russiam incurrentibus vsque ad Præmissiam Duce Kantimiro, species barbarorum cum pharetris & sagittis in equis, quibus vulgus circa horam noctis primam in cœlo conspectis, statim e Scythia imminere periculum proclamauit. Similiter ante irruptionem Gustau in Prussiam, visa fuerunt Dantisci spectra de noctu in cœlo, à Septentrione venientia, specie nauium armatarum, globos quasi ignitos euomentium in prouinciam, & statim rumor populi Suecos per mare venturos iudicauit.

Haud spernenda igitur videntur cœlo terraq; prodigia, & fulminum monitus, & futurorum præfagia, læta, tristia, ambigua, manifesta; in quæ Imperator modicè inquirat, & sine superstitione. Fortunaq; belli non tentanda si periculum prodigia minentur; quinimò subsistere atque expectare satius erit, si luctuosæ calamitates imminere videantur. Ita fecit Murates Othomanidarum Sultanus Anno 1594. cum die II. Ianuarij Constantinopoli egrederetur, vt exercitum suum, quem aduersus Christianos coegerat, lustraret; repentina siquidem exorta fuerat tempestas, quæ tentoria & cursus, viros & equos prosternebat, cui vix vllus obistere potuit. In illo ventorum turbine cruces cœlitus in vestimenta Turcarum deciderunt plurimæ, quibus Sultanus visis vehementer conturbatus extimuit, & totum exercitum Constantinopolim reduxit, Christianis interim per Germaniam & Hungariam supplicationibus peragentibus.

Fortasse & somniorum habenda est quædam ratio. Nam instantibus curis, agitant sæpè per somnium species imminentium rerum; siue illas ægritudo, siue diuinatio animi præfagientis accersit. Ottocarus Bohemiæ Rex, cum Rudolpho Romanorum Rege prælio congressurus, vidit in visu noctis, quod plurima in capite cornua gestaret, quæ omnia

omnia præter vnum radicitus sibi sunt euulsa. Igitur non multo post Ottocarus à suis militibus in pugna proditus, & ad mortem vulneratus, quod prælio abstinere monitus non-
 luisse, occubuit. Cazimirus verò Monachus Poloniæ Princeps, cum Iazygibus & Lituanis conflicturus, vidit per somnium speciem S. Micháelis Archangeli, victoriam sibi pollicentis de hostibus. Narravit somnium militibus in crastinum, & animavit eos, victoriáq; obtenta templum Lublini in arce, in honorem S. Michaelis erexit. Boleslaus verò Chrobrius in obsidione vrbs Chiouiensis longo tempore defatigatus, tandem gladium in somnijs ab Angelo ad excidium vrbs porrectum, accepit, & militibus pro concione monstravit, qui hodie dum in thesauro Regni Poloniæ asseruatur, etsi fractus ab eodem illo Rege tempore oppugnationis, cum portam vrbs, quæ aurea vocabatur, effractus, illo gladio excinderet.

ex Lench Crany

Sollicitos quoque habebat veterum Duces, si vel sagitta è cælo in agmen decidisset; vel Solis, Lunæue lumen deficeret; si terra quateretur, si Dux equo excideret; si lupo in castra veniret, & id genus alia, quæ militi mali omnis loco erant, tantumq; ipsi metum incutiebant, vt ita affectum in prælium producere summi discriminis fuerit, Dlugossus de Casimiro Rege scribit, quod dum in Bohemiâ contra Vratisslaum Ducem castra moueret, Tribunus eius quidam, nomine Niezobia aquilam nigram supra caput Regis volitantem conspicatus, dum varij varium inde futuri belli omen coniectarentur, præ cæteris respondit: Si Aquilam hanc, ô Rex, sagitta transfigam, habebis prosperæ victoriæ signum, si verò non occidero eam; signum cladis tui exercitus. Atq; sic arcu extenso caudam Aquilæ tetigit, quæ nihilominus integra auolauit. Ergò inquit, ô Rex, non omnes inimicos tuos interficies sed dissipabis eos, sicut istas pennas ego. Excepit omen Cazimirus, & euentu rem comprobante, militi ad insignia illius gentilicia, sagittam cum pennis Aquilæ adiunxit.

Igitur obseruabit Imperator, vt si mobiles militum animos, vel augurijs aliquibus vel portentis moueri animaduertit, vt istiusmodi omina omnia ad priscorum morem in lætiorem partem interpretetur, quamuis illorum opinione sinistri quid portendere videantur, sed vel ex causis naturalibus proficisci persuadeat, vel & re sua accidisse dicat. Prout Cæsar fecit, cum in Africam traiecisset, atq; è naui exiliens pronus cecidisset. Teneo te Africa, dixit. eaq; ratione militum animos casu eo non mediocriter consternatus, restituit. Epaminundas quoque, cum ei auguria obiecta fuissent, quorum alterum victoriam portendebat, alterum cladem; animaduertissetq; animos multorum in suspenso esse ac metu, diuersorum auguriorum obiectu, indicta concione, ea sic interpretatus est, vt si obsequentes Præfectis suis se præberent, alacriq; animo hostes incescerent, lætum illis augurium dari; sin aliter, triste & funestum. Ita magnus vir rem ambiguam incertamq; optimam in partem interpretando, animos suorum sinistro augurio perculsos erexit, seq; præsentis periculo liberauit. Quamuis itaque huius sæculi homines ab isto molestiæ genere propemodum immunes sunt, scire attamen debemus, quod dum aut pestem pro peccatis nostris, aut tempestatem aliquam aut cladem in bello immissurus est Deus, nunc monstris præmonet, vt à sceleribus confurgamus; nunc per ostenta declarat, vt iram illius placare contendamus. Exemplo hoc manifestissimo, Bembus in Historia Veneta declarat, qui bello Ferrariensi durante, dicit terram Venetijs tremuisse motu tam vehemēti, vt Senatus præter morem, nulla lege lata dilaberetur ex Palatio: patresq; ruina tectorum intercipi metuentes, tumultuosè se foras truderent. Cadebant autem è summis Curia, templiq; Marcij parietibus pinnæ, ac signa marmorea, quæ in ijs antiquitus posita prominebant: turesq; templorum nutare cacuminibus & commoueri prospiciebantur; & æs campanum in plerisque earum, maximè autem in

ea turri, quæ in foro est, spontè insonuit: pleræq; etiam vitium fecerunt; & aqua Vrbani in alueis altè excitata contremuit; domusq; non vna cum incolentium interitu, & fanorum frequentes parietes ruinam traxerunt: mulieresq; prægnantes permultæ timore perterrefactæ abortum fecerunt, mortuæq; sunt. Postridie igitur eius diei Deo O. M. supplicationes in vrbe tres dies fieri, & ne quid præter panem & aquam, ad vescendum omnes puberes sumerent, ab Antonio Contareno Patriarcha Venetorum consultis Patribus indictum. Atque ita omnes ferè magnæ & memorabiles in rebus humanis mutationes, aliquanto antea, aut vno, aut pluribus illustribus ac notabilibus signis diuinitus portendi ac præsignificari solent; maximè verò in bellis, vbi continua aleæ fit mutatio. Sed in omnibus recurrendum ad Deum: procurandumq; vt prudentia nostra, quàm optima fama de bello & progressibus nostris spargatur.

C A P V T X V I I I.

De Fama Belli.

VT occasionis prima ratio in bellis habenda est, sic famæ secunda; cuius momentum in bello maximum semper. Vnde Curtius. *Fama bella constant, & sæpè etiam quod falso creditum est, veri vicem obtinuit.* Experientia nuper vidimus, cum Gustauus Tyllio ad Lipsiam profligato, sola nominis sui fama Imperij vrbes & arces, quæ alias inexpugnabiles videbantur possideret, sola Herbipolensi munitione expugnata, adeò, vt quæ fideles etiam Imperatori ciuitates fuerant, poterantq; sua resistantia retardare victorias illius, & vires diminuere, territæ fama ipsius vltro portas aperiebant, existimantes nihil virtuti ipsius resistere posse; præsertim postquam Crusenachum expugnasset. Non abs re itaque Liuius scripsit, *Fama bellum conficit, & parua momenta*

Boris Godunov

in spem metumue impellunt animos: præcipuè sub initia; quia fama in nouis cœptis validissima est: primisq; euentibus, ut inquit Tacitus, metus aut fiducia gignitur. Ita cum Demetrius Moschouiam cum Pòlonis intrasset, ut eam, eiecto Tyranno Borisso Hodunio, tanquam patriam suam recuperaret, profligatis semel apud Cromos exercitibus illius, statim ad se procerum ciuitatumq; partem maiorem traxit, qui relicto iniusto Imperij inuasores, vndique ad eum, tanquam ad legitimum Principem concurrere cæperunt. Quid cum altero conflictu ad ipsam Metropolim Moschouiæ eum profligasset? Extemplò ciues portas ei aperuerunt, & in urbem festis cum acclamationibus introduxerunt, ut Borissus consilij inops se cum suis in arce veneno interficere cogere-
tur, ne a victore Demetrio, ad ludibrium & crudeles pœnas exponeretur. Scito igitur Imperator instandum famæ; & prout prima cesserint, fore vniuersa.

E contra verò, famam de aduersario tuo sparsam, quòd sit fortis in præliando, quòd felix in vincendo, quòd prudens in cauendo, quòd dexter & sagax in gerendo, generoso animo contemne, & aduersus rumores hominum firmus esto. Non tamen securus, quia nemo celerius opprimitur, quam qui nihil timet, & *frequentissimum initium calamitatis*, inquit Vegetius, *securitas.* Quia igitur nihil paruum in bello; & fiducia semper noxia; idcirco diligenter quæ de aduersario sparguntur explora, & noli eum contemnere, etsi paruas & prauas copias habeat: quia *Sæpè contemptus hostis cruentum certamen edidit, & inelyti populi Regesq; perleui momento victi sunt.* Et Iulius Cæsar, Martis ipsius pullus, post tot victorias & triumphos debellatumq; Pompeium, cum quantum iam Consul factus in Hispaniam contra filios Pompeij abiret, adolescentes quidem illos adhuc, sed audacia principatu digna præditos, quod eos tanquam indignos paterno nomine & regimine leui apud se æstimaret, in tantum periculum venit, ut per aciem discurrens clamitaret, *An milites non pude-*
ret

ret se captum pueris in manus tradere? Post pugnam autem amicis dixit. *Se de victoria sapè, tum verò primum de vita certasse.* Hinc Curtius. *Nihil tuto in hoste despicitur quem spreueris, valentio rem negligentia facies.*

Ego ut nihil timendi, sic nihil contemnendi auctor sum: tu verò Imperator scito, quòd *sapè in bello, paruis momentis magni casus intercedunt; & nihil tam leue est, teste Lio, quod non magnæ interdum rei momentum faciat.* In omnibus autem animi excelsi, longam potiùs consequi famam, quàm vitam obtinere breuem malunt; atque ideo cum gloria, & utilitate subditorum suorum, bella finire cupiunt,

CAPVT VLTIMVM

De Finiendo Bello.

DIximus militarem prudentiam maximè necessariam esse, ad tutelam salutemq; Regni: eamq; diuiseramus in hæc tria capita, nimirum, quomodo sit suscipiendum bellum. quomodo gerendum. & quomodo finiendum, Prioribus absolutis, restat de hoc ultimo agendum, videlicet, de Fine belli.

Bella itaque quamuis magna, quamuis diuturna, pace finienda sunt, *cuius & nomen dulce est, & res ipsa, inquit Cicero, cum incunda, tum salutaris.* Ergo ad hanc pariter ire debent, tam quibus salus, quàm quibus gloria charissima est, hoc est, ut Lipsius docet, Victi & Victores.

Victi quidem, metum adhuc faciendo hosti, ut sciat esse tibi adhuc vires: si deliberas, ambiguas; acres, si desperaris. Ideo te erectum & fidentem animi ostende, ne ignauum & vile aliquod animal videare; iuxta vetus illud prouerbium. Sub clypeo melius succedere pacis negotium. Ita Zamoscius in Moscouia, cum acerbissima hyeme urbem Pleseouensem triginta millibus armatorum obsideret, quæ intus præ-

ter

ter ciues quinquaginta septem millia defensorum habebat; sciebat & auxilia obsessis præsto adfutura. Nihilominus ad pacis condiciones descendere noluit, donec Moscus ei tota Liuania celsisset, perpetuumq; foedus cum gente Polona sanxisset. Similiter ad Chotimiam vndique à Turcis cincti, non prius ad pacem descendimus, donec prior barbarus i spe recederet, & nullam tributi soluendi mentionem faceret.


Et quamuis pax vel iniusta, vtilior sit iustissimo bello, tamen quia viro Principi intolerabilis, vtpotè quæ labem & ignominiam adfert; ideo in tractatione pacis, diligenter videbis, vt verè pax ea sit, non pactio seruitutis, quia potius est cum dignitate cadendum, quàm cum ignominia seruiendum. Quapropter in omni pace, hæc duo considerabis, vt *Honestæ* ea, & vt *Simplex* sit. *Honestæ* erit, cum aliqua tolerabili conditione finies bellum, vti paucos ante annos fecerant, Daniæ Rex, & Mantuæ Dux, cum Imperatore Ferdinando II. grauissimo ab eo bello deuicti, & postea suis possessionibus per certas pacis condiciones ab eodem restituti. *Simplex* verò, quando in tractatibus, nullus fucus, nulla fraus adhibetur, & pacis nomine inuolutum bellum iterum non reformidatur, vti Sueci & Turcæ facere solent: alias enim, *pax suspecta*, vt docet Tacitus, *tutius bellum*.

Obseruandum autem est, quòd non semper pax impetrari potest; sed tum solummodò, dum sibi vterque confidit, & pares ambo videntur: iam verò rebus inclinatis, necesse est, vt te quoque inclines; & quāquam atrociter loquaris, minorem tamen apud te animum esse scimus; & vt Historicus ait, *Apud victos plus ferè querimoniarum, quàm virium*. Ergo necessitati pare, & omissa ira ac spe, fallacibus auctoribus, te ipsum tuāq; omnia, victoris cognitæ permitte fidei. Sæpè enim victores, (qui alto quidem sunt animo) secundæ res in miserationem ex ira vertunt; & supplices, nihil abnuendo, veniam omnium accepere. Ita Alexander Poro Indiæ Rege superato, non modo Regnum ei restituit, sed & alias multas pro-

prouincias attribuit, cum captum rogasset, quomodo tractandus esset? Regaliter inquit. Perconctante Alexandro. Nunquid aliud vellet? respondit. in Regali tractatione inesse omnia. Igitur dimissum & muneribus Regijs, & regno vti diximus debellato, satrapijsq; alijs plurimis donauit. Idem fecere & alij plures Reges, solâ victoriâ contenti.

Victores ideo pacem non abnuant velim, tùm quia id decorum ipsis, & vtile, tùm quia maximè tutum. Nam quamuis vela tibi tumeant secundo vento, tamen potes procella inuolui & euerti, si prætermittis hoc tempus, quo dare magis quàm accipere potes pacem. Eapropter Serenis. **R**EX noster VLAD. IV. de bellatis ad Smolenscum Moschis, profligatisq; cum Abasi Bassa eorum duce in Podolia Turcis, ductoq; splendidissimo contra Suecos, instructissimoq; in Prusiam victore exercitu, pacem maluit potiùs cum omnibus suis vicinis concludere, quàm dubiam prosequi victoriam, & sanguine humano fuso, vanam sibi quærere gloriam. Cæterum, quia pacem habere cupienti, arma semper in manibus tenenda sunt, & vt Tullius inquit. *Si pace frui volumus, bellum gerendum est: si bellum omitemus, pace nunquam fruemur,* ideo gerendi belli rationem edocturi, Ducis cum primis ipsius officia, requisitasq; in eo dotes, libro sequenti prosequemur.





SIMONIS STAROVOLSCI
INSTITVTORVM
Rei Militaris.

LIBER SECVNDVS
De BELLO.

CAPVT PRIMVM

De Constituendo Duce militiae.



Ost præparatam ad bellum Pecuniam, Annonam, & Armas; vti superius docuimus; quartum requisitum est, *Habere viros bello gerendo aptos*: hoc est, tam milites, quam Duces exercitatos; & tam impugnare, quam repugnare peritos.

Et quia caput totius exercitus Imperator est, militarem verò sine Duce turbam, esse corpus sine spiritu, scimus; ideo ab ipso ordiemur primo, & de illius electione seu constitutione, de officio, auctoritate, dignitate, atq; virtutibus requisitis, toto libro præfenti agemus.

Duo itaque genera Ducum consideranda sunt. Primariorum, & Secundariorum. *Primarij dicuntur*; qui summæ rei imperant, suisq; auspicijs & ductu rem gerunt. *Secundarij dicuntur*, qui imperantis alterius nutu, sine iussu impe-

imperant, & suo saltem ductu rem gerunt. In prima classe, quilibet Rex aut Princeps in suo solo. In altera, ij qui ab his constituuntur, Administri bellorum & Legati, quos propriè Duces exercituum vocamus.

Qui igitur Princeps, bello Ducem talem constituit, & vult illud efficaciter ac feliciter peragere, hæc tria imprimis habere procuret. *Primo* Ut Dux belli sit vnicus, siue Collega. *Secundo*. Ut omnia pro sua prudentia, liberè gerat, absque omni dependentia, vel Principis, vel Commissariorum. *Tertio*. Ut sit ad omnia munia belli resolutus & aptus.

Quantum ad primam conditionem, vt in Repub: administranda; mala est gubernatio multorum, sed vnus Princeps esto; sic & in gerendo bello plurium imperium nocuum, vnus Dux seu Imperator sit. Nam vbi æqualis potestas duobus datur, semper discordiæ, æmulationes, simultates, & militum dissensiones erunt, exercitusq; ille quamuis potentissimus nihil omninò efficiet. Experti hoc toties Romani, quamuis legum obseruantissimi, & patriæ amantissimi fuerunt, de quibus propterea Liuius, *didicerunt complurium imperium bello inutile esse*. Sed & nos Sarmatæ hoc sæpius experti sumus, boniq; publici damno didicimus, nusquam prosperè celsisse res nostras, quoties in expeditione aliqua vterque Dux belli, tam Polonicarum, quàm Lituanicarum copiarum, fuerat simul. Et Athenienses olim totum exercitum in Sicilia amiserant, quod Duces inter se discordes fuissent æqualis potestatis. Et Hispaniarum Reges similiter ob Ducum contentiones in Aphrica, ingens damnum ad Alzerbam acceperunt. Et in Anglia, tam nauali, quàm terrestri prælio, ob Ducum discordias, res malè gesta sæpius: plurimisq; alijs in locis & regnis, id accidisse, Historiæ testantur. Vnde, nec mutare Ducem in vna expeditione consultum, præsertim si felix est; quia illo mutato persæpè & fortuna belli mutatur: nec collegam ei æquali potestate dare præsertim si animosus est, quia intet se potiùs quàm cū

hoste pugnabunt; interim autem ordo bellicus & progressus immutabitur, aut interruptetur.

Secunda conditio est, ne Dux ligatas manus habeat, aut circumscriptus sit conditionibus, qualiter faciebant olim Carthagenenses, & Romani ipsi, priusquam id Reipub: noticiū experientia didicissent. Nunc faciunt, Hollandi, Veneti, Moschouitæ, & si paulò liberiùs, quàm antea. Verum enim uerò absolutissimam habeat officij sui, atque amplissimam potestatem, qualem & nostri Duces semper tam in Polonia, quam in Lituania habebant, & cæterorum Regum vulgò Generalissimi dicti habere solent: alias Commissarij illis adhibiti, potiùs impedimento, quàm iuuamento fieri solent, præsertim si in rebus bellicis non resoluti, sed timidi, & priuatum commodum spectantes. Vnde Lycurgus prudentissimus Legislator, refrænata authoritate Regum domi, in bellis absolutam eis potestatem reliquerat. Quem imitati Romani quoque, habentes multis legibus antea circumscriptum Consulis officium, postmodum liberam eis in bellis potestatem mittebant, prout & Dictatoribus; hoc solo addito, *viderent ne quid detrimenti Resp: pateretur.* Et hoc propterea, *quod bellum, ut inquit Thucidides, multas res generet, de quibus ne cogitare domi poteras;* unde facere quoque resistentiam aduersario debes, non prout apud te constitui, sed prout casus, aut necessitas te coget. Propterea Q Fabius Maximus dicebat. *Consilia magis res dant hominibus, quàm homines rebus:* & propterea reprehendebat Varronem, quòd ille hoste nondum viso, disponderet apud se quomodo procedere deberet. Igitur hoste conspecto, Dux non expectet consilium, aut informationē Principis, Reipublicæ suæ, quia interim rei benè gerendæ poterit occasionem omittere, ut non semel Venetorum Ducibus accidisse legimus, tum Architalasso Hispanico, haud ita pridem contra Anglos: & Anglico etiam contra Gallos, quibus, *ex distantibus terrarum spatijs, ut Tacitus inquit, consilia post res afferebantur.*

Ter-

Tertia conditio est, ut sit ipse Dux belli impiger & factiuus, atque ad exequendum promptus & aptus. Quæ aptitudo sanè, seu inclinatio ad bellum in hoc maximè consistit, ut libens volensque suscipiat expeditionem, cum ardore quodam & desiderio, peragendi eam usque ad finem. Nam si vadit ad bellum coactus à suo Principe, ut in Moschouia & Turcia per sæpè accidit; vel ex officio sibi imposito ad vitam, ut apud nos in Polonia, non verò sponte, & cum alacritate innata, tum iam non crescet in ipso ardor ille, & promptitudo deuincendi hostem, sed tantum exercendi munus sibi impositum; quare tergiuersabitur in omnibus actionibus suis & moram trahet, causabit difficultates, morbum simulabit, suadebit conditiones pacis, consilia vel in minimo requiret à Principe, de com meatu, munitionibus & stipendijs militum negligenter prouidebit, lucrum quæret, & ut verbo dicam totum tempus tractationibus potius & consultationibus, quam operibus Martialibus consumet; contentus repulisse hostem, & se suaque seruasse, quam deuicisse eum, aut coegisse ad pacem. Ita Nicias in bello Siracusano olim, & nunc in Belgio quidam Regis Catholici Duces. Sed cui ardor inest à natura, & voluntas cum desiderio famæ bonæ, ille promptè se itineri accingit, diligenter annonam & bello necessarias machinas comparat, maturè milites euocat, sollicitè omnia prouidet, omnesque suos Tribunos & turmarum præfectos ad idem faciendum incitat, omnia videre, omnia tangere ipsemet cupit, & nec modò antecedit militem, sed in periculis quoque ipse exemplo omnibus præit, & præuenit hostem. Talis fuit Alphonsus Rex Aragoniæ, Ismael Sophi Rex Persarum, Campsongaurus Sultanus Ægypti, Georgius Scandembergus Dux Albanæ, Vitoldus Dux Lituaniæ, & nostra ætate Gustauus Rex Sueciæ, qui omnibus ferè imperatorijs virtutibus præditus fuit. Sed iam officia Ducis videamus.

CAPVT II.

De Officio Ducis.

Æterna natura lege, inquit Dionysius, receptum est, ut inferiores præstantioribus pareant, & milites gregarij obediant suis ductoribus, maximè apud quos summa potestas & regimen belli; quia ipsi sine Imperatore, ut remiges sine gubernatore, nihil valent. Et quia Principis proprium munus est, tueri subditos; id autem non potest esse sine fortitudine; idcirco optarem ipsimet Principi militarem prudentiam & fortitudinem; sin verò minus aptus est, tum è subditis egregios in armis Duces, qui animum atque aures darent ad hanc disciplinam. Quæ enim res vitam, aut tranquillum vsum habeat sine ista? Patria quandoquidem, libertas, ciues, atque adeò ipsi Reges, latent in tutela ac præsidio bellicæ virtutis.

Ad inferendum igitur bellum, duo præcipuè in Duce requiruntur. Magnitudo animi, & Ratio gerendi belli. quarum ædepol virtutum si expers fuerit, næ non ille suæ laudi, multo minus Reipublicæ consulat; cum boni Ducis munia commodum sine ijs explere nequaquam possit: quod verbo satis scito significauit Gabrias Atheniensium Imperator, cum dixit. *Magis timendum esse ceruorum exercitum cui Leo Dux præsit, quàm Leonum, qui ducem habeat ceruum.* Ideo Iulius Cæsar in Hispaniam proficiscens contra Petreium, aiebat, *non magni eum se facere, quod rem cum exercitu sine Duce haberet.* Qui enim non habet spiritum excellentem & generosum, ille non poterit pugnare Marte aperto; obsidere ciuitates munitissimas; acquirere Regna; concupiscere victorias & triumphos; quia spiritus in eo extinguuntur præ timore, cum hostem conspexerit, vel maiore cum exercitu ad se audacter venire, vel ordine meliori stare intra munitiones suas. Sicut igitur non sufficit nauim esse benè fabricatam,

tam, & adornatam omnibus necessarijs ad nauigandum, si ventus vela non implet, & eam in altum non promouet; ita non sufficit Ducem habere scientiam rei militaris, & diligentiam officij sui in omnibus peragendis, si non habet animum generosum, & resolutum exequendi id, quod destinauerat facere ad euertendum aduersarium suum. Vnde Aratus Siciniorum, quamuis fuerit prudens Imperator, quia tamen minus resolutus & non magnanimus, ideo parum prosperè bella gessit, quæ audacia potius peraguntur.

Post magnanimitatem requiritur etiam in Duce, Ratio gerendi belli, vt non temere ruat in hostem, sed secundum præscriptum rei militaris omnia agat, & sit diligens officij sui, quod sex præcipua munera requirit. *Castra mouere, Metari, Incampo manum conferere. Obsidere. Oppugnare, & Propugnare* in quibus omnibus rebus excelluit Iulius Cæsar. Sed particulariter loquendo, in ducendo agmine laudem præ omnibus habebat Philopomenes; in castrametatione Pyrrhus; in conferendo manus cum hoste T. Manlius Torquatus; in obsidendo Titus Vespasianus; in oppugnando Parmenides; in propugnando Afranius. Quæ singula, vt vnus comedè exequi possit, describamus qualitates quæ in bono Duce necessario requiri debent.

C A P V T I I I.

De Qualitatibus requisitis in bono Duce.

QVandoquidem victoria non dependet absolutè à Duce ipso, sed à militibus quoque, ab occasione bona, à tempore, à situ loci, & ab alijs circumstantijs pertinentibus ad assequendam victoriam, eapropter ille contendere debet, vt de illo dici possit, tam in felici, quàm in aduerso prælio, quòd ille rectè sit functus officio suo, & omnia media ad assequendam victoriam prudenter disposuerit. Vnde dicitur
de

de Annibale, quòd in illa pugna cum Scipione ad mœnia Carthaginis, licet succubuerit cum tota sua patria, tamen sese ita strenuè gessit, vt semper visus est se gessisse in alijs felibus victorijs. Nosterq; Zolkieuius paucos ante annos in pugna cum Tnrkis ad Cieczoram licet post octiduum prælium succubuerit oppressus à multitudine barbarorum tamen dicitur (ipsis etiam Machometanis testantibus) omnibus prudentissimi Ducis munijs functus esse, & gloriosè pro patria atque Religione cecidisse. Victoria etenim assequitur non tantum ingenio, audacia, exercitio, apparatu & sumptu, sed etiam felicitate & numerositate copiarum; de quibus septem rebus, tres vltimæ, potiùs dependent à potentia Principis, quàm ab officio Ducis exercitus. Quapropter Veneti in tot bellis præualuerunt sumptu pecuniario: apparatu bellico, prisci illi Reges Ægyptiorum & Assyriorum: multitudine exercitus, Tartati, Arabes, Turcæ, Mauritani, Saraceni: ingenio & fortitudine, plurimi diuersarum gentium Duces; maximè tamen Christianarum; qui iuniore hoc sæculo reuocata veterum Imperatorum disciplina militari, has præcipuè qualitates in legitimo Duce requirunt. 1. *Scientiam.* 2. *Virtutem.* 3. *Prouidentiam.* 4. *Auctoritatem.* 5. *et Fortunam.*

Scientiam nempe, vt artis suæ gnarus sit; & qui militiam longo vsu combiberit, non auditione solum aut lectione: hoc est, vt vno verbo sit peritus, & nullum genus belli sit, in quo illum non exercuet fortuna. Qui norit, quis ordo agminis: quæ cura explorandi: quantus vrgendo trahendoue bello modus.

Virtutem verò, & corporis & ingenij vigorem quemdam habentem, vt videlicet alacer actuosusq; sit, exerceat legiones etiam sine bello; curâ, prouisu, perinde agat, ac si hostis ingruat: *et cui, (vt cum Cicerone dicam) adsit labor in negotio, fortitudo in periculo, industria in agendo, celeritas in conficiendo.* At animi virtutes adhibendæ etiam quædam sunt.

sunt. Non enim solum bellandi virtus in summo atque perfecto Imperatore quaerenda est, inquit idem Cicero, sed multae sunt partes eximia, huius administræ, comitesq; virtutis, Temperantia, Fides, Facilitas, Humanitas, Castitas &c. quæ nisi aut omnia, aut pleraque habeat, non ego possum Imperatorem in aliquo numero putare.

Prouidentiam, quæ cautos cunctantesq; Duces facit, nullo loco commissuros se fortunæ, nisi quantum necessitas cogat. Et si calidos amat vulgus, temeritas tamen sit à Duce alienissima, quæ præterquam quod stulta est, etiam infelix & exposita ad omnes laqueos. Polibius pulchrè. *Celeritas & audacia & impetus præter rationem, & vanitas ac typhus, hostibus quidem opportuna, noxia verò maximè amicis;* nam ad omnes insidias, fraudes, atque astus obnoxius est hic talis. Quapropter Sertorius cognoscens benè quòd non liceat in bello bis peccare, dixit. *Oportet Ducem respicere magis, quàm prospicere, quia præliorum delicta emendationem non recipiunt.*

Felicitatem, quæ comes ferè consilij & rationis est, sed tamen paullò benignius quibusdam attributa à Deo. Ille vnus eius auctor, eamq; præstare à seipso nemo potest. Vnde olim Maximio, Marcello, Scipioni, Mario, & cæteris magnis Imperatoribus, non solum propter virtutem, sed etiam propter Fortunam sæpius imperia mandata, atque exercitus esse commissos legimus.

Auctoritatem denique, quia vehementer pertinet ad bella administranda, quid hostes, quid socij, quid ciues ipsi & milites de imperatoribus existiment. Hinc Curtius, *Majestas & auctoritas imperantis fulcrum regnorum, & salutis tutela est.* Cæsar ad Monarchiam adspirans, media nulla neglexit quibus auctoritatem sibi conciliaret: ideo Pompei & Crassi societate acquisita, ex omni prouinciarum copia, Gallias sibi potissimum elegit, quæ emolumento suo & opportunitate, idoneam triumphis materiam suggesturæ videbantur.

tur. Sciebat enim prudentissimus Imperator auctoritatem omnem ex metu quodam & admiratione constare, eamq; opibus & victorijs maximè obtineri. Hæ enim si frequentes sint, omnes timore simul & stupore percellunt, dum eum vinci posse desperant, qui sæpè iam vicit. Illæ verò, & milites in officio continent, & conciliant amicos. Sed de his, alijsq; qualitatibus boni Imperatoris, singulis capitibus.

C A P V T I V.

De Scientia Ducis.

DVplex scientia in Duce requiritur, Politica & Militaris: ad illam spectat Eloquentia: ad hanc Geometria & Architectura, parentes omniū artiū, Mechanicarū. Non requiritur itaq; in Duce tanta perita harū artiū, vt in magistris illarum, sed vt in Imperatore; qui non exstruet ipse pontes, aut machinas militares, neque ædificabit munitiones, aut explodet bombardas: sed vt attendat ad omnes harum rerum professores, & possit iudicio suo discernere, vtrum illi benè aut secus, hæc à se imperata exequantur. Vt autem ipse optimè loquatur ad milites, artifices, legatos extraneos, & consiliarios suos, optimè studere Eloquentiæ debet, & in hac excellere conabitur. Quam vt fundamentaliter possidere valeat, Philosophiam Naturalem & Moralem diligenter leget. Mathematicam discet, Historias & Oratores euoluet, sed maximè Cosmographiam in manibus habebit, si cognoscere cupit situs locorum, atque genios populorum. Quapropter viros eruditos penes se fouebit, à quibus reliqua ex conuersatione & discursu discet. Ita Iulius Cæsar & Alexander Macedo, & omnes validissimi Principes atque Duces, qui postea Magni cognominati fuerunt; inter quos Ioannes Samoscius qui & Orator summus in patria sua fuerat, & Senator prudentissimus & Imperator felicissimus, & scriptor in vtraque Philosophia celeberrimus, nec non erudi-

torum

torum virorum fautor & patronus Singularissimus. Sed & Machometes II. Turcarum Imp. victoriosissimus, quamvis & natura Tyrannus, & instituto Prophetæ sui, qui omnem litterarum cognitionem prohibuit, barbarus, egregiam attamen hac in parte laudem meretur, quod & viros eruditos penes se quamplurimos aluerit, & Historicos tam veteres quàm Neotericos in linguam Turcicam transferri iusserit, quin & imagines Principum præstantiorum atque Ducum ex eis depictas in suo palatio habuerit, ut non res gestas modò ipsorum legere posset, sed & vultus eorum virtutem quodammodo spirantes intueri, atque inde ipse magis ac magis accendi ad gloriam.

CAPUT V.

De Experientia Ducis.

EXperientia rei militaris tribus ex causis agnoscitur in Duce. Prima, si scit delectum militis facere. Secunda, si scit eum exercitare. Tertia, si scit illo ad assequendam victoriam prudenter uti. Ob primam conditionem, laudem inter veteres merentur Pyrrhus Rex Epirotarum, & Marius Consul: inter recentioris memoriæ Duces, Albericus Balbianus, & Georgius Scanderbergus. Ob secundam, Scipio Numantinus, & Domicius Corbulo ex veteribus: ex recentioribus verò Selimus II. Turcarum Imp. exercendo suos Iannizaros, & Saladinus Ægypti Sultanus, instituendo suos Mamaluchos: Apud nos verò Ostaphæus Dascouicius formando Cosachos Zaporosenses, & Rex Stephanus Batoreus faciendo Haiducos. Ob tertiam denique Alexander Magnus, qui triginta quinque millibus peditum, & septem millibus equitum Asiam occupauerat, & Iulius Cæsar, qui pluribus quidem legionibus hostes vincere solitus erat, sed longè numerosiores hostium exercitus profligabat, & cum for-

tioribus multò populis quàm Alexander Magnus bella gessit; & quod maximum est, cum ipsis Romanis, & tanti nominis Imperatoribus.

Igitur peritiæ potissîma in Duce ratio habenda est, ut sit miles potius, quàm vir bonus. Vnde Aristoteles. *In bellica præfectura maior respectus habendus peritiæ, quàm virtutis aut morum.* Non enim sufficit bella incipere, aut ea velle gerere, sed opus est omnia requisita scire, & praxi ipsa experiri: nam si quolibet in negotio homo novus & inexpertus parum proficit, priusquam rei experientiam acquireret, tum maximè in re militari, ubi communissimè casus & fortuna dominantur; quibus interuenientibus, impossibile ut Dux novus possit prudenter, iudiciosè, & fortiter omnia quæ accident peragere, priusquam praxim rei addiscet, & assidua armorum tractatione ingenium confirmabit. Eapropter Romanam Rempublicam non Imperium tantum, sed & salutem arti militari debuisse prudentiorum nemo dubitat. Nulla siquidem magna ciuitas aut regnum quiescere potest; si foris hostem non habet, domi inuenit: bellis autem Respublicæ implicatæ, à periculis omnibus & mutationibus sunt immunes. Ideo stante adhuc Republica Romana, nemo militiam detrectare poterat, quem non ætas, aut fracta valetudo, aut alia iustissima causa excusaret, quòd assiduè cum vicinis belligerandum esset, ut pax domi maneret; quemadmodum nunc faciunt Turcæ. Hoc autem imprimis studiosè curabant Primates Romanorum, ut à teneris filij eorum militiæ assuescerent, nec voluptati aut otio se darent; quia sciebant eos aliquando militibus præficiendos, quos nemo cum laude gerit, qui non diu & subesse didicit, & militare. *Nemo enim, inquit Seneca, benè imperat, nisi qui ante paruerit imperio.* ut & Iulius Cæsar fecit, qui prima stipendia, teste Suetonio, in Asia peregit, primusq; postea Romanorum Imperator fuit, qui rebus gestis omnes quodquot hætenus in Orbe Duces bellicosissimi fuerunt, atque ipsum Alexandrum Magnum supe-

superavit. Quapropter in Prætura militari, opinione Philo-
sophi, usus magis quàm virtus spectari debet, quem, qui ne-
gligunt, patriæ non student. Olim Pompeius cum alacri-
bus saltu, cum velocibus cursu, cum validis vecte certabat,
vt par futuro Imperio fieri posset. Neque enim aliter ille
potuisset par esse Sertorio, nisi se, & milites, frequentibus ex-
ercitijs præparauisset ad prælia. Ætas nostra quatuor sum-
mos Imperatores vidit, qui assidua meditatione armorum
peritiam rei militaris assecuti fuere, Henricum IV. Franciæ
Regem, & Gustauum Adolphum Sueciæ. tum Mauritium
Nassouium Aurasiorum Principem, atque Carolum Ghod-
kieuicium Magni Ducatus Lituaniæ Supremum exercitu-
um Ducem, quibus cum multa igneus animus, tum omnia
ferè ad assequendam gloriam, continuum à teneris exerciti-
um dederat. Hodie pessimo exemplo tota ferè in Europa e-
tiam pueros, aut adolescentes immaturis honoribus cor-
rumpunt; adeò, vt plurimi ante sint Duces, quàm ferulæ ma-
ternæ manum subduxerint, aut per ætatem sapere possint.
Quapropter sciant Reges & Resp. pessimè secum agi, si rei
militaris imperitos, qui se otio magis quàm bello dedere,
virtute neglecta, iniustus fauor militibus præficiat.

C A P V T VI.

De Ingenio & Industria Ducis.

Non sufficit Ducem esse Scientijs imbutum, & bellicæ
rei peritum, opus est etiam vt sine mora, tempore ne-
cessitatis, possit monstrare ingenium suum & industriam,
casus aduersos in bonum interpretando; sedando tumultus
militum, aut consternatorum, aut seditiosorum; excogitan-
do dolos seu strategemata; conciliando sibi hostes; proui-
dendo commeatus; inueniendo nouas machinas, aut arma;
& id genus similia, quibus de se opinionem ingentis pruden-
tiæ

tia & dexteritatis, tam apud aduersarios, quam apud suos, conciliare posset. Nam quædam ingenia sunt vulgaria, plebeia, parua, deiecta, quæ in angustas damnata cogitationes, nil animis altum concipiunt, nil præclari cogitant, nec è sua humilitate excedere audent. Tali ingenio Dux præditus nihil ardui suscipiet, nihil magni cogitabit; nec præuenire hostem audebit, nec obsidionem aliquam difficilem aggredietur, aut aggressam perficere poterit; ne sciet possessam prouinciam retinere, aut victo acie aduersario victoriam prosequi, sed contentus felicitate pugnae domum reuertetur, aut præda sese occupabit. Propterea non sunt æstimandi Duces ex in dolis, quam habent bonitate, sed ex operum quæ faciunt, vel præstantia, vel prauitate.

Alia ingenia sunt, nimia mobilitate vaga, futilia, fluxa, euanida; quæ nullo saburrata pondere instabili huc illuc motu feruntur, fluida tantum leuitate constantia. Dux tali ingenio nihil præstantis efficiet, sed huc & illuc vagabitur cum exercitu donec eum perdat aut pereat ipse. Ita nostra ætate Mansfeldius contra Regem Hispaniarum & Ferdinandum II. Imp: modò Danum iuuabat, modò Hollandos, modò Halsium & rebelles: & nullibi insignem bello operam edidit, licet sæpius numerosissimum exercitum habuisset. Tandem ad Gaborium in Transyluaniam profectus nullo edito ingenij sui ad posteros militari monumento, inglorius obiit, relictis in Silesia quadraginta millibus armatorum ad trucidandum Ferdinando Imper, qui eos breui post per Duces suos ad internecionem ferè deleuit.

Item sunt ingenia tarda, dura, pingua, retusa, hebetia ad cogitandum, ad iudicandum imparata, ad capiendas disciplinas, nisi immanem adhibeant laborem, incommoda. Talia omnino ad militarem Præfecturam sunt inhabilia, nec digna nomine aut officio Imperatorio. Quibus cognatione quadam accedunt ingenia tortuosa, perplexa, intricata, multiplicia, quæ suis implicata vestigijs hærent, ut se euoluere

re atque expedire nequeant. Et proinde ad Imperatorium munus inepta, ut pote quæ omnia consilia perturbant, & nullum in castris ordinem possunt seruare, aut in agendo celeritate uti. Iam autem in bello sæpenumero inopinati tumultus ingruentes, tumultuariam quoque utilis consilij rationem expedire cogunt. Quo fit, ut è re nata, & difficili promendum sæpè sit subitum consilium. Nam in rebus bellicis, *insperata accidunt magis, ut inquit Plautus, quàm quæ speres.*

Sed inuenies & subita ingenia atque extemporanea, subtilia, prompta, elegantia, quæ celeri ad cogitandum motu, faciliè quæquæ compræhendunt, sed memoria parum fida, & iudicio infirmo. Talia sanè ingenia Ductoribus cohortium aut legionum potius, quàm Ducibus ipsis conuenire possunt; qui dolos in hostem excogitabunt, & modum oppugnandi vrbes, sed iudicio Imperatoris submittent, quem non modò acutum & perspicacem, sed & iudicio firmo, vastaq; memoria pollentem esse oportet.

Reperies etiam ingenia grauiora, robusta valentia, acri iudicio, singulari solertia, quæ in arduis versata negotijs, quoad tardiores, eo ampliores studij constantiaq; suæ fructus proferunt; Et non tantum ad regimen ciuile sed & ad Militare quoque sunt aptissima. Talis M. Marcellus teste Lilio fuit qui nihil ita agebat, ut aut fortuna, aut temere hosti commissum dici posset. Nam ut dicit Plutarchus. *Fortuna id unum hominibus non aufert, quòd lenè fuerit consultum.* Nemo autem melius consulere potest, quam qui iudicio acuto, & solertia singulari præditus est.

Neque defunt etiam temperata & mediocria ingenia, quæ inter fluxam leuitatem, & ponderosam posita tarditatem ad cultum humanitatis & bonarum artium imprimis valent. Sed nec in bellis spernenda omnino sunt, quia animos militum sibi conciliant faciliè, & aduersariorum sectatores ad se pelliciunt optimè. Talis apud Persas Metabarzenes fuisse dicitur, quo neque astutius alicuius Imperatoris. inquit Probus, cogitatum, neque celerius factum.

Omnem verò virtutis implent fructum, ingenia illa diuina, præclara, eximia, diffusæ vbertatis, expeditæ celeritatis, confirmatæ stabilitatis, quæ in rem omnem tempusq; commoda, ardua quæquæ animosè suscipiunt, & dextrè perficiunt: tam ad inueniendum prompta, quàm ad iudicandum acuta, & ad memoriam diuturna & firma. Et talia tam in fago quàm in toga præcipuo loco censentur. Qualis erat olim Scipio Africanus, qui sua industria conciliauerat sibi animos Hispanorum, Siculorum, Massinissæ & Sifacis, eorumq; sumptibus armauerat ingentem exercitum in Carthaginienses. Nuper similiter Gustauus omnibus militaribus virtutibus præditus & ingenio diuino, Germanorum viribus Germaniam occupauerat, & oppugnabat domum Austriacam. Sed ex veteribus L. quoque Sylla nimium laudatur, *Cui inquit Sallustius, nunquam super industriam fortuna fuit: multique dubitauere fortior an felicior esset: & cui ad simulanda consilia altitudo animi incredibilis.*

C A P V T VII.

De Vigore & Alacritate Ducis,

Vigor in Duce maximè in hoc consistit, vt lubens lubensq; & non coactus, expeditionem belli aggrediarur; vt deliberata in consilio, promptè & alacriter exequatur: vt susceptam expeditionem constanter vsque ad finem deducat; vtq; semper tam in pugna, quàm etiam ante pugnam, ardorem animi vultu oculisq; præferat; & nusquam desperatum animum suis militibus ostendat, aut desperatam vocem emittat. Quid enim audeant, si te videant segnem, & velut animi captum, huc illuc clamoribus circumagi? Profecto necesse est ad fugâ parati sint, qui Ducem suum sentiunt desperare. Excita igitur & doce, quo timoris minus fit eò minus fermè periculi esse. Semperq; in prælio his maximum pericu-

riculum esse, qui maximè timent. audaciam pro muro haberi.

Et quia nulla res magis in bello valet, quàm celeritas non segnis; ideo Dux sit alacer, vegetus, expeditus, & promptus in exequendo ea, quæ in consilio determinauit. Vnde Otto imperator dicere solebat. *Nullus cunctationi locus est in eo consilio, quod non potest laudari nisi peractum. quapropter consultare oportet lentè, consulta exequi festinanter.* Ne deinde accidat id, quod de Fabio Valente Tacitus scripsit. *Quod inter ancipitia deterrimum est, dum media sequitur, nec ausus est satis, nec prouidit.* Inutili cunctatione agendi tempora consulendo consumpsit. Nam in omni negotio bellico hæc tria potissimum requiruntur. Consultatio, Determinatio, & Executio. In qua re vltima præstabat M. Agrippa, & Septimius Seuerus: vterq; enim per omnia extra dilationes fuit positus, consultisq; facta coniungens. Quibus apud nos perquam similis erat Vitoldus; Apud Valachos Stephanus Palatinus; Apud Hungaros Ioannes Huniades; apud Albanos Georgius Scanderbegus; apud Regem Hungariæ Ioannem, Hieronimus Lascus Palatinus Siradiensis. Sed Alexandrum M. & Iulium Cæsarem, nemo vnquam hac in re superauit. Et de Alexandro quidem Q. Curtius dicit. *Nullam virtutem Regis istius magis, quàm celeritatem laudauerim.* De Cæsare verò Suetonius, *Ut persæpè nuncios de se prauenerit.* Eadem celeritate valuit Selimus Primus Turcarum Imp: qua Syriam atque Ægyptum occupauit. & Ferdinandus Cortesius in Nouo Orbe; & Gaston de Foix, Regis Galliæ copiarum Præfectus, qui in spacio quindecim dierum, liberauit obsidione Bononiam, profligauit ad Villam francam Venetos, & Prixiā recuperauit. Sed & Totilas Rex Gotthorum, ob celeritatem in agendo, laudem inter bellicosos Duces promeruit. Et apud nos in Polonia Romanus Sanguscus, & Alexander Lisouius hac eadem arte sunt celebres. quod vterque Moscorum copias & regna, ita sua celeritate oppri-

meret, vt nullus eorum Dux aduentum ipſorum præſentire, aut manus effugere poſſet.

Sed non tantum ſit alacer Dux in aggrediendo ea quæ in deliberatione determinauit, verum etiam perſeuerans in perficiendo, vbi reſiſtentiam præter opinionem ſuam naſtus fuerit. Qualiter Appius Claudius fecit; qui cum Veios obſideret, nec oppugnare urbem abſque ingenti damno ſuorum poſſet; nec ad promouendam in longum obſidionem ſufficientem apparatus haberet, recedere tamen noluit, populoq; Romano continuationem omnino ſuaſit. *Hic, inquiens, ſit terror nominis noſtri, vt exercitum Romanum non tadium longinquæ oppugnationis, non vis hyemis ab urbe circumſeſſa ſemel amouere poſſit; nec ſinem vllum alium belli, quàm victoriam nouerit; nec impetu potiùs bella, quàm perſeuerantia gerat.* Qua perſeuerantia Rex Hiſpaniarum uſus eſt in obſidione Oſtendæ, Poloni in expugnatione Boeſlaueciæ & Nacli, Rex Galliarum Ludouicus XIII, in euerſione Rupellæ. Stephanus Battoreus in obſidione Polociæ. Zamoſcius in obſidione Pleſcouiæ. Sigismundus III. in expugnatione Smolenſci, eiusq; filius nuper Sereniſ. Vladislaus. IV. ibidem in obſidione caſtrorum Moſcouiticorum, vbi & cælum nimium rigidum eſt, & commeatus ob rariffimas populationes, vias vliginoſas, vaſtitemq; ſylvarum valdè difficilis fuit. Vt igitur in pericula Dux bellicus audax eſt & alacer, ita in ſupportatione moræ, inopiæ, atque iniuriarum cæli ſit patiens, vegetus viuax, & ad omnes caſus promptus, quo milites etiam vultum ipſius conſiderantes, ſint ad omnia expediti & vigorofi, nullam deſperationem in rebus difficillimis animo concipientes.

Rochelle

C A P V T V I I I.

De Magnanimitate & Fortitudine Ducis.

Fortitudo ſecundum opinionem Ciceronis eſt. conſiderata periculorum ſuſceptio, & laborum perpeſſio. Eius par-

partes Magnificencia, Fidentia, Patientia, & perseuerantia. Ex quibus sanè fit Magnanimitas, quæ est rerum magnarum & excelsarum, cum animi ampla quadam & splendida propositio, agitatio, atque administratio. Magnus enim & à natura ipsa ad honestatem conformatus animus, nec asperitatibus terreri, nec vlla vtilitatis specie à recto amoueri potest. Et Dux belli tali animo præditus excelsa quæquæ cogitat; difficilia aggreditur: spernit mortem, sustinet incommoda, non quærit lucrum aut diuitias, sed constanter perseuerat in proposito, vnde immortalem gloriam assequi possit. Tales cum fuerint infiniti, nouem attamen præcipui atque incomparabiles Heroes esse dicuntur. Tres Iudæi. Iudas Machabæus, Iosue, & Dauid. Tres gentiles seu pagani. Hector, Alexander Magnus, & Iulius Cæsar. Tres denique Christiani. Carolus Magnus, Arthurus Britannus, & Gotifredus Bullonius. Cæterumquo ad Magnanimitatem & Fidentiam. M. Marcellus testimonio ipsius Annibalis celebratur, qui primus post tot clades acceptas ausus est Marte aperto cum Pœnis congredi. Vnde Annibal eum in acie conspicatus dixisse fertur. *Cum eo nimirum nobis hoste res est, qui nec bonam, nec malam ferre fortunam potest, seu vicit, fortiter instat victis; seu victus est, instaurat cum victoribus certamen.* Sed & Narses prætereundus non est, qui à Iustiniano Imp. cum exercitu in Italiam missus, tales tantasq; res gessit, tantas confecit expeditiones, tot Reges vicit, tantasq; de hostibus victorias reportauit, vt in vno ipso robur Herculis, audaciam Hectoris, generositatem Alexandri, ingenium Pyrrhi, & fortunam Scipionis esse Romani affirmarent. Ex ijs autem, qui ducti magnanimitate spreuerunt multitudinem aduersariorum, & paucis suis militibus, numerosissimos hostium exercitus profligarunt, Polonia nostra habuit ferè infinitos. Et nuperrimè Nicolaus Potocius Dux militiæ Regni Campestris, ad coërcendum rebelles Cosachos Zaporosenses missus, qui ducibus Pauluco & Skidano ultra quadragin-

ta millia congregati, insolenter sese gesserant prouinciales vexando, nobilitatemq; Catholici ritus (nam ipsi omnes Schismatici sunt, Græcanici ritus,) occidendo, & insurgendo in Dominos suos, quorum subditi erant. Igitur Paulucus relicto certo in loco benè munito cum reliqua multitudine, socio seditionis Skidano, ipse cum selectioribus quindecim millibus sclopetariorum, & octo millibus gregariorum more suo carraginibus vallatus, in campos apertos obuiam Potocio processit, habens octo maiores bombardas secum, ut inopinatum aggredi posset & circumuenire, eo quod intellexisset cum vix duo millia Polonorum penes se habere, & tormenta bellica nulla: præterea maiorem partem eorum equites esse. Potocius itaque conspecto aduersario, indignum retrocedere ratus, magno animo concurrere suos iussit, & cæsis ex eis vndecim millibus in acie, tormenta maiora accepit, fugientesq; ad Skindanum insecutus, ita fortiter eos, ubique sese opposcentes, cecidit, ut & ducem ipsorum Paulucum & chiliarchas præcipuos, viuos ceperit, adq; Regem Varsouiam miserit, potitus omnibus signis, sigillo, privilegijs & insignijs ipsorum. Ita enim sæpius fortes ac generosos animos Superi aduersis probant, eosq; docent dura ac difficilia non formidare, & sese cum fortuna luctando, ac pugnando exercere, ut egregia contentione, quid eorum virtus valeat, possint vniuerso Orbi ostendere.

C A P V T IX.

De Temperantia & Abstinencia Ducis.

Quia intemperantis animi motus semel admissi, liberas mentes subigunt, & impotentes feruntur in libidines. ideo Dux bello designatus sit temperans & quantum ad castitatem & quantum ad attræctionem rei alienæ; sed in omnibus se præbeat generosum, sobrium, modestum, frugalem.

lem. ut possit suo exemplo milites bonos efficere. Alias non poterit exercitum is continere Imperator inquit Cicero; qui seipsum non continet, neque seuerius esse in iudicando, qui alios in se seueros esse iudices non vult. Iam autem præcipua militis virtus esse debet, erga ciues patriæ, modestos, humanos, clementes; contra hostes verò, feroces & crudeles sese exhibere. Hæc non nisi ab imperatore discet. qui imprimis Castus oportet sit, ne voluptarijs distractus hinc inde cupiditatibus, rerum curam posthabeat maximarum, ut fecit Antonius. cuius animus ut in corpore amicè viueret, in ipso moriebatur. Et quamquam dimidium imperij administrandum haberet, & infinita negotia, nullis tamen vacare poterat, nec legatos audire, nec hostium conatus animaduerte, nec res ad bellum necessarias præparare, nec amicorum & sociorum amicitiam fouere. Adeo enim Cleopatra mentem eius detinebat, ut ne per horam quidem ipsam ad munia publica referre posset. Itaque Imperaturus refrenet primum libidines, inquit Cicero, spernat voluptates, animi labes repellat: tum incipiat alijs imperare, cum dedecori & turpitudini parere desierit. Maximè autem auaritiam fugiat; quia eà solà summâ authoritas in Duce est in corruptè & magnificè præesse exercitu. Exemplo Pyrrhus Epirotarum Rex, qui bello cum Romanis superior, captiuos omnes gratis remisit, testatus coram legatis Romanis, qui ciues suos auro redimere curabant, se non mangonum more cum Romanis negociari, sed certare tantum de gloria & imperio. Idem fecit Zamoscius cum Moschouitis quibus nobiles fœminas captas, honestè habitas absque vlllo litro remisit, barbarosque eorum animos in sui admirationem conuertit, qui palam testati sunt, se nusquam passos esse ut similiter cum Polonis matronis procederent, si eas captiuas haberent. Plerique enim viri fortes, vmbonum hastarumque micantium stricturas oculis contra spectant irretortis, at auri nûmorumque fulgorem aut faciei venustæ formam, non vsquequaque sustinent, mentisque ac-

ciem hebescere patiuntur, vel libidine incitante, vel auaritia.

Sobrium quoque Ducem esse oportet, ut in arduis negotijs parandis putandisq; peruigilet. Noctu enim quasi silente & quiescente animo, multa Ducis cogitatio molitur ac perficit. Hinc Iulium Cæsarem fortunam sibi fabricantem temperantiæ addictum fuisse, scripta super eo edita testificantur, adeò ut Marcus Cato dixerit. *Vnum ex omnibus Cæsarem ad euertendam Rempub. sobrium accessisse* nam Catilinæ coniurationem nihil aliud nisi ebrietas ipsius perdidit. Vnde Dux belli à poculis abstineat, inq; omni tempore & refrugi sit, quia facultates exhauriunt & exsiccant frequentia conuiuia aut compotationes, prodigaq; familiarum ministeria. Similiter & Tribunorum immoderati ac intempestiui sumptus, in vestes, gemmas, luxus atque delicias, dant occasionem ad rapiendum per vim aliena. Hinc ex verò inquebat Cyrus ille Xenophontæus. *Parsimoniam firmissimum esse penu rerum agendarum.* Scanderbegus verò inclutus ille militiæ Dux dictabat; *belligerandum ita esse hodie, ut cras etiam belligerare possimus:* habendus itaque apparatus, dispensandæ vires, partiendum ita matrimonium, ut quotidie emergentibus nouis creditoribus soluendo esse possimus.

C A P V T X.

De Comitatu & Affabilitate Ducis.

NVlla in viro nobili virtus affabilitate & comitate amabilior. Quid in Duce belli? is ut hostes ad se alliciat, ut prouinciales in obedientia retineat, ut milites in disciplina conseruet, ut agrestes noua de suo aduersario adferentes excipiat, ut per paganos hostium occupationes cognoscat, ut per speculatores consilia eorum exploret; necesse ut facilis sit in admittendo, comis in alloquendo, & affabilis in prouocando eiusmodi homines ad narrandum, quæ sciunt, aut sentiunt,

tiunt, aut iam fecerunt. Aliter, si vel superbia elatus, vel crudelitate feuerus difficilem adytum accedentibus ad se præbebit, in maximas difficultates incidet, cum nesciet conatus & consilia aduersariorum, aut ea iam post tempus sci-
et. Veteres Imperatores hac uirtute diuini habebantur, sed præcipuè Alexander Magnus, & Iulius Cæsar. Quinimò & Marcus Antonius antequam à Cleopatraz illecebris eius animus corrumpetur. Traianus quoque Imp. ob facilitatem & beneficentiam in omnes, omnibus amabilis erat, nulliq; formidandus, præterquam hostibus. Sæpius siquidem deliberationibus actionibusq; amicorum intererat, militum animos iocis & dictarijs excitabat, ægrotantes & sauciatos visitabat, donabat, consolabatur. Eius exemplo Carolus quoque Quintus, adeo fuit facilis aditu alloquioque, ut priuatum in modum se dmitteret, securus ubique maiestatis suæ. Atque, ut erat versatili ad omnia pariter ingenio, mores exteros ita induebat, ut non minus cum Germanis Germanum ageret, Italumq; cum Italis, aut cum Hispanis Hispanum, quam Belgis suis se Belgam præstaret. Indignus enim amore ille Imperator est, qui erga eos, qui multis ipsum plenisq; demerentur obsequijs, verborum etiam commodorum parcus est. Quod Zamoscius probè sciens, cum diuersarum nationum & linguarum milites in castris suis haberet, omnes sibi liberalitate & beneficentia comprimis, deinde affabilitate & facili accessu dicto obedientes efficiebat, ut illius amore omnia incommoda sufferent, omnia pericula subirent. Nulla enim tam est fera immanisq; belua, quæ non humanitatis cultu mansuescat: nullusq; hominum animo adeò in domito, ut leniter habitus beneficentia non mitescat. Trahebant ad se animos omnium sua humanitate Tyllius, liberalitate Bucquius, comitate Dampierus, facilitate Papenheimius, affabilitate Picolomineus. Sed his omnibus virtutibus præcellebat Gustauus, ut de illo velut de C. Cæsare dici verissimè possit, quod fuerit specimen humanitatis, salis, sua.

ſuauiſſimæ, leporis, beneficentiæ. Ipſe enim gregarios viſita-
bat ægrotos, ſolabatur deficientes, excitabat vacillantes, cõ-
meatu & pecunijs prouidebat egentibus, vt patrem eum ſui mi-
lites non Regem appellarent. Non parum igitur præſidij
erit, Ducem belli eligere, vulgi commendatione, ob huma-
nitatis cultum, & amabilem quandam comitatem, proba-
tum. Quem enim homines ſpontanea voluntatum inclina-
tione cordi habent, eius facilimè imperio parent, dicto audi-
unt, periculis ſubueniunt, decertantemq; protagunt. Ex-
pertus hoc Conſtantine Oſtrogius, qui in ſuis expeditioni-
bus non alia re glorioſus aut victor exſtitit, quam amore mi-
litum, & fauore agricolarum, qui ad eum omnia, quæ vel vi-
derant, vel inaudierant de hoſtibus, ex templò referebant. Qua
in re, quam diligens & aſſiduus Imperator eſſe debeat, capi-
te ſequenti videamus.

C A P V T X I.

De Diligentia & Labore Ducis.

DVx cui tantæ poteſtatis inſignia tribuuntur, cuius fidei
atque virtuti poſſeſſorum fortunæ, tutela vrbiũ, ſa-
lus militum, Reipub: creditur gloria, non tantum pro vni-
uerſo exercitu, ſed etiam pro ſingulis contubernalibus debet
eſſe ſolicitus: Si quid enim illis eueniat in bello, & ipſius
culpa, & publica videtur iniuria. Hinc apud Græcos lauda-
tur Themistocles, quòd prudenti ſuo conſilio ſeruauerit A-
thenas. Epaminondas, quòd illuſtrauerit ſuis victorijs
Thoebas. Xantippus, quòd ſuo ingenio iuuerit Carthagi-
nenſes, toties victos à Romanis. Fabius Maximus apud
Romanos, quòd ſua cunctatione reſtituerit rem Romanã;
& alij infiniti, qui officiũ ſui diligentes fuerunt; ſed inter eos
maximè Conon, de quo Probus. *Et prudens rei militaris,
& diligens erat imperij.* Similiter Paulus Æmilius, qui nul-
lam

lam rem non attentauit ipse, nullam non fecit. Ex recentioribus verò Ferdinandus Marchio Pescaræ hac in parte laudatur, tum quoque Franciscus I. Rex Galliarum. Nuperrimè verò Gustauus Rex Sueciæ, atque Carolus Chodkieuicius, copiarum Magni Ducatus Lituaniæ Magnus Polemarchus, qui identidem illud M. Catonis repetere solebat. *In bello nihil tam leue est, quod non magnæ interdum rei momentum faciat.* Proinde quæquæ minima ipse videre, ipse scire volebat; & quis Comes, quis tribunus, quis domesticus, quis contubernalis; & quantum possit in bello, velut alter Annibal probè cognoscebat; & nominatim velut Mitridates vnumquemque appellabat. Talis quoque olim apud nos Boleslaus Criuoustus Rex Poloniæ dicitur fuisse; & patrum memoria Nicolaus Melecius Polonicarum copiarum Magister.

Igitur sit diligens officij sui Imperator, & patiens laboris, ut non primus à militia deficiat, sed postremus. De Cæsare Tranquillus. *Laboris ultra fidem patiens erat, & in agmine nonnunquam in equo, sæpius pedibus anteibat, capite detecto, seu sol, seu imber esset.* Et apud Lacedæmonios Agesilaus existimabat, Imperatorem decere potius ut tolerantia, quàm mollietate priuatis hominibus præstaret; ideoq; ipse cum laborandum exercitui esset, sponte sua supra cæteros laborabat, quod arbitraretur eiusmodi omnia militibus esse solatio. Similis ipsi fuisse memoratur apud nos Constantinus Ostrogicus, qui ter & tricies, non minus sua felicitate, quàm diligentia & labore, victor exstitit: singula enim militaria munia ipse obibat, singula prudentis Imperatoris officia, per se exquebatur; & velut alter Cecinna, secundarum, ambiguarumq; rerum sciens, eoq; interritus semper fuit. Qualiter etiam Catonem Liuius laudat, *In parsimonia, inquit, in patientia laboris, periculisq;, ferret propè corporis animiq;.* Sed & Carolus V. in bello contra rebelles, licet totus podagra grauatus esset, nec posset pedem in staffa tenere, ligatum nihilominus & suspensum fascia in equo tota die tenuit, totaq; hyeme sub pædilio.

dilionibus mansit, memor dicti Vespasiani. *Imperatorem stantem mori oportere.* Sit igitur Dux plerumque in opere, ac in agmine gregario militi mixtus, incorrupto tamen semper Ducis honore.

C A P V T X I I .

De Exemplo Ducis.

Quia magis paucis mentes humanæ exemplis, quàm verbis mouentur plurimis, ideo si quid subito confici optet Imperator, primus ipse manu operi adnota conspiciatur. Nec enim militum vulgus adeò potentiorum comminationibus cogitur, atque præstantium dignitate virorum exemplis ad opus prouocatur. Vide Alexandrum in oppugnatione Tyri vrbis, Cum, inquit Polyænus, *amplam fossam mœnibus Tyriorum, directam superare cuperet, primus ipse corbem arena refertum apportauit: Macedones cum Regem suis manibus opus facere viderent, confestim abiectis chlamydbus celeriter loca exaquarunt.* De Caracalla verò Herodianus scribit. *Ipse utique nullum non militiæ munus obire: & siue quid fodiendum foret, primus fodere; siue pons flumini imponendus, aut exstruendus ager, siue quod opus manu faciendum, aut labor subeundus, primus omnia occupare.* Ita etiam Nero in Achaia Isthmum perfodere aggressus, primus rastello humum effodit, & corbulæ congestam humeris extulit. Et Vespasianus Imp. cum restituere Capitolium aggressus esset, ipse ruderibus purgandis, manus primus admouit, ac suo collo quædam extulit, inquit Suetonius. Simile refert Choniates de Manuale Imperatore, *Vrbis, inquit, Dorilai instaurationem aggressus, ipse primus saxa humeris portare cepit: eaque re aliorum alacritatem ita excitauit, ut murus celerimè in altum erectus, vallo extrinsecus muniretur; & intra mœnia putei complures, ut affatim aqua suppeteret, effoderentur.* Et

Vale.

Valerius Corvinus dictare solebat. *Facta mea non dicta vos milites sequi volo; nec disciplinam modò, sed etiam exemplum à me petere.*

CAPUT XIII.

De Prudentia atque Providentia Ducis.

Prudentiam à providendo Latini dixerunt, quod per eam animus, & futura prævideat, & præsentia disponat, & præterita memoria teneat. Nam qui de præteritis nihil cogitat, vitæ obliuiscitur: qui futura non prospicit, multis periculis obnoxius est, in omniaq; malè cautus incidit. Vera igitur prudentia est, & cognoscere quid petendum fugiendumq; sit, & quibus vijs tum ipse eo peruenire, tum alios eodem perducere commodissimè possit: nihil temere atq; inconsideratè agere, sed vnaquaque in re, quid rerum, personarum, locorum temporum varietas postulet diiudicare. Ex quo Providentiam quoque Cicero sic definiuit. *Providentia est, per quam futurum aliquid videtur antequam factum sit.* quòd nimirum prudentum non tam corporis, quàm animi oculi, nullis Aduocatis adhibitis, exactè & minutatim omnia, & à longè contemplantur. Et hanc verè Aristoteles ait esse propriam virtutem imperantium: nam ex præteritis & presentibus, ea quæ deinceps euentura sint colligit, causas revidet; rectè de rebus iudicat: sibi, suisq; in longum prospicit; & impendentia mala sapienter auertit. Eapropter Prudentia in Duce habetur tanquam oculus, & vigor animi, de quo supra egimus, tanquam manus: sine illa omnis bellator cæcus, sine ista impotens. Nam prudentia subministrat consilium, vigor animi fortitudinem. illa imperat, ista exequitur: illa prævidet difficultates, ista peruincit: illa confirmat iudicium meditantis, ista corroborat cor præliantis. Maximè autem requiritur prudentia in Duce, vt omnes casus aduersos, qui in bellis accidunt, sciat in bonum dextrè interpretari,

vti faciebat Germanicus teste Tacito, *quæ casus*, inquit, *obtulerat in sapientiam conuertenda ratus*, milites suos animabat ne conciderent metuleui ex re orto, vti sæpius in castris accidit. Id autem est & viri & Ducis, non deesse fortunæ sese præbenti, & calu oblata flectere ad consilium, vti Pericles fecit, qui territis suis Atheniensibus obscuracione solis, tali vsus est ad animandum prudentia. Gubernatorem suæ triremis perterritū ob eandem causam conspiciens, opposita ad eius faciem chlamyde, velatisq; oculis rogauit, nunquid horrendum eius rei signum putaret? abnuenteq; illo. Quid igitur interest, inquit, aut quid distat hoc ab illo, nisi quod maius quiddam chlamyde est illud, quod nunc tenebras agit. Prudentis itaque est, pro temporum ratione hominum ingenia ad commoditates suas applicare, & accurata cum consideratione res arduas & periculosas aggredi. Hinc tres partes Prudentiæ dicuntur esse. Memoria, Intelligentia, & Prouidencia, vt illi qui præsunt cæteris, bonarum & malarum rerum scientiam habentes, prudenter eis imperent, doceantque eos fidem colere, iustitiam retinere, alijs æquo animo parere, labores pro communi vtilitate suscipere, proq; gloria publica fortiter dimicare, siue secunda fortuna faueat, siue aduersa. Sed de hac capite sequenti.

C A P V T X I V.

De Fortuna seu Felicitate Ducis.

DVcis belli quatuor præcipua requisita esse aiunt. Longam bellicæ rei experientiam, Egregiam virtutis famam, Longe resplendentem authoritatem, & Fortunæ fauentis afflatum. De experientia itaq; & cæteris virtutibus in Duce requisitis, superioribus capitibus satis prolixè disputauimus. De authoritate illius capite vltimo dicemus: de Felicitate verò nunc breuiter disseramus, & sic librum istum secundum Institutorum rei bellicæ finiemus. Fe-

Felicitas itaque Ducis, non procedit à persona ipsius, sed ut plurimum à causa belli iusta, quam Deus ipse promouet, uti experientia sæpius compertum est. Nam & Andreas Dorianil memorabile fecit, cum militaret sub auspicijs Francisci I. Regis Galliarum: & in expeditione Sardica contrariam fortunam expertus est. Cum verò esset in seruitio Caroli V. insignes victorias obtinuit. Et Rentiuss fortissimus Dux fuit, cum pro Venetis militaret: infelicissimus cum apud eundem Regem Galliarum Franciscum I. & apud Clementem VII. fuisset. Licet igitur felicitas non semper comitetur virtutem (quia Deus dat etiam prosperitatem & Gentilibus, & Hæreticis & Machometanis contra malos Catholicos) tamen communiter bonos & pios, iustaq; ex causa arma fumentes Principes fortuna iuuat, ut nunc vidimus in Germania, quomodo omnes aduersarios suos Ferdinandus II. Imp. feliciter deuicerit, Ducesq; illius pro Imperij maiestate & religione Catholica pugnando, paruis sæpè corporijs, gloriosissimas victorias obtinuerint. Cum autem milites videt Ducem felicem, & prosperos belli successus, sequitur signa absque timore, & pro causa iusta, certam sibi pollicetur victoriam. Sylla hanc laudem habebat, quod XV. millibus peditum, & mille quingentis equitibus, profligauerit Archelaum & Tarsilem Duces Regis Mitridatis, tanta felicitate, ut ex centum millibus peditum, & decem millibus equitum, non effugerint ex integro decem millia. Ille verò de suis militibus non amiserit vix duodecem homines. Apud nos Lesniouius mille quingentis equitibus, quadraginta millia Moscorum aggressus, tredecim ferè millia ex eis occidit; ex suis verò vnum tantum modò amisit.

Observabant igitur diligenti cautione Romani; apud quos magistratus Consularis annuus tantum fuerat, ut si Imperator felix esset, ne mutaretur anno magistratus sui exacto, sed ei officium Imperatoris confirmabant in plures annos, ne videlicet sic ordo bellicus & progressus interromperetur.

retur. Ita Scipioni in bello Hispanico & Africano. T. Flaminio in bello Macedonico. C. Mario in Cymbrico, & Iulio Cæsari in bello Gallico; *quia animaduenterunt, inquit Historicus, interrumpi tenorem rerum, in quibus peragendis continuatio ipsa efficacissima esset: inter traditionem imperij, nouitatemq; successoris, quæ nascendis, priusquam agendis rebus imbuenda sit, sæpè benè gerendæ rei occasionem intercidere.* Itaq; tamdiu permiserunt Lucullo bellum gerere, quamdiu eum felicitas comitabatur: cum autem animaduertissent, quòd in medio cursu fortuna eum defereret, miserunt in locum eius Pompeium. Carthaginenses quoque cum uiderent res suas haud prospere per Duces gentis suæ geri, aduocarunt è Græcia Xantippum Lacedæmoniensem, & illi summam belli commiserunt, mutaruntq; fortunam in melius, Similiter Siculi resistere aduersarijs suis per Duces suos non valentes, Gilippum Spartanum aduocauerant. Idem Principes & Ciuitates Italiæ faciebant, cum factionibus Guelforum & Gibellinorum inter se dissecti essent. Et posteriore ætate quoque denuo, cum Bractiani & Sfortiani armis Italiam conquassarent.

Igitur felicitas non solum in militia, sed in vita omni Ducibus est expetenda, quia huc omnia in bellis referuntur: hanc autem nec dare sibi quisquam potest, nec augere; diuinum planè munus, sed ita Duci necessarium, ut quanquam reliquis affluat, si hoc vnum desit, nemo infelicem Ducem, doctum licet ac strenuum, eligendum censeat. Nam ut felicitatem fiducia, sic infelicitatem Ducum sequitur paupor militum, quo nil propius est exitio. In hac eminent Africanus minor, Camillus, Titus, Traianus, Theodosius, Alexander M. Cyrus, Annibal, Maharbali, Carolus M. Marius, Metellus, Ventidius Bassus, alijq; infiniti, tum Gentiles, tum Christiani, tum etiam Machometani. Sed quia ex felicitate Ducis maxime nascitur authoritas illius, idcirco de ea capite hoc ultimo videamus.

CAPVT VLTIMVM.

De Auctoritate & Reputatione Ducis.

DIximus quòd prudentia & animi vigor conciliant Auctoritatem Ducis, auget assidua in expeditionibus felicitas; nunc declarandum quomodo indies maiorem Reputationem faciunt diuersæ virtutes. Et *Primo* quidem, si scit tegere impotentiam suam, seu debilitatem virium suarum, vti faciebant Alphonsus Magnus, & Ludouicus Sfortia; qui licet bellis exhausti, omnium rerum penuria laborabant, sciebant tamen aduersarijs suis monstrare magnificentiam, splendorem, copiarum numerum, & com meatuum abundantiam. Sicuti nunc etiam faciunt Turcæ, apud quos, in loco vbi datut accessus ad Vesirium Magnum Oratoribus victorum Principum, aut etiam mercatoribus extraneis alioquium, singulis diebus veniunt trecenti baiuli saccos pecunijs repletos portantes, quos exonerant per fenestram ad id in proximo factam, velut fruges in cameram vicinam cum strepitu emittendo, vbi deinde alii ponderibus numerum simili cum sonitu æris examinant, quasi infinitus esset, nec posset numeratione computari thesaurus Imperatoris ipsorum, quod exteri videntes inexhaustos thesauros & assiduò accrescentes deferant famam potentiæ illius ad suos conterraneos; doceantq; timere Turcas. Quos vt arte deluderet simili Nicolaus Sieniauius Campiductor Poloniæ, post obitum Regis Augusti, licet exiguas copias secum habuerit, sciens tamen quam sit necessarium barbaris hisce monstrare potentiam cum sint in vicinia, ingressus erat prouincias ipsorum tempore Interregni, cum maximè scissum fuisset Regnum in factiones circa electionem noui Regis, & sic Mysiam Moldauiamq; defendendo, quarum Regulos turbare tunc cæperat barbarus & Principatu detrudere, ita fortiter cum paucis cohortibus tenuit à fræno furentes Turcas, vt saluam Reipub. dignitatem in integro conseruaret. Li

Secundò, vt belli Dux plura semper faciat, quàm loquatur: quæ autem loquetur, loquatur cum grauitate & iudicio, præsertim extraneis præsentibus. *Zamoscius* & *Chodkieui-*
cus mirabiles hac in parte fuere, quos magnopere nunc *Stanislaus Koniecpolscius* conatur exprimere, qui & natura breuiloquus est, & nullum verbum vanum extraneis præsertim audientibus profert, nisi quæ admirationem in barbaris pariunt. Magister huius virtutis *Scipio Africanus* fuit, de quo *Liuius* scribit, quòd *cum legatis Hispanorum loquebatur ita elato ab ingenti virtutum suarum fiducia animo, vt nullum ferox verbum excideret, ingensq; omnibus quæ ageret; cum maiestas inesset, tum fides.*

Tertiò, vt promissa fideliter exequatur: hinc enim illius constantia apparebit, & animi iudicium. Et non alia prorsus re apud *Belgas* gloriam sibi acquisiuerat & reputationem *Alexander Farnesius*, quam constanti promissorum executione; sicuti & *Magnus Zamoscius* apud *Liouones*, qui cum militibus ad dictam diem à *Repub.* solutionem, ob publici ærarii defectum, non impetrasset, res suas & bona tempestiuè oppignorauit, vt promisso tempore toti exercitui satisfaceret, aut potius verbo suo, quo fidem stipulatus fuerat, vt meritò de illo dici possit, quod *Paulus Aemilius* dicere solitus fuerat. *Is demum vir erat, cuius animum nec prospera flatu suo efferent, nec aduersa infringent.* Quandoquidem & clientelis & amicitijs felix, & victoriis clarus, & magistratibus in *Rep.* insignis, semper æquali animo fuerit & in prospera & in aduersa fortuna; nec si fuerit præpediri inuidorum calumnijs, aut maleuolorum factionibus cursum gloriæ suæ, vsque ad extremum vitæ. Sed & *Zoskieuius* ex eius disciplina prodiens, similesq; in *Rep.* Ducis Exercituum videlicet & Cancellarij supremi, honores gerens, ita semper infractus & immobilis tota vita mansit, vt vel solâ constantiâ ingens sibi nomen, & apud ciues suos, & apud extraneos compararet, nec desineret ea fideliter exequi, quæ in rem Patriæ putaret facienda, donec mors meliorem sortem ei monstrasset.

Quar-

Quarto, vt nihil supra vires suas tentet; quæ autem aggredietur, omni conatu perfici studeat. Et hanc ob causam res Hispanorum nunc benè succedunt, quòd rem semel cæptam nusquam deferant, nisi ad finem suum deductam. Pulchre hac de re Marcellus ad Q. Fabium, tempore obsidionis Caselini. *Multa magis Ducibus sicut non aggredienda, ita semel aggressis, non dimittenda esse, quia magna fama momenta in utramque partem sunt.* Et Scipio cum iuuenis adhuc ad regimen Hispanicorum exercituum missus esset, ea constantia munus susceptum prosequeretur, vt nonnisi cum gloria in patriam redire posset. Non ignorabat enim instandum famæ, ac prout prima celsissent, fore vniuersa.

Quinto vt sit in moribus & vestitu grauis, nec studeat nouitati; nec immutet regendi modum; aut facienda in bello Tribunis suis & cohortium ductoribus, per leues personas, aut pueros significet; sed per viros magnos, constantes, & fideles, peritosq; rerum militarium.

Sexto vt in omnibus suis actionibus monstret excelsum animum & Heroicum; non auarum atque sordidatum, sed magnificum & munificum, splendidumq; tam circa cultum diuinum, quàm circa ornatum suum priuatum & militarem. Quia nihil rerum mortalium tam instabile ac fluxum est, quàm fama potentiæ non sua vi nixæ. Vnde Tiberius Cæsar non abs re dicere solebat. *Ceteris mortalibus in eo stare consilia, quod sibi conducere putent; Principum diuersam esse sortem, quibus præcipua rerum ad famam dirigenda; maximè in bellis, vbi omnino requiritur vt Imperator sit summus seueritatis & munificentiae.*

Vnde auctoritatem maximam seueritate sumat, omnes culpas militares legibus vindicet, nulli errantium credatur ignoscere, & in diuersis locis, ex diuersis occasionibus omnium experimenta præcipiat. Tales sub Rudolpho. II. fuere in bellis Hungaricis Duces Mansueldius & Suartzembergius; sub Ferdinando II. Dampierus & Valseinius. A-

M

pud

puđ nos Lituanicarum Copiarum Præfecti, tres Chodkieu-
cij: Georgius, Ioannes, & Carolus, qui sibi ob virtutem suc-
cedentes in ista dignitate, seuerissime disciplinam milita-
rem conseruabant, exq; eo sibi apud omnes authoritatem
conciliabant; quæ de Ducum virtutibus atque prosperitate
fama concepta, augetur in dies opinione hominum. Ad
quod & forma corporis nonnihil confert, non mundicijs vti
supra diximus culta, sed virilis, & verè militaris. Insuper &
nobilitas sanguinis, & castrensis eloquentia; quo in genere
Julius Cæsar, Africanus Maior, & Pompeius apud Roma-
nos, apud nos verò ferè omnes Duces Radiuilli quicunque
bellis Lituanicis præfuerunt, celeberrimi habentur. Quo-
rum tanta fuit authoritas, eaq; sub illis militum fiducia, vt
non se ad prælium & discrimen, sed ad victoriam &
prædam duci crederent. Et hæc de Duce belli
eiusq; qualitatibus requisitis.





SIMONIS STAROVOLSCI INSTITVTORVM

Rei Militaris

LIBER TERTIVS

De Disciplina Militari.

CAPVT PRIMVM

De Militia in genere.



*M*ilitia est, inquit Lipsius, *Multitudo apta
& composita in armis, ad vim faciendam,
aut arcendam, sub certa lege.* Qui enim ad
militiam animum applicuere, eos non
modo vestium mox aliam ratione inire,
verum etiam in moribus, consuetudine,
voce, quin etiam in incessu, omnem ciuilem modum fastidire
videmus. Ideo sub legibus talem multitudinem congrega-
tam, in bona disciplina continere oportet, siue defendamus
nostra, siue in vicinos arma sumamus; aliter militum auda-
cia eo vsque grassatur, vt, aut euertere Rempub. possit, aut
certè bonos modestosq; ciues, ipsamq; demum Iustitiam ar-
mis seruire cogat. Sub fereis quandoquidem corporum te-
gumentis, feri, ferreiq; animi communissimè delitescunt.
Sub truculenta vultuum specie, dira morum immanitas, ef-
fre-

frœnata violentia, legum contemptus, prædandi sæuendiq; cupiditas, insolentia, perfidia, impietas habitat Meritoq; Alexander Seuerus, in milites seuerus fuerat; quia sciebat licentiam militum non nisi seuera punitione coerceri; exercitusq; non nisi diligenti disciplina conseruari. Hinc sæpius vsurpabat. *Disciplina militari Remp: contineri, quæ si dilabatur, & nomen & Imperium Romanum amissum iri.* Quippè quæ ex ignauo ciue fortem, ex intemperante moderatum, ex desidioso strenuum, ex luxurioso frugalem, ex libidinoso continentem efficit. Hinc Romanos omnes gentes sola armorum exercitatione & disciplina Imperio suo subiecisse videmus, quod tamdiu stetit, quamdiu secundũ leges Duces militẽ gubernabant, vbi autẽ de vetere disciplina remiserunt, statim ab omnibus gentibus quibus imperabant discerpti fuerunt, vt vix nomen nunc Imperij Romani reperiatur.

Omnis igitur copiarum vis consistit, aut in militum disciplina, aut numero, aut robore; sed quæ omnia suppeditat, meditatio seu exercitium assiduum: quia in omni prælio, non tam multitudo & virtus indocta, quàm ars & exercitatio solent præstare victoriam. Vnde optimus quisque miles, qui patriæ defendendæ incensus studio, nobilem ex armis gloriam quærit, otij impatiens ad nascentium bellorum famam exhilarescit, gaudiumq; concipit. Nihil volupe magis, quàm premere equum calcaribus, obtegere crinem casside, concurrere cum hoste aduerso, euadereq; in hostiles muros, pro gloria & victoria, nullum laborem, nullum periculum extimescere studet. Quia bellandi peritia gignit in eo audaciam: nec vllus timet agere, quæ antea se probè didicisse confidit.

Quapropter in pace militis officium erit, arma scire tractare, bello dignum se præstare, vita cætèris cum ciuibus æquali, iustaq; frui, nec eorum otiosæ dignitati armis nocere: & vt erga patriotas modestos, humanos, atque clementes, ita

contra

contra hostes feroces & crudeles sese exhibere. Quod ut fiat, interest Reipub: ut militibus leges imponat seueriores, quibus & ad exercitia armorum adigantur, & ad honestè viuendum compellantur, atque à lædendo deterreantur. Nihil enim immanius est armata iniustitia. Quare laudantur Epaminondas & Pelopidas, Thœbani, quod corruptum licentia exercitum, ad generosissimam militiæ disciplinam reuocauerint. Celebrantur Chabrias & Iphicrates, Athenienses. Hephestionis, Clitonis, Achillæ, Eumenis, Phylotæ, multorumq; aliorum, qui castra Magni Alexandri sequuti sunt, rei militaris gloria ora hominū peruagatur. Sed & Alexander Seuerus, cuius supra mentionem fecimus, sua gloria non caret, qui ita seuerè militarem disciplinam seruauit, ut cum exercitum in Parthos duceret, non milites; sed Senatores transire dicerentur. Quacunque enim legiones iter faciebant, Tribuni accincti, Centuriones verecundi, milites amabiles erant. Si quis de via, in alicuius possessionem deflexisset, pro qualitate loci & criminis, aut fustibus subijciebatur, aut virgis, aut condemnationi. Aut si hæc omnia transiret dignitas hominis, grauissimis contumelijs afficiebatur, quum diceret. *Visne hoc in agro tuo fieri, quod alteri facis?* Et ante eum longè multò C. Iulius Cæsar non minus se in milite modestiam & continentiam, quàm virtutem atque animi magnitudinem desiderare dicebat; quòd hic scopus optimi militis esse deberet. Sed ut concludamus.

Finis militiæ est, non diuitiæ, ut eas sibi proponunt omnes artes Mechanicæ; nec Imperia aut Principatus, qui interdum comparantur artibus pacis, aut per electionem, aut per successionem, aut per matrimonium; sed *asssecutio victoria*; partim animi dexteritate, partim armorum usu & fortitudine, partim denique occulta Dei voluntate, in cuius manu & felicitas posita est, & corda Principum, & denique ipsa victoria.

CAPVT II.

De Diuisione Militia.

Res militaris, inquit Vegetius, quæ armis constat & viris, in tres communiter diuiditur partes. Equites, Pedites, Classes. Equitibus campi; classibus maria & flumina; peditibus colles, vrbes, arces, plana & abrupta seruatur.

Hominum igitur quos ad bellum colligimus, siue in mari, siue in terra faciendum, alij bellatores erunt, alij imbelles, ad vsus tantum bellatorum necessarios, & ministeria accommodati.

Bellatores ij sunt, qui ad decertandum instruuntur, armisq; aduersarium inuadunt. Imbelles reliqui omnes habentur, vt Medici, Tabernarij, Chirurghi, serui; artifices & cæteri qui exercitum ministerij causa sequuntur,

Bellatorum autem alij Pedites, alij vectores sunt. Pedites, qui pedibus in terra enituntur. Vectores, qui aliquo feruntur vehiculo: quorum duplex est genus. Nam alij equis, alij elephantis vehuntur. Et qui equo vtuntur, iterum in duas partes distinguuntur; quippe, qui aut in curribus constant, aut equis ipsis insideant. Elephantis igitur Asiatici & Africani populi vtuntur. Europæi verò equis solum modò: currus verò iam pridem in vsu esse desierunt: nisi fortè ad portanda onera, aut commeatus; quibus nihilominus *Cosachi* tempore pugnae vtuntur, non quidem more veteri, sed ad tegenda latera, ne ab equitatu conculentur.

Pedestris quoque ordo in partes digeritur tres. Armatos, Nudos, & Semicopertos. Armati (non dico de veteri militia) nunc ferreo torace & galea teguntur, & ad offendendum partim sclopos & gladios, partim hastas aut bipennes gerunt. Nudi (quales præcipuè sunt Indi, Æthiopes, Narsingani Calecutenses, tum maior pars Americanorum) nullo prorsus torace aut munimine ad euitandum tela tecti, sed lance-

lanceis solummodò aut arcubus, ad inuadendum hostem armati: velis subtilissimis vmbilicotenus coperti. Seminudi dicuntur, qui vestibus quidem (in Polonia semper vnicoloribus) honestè coperti sunt, ast tamen nullo armorum defensorum genere muniti, ad offendendum aduersarium contritos, sclopos, secures minores, frameasq; ad latus aut gladios habent.

Equites similiter nunc in vniuerso Orbe, modo armandi inter se differunt. Pars enim armis tota obsepta est; & hinc cataphracti nomen habet. Pars non tota armis integitur. Cataphractos igitur eos intelligi volo, qui non solum sua corpora, sed etiam equos lorica vndique muniunt: & tales olim passim per Europam in vsu fuere; modo vix alicubi, præter Germaniam reperiuntur, idq; paucissimi. Partis verò non cataphractæ, *alij Hastati* habentur, *alij Ferentarij*.

Hastati qui manus conferunt & cominus hasta decertant, sunt in duplici differentia. Alij enim scutum gerunt, vt Persæ Siamitæ Chineses, Abyssiui, & ex Turcis nonnulli: & inde scutati dicuntur. Alij sine scuto hasta impugnant, qui ob id olim Hastati, seu contati vocabantur, nunc vulgò Hussari in Polonia & in Hungaria dicuntur: qui antiquitus more Germanico scuta etiam magna ferebant; nunc torace tantum modò ferreo, cum manicis loricatis, & casside armati, pellibus desuper tygridum, leopardorum, luporum, variorumq; animalium conteguntur.

Ferentarij verò equites dicuntur, qui eminus solent dimicare: quorum alij toracibus ferreis & galeis armati sunt, & sclopetis tantum breuioribus vtuntur: qui vulgò apud Germanos Reitari dicuntur. Alij leuius armati sunt, & in Polonia *Cosachi* appellantur, siue sint loricati vt moris est, siue non: quorum alij sagittis more Scythico vtuntur, & vocantur sagittarij: alij lanceis & iaculis more Arabū Turcarumq; & vulgò Velites dicuntur; alij denique sclopetis oblongioribus vtuntur; & à Gallis vsurpato nomine *Carabiniri* appellantur

Iantur. Omnes isti tales, iaculis emissis, manus de cætero cum aduersario conferunt, & rem gladio gerunt, non secus ac illi, quos hastatos appellauimus. Nam Velites antiquitus non solebant pugnare cominus, sed tantum ex equis optimè missilia iaciebant, præsertim apud Romanos; apud quos ad id genus militiæ, iuuenes corpore alacri deligebantur, & ad agilitatem assiduò exercitio assuefatiebantur. Vnde & nos quoque de delectu primum, deinde de exercitio militum agemus.

C A P V T I I I.

De Delectu Militum.

Quia in certamine bellorum, exercitata paucitas ad victoriam promptior est; rudis autem & indocta multitudo exposita semper ad cædem. Ideo qualis miles debeat ad bellum eligi, rerum ordo deposcit ut in primis dicamus.

Legio itaque ab eligendo appellata est, quod robur militiæ Romanorum in electis militibus præpolleret; vocabuloq; isto fides in eis atque diligentia desideraretur. Promiscuè enim vocati ad militiam, uti nunc mos fert, nec fidem seruant, quia puniri non possunt si diffugerint; nescitur enim ubi nati sint, aut quò abierint: nec diligentiam adhibent quia non sunt patriotæ, sed ex diuersis gentibus & linguis aggregati, etiam si prouinciã integram perdiderint, minimè curant, cum non sit patria ipsorum. Si igitur è diuersis gentibus & non subiectis Principi tuo prouincijs milites legendi sunt, de temperatioribus plagis eos elige; nam & ad pugnandum boni, & ad seruandam in castris modestiam apti. Aptiores autem de plebe rusticana, quàm de urbibus delecti, quia ad omnem laborem, tolerantiam, assueti, & luxus deliciarumq; nescij. Hinc maiores nostri nobilitatem vniuersam in agris manere iusserunt, quòd propriè militia in
mani-

manibus ipsorum esset. Nolueruntq; ciues Poloniæ vti curribus aut rhedis ad vehendum, aut quouis carpentorum genere, (præter fœminas) sed passim tam iuuenes, quam senes, in equis etiam domestica itinera peragebant, idq; perpetuò armati, ob quod in hodiernum Equites appellamur. Semper autem illi minus mortem extimescunt, qui minus deliciarum nouerunt in vita: ast qui iam rure relicto ciuitatis illecebras degustarunt, illi nec solem aut algorem ferre possunt, nec victu pariori & rustico in castris sunt contenti, sed semper sapidiores desiderant dapes, & luxum omnibus in rebus in castra inuehunt, ita vt iam passim popinas, culinas, & prostibula, sub padilionibus videamus.

Cæterum qui in proprio solo aut regno, facit militum delectum, siue illi equites siue pedites sint, has quinque viri militaris notas diligenter obseruet Patriam, Ætatem, Corpus, Animum, & Vitam.

Quantum ad patriam, scias quòd locorum asperitas hominum quoque ingenia durat, & vt Seneca inquit, *Fortior miles è confragoso venit: segnior est urbanus & verna.* Ergo è montibus meliores quàm è planicie; è syluis, quàm è campis; è pagis, quàm ex vrbibus. Talibus enim viris non labor insolitus, non locus vllus asper aut arduus erit, non armatus hostis formidolosus. Nescio enim quomodo minime mortem timet, qui tota vita nihil deliciarum persensit. Itaque hos maximè leges, qui saltuosos locos incolentes, duritiæ patientiæq; magis insuevere: aut si qui Septentriones & mare versus habitant; nam & hi ipso terræ suæ solo & cœlo acrius animantur.

Quantum ad ætatem; ex Romana regula eos legi suadeam ab anno decimosextimo, aut paullum supra: nec enim tantum celerius, sed etiam perfectius imbibuntur, quæ discuntur à pueris. Grandiores autem & veteranos si misces, vnà etiam vetera vitia admisces, vt sunt propria huius sæculi

N mala

mala, inertia & contumacia, & dedignatio parendi. Igitur in delectu faciendo, non tam veteranos, vt nunc mos inoleuit, intuendos arbitror, quàm eos, qui possint aliquando esse boni veterani. *Neque enim longitudo, inquit Vegetius, ætatis, aut annorum numerus artem bellicam tradit, sed continua exercitationis meditatio.* Et semper facilius est ad virtutem instruere novos milites, quàm reuocare præteritos,

Quo verò ad corpus. C. Mario grande & prælongum placuisse video, quales apud nos communiter Haiducos è Carpatijs montibus Proceres Poloniæ habere solent. Et Pyrrhus dilectori suo fertur dixisse. *Tu grandes elige, ego eos fortes reddam* quod fecisse videbatur tempore belli Turcici ad Chotimiam Georgius Dux Zaslauiensis, qui legionem suam ex viris stupendæ proceritatis collectam, in castra regia duxerat. Me tamen iudice, non tam staturæ rationem habere conuenit, quàm virium. Vtiliusq; est fortes milites esse, quàm grandes, media statura creatos. Sic tamen vt ex vultu, ex oculis, ex omni conformatione membrorum eos eligas: nempe quibus sunt dura corpora, stricti artus, minax vultus, & vt Tacitus de Germanis inquit, maior animi vigor. Tales apud nos sunt forè omnes Masouij, quibus utebatur Sigisf. III. ad expugnationem Smolensci, Duce Ioanne Gratiouio, viro haud impigro & forti, & qui non dubitauerit, quadringentos suos pedites Masouios, duobus milibus Hungarorum acie aperta opponere, & vtrò etiam in certamen prouocare.

Item obserua, ficcum, vegetumq; potius, quàm fluidum & crassum, superflua carne distentum, eligendum; quia velocitas est, quæ percepto exercitio strenuum efficit bellatorem, à qua nimirum magna illa & fluxa corpora, iudicio Lipsij, sunt aliena.

Sequitur nota quarta Animi, quæ maximè in delectu obseruanda. Nam hoc est, in quo totius Reipub: salus vertitur (ait militaris scriptor) vt tyrones non tantum corporibus,

bus, sed etiam animis præstantissimi deligantur; quia animus acer & præsens, ut docet Cicero, & acutus, idem atque versutus, inuictos viros efficit. Sint igitur eligendi, audaces, fortes, robusti probi, fati sui securi, laboris tolerantes, gloriæ auidi, & ut verbo dicam, qui nihil aliud timeant, nisi turpem famam.

Ultima nota in delectu faciendo vitæ, id est, quo genere quæstus aut artis sese sustentent: nam ad molliem aut duritiem, ignauiam aut ferociam, haud leuiter hoc facit. Hinc piscatores, aucupes, dulciarios, linteones, omnesque qui aliquid tractasse videbuntur ad gynecæa pertinens, Vegetius longè arbitratur repellendos à castris. Quin etiam opificum vulgus: & sellularij minimè militiæ idoneum genus.

Addit insuper ad Delectum Lipsius, duo egregia monita. *Primum.* ut non leue hoc munus & officium putes, aut passim quibuscunque mandandum, ut huius sæculi mos est: sed à magnis viris, magna diligentia idoneos eligi cures iuniores, in quo apud nos magnam nuper laudem promeruisse videtur Thomas Zamolscius Cancellarius Regni, & Lucas Zolkieuius, Pereaßlauiensis in confinio Scytharum Oczaco, uienſium Præfectus, qui complures cohortes è suis possessionibus ita ordinatè delectos, armis optimè instruxerant, & in vſum habebant. *Alterum.* ut idem talem repetas, & an ex integro numerum compleant diligenter inspicias, quia morbo, fugâ, missione, numerus imminuitur, nisi annis singulis, imò singulis pænè mensibus in decedentium locum iuniorum turba succedat, quamuis copiosus exhaurietur exercitus. Propterea Sigif. III. ad initium cuiuslibet mensis, aulicum suum peditatum ipse lustrare volebat, dumque grauioribus Reipub. distineretur negotijs, iubebat ad se venire in Palatium, vexillis expansis; & tibicinibus præcinentibus, ter quilibet sclopetum suum explodere tenebatur, illo per fenestram in aream prospiciente.

CAPVT IV.

De Exercitijs Militum.

EXercitus ab exercitio nomen accepit; quia non longitudo ætatis, vt supra cum Vegetio diximus, aut annorum numerus artem bellicam tradit, sed continua exercitationis meditatio. Vnde non tyrones solùm, sed veteres etiam & eruditi exerceantur continuò, ne intermissa consuetudine, animi militum debilitentur & corpora. Nam quemadmodum, benè exercitatus miles prælium cupit, & audet congregi cum hoste, ita formidat indoctus, & effugia quærit ignauus. Propterea apud Romanos tyrones bis in die, mane & post meridiem; veteranos autem semel tantùm exerceri solitos. Vegetius scribit: quia huiusmodi ludo & exercitatione, militum valetudo confirmatur, robur corporis acquiritur, metus excutitur, periculisq; assuescitur, sudando, nitendo, anhelando: atque demum singuli in feruenti sole caloribus, & algoribus sub dio perferendis exercentur, & famem, sitim, vigilias pati assuescunt. Iam autem omnibus omnium ætatum Historiis docemur, parum in bello valere militem inexercitatum, sæpiusq; profligatos exercitus numerosissimos, à paucis exercitatis. Vnde non legimus Consules Romanos aduersum hostes copiosissimos plures milites duxisse, quàm duas Legiones, additis auxilijs sociorum. Tanta in illis erat exercitatio, tãta fiducia, vt cuius bello duæ Legiones crederentur sufficere posse. Cassius solebat dicere. *Miserum esse, cum exerceantur athletæ, venatores, & gladiatores, non exerceri milites, quibus minor esset futurus labor, si confectus esset.* Imò & felicior labor; nam in omni prælio, non tam multitudo & virtus indocta, quàm ars & exercitium solent præstare victoriam. Tanta ideo cura præcipui omnes Imperatores suos exercuere, cum scirent maximos sæpè exercitus, à paucis deletos fuisse, & *Cæsaris milites*, inquit Suetonius

tonius, innumeras aduersariorum copias, multis partibus ipsi pauciores facile superauerunt. Cum itaque manifestè videamus in pugna vsum amplius prodesse, quàm vires; quia paucos viros fortes natura procreat, bona institutione plures reddis industria; idcirco quid sit exercitium, & quotuplex paulò latius videamus.

Exercitium itaque est, electum militem assidue ad arma condocere, & ad opus. ne vel ad pugnam rudis & inexercitatus procedat, vel eruditus in armis, otio torpescat & pigritia. Hinc Paulus Aemilius, officium militis tribus in rebus consistere dicebat, ut videlicet miles sit agilis & fortis: ut benè in armis exercitatus: & promptus ad omnem nutum Ducis sui. Similiter Brasidas tria in omni milite requisita postulabat. Voluntatem Verecundiam & Obedientiam. ut scilicet lubens volensq; in omni armorum genere se exerceat; ut turpe existimet fugere ex acie; & ut non recuset laborem iniunctum sibi ab Imperatore. Vnde Vegetius, Honestas idoneum militem reddit; verecundia dum prohibet fugam, facit esse victorem. Quamobrem Sarmatæ nostri, tam grauioris, quam leuioris armaturæ, equitatum, è sola nobilitate (lixis & calonibus exceptis) conscribere solent, quòd & audacius hostem, quàm plebei milites aggrediantur, & honestate ducti fugere ex acie erubescant, certocertiùs eo ipso amissuri honorem, quem sibi tanto sanguine sui maiores comparauerant. Dum igitur verecundia prohibet fugere, facit militem victorem, quem honestas & gloriæ cupido ad omnia idoneum reddit, vti supra expressit Vegetius.

Triples autem exercitij ratio esse debet. Vna. qua corpus induretur, atque incommoda pati discat, tum etiam agilius dextrumq; magis reddatur. Altera. qua arma tractare assuescat. Tertia. qua ordines tueri norit; idq; tam proficiscendo, quàm dimicando, tum etiam castra metando. Quæ quidem tres actiones, præcipuè sunt, quæ ab exercitu expectentur: nam si exercitus dextrè atque ex legibus mili-

tiæ iter faciat, dimicet, atque castra metetur, licet prælium finistrum exitum sortiatur, tamen Duci honos suus nihilo minus constabit. Eam ob rem priscæ Resp. omnes adeo hisce exercitijs inuigilabant, easq; usu & legibus tuebantur: Vt nullam harum partium vnquam intermitterent. Exercebant itaque iuuentutem cursu ad velocitatem; saltu ad agilitatem; lucta vel palo ad robur adquirendum: siquidem hæ tres partes in milite vix non necessariæ esse solent. Velocitas enim præstat, vt loca idonea hosti præripiat, aut illum expectatione citius inuadat, vel dissipatum aut fugientem citius assequatur. Agilitate ictus vitare, fossam transilire, vallum superare discit. Robore facilius arma sustinet, hostem ferit, impetum repellit, & omnem laborem perfert. Idq; imprimis curabant, vt corpora ad incommoditates perpetiendas oneribus bauulandis præmunirentur; quæ quidem assuetudo maximè necessaria est, siquidem sæpius contingere solet, vt in expeditionibus difficilioribus militi præter arma annona aliquot dierum gerenda sit, cui quidem oneri, nisi laboribus assuefacto parem esse non licet: atque hoc sanè modo, aut periculum aliquod vitari non posset, aut victoria nulla cum existimatione adquiri.

Ergo Dux curabit, vt siue legio, siue auxilia fuerint, exerceantur assidue; ac imprimis tyronibus per quotidiana exercitia, armorum est demonstranda doctrina, idq; exemplo veteri à Campiductoribus, quod solebat sæpius nostra ætate facere Mauritius Nassouius ipse, tum Gustauus Rex Sueciæ. Apud veteres autem Romanos nemo melius exercebat militem T. Manlio, Paulo Aemilio, Scipione, Numantino, Metello Numidico, Domitio Corbulone. Et post amissam disciplinam Alexander Seuerus, qui semper hoc in ore habebat. *Disciplina maiorū Remp. tenet: quæ si dilabatur, & nomen Romanum, & imperium amittimus.* Quod & euenit Imperio ad Græcos translato. Cæterum priusquam translatum fuisset, licet corrupta iam Republica, Adrianus Imp. nihilominus sem

nus semper militem habuit in exercitio: & ne obmurmurent Tribuni, ipse primus omnem laborem incipiebat, singulisq; diebus armis indutus & pedes, quatuor ferè millia ibat, cum exercitum aliquorsum duceret, eodemq; cibo utebatur, quo & milites Idem faciebant Aurelianus Imp. & Probus, atque ante eos longe in florente Repub. Valerius Corvinus, & Papirius Cursor. Et de Pompeio scribit Sallustius, quòd *cum alacribus saltu, cum velocibus cursu, cum validis veste certabat.*

Exercitium igitur necessarium valdè, quia errata in bello commissa emendari nequeunt, nisi prius fuerint longa armorum meditatione præuisa; quod nimirum poena præstet, & mors immineat ignavis. Nam qui non sunt benè in armis exercitati, aut ignauè pugnando confestim pereunt, aut in fugam versi, victoribus ultra pares esse non audent. Iam autem experientia illa in exercitatione, solet animum militis augere, cum nemo id tractare metuat, quod abundè se didicisse atque cognouisse sciat. Quapropter diligenter obseruandum est, ut ad minus ter in mensem, tam equites quam pedites educantur ambulatum; hoc exercendæ pugnae causa, tam in cliuosis & arduis locis, quam in planis, & limo paludibusq; obductis, ubi datis ferulis, aut rudibus, & iaculorum arundinibus, pugnam sine ferro, & sanguine depugnent. Et si in aruo sint, glebis ut missilibus Imperator uti iubeat, item crudo cestu, lorisq; bubulis. Designet quoque illis colles, cacumina, & ardua loca celeri cursu conscendere imperet: tum etiam submittat cum telis alios, qui illos exturbare contendat: eosq; laudibus efferat, qui vel permanserint fortiter reluctando, vel qui constanter oppugnando aduersarios deiecerint. Quare omnes dies festos, seu otiosos hisce rudimentis tribuere vellem; & postquam satis in ludicra pugna tyrones exercitati fuerint, tum ad seriam dimicationem iam exercendi erunt vniuersi, tela per dextrè vibrare, punctim & cæsim ferire, magnis viribus hastile con-

tor.

torquere, sagittas aut sclopos ex destinato dirigere, equos domare, atque demum in eis hastis concurrere; & non solum à dextris, sed etiam à sinistris partibus insilire & desilire subito, quod maximè docebant prisce, ut ad nutum Ducis omnis exercitus equestris in pedibus conspiceretur, iterumque ad momentum in equos se reciperet. Similiter exercendi sunt tyrones, fossas transilire, equum huc illuc flectere, velitationibus socios ceu hostes ex insidijs apte adoriri, & mox regredi ad turmas grauioris armaturæ, vel ad signa sua; in quo sese maximè veteres Poloni exercebant, nunc Scythæ assidua in meditatione habent, tum Turcæ, Persæ, Arabes & Nairi Calcutenses, non tantum in campis patentibus ac planis, sed etiam circa collium radices, quantum, per arduas asperitates attingere licet, certatim pugnando, cursim insequendo, mixtim præliando, aut tumultuariè velitando.

Iidem quoque natandi usum condiscere debent, quia non ubique pontes haberi possunt: præsertim si inopinato hostem aggredi volumus: sed & cedens & insequens natari cogitur frequenter exercitus. Ideo Scythæ nobis vicini, assiduis excursionibus Moschouiam, Valachiam atque Russiæ prouincias infestant, quia inopinato superueniunt, & flumina quæquæ maxima sine pontibus superant, tanta celeritate, ut à speculatoribus conspecti, pari cursu cum ipsis aduolent, pari que facilitate rapta præda abeunt; cum interim insequentes nostri, natare non assueti, ad ripas fluminum consistere cogantur. Si igitur exercitus tuus natare nesciet, multis commoditatibus, atque etiam occasionibus, rei benè gerendæ tibi carendum erit. Ac propterea veteres alijs exercitijs addebant & Natationem, quod nimirum, post Decursionem, Saltum & Palaria, illa quoque maximo commodo in bellis esse soleat. Præmiaque similiter vrinatoribus atque natatoribus proponebantur, sicut & equestribus turmis, aut legionarijs cohortibus.

Denique non sufficit multum in exercitijs desudasse, labori-

boribus affuefactos, veloces, natatores, agilesq; euasisse, nisi scias ordinibus quoque insistere, signa, tubas, tesseras, vocemq; Ducis agnoscere, atque ordines stando, recedendo, progrediendo, pugnando & proficiscendo tueri noueris. Si quidem absque hac disciplina, omni studio accuratissimè obseruata atque exercitata, exercitus nunquam bonus fuerit: cum omni proculdubio quantumuis feroces, at in ordinati, timidis sed in ordinem tributis longè debiliores sint, quod ordines timorem dissipent, neglecti verò ferociam minuant. Proinde militari gradu ambulare celeriter & æqualiter omnes milites discant, sic vt nec locum deferant, nec ordines turbent, sed quæcunque euenire in acie atque præliis possunt, omnia in campestri meditatione prænoscant, memores quod in quolibet bellico negotio, non tam prodest multitudo, quam exercitatio & virtus. Vnde & veteranorum cohortes, non modo tyronum, in hyberna missas, ad bellicas exercitationes traducat Imperator, nec sinat eas ociari vel desidere. *Nam otio quidem corporis vires mollescunt & languent: desidia vero, inquit Onolander, animi veluti euirantur, socordesq; & ignaui sunt, non prodeunt lubentes ad munera militaria, nec diu perseuerant, sed repente timore consternati trepidant, priusquam periculorum dubia tentauerint: simulac verò tentauerunt, abscedunt atque ita in illis, nec sperant, nec resistunt.*

Sint itaque matriculæ militum, in quibus nomina eorum scribantur, & patria cuiusque, tum ordo in aciem descendendi. Sed imprimis sint libri Iuris militaris & disciplinæ, vnde ad præscriptum viuere discant, & si neglexerint, puniantur. Ita faciebant Lacedæmonij & Athenienses, ita veteres Romani, qui ex paruis initijs imperia sua latissimè propagauerant, non alia re quam armorum disciplina, & assiduo militis exercitio.

CAPVT V.

De Operibus & labore militum.

Post exercitium armorum, exercitium operis necessarium, ut condiscat tyro assidue laborare, decurrere, portare, pondus, & solem pulueremque ferre; quia indurant hæc militem & exercitus labore, ut vetus prouerbium & verissimum est, *proficit, otio consenescit*. Quapropter è priscis Germanis Catti, militem suum super arma, ferramentis quoque & copijs onerabant. Et P. Nasica in hybernis, quamuis classis usus non esset necessarius, ne tamen desidia miles corrumpetur, aut per ocij licentiã socijs iniuriã inferret, naues ædificare instituit. M. Aemilius, ne miles ociaretur, viã per multa milliaria lapidibus sternere iussit, à Placentia usque Ariminum. Idem fecit C. Flaminius, & à Bononia incipiendo usque Aretium viam strauit. Quod considerans Domitius Corbulo, dolabra, id est operibus, hostem vincendum esse dicebat: quia exercitio quotidiano & laboribus assiduis temperatè adhibitis, & lacertis robur accrescit, & pugnandi cum hoste peritia acquiritur & operæ militum manibus effectæ, ad consequendam victoriam media subministrant. Idcirco Gustauus Germaniam ingressus, miram hac in parte disciplinam obseruabat, seueramque & exemplarem posteris reliquit, dum milites mollicie otioque marcescere minimè pateretur, sed continuis laboribus (moderatis tamen) exercerceret; ratus immodicam mollietatem nihilo magnis facinoribus aptiorem esse, quam dementiam; & fieri non posse, ut is qui luxui, & molliciei indulget, viro aliquid dignum, vel consulat, vel agat. Exercebat igitur semper militem aut prælijs, aut militari alio munere, ne per desidiã mollesceret: & propterea munitiones vbique nouas erigebat, veteresque reficiebat aut in meliorem formam, secundum artis peritiam redigebat, ut Stetini, Norimbergæ, Moguntia, Augusta Vindelicorum, Francofurti

furti ad Mœnum, Stralsundæ, Erfordix, alijsq; in locis infinitis? Vnde ipse etiam toto hyberno tempore in castris mansit. & vrbes oppugnabat, aut prouincias inuadebat, quia militē indefessum laborib; prælijs fortem, imperterritūq; periculis habuit. Nam qui vitam commodam voluptuosamq; ducunt, illam magni pendere solent, & pericula vitant, qui verò exercitam & laboriosam, floccifaciunt, & pericula cupiunt, vel ipso vitæ fastidio. Annibal quòd ociari milites suos Capuæ permiserit, Italia eiectus fuit. Alexander M. quòd in Babylonia luxui cum suis militibus deditus esset, ipse periit. Vnde Curtius, *Diutius in hac vrbe, quàm vsquam constitit Rex: nec ullus locus disciplinæ militari magis nocuit.*

Ea propter laboribus assidue sit occupatus miles; & imprimis pondus baiulare condiscant tyrones, vt in arduis expeditionibus, annonam pariter ac arma portare possint: tum fossam ducere, aggerem ponere, ligna secare, lapidum aut trunctorum moles, pro extruendis munitionibus conferre, tormenta bellica eis imponere, aut vallo admouere; proq; eis extruendis metallum gestare, corbes conficere, pontes extruere, fossam ducere, & fudes scienter figere. Quæ omnia nonnisi duratis ad laborem militum membris confici facile haud possunt, nostro præsertim sæculo, cum passim omnium gentium milites ad laborem ob molliciem videam ineptos, solis Moscouitis exceptis, deinde Cosachis Zaporosensibus, qui aliquid hac in parte de veteri disciplina inter se retinent. Nam apud Romanos olim, vt testatur Sallustius, *inuentus simul ac belli patiens erat, in castris per laboris usum militiam discibat* Sed cum campestris exercitatio, interueniente negligentia desidiaq; cessaret, grauiam videri arma ceperunt, quæ vt dicit Vegetius, raro iam milites induebant, & sic nudis pectoribus & capitibus congressi contra Gottom, sagittariorum multitudine deleti sunt, & totum deinceps Imperium amiserunt. Eadem desidia nostri sæculi milites, primo cataphractas, deinde cassides deposuerunt, sæpiusq; à

Turcis in Hungaria sub Rudolpho II. & à Scythis in Mysia atque Transyluania, sub Sigismundo atque Andrea Battoreis fratribus, cladem retulerunt. Ita enim fit, ut non de pugna, sed de fuga cogitent, qui nudi in acie exponuntur ad vulnera; & cum exercitium laboremq; declinant, cum maximo dedecore trucidantur vt pecudes.

C A P V T VI.

De Ordine seruando in militia.

PRæcipua est pars disciplinæ Ordo, qui multipliciter in Militia est seruandus. *Primum.* in digerendis copijs per Legiones, Cohortes, Centurias, & Decurias: quia *acies distinctior, & ex pluribus partibus constans, facilis partienti quacunque opus sit, facilis iungenti*, vt inquit Liuius. Etenim certum atque clarum est, non omnia omnibus imperanda, sed ita se ducum auctoritas, sic rigor disciplinæ habet, vt multa Centuriones, Tribunosq; tantum iuberi expediat; proinde in Ordinem milites dispositi, ad nutum regentis, sine tumultu respondent, cum eos aliquid facere velit; imperiumq; Ducis simul omnes copię sentiunt. *Deinde.* in incedendo, & stando in acie, vt scilicet omnes milites in itinere faciendo Ordinem seruent, & vt in pugna æquali legitimoq; spatio vnus distet, ab alio, nec vltra quam expedit, aut conglobent agmen, aut laxent. Nam grande in his rebus momentum: sæpèq; integri exercitus periere à tali aliqua confusione. *Postremo.* quia nihil tam vtile aut decorum hominibus, quàm Ordo; ideo in castris etiam diligenter seruandus, vt illa scilicet habeant apta dimensione vias suas, portas, fora: & sint velut ad formam minutæ vrbs. Ibi pro gradu, Legionibus, Auxilijs, Equitibus, & Peditibus, loca, in quibus papiliones tendant, deputentur, sic vt facilè cuique sit & locum suum, & commilitones reperire. Sed de hac re loco suo, hic autem

autem notandum, omnes populos in constituendis exercitiis, aut militia, ordinis aliquam rationem habuisse, atque eius præcipuum quoddam membrum constituisse: quod licet nomine tenus alij aliter mutauerint, parū tamen quoad numerum inter se discrepasse, compertum est; siquidem omnes istud ex sex vel octo hominum millibus composuerunt. Hoc membrum Romanis vocabatur Legio: à Græcis Phalanx, à Gallis Caterua: ab Heluetijs, qui quidem soli hoc æuo ex antiqua militia umbram quandam retinent, vocatur Regimentū, quod nobis aciem significat. Licet singuli istud postea in turmas atque agmina subdiviserint, atque ex arbitrio ordinaverint, Germani præsertim, qui ista Regimenta bellis modernis, vix quingentorum hominum habere voluerunt, modo titulos Tribunorum aucuperentur, & stipendia tanto nomine digna, à principibus emungerent, cum nec artem militarem norint alij, nec sciant quid Legio sit, aut quomodo administranda. Melius Cosachi Zaporofenses, qui per Chiliades exercitum suum distribuunt, & Chiliarcham decem Centurionibus præficiunt, Centurionem decem Decurionibus. Decurio verò præter novem veteranos, quibus præest de consuetudine, habet interdum in manipulo suo triginta & quadraginta tyrones, quos suis deinde commilitonibus instruendos æqualiter dividit. Unde Chiliarcha mille quidem veteranis præest, sed quandoque ad tria & quatuor millia hominum in sua Caterua habere solet, quibus ferè ad normam veterum Romanorum imperat, ad labores & militaria exercitia eos assuefaciendo. Sed maximè ab illis silentium in castris, & obedientiam, sub poena etiam capitis, non modò fustigationibus exigit. quorum exemplo, in omni planè exercitu, duas Ordinum rationes observari vellem. Vnam, qua vniuscuiusque cohortis, Alteram, qua vniuersæ Legionis milites obstringuntur. Sed in exercitio, cohortium id primum est, ut ordines ritè seruentur.

Princeps itaque, qui milites in suis prouincijs descriptos habet, iubeat vnamquamque cohortem exercere separatim, festis diebus præsertim, quo cognoscant tyrones, quali ratione sese colligere, quid ad classicum, quod in prælijs receptum est, agere debeant. Bis autem in annum ad minimum omnes cohortes iubeat conuenire ad Ducem Legionis, ad iustam exercitus formam componendam, ut discant omnes simul ordines in ea seruare, signa sequi, & imperium Ducis agnoscere, quibusue signis, vocibus, classico obtemperare; frontem, alas, atque subsidia noscere, hostem excipere, vel in eum ingruere, acies committere; quoque loco idoneo si pulsifuerint sese recipere, & vnde subsidia expectare. Hinc Iosephus in sua Historia testatur, Romanorum exercitijs id tandem effectum fuisse, ut etiam turba illa, quæ exercitum lacri causa sectari consuevit, cum de summa certaretur utilis esset, siquidem tueri ordines, atque in illis pugnare, omnes nouissent.

Quapropter Imperator milites suos & pedem referre, & hostes persequi, ordine semper seruato iubeat, ut non singillatim dispersi, in hostium manus incidentes, dum forte fugient, minore clade premantur. Et si rem benè feliciterque gerant, integris semper ordinibus ac manipulis, maiorem hostibus perniciem inferant, & fortiores existimentur, sintque re ipsa tutiores. Nam plerunque terga vertentes hostes, cum aduersarios passim, nulloque ordine insequentes vident, conspirantibus mutatisque animis, ordines suos repetunt ac reparant, rursusque inuersi impetum acriter vrgendo faciunt. Ut fecerunt Turcæ ad Canisiam, qui iam ferè omnes à Christianis dissipati fuerant; sed cum viderent nostros partim prædæ inhiare, partim dissipatos in victoria esse, obuersi tot millia interemerunt in instanti, quot multis annis Cæsares Germanici postea contra barbaros conscribere haud poterant: qui tamen non ita nimium cæsi in fuga fuissent, si ordines in recedendo seruare sciuisent. Vti obseruare licet in Heluetijs, qui

qui temporibus bellorum ciuiliū in Gallia, in illa memorabili pugna Dreuxensi, à Condæo sectariorum Principe acriter circumquaque oppugnati, nihil secius ordinibus seruatis pede presso restitere, cunctis alijs diffugientibus, hostemq; tantisper sustinere, dum viribus sensim accisis pedem ad sua castra referre cogerentur, hostibus in admirationem raptis, qui eos nullo modo dissoluere poterant. Ideo & Ioannes Austriacus, in pugna ad Mechliniam, cum suos laborare videret, quos ad certamen præmiserat, exercitum qui in acie stabat circumuectus, Tribunos ac Centuriones hortabatur, continerent loco militem, redeuntesq; à certamine socios, seruatis ordinibus reciperent: ne, quod confæderatis Belgis exitio fuit in Gemblacensi pugna, dum illorum equitatus actus à Farnesio in fugam, peditatum omnem interturbauit, afflixitq; idem Catholici Regis exercitui fortè contingeret, si ex accessu commilitonum, distractis agminibus percussus, superueniens hostis ex alienâ trepidatione ferox inuaderet.

Præcipua itaque cura militū sit, assiduo vsu permanere in ordine, vt adsuescant de facie, ac nomine, sese inuicem nosse. Item vt discant, quis progredi debeat; quo imperante; quo loco; quot socijs comitatus. Tum verò doceantur vel leuissimo nutu & signo adstare in ordine, agmen producere, vel contrahere, inclinare in læuum, in dextram latus, manipulos traducere, diuidere, condensare, vel etiam vicibus alternis accedere, & recedere. Quod quia ignoratum fuit à nostris in pugna Czezoriensi cum Turcis & Scythis, qui conglobati adoriuntur hostem, ideo carragines vnius cornu, quas extra vallum eduxeramus, & machinas æneas, in primo congressu amisimus. Quapropter adsuefiant milites aciei distributionibus, dispositionibus, ac obuersionibus tempestiue ante prælium, siue in Phalangem componenda sit acies, siue confertim colligenda, siue longa serie protendenda, siue ita, vt postremi aduersus circumuenientes obuerso vultu

vultu præliantur, pugna biceps, ac bifrons pugnanda, siue etiam receptui signo audito secedendum; quod Chodkievicius etiam hastatos equites facere edocebat, cohortem de loco non mouendo. Alias enim ordinum seruandorum insueti & ignari, trepidi admodum, post multos errores & anfractus, vix tandem dispositè cum equis suis conquiescunt. Qui verò communibus animis conspirare edocti sunt, dato signo, de repente, quasi naturali motu, ipsi per se feruntur in ordines, aciemq; pulchrè concinnatam componunt.

C A P V T . . . V I I .

De Officio Tribuni, seu Legionis Præfecti.

LEgio ab eligendo appellata est; quòd milites electos ex subditis naturalibus haberet: cui deinde addebantur auxilia è socijs, seu fœderatis populis, tam peditum, quàm equitum. Et equites sanè ad latera dispositi fuère, quos appellabant alas Legionis, ab eo, quòd ad similitudinem alarum, ab vtraque parte protegant acies, quæ nunc vexillationes vocantur, à velo; quod vexillo pro signo & Aquila vtantur.

Ritu itaque veterum Romanorum, in vna Legionem decem Cohortes esse debent. In cohorte autem qualibet, diuersum illi numerum ponebant; sed quarum prima, & plures milites reliquis habebat, & dignitate præcedentes alios Leginarios; quia & genere, & institutione literarum, viros electissimos requirebat. Et hæc Aquilam argenteam, signum præcipuum Romanorum habebat; & imaginem Imperatoris, totius Legionis insigne. Nos, æquales numero omnes cohortes, & æquales prærogatiua omnes milites habeamus, modò è strenuis viris collecta sit Legio, siue equites illi fuerint, siue pedites. Nam illi, vnicuique cohorti peditum, partem quasi septimam, equitum adiungebant, vt, cum cohors constaret 555. peditibus, bonos haberet 66. equites. Nos separatim, more præsentis, equites à peditibus habeamus; &
non

non vltra centum in vna cohorte: quia & facilius obire munia sua poterunt, & commodius in itinere à paganis sub tecta recipi, postquam iam sub dio dormire desueuerunt.

His adiungendi sunt artifices, machinarum structores aut vibratores, vectores, rhedarij, fabri, fabrorumque præfecti cum suis familijs & seruis, aut officialibus, vt quocunque in loco fixerit castra Legio, armatam faciat ciuitatem.

Legioni autem præest Tribunus: qui sic vocatur, à tribu, tribuendoque iure, quòd præesset militibus, quos ex tribu, primus Romulus legerat. Centuriones verò sunt, qui singulas centurias curant, nunc vulgò Capitanei, quasi capita cohortium vocantur. Decani verò, denis militibus præpositi, qui capita contubernij nominantur, quòd decem sub vno papilione degentibus præsent. Hæc nomina & officia, pedites Poloni, quos Haidones, ab Hungaris mutuato nomine, vocamus, rectè quidè ex vetere disciplina obseruant, sed melius Cosachi Zaporosenses. Reliquus verò peditatus Europæus plures officiales, cum in qualibet cohorte, tum in vniuersa legione habet, non vt ordinem melius obseruet, sed vt ærarium emungat, & miles vanis titulis inter ciues superbiat.

Legati verò sunt, Imperatoris Vicarij, quibus Legiones & auxilia vniuersa apud Romanos obtemperabant in ordinatione pacis, vel necessitate bellorum: in quorum locum nos Sarmatæ, tam in Lituania, quàm in Polonia, magistros militum, Viros illustres substituimus, quos vsitato nomine, Duces Campestris, appellamus; Imperatores verò ipsos, supremos exercituum Duces. Germani autem & alij occidentales, illos Campi Marscalcos vocant; istos Generalissimos belli.

C A P V T V I I I.

De Officio Cohortis Præfecti.

CEnturio, seu Cohortis præfectus, qui centum peditibus præest, habeat milites suos per decurias dispositos.

P

Opti-

Optim⁹ autem cuiusque decuriæ præponi, & ductor cæterorum omniū eſſe debet, qui & Decurio, & Decanus, & Dux, & Prim⁹, & Præſtes nuncupatur. Qui verò decurionem proximè ſequitur, Subſtes dicitur. Atqui toti⁹ Centuriæ, ſiue etiam Cohortis equeſtris, vltimū agmen claudit, eū Romani Tergiductorē vocabant: nos Vicariū Præfecti, ſeu Locotenentem appellam⁹, quod locū illi⁹ abſentis teneat, vicesq; gerat.

Vt autem Decuriones, ita & Signiferos & Tergiductores optimos eſſe omnino conuenit, ita vt & ſtatura, & viribus corporis præſtantes cæteris ſint, & rei militaris peritiores. Maxime tamen Tergidux ſuperordinarius prudens peritusq; eſſe debet (frequenter enim Præfecti ipſi ſeu Centuriones, fauore Principis, aut Ducis belli, iuuenes, & ignari rerum militarium, conſtituuntur: præſertim in Polonia equeſtrium turmarum Præfecti, eo quòd Procerum filij proprijs ſumptibus, non cohortes ſolummodò, verū integras etiam legiones interdum conſcribere ſoleant) qui & ipſum Ducem Cohortis, & omnes ſuos commilitones inſtruat, prouideatq; & procuret, vt ordine ſemper incedant, maxime autem prælij tempore, cum ab hoſte premuntur, aut recedere coguntur. Idem authoritate ſua, animo conſtanti, verbis atque exemplo reliquos in officio contineat, atque ad pugnam alacriores reddat, recedentesq; expugna vel metu, vel aliqua alia cauſa, prohibeat, & reſtitui cogat in ordinem: atque etiam cum conſtipandum ſit, compellat militem, cogatq; ſi vſus exigit, in arctum quàm maximè adduci, vel etiā diduci, & in partes ſeſe obuertere omnes. Decuriones quoq; ſinguli ſuas pecurias ſibi paratas habeant, cum illis in caſtris habitent, ſeſe exerceant, atque eoſdem ordines tueantur.

C A P V T I X.

De Officio Præfecti Turmæ.

Quemadmodum inter pedites Centuria vel Manipulus appellatur, ita inter equites Turma dicitur. Sicut igitur

igitur Centurio, ita quoque & Turmæ Præfectus eligendus est magnis viribus, magnoq; animo, procera statura; qui hastas vel missilia peritè iaculetur & fortiter, qui dimicare gladio, qui scutum rotare doctissimè nouerit, qui omnem artem didicerit armaturæ: vigilans, sobrius, agilis; magis ad facienda, quæ ei imperantur, quàm ad loquendum paratus. Contubernales suos ad disciplinam retineat, & ad armorum exercitium cogat, vt bene vestiti & calceati sint, vt arma omnium defricentur ac splendeant.

Et quia nunc moris est, vt quisque Turmæ aut Centuriæ præfectus habeat suum legatum seu vicarium, idcirco delegatus quoque iste, eligatur habili corpore, vt loricatus & armis circumdatus omnibus, cum summa admiratione contubernalium suorum equum possit ascendere, equitare fortissime, conto scienter vti, sagittas doctissimè mittere, hastam dirigere, acinacem vibrare, sclopetum promptè implere, & ex destinato explodere, audacissimè cum hoste congregi, turmalesq; suos, id est, sub cura sua equites positos, diligenter erudire ad omnia, quæ vel pedestris, vel equestris pugna deposcit. Nam hæc communissime ipsi Turmarum Præfecti, Dynastarum præsertim filij, vti tyrones ignorant. Proinde obseruet diligenter Imperator, vt si illi inualidi sunt, & pueri adhuc, habeant legatos suos, longa militia probatos; peditibusq; suis, quos ære proprio conscriptos habere penes se consueuerunt, veteranos Centuriones præponant, ne per conniuentiam ipsorum, castrensis disciplina paulatim dissoluatur.

Notandum, quòd antiqui, qui sciebant in acie commisso prælio celeriter ordines turbari atque confundi, ne hoc posset accidere, Cohortes in centurias diuiserant, & singulis centurijs, singula vexilla constituerant, ita, vt ex qua cohorte, vel quota esset centuria in illo vexillo literis esset scriptum: quod intuentes vel legentes milites, in quantouis tumultu à contubernalibus suis aberrare non possent. Centuriones.

rionesq; ipsos transuersis casside argenteis cristis, quo facilius noscerentur, singulas iusserunt gubernare cateruas, quatenus nullus error existeret, quum cuncti milites sequerentur non vexillum suum, sed etiam centurionem, qui signum habebat in galea. Præterea in aduerso scuto vniuscuiusque militis erat nomen literis ascriptum, tum ex qua esset cohorte, ex quaue centuria. Quod posset iterum in consuetudinem reuocari; quamuis & hoc non male, quod apud nos superioribus annis, tam Cosachi equites leuioris armaturæ, quàm pedites omnes per vnicolores vestes, cuius centuriæ fuerint, dignoscebantur: sed nunc iam in defuetudinem venit, postquam ad morem Germanorum, peditatum nostrum exercere cœpimus.

C A P V T X.

De Officio Præfecti Castrorum.

CAstrorum Præfectus est, ad quem castrorum positio, valli & fossæ destinatio pertinet. Ad eundem prisca consuetudine tabernacula, vel casæ militum, cum omnibus impedimentis pertinebant, ipsiusq; nutu curabantur. Præterea, ægri contubernales, & Medici, à quibus curabantur. Expensæ etiam ad eius industriam pertinebant, vehicula, currus, & ferramenta quibus materies secatur, vel cæditur, quibusq; aperiuntur fossæ circa situm valli, & aquæ ductus. Item ligna, stramina, asserses ad pontes exstruendos, & omnia genera tormentorum. Et propterea sub eius iurisdictione fuerunt lignatores, lapicidæ, machinarum artifices, libratores, armentorum custodes; atque omnis generis artifices; currus item publici, tam victum, quàm arma, & quæ eo spectant, gerentes. Vnde & apud nos prisco Romanorum more, post longam probatamq; militiam, peritissimus omnium, olim ad hoc officium legebatur, alter in Polonia, & alter

& alter in Lituania, cum honore & titulo perpetuo. Cæterum nunc, non eadem prudentia in eis requiritur, quòd titulo contenti, in castris nusquam compareant, vt rem opere præstent, idcirco Copiarum Duces alios in campo pro libitu suo creant, & immutant.

Præfectus igitur electus, postquam vias castrorum delineauerit, necesse est, vt quatuor spatia pro impedimentis relinquat, adeò, vt vnum armentis, alterum artificibus, tertium annonæ, quartum armamentario cederet. Caueatq; diligenter, ne Machinæ vitari, aut auferri ab hoste possint. Hinc Gregorius, Tolossanus. *Magnam partem victoriæ tulit, qui armis hostem exuit, vires enim sibi ad supremum triumphum addidit.*

C A P V T X I.

De officio Præfecti Fabrorum & Tormentorum.

HÆc erat antiquorum Imperatorum cura præcipua, vt quicquid exercitui necessariū videbatur, nunquā deesset in castris. Quare, quælibet Legio habebat fonebatq; fabros lignarios, ferrarios, instructores, carpentarios, pictores, reliquosq; artifices, ad situs locorum, vrbium, aut munitio-num depingendos; ad hybernorum ædificia fabricanda, ad pontes exstruendos, ad machinas præparandas: tum qui arma, qui vehicula, cæteraq; genera instrumentorum, aut armorum, (quibus vel expugnantur, aduersariorum ciuitates, vel defenduntur propriæ) vel noua facerent, vel quassata repararent. Ista cura in omnibus ferè Christianorum Principum exercitibus neglecta nunc est, Venetis, atque Batauis exceptis; sæpiusq; ob id cæptas dissidiones omisas vidimus, vel in longissimum tempus protractas. Quin & exercitus in proprijs castris ab obsessis deletos, quòd ob intermissum exercitium & laborem, eiusmodi instrumenta in campum deferre noluisent.

Quapropter, non vniuersus modò exercitus, sed quæquæ Legio habeat ad fossarum opera facienda bidentes, ligones, palas, rostra, alueos, cophinos quibus portetur terra. Itemq; scaphas, harpagones, falces ferreas confixas longissimis contis, dolabras, secures, ascias, ferras quibus materia ac pali dolantur, atq; secantur. Præterea, testudines, musculos, vineas, colubrinas, hastas, sclopetas, frameas, tormenta ænea; turres etiam ambulatorias & scalas, atque ea vniuersa, quæ in quoque belli genere necessaria esse creduntur, vt etiam medijs in campis Legio depræhensa, non metueret repentinum hostium superuentum, sed subito fossa se valloq; muniret; omneq; genus militare instrumentorum & artificium in se contineret. Quiduis enim efficit solertia, si competentes non denegentur expensæ.

His autem omnibus & instrumentis & fabris, præficiatur in qualibet Legione vir prudens & fidelis in expendendo, tum diligens & sobrius in attendendo ad operas artificum. In vniuerso autem exercitu, sit vnus, qui his legionarijs fabricorum præfectis, cum authoritate præsit, & ab illis tam expensarum, quàm etiam instrumentorum omnium rationes exigat, & ad Imperatorem deferat.

C A P V T XII.

De Buccinatoribus & Tympanistis.

Veteres habebant in castris Tibicines, Cornicines, & Buccinatores; de Tympanistis verò nullibi legimus, sed dicunt esse nouitium inuentum Heluetiorum, quamuis Calcutenses & Magoriani antiquitus vtantur tympano æreo, & laminis sonum ex concussione edentibus, à quibus deinde Persæ, & ab his Moschouitæ tympana partim lignea partim ærea equis adligare parua consueuerunt, Tribuni præsertim aut turmarum ductores, quibus vel ad pugnam, vel ad iter
milites

milites concitare solent. Apud Romanos verò Tubicines ad bellum vocabant milites, & rursum receptu canentes reuocabant. Cornicines & Buccinatores, erant ornamentum Legionum in ingressu conflictus, & eius reditu. Modo quoties ad aliquod opus mouentur milites, siue ad pugnam, siue ad iter, tubicines canunt, & tympana murmure suo resonant. Cornicines verò & fistulatores varij ornatus causa adhibentur, tam equitum turmis, quam peditum centurijs, in Polonia præsertim, vbi peditatus & Hungarico & Germanico more instruitur; equitatusq; è nobilitate collectus, pro sua animositate & libertate militari, diuersarum gentium armis & habitu utitur. Cum autem eos, vel pugnare, vel stare, vel sequi, vel redire ex acie, Duces Supremi iubent, tuba ænea insonante, datur peculiare signum. Vnde Vitoldus Magnus Dux Lituaniæ in quadam pugna multitudini Scytharum resistere nequiens, ad ripam Borystenis, vbi castra habebat, tubas quæ vento inflante sonarent extruxerat, ipse autem in alio loco, nocte obscura fluuium transgressus hostem inopinatò adortus erat, & victoria potitus insigni, multa Scytharum millia in captiuitatem duxit, quibus deinde sedes in media Lituania propè Vilnam assignauit; qui in hodiernum etiam genus suum ducunt, suntq; vtilis bello Regibus Poloniæ. Moschouitæ complures solent tubicines habere; & in pugna illa Orsanensi, toto Orbe celeberrima, quingenti buccinatores fuerunt. Turcæ è contra, paucissimos tubicines habent, & tympana ferè nulla, præter ipsum Imperatorè; Bassæ verò & triremium Præfecti, fistulatores penes se habent; ad pugnam verò loco tubarum clamore, sicut & Hungari, concitantur. Nairi autem in India, cum ad prælium procedunt, laminas æreas singuli gladiatorum manubrijs appedunt, quæ ferro allisæ strepitum ingentem efficiunt, & sic ad pugnam omnes accendunt. Sed confusio inde maxima in acie nascitur, quia à pugna milites reuocari non possunt, cum opus est: melius est uti tubis.

Nam

Nam ſicuti qui ſaltant numeris Muſicis obtemperare ſolent, atque eo modo errare neſciunt, ita & milites ſi buccinis & tibijs obtemperant ordines ſuos facilè tuentur. Proinde veteres mutabant ſonitum crebrius, prout ipſis viſum erat, vel gradum mutari, vel animos incitari, componi aut refrœnari. Sicuti autem modi iſti diuerſi, diſtinctiq; erant, ſic etiam diuerſa hæc nomina ſortiebantur. Doricus etenim conſtantiam, Phrygius furorem excitabat, reliqui ſonitus alia ſigna motus dabant. Alexander Magnus habebat Antigēnidam excellentiſſimum tubicinem, cuius ſonitu ita excitabatur ad prælium, vt circumſtantes Duces eum timerent, cum ſcintillas ex oculis ipſius ardentes prodire cernerent.

Neceſſe itaque eſt vt milites obtemperare tubis aſſueſcant; auresq; eorum crebris exercitationibus inbuantur, quia & nunc, prout & olim, varia tubarum aut tibiæ ſunt in bellis genera, quibus varia imperantur à Ducibus. Et Lacedæmonij quidem, ſicut ex Thucidide cognoſcimus, fiſtulis tenuib; utebantur, qualib; fortasſe nunc peditatus Germanicus vtitur. Carthaginenſes in primo conſlictu citharas adhibebant. Macedones & Romani cornua atque buccinas habebant. Poloni nunc omnia genera tubarum & fiſtularum habemus, ſed diuerſimode adhibemus: fiſtulas Bulgaricas equitatu, tibiæ verò Hungaricas peditatu attribuiſimus: Item tympana ærea maiora haſtatis, minora velutibus, lignea Heluetica peditibus damus; ſigna autem imperatiua omnia, in caſtris præſertim, per tubæ ſonitum denunciamus.

Eapropter buccinatores propè Ducem Supremum collocentur, tum iuxta Tribunos reliquos, vt ad iuſſa Ducis moſtrent, quando vel conſiſtendum, vel mouendum; vel etiam pes referendus, aut tormenta diſplodenda. Hos deinde reliquarum cohortiū ſonatores & tympaniſtæ conſequantur, qui, cauendum diligenter, ne inebrientur, cum hoſtis in proximo eſt, ne fortè aliquem errorem ſono edito committant,

aut

aut totum exercitum conturbent, ut accidit Koniecpolscio in Prussia bellum gerenti, qui cum nocturnas insidias ad capiendum Gustauum propè Grudentum collocasset, ipseque eum in acie armatus expectasset, eo quòd ille excubias suas aggressurus inopinato veniebat, Tympanista Germanus qui in insidijs collocatus fuerat, prætereuntem Gustauum conspicatus strepitu tympani factò, ut retrocederet admonuit, vel utrò saluti illius consulens, vel, ut ferebatur, mero occæcatus, aut in furorem incitatus; atque sic periculo suo, Regem in casses ruentem, periculo exemit.

C A P V T X I I I.

De Calonibus & Lixis.

ANtiqui calones & lixas, ad exemplum militum sub signis habebant, vexillaque eis dabant, ut scirent ad quæ signa deberent impedimenta, quæ conducebant, tempore necessitatis colligere. Ideo eis, ex ipsis calonibus idoneos ac peritos usu legebant, quos non amplius quàm ducentis lixis præficiebant, & ad pugnam adhibebant. Ita Minutius Rufus, & Accilius Glabrio, Romani Consules, superiores euaferunt, lixas loco auxiliorum à sylua venientes in terrorem exhibendo. Ita Marius circa aquas Sextias, cum in animo haberet postera die depugnare aduersus Theutones, Marcelum cum parua manu equitum peditumque; noctu post terga hostium misit, & ad implendam multitudinis speciem, agasones lixasque armatos simul ire iussit, iumentorumque magnam partem instratorum, cum centunculis, ut per hoc facies equitatus obijceretur, præcepitque ut cum animaduertissent committi proelium, ipsi in terga hostium descenderent: qui apparatus tantum terroris intulit, ut asperrimi hostes in fugam versi sint. Caius etiam Sulpitius calones atque lixas, mulis atque alijs bello inutilibus iumentis imposuit, eosque tanquam

agmen

agmen cataphractorum dispositos, in ipsa cum Gallis pugna in colle vicino comparere iussit, atq; sic victoria potitus est. Qua itidem ratione Chodkieuicius in Liuania contra Suecos feliciter usus fuit, & Lisouiani Cosachi in Germania contra rebelles Morauos cum Ferdinando II. Imperatori suppetiatum iuissent; cum hoc sit commune quasi Polonis, lixas tempore necessitatis pugnae immiscere, aut ad defendenda castra ad castra adhibere, vel vrbibus oppugnandis in acie monstrare. Vnde cum Vielikolucos in Moschouia Rex Stephanus expugnaret, in illo assaltu, in quo arx primùm capta fuit, calones & lixæ primi quoque fuerunt qui muros conscenderant, auxerantq; numero suo terrorem hosti, qui paucitatem militum regionum flocci pendebat.

Attamen in calonibus etiam atque lixis debet esse delectus, ne pueri sint nimium, aut malarum artium sectatores: tum ne mercatores rerum ad luxum spectantium adhibeantur, aut cupediarum venditores. Maximè verò cauendum est, ne foemine comitentur castra, in quo maximus committitur modo error apud Germanos, qui tot ferè foeminas habere solent in bello, quot sunt & viri. Turcæ, Persæ, & Scythæ hac in re prudentiores, qui nullam in castris foeminam patiuntur, nisi fortè captiuam. & meritò. quia & comœdum consumunt, & foctorem in castris augment, & timorem in viris suo pauore excitant, & militem eneruant, & quòd grauissimum est, peccatis multiplicatis iram Numinis prouocant, quod animaduertens Metellus, etsi gentilis & idolorum cultor, ipse nullum tamen puerum, in bello cum Iugurtha, nullam foeminam, nullumq; popinatorem, in castris suis habere voluit; imò & lixas admittere noluit, quo milites delicijs assuetos labori addiceret, atque sic instructos pristinae disciplinae restitueret.

CAPVT XIV.

De Mercede conductis.

ET si multo vtilius est naturales subditos in castris habere, quàm populos alienos mercede conducere, tamen quia raro, aut ferè nusquam exercitus fieri possunt absque alienigenis, ideo in mercede conductis præliandi magis adnunculum sit, quàm principale subsidium, ne videlicet amplior eorum multitudo sit, quàm ciuium. Nisi fortè necessitas aliter postulauerit, aut Princeps suis militibus diffidat. Vtilius tamen semper constat erudire armis suos, quàm alienos mercede conducere: quia exteris proprium est tumultuari, fidem excutere, patriæ incolas tanquam hostes vexare, atterere, vrere, & magnis tormentis excruciaci. Testis sit Michaël Palæologus Orientis Imper. qui Turca contra Bulgarum accito, mox nedum ab eo destitutus est, veùm etiam Constantinopoli Imperij sede exutus fuit. Ita quoque Franciscus I. ad Papiam Heluetiorum beneficio, qui ob inopiam rei pecuniariæ rebellabant, fusus fugatusq; imo & captus ab hoste fuit. Quapropter Hanno Carthagenensium Imperator in Sicilia, cum comperisset Gallorum mercenariorum circiter quatuor millia conspirasse ad transfugiendum ad Romanos, quòd aliquot mensium mercedes non receperant, animaduertere autem in eos non auderet, metu seditionis, prolationis iniuriam liberalitate pensaturum: quo nomine gratias agentibus Gallis, per tempus idoneum datis pollicitis, fidelissimum dispensatorem ad Otacilium Cons. misit, qui tanquam rationibus interuersis transfugisset, nunciauit nocte proxima Gallorum quatuor millia, quæ prædatum forent missa, posse excipi. Otacilius nec statim credidit transfugæ, nec tamen rem spernendam ratus, disposuit in insidijs lectissimam manum suorum, ab ea Galli excepti dupliciter

Q²

Hanno.

Hannonis consilio satisfecerunt, & Romanos ceciderunt, & ipsi omnes interfecti sunt.

In necessitate tamen exteros milites Imperator legat, & utatur eis prudenter, exercitatione moris sui adhibita. Nam cum in expeditionibus plurimum profit omnes milites vnius præcepti significatione conuerti, non possunt æqualiter iussa complere mercenarij, qui sunt alterius gentis & linguæ, nisi fuerint pariter exercitati. Propterea instruantur diligenter atq; ita Cæsar & Labienus Numidarum, & aliarum exterarum gentium ope rem in Gallia dexterrimè gesserunt. Mercenarij etenim melius pugnant, uti experientia videmus, quia procul sunt à domibus suis, & cum se ab hostibus vndique cinctos vident, sumunt ad resistendum animos, non habentes respectum ad parentes, vxores, & filios suos, qui non sunt præsentibus, nec incitant affectus in eis, sicut in illis, qui inter suos versantur. Præterea famam genti suæ comparare volunt, & præda ex hoste ditari, ut ad propria non incolumes modo, sed & honorati & nummati reuertantur. Ideo Annibal in præsidio Hispaniæ collocabat suos Africanos, in Africa verò Hispanos. Et Portugallenses modò remoti à sua patria in Indijs multò fortius se gerunt, quàm vnquam sese in patria gesserunt pro defensione suæ libertatis: & Hispani omnes in Nouo Orbe quàm in patria contra Gallos aut quosuis alios vicinos suos.

C A P V T X V.

De Ordinatione & Dispositione Castrorum.

Milite Imperator ritè conscripto & exercitato, cum in itineribus faciendis, & acie disponenda ordinem bonum seruet, tum castra quoque secundum veterum doctrinam & artem benè disposita atque munita habeat. Incautum enim est, plenumq; discriminis exercitum malè ordinatum

tum habere, & sine aliqua munitione confidere, cum militibus ad capiendum cibum, occupatis, aut munera facienda dispersis, facile nectantur insidiæ. Præterea noctis obscuritas, necessitas somni, pascentium equorum dispersio occasionem superuenientibus præstat; Et ita Hannibal cū explorasset negligenter castra Fuluij Romanorū Ducis posita, esse, ipsum præterea multa temere audere, prima luce cum dēfiores nebulæ præstarent obscuritatem, paucos milites munitionum vigilibus ostendit, quo Fuluius repente mouit exercitum. Hannibal per diuersam partem castra eius occupauit, & ita in tergum Romanorum effusus, octo millia fortissimorum militum cum ipso Duce trucidauit. Simili quoque ausu Romanus Rozinius, pro Demetrio Moschouiæ principe Polinici exercitus Dux, ad Putiuliam ludificatus hostem, octuaginta millia Moschouitarum profligauit, cum partem exercitus in syluis cœlasset, & partem ad euocandum hostem eduxisset in aciem, præmissis qui proximum tumultum occuparent. Ad quos opprimendos, quod pauci fuissent, cum eduxisset copias Moschus, insidiatores à Rozinio dispositi, subito consurrexerunt, & primū castra à tergo inuaserunt, machinasq; omnes occuparunt, tum deinde aciem obuersam, & perturbatam rei nouitate, in fugam coniecerunt.

Igitur Imperator castra benè munita, beneq; disposita habeat, si periculum euitare cupit; quæ tuto semper facienda sunt loco, hoste præsertim vicino, vbi & lignorum, & pabuli, & aquæ suppetat copia: sed vt præcipuè sit salubritas loci. Deinde cauendum, ne sit mons aliquis vicinus altior, qui ab hostibus captus possit officere: neue torrens aliquis aptus inundare castra, quod intra colles sepiùs accidere consuevit, & in locis maritimis fluxui ac refluxui subiectis. Tum ne sint in abruptis ac deuijs, ita, vt circumsedentibus aduersariis difficilis præstetur tuis egressus: neue ex superioribus locis, missa ab hostibus tela, in castra cum damno tuo perueniant.

ant. Præterea animaduertendum est, ut pro numero militum vel impedimentorum muniantur castra, ne maior multitudo constipetur in paruis, neue paucitas in latioribus, ultra quam oportet, cogatur extendi. Si fortè tamen in animo habeas exercitum tuum clam imminuere (vti Claudium Neronem fecisse legimus) atque amico, ne hostis vicinus id animaduertat, auxilia submittere, necesse est mansionibus, signis, ordinibusq; nihil deperire, sed potius eosdem ignes, easdemq; excubias vbique conspici. Pari etiam ratione, si noua auxilia, quæ hostem clam habere cupias, tibi submissa sint, mansiones amplificare minimè conducit, siquidem consilia clam habuisse semper maximæ utilitatis fuit.

Sunt autem castra facienda pro loci necessitate, quadrata interdum aut rotunda, aut trigona, aut semirotunda, aut oblonga, porta vna ad hostem respiciente, qua miles in aciem exiret; & altera ad tergum, qua commeatus, & subsidia noua inducerentur, tum aquatio libera fieret. In Romanorum attamen castris satis constat, quatuor semper portas fuisse, eo quòd semper quasi quadrata castra haberent. Primaq; porta *Prætoria* dicebatur, quòd vijs in crucis formam distributis, prima via ad tabernaculum Imp. recta duceret. Tabernaculum autem Imperatoris, teste Festo, Prætorium dicebatur, à Præto, quòd initio ante Consules, Prætores bella administrarent. Secunda porta, Prætoriæ ex diametro respondens, *Decumana* vocabatur, hosti auersa, vt Tacitus auctor est. Tertia & Quarta porta, vt Polybius docet, *Dextra Principalis*, & *Sinistra Principalis* vocabantur, quæ sibi ex diametro oppositæ erant. *Metatores* autem dicuntur, qui præcedentes locum eligunt castris. *Mensores* vero, qui in castris ad podismum dimetiuntur loca, in quibus milites tentoria figant; vel hospitia in ciuitatibus præstant.

Primo igitur signa locis suis intra castra ponuntur, quia nihil est venerabilius eorum maiestate militibus. Deinde
Duci

Duci Prætorium, eiusq; comitibus præparetur. Postmodum Tribunis tabernacula collocentur. Tandem reliquis cohortium, aut alarum ductoribus, & eorum contubernilibus papiliones tendantur, & loca deputentur in castris. Et propterea ad mansiones distribuendas requiruntur homines exercitatissimi in Geometria, qui quamprimum Dux castris locum elegerit, ex Metatorum consilio, formam eorum cum suis distinctionibus atque vijs, ipsi exhibere sciant, atq; funibus & hastis rem confestim oculis subijcere & metiri, ut omnia momento distributa conspiciantur. Quo verò id citra confusionem perfici possit, necessum est castra semper in eundem modum metari, ut unusquisque nouerit, qua via & mansione sibi morandum sit: quòd quidem omni tempore & loco obseruandum erit, adeò ut castra ciuitatem mobilem exhibeant, quæ ubiuis locorum iisdem vijs, habitationibus, atque prospectu constet. Quamuis pro sitis diuersitate aliquomodo immutari debeant, semper tamen ad figuram quadratam accomodentur, vel ad formam dimidiati circuli, ut hostem castra oppugnantem per latera ferire possis, & excurrere quando libuerit. Constructo autem amplo quadrato castrorum, & in quatuor quadrata per vias regias diuiso, iterum instar hortorum, minora alia quadrata, veterum Romanorum more constitue, & vias minores eadem mensura designa, quæ ab imo ad summum omnes militum stationes, in latitudine & longitudine diuidant. Nam sic, opinione Scipionis Amirati, viri ciuiliū militariumq; rerum peritissimi, aduersus hostiles insultus promptus eris. Tormenta verò ad fossas castrorum omni ex parte distribuuntur, factis portis castrorum in formam crucis, ut faciliè subbuenire sibi tempore necessitatis milites possent.

Nota, quòd à vallo ad militum tabernacula, interstitium Romani faciebant, pedum ducentorum. Primo, ut si ab hosti.

ab hostibus tela, ignesue missiles iacerentur, citra caderent, sicq; illæsi consisterent. Secundo, ut locus esset, quo commodè præda armentorum & pecorum ab hostibus capta recipi posset. Tertio, ut ex facili in eo loco milites, qui ex castris adducebantur, in aciem ordinarentur. Quod quia moderni Duces in ordinatione castrorum non observant, optandum est, ut in usum reducant, quia mille confusionibus & periculis sese, & militem liberarent. Laudandus hac in re Zamoscius, qui in metandis castris, totaq; re militari, ad veterum disciplinam & præscripta, quàm maximè sese accommodabat, & Castrorū Metatoribus, non nisi in carta depictam dispositionem dabat, ubicunque metari volebat, ne confusio aliqua subsequeretur, ignaris militibus veterum castrametationem. Sed iam munitionem eorum videamus.

C A P V T X V I.

De Munitione Castrorum.

QVanti munitiones castrorum fecerint Romani, satis docet P. Aemilius apud Liuium. *Maiores nostri, inquit, castra munita, portum ad omnes casus exercitus dicebant esse, unde ad pugnam exirent, quò iactati tempestate, pugna, receptum haberent. Ideo cum munimentis ea cepissent, præsidio quoque valido firmabant: quòd qui castris exutus, etiamsi pugnando acie vicisset, pro victo habebatur.* Cæterum hæc muniendorum castrorum scientia prorsus iam interciderat,, Imperio Romanorum à barbaris conculcato, nemoq; ab eo tempore deductis fossis, præfixisq; sudibus castra constituit, donec regnante Carolo V. bellis Belgicis innouari cæptum, & modernis temporibus ad maiorem usum perductum est: non tamen ad eam perfectionem qualis apud Græcos aut Romanos fuerat. Iure igitur castrorum munitionem, tyro condiscere, Imperator seruare debet, quia nihil tam salutare atque necessarium inue-

um inuenitur in bello, quàm vt securè intra vallum dies noctesq; peragas, etiamsi hostis vndique obsideat. Scimus enim multos exercitus, tam diurno, quàm nocturno superuentu hostium fuisse afflictos; frequenterq; acie pulsi Christiani, dum munimenta castrorum, quò sese reciperent non haberent, à barbaris more animalium cæsi fuerunt. Exempla commemorare nolo, ne refricare dolorem videar; sed videant Duces, quantum damnum inscicia ipsoꝝ res Christiana passa est. *Qui autem castra munita habet, tutus est*, inquit Onofander, *aduersus repentinas & improuisas irruptiones*. Imò & aduersus vim ac multitudinem hostium. Zamoscius enim tribus millibus suorum, aliquot myriadas barbarorum in Czezora sustinuit, & ad tractationem pacis adegit, eo quòd munitione castrorum à tanta multitudine moueri non potuit. Similiter Osmanus Turcarum Tyrannus, quamvis tot centenis millibus armatorum ad Chotimiam stipatus fuisset, quia ex castris pugnabamus pro occasione superuentus faciendo in barbaros & excursiones, cum oppugnaremur vndique ideo rebus infectis & militibus amissis inglorius, abiit munitionibus nostris non expugnatis.

Si igitur castra tuta esse velimus, ea tam munire, quàm ordine disponere necesse est: & in ordinem quidem industria Ducis rediguntur, muniuntur verò vel situ, vel arte. Græci sanè situm munitum quærebant, neque vnquam loca infedebant, cui vel specus, vel ripæ, vel arborum multitudo, aut aliud quidpiam natura ipsa defensionì aptum deesset. Romani verò non tam situ, quàm arte castra muniebant, neque vnquam metabantur, vbi omnem exercitum minus commodè recipere possent; & quod loco ad munitionem deesset, id arte & industria restituebant. Etenim in metandis castris non sufficit bonum locum eligere, nisi talis sit, vt alter eo non possit melior inueniri: ne vtilior prætermisus à nobis, & ab aduersarijs occupatus, apportet incommodum, vt nuper Moscouitis ad Smolenscum, qui ab oppugnatione arcis à Sere-

R

nis. Vla.

nif. Vladislao IV. repulſi, cum ſeſe caſtris ad Boryſthenem poſitis incluſiſſent, ob aquationem faciliorem, montem A-laudinum neglexerunt, quem cum Rex deinde occupaffet, facile munitiones ipſorum expugnauit, multisq; millibus interemptis, reliquos ad deditionem coegit. Propterea Annibal quum frequentibus prælijs à Cl. Marcello ſuperaretur, nouiſſimè ſic caſtra metabatur, vt aut montibus aut paludibus, aut ſimili locorum aliqua oportunitate adiutus, aciem eo modo collocaret, vt vincentibus quidem Romanis, penè indemnem recipere poſſet intra munimenta exercitum, cedentibus autem, inſtandi liberum haberet arbitrium. Idem fecere noſtra ætate noſtri Duces contra multitudinem barbarorum Chodkieuicius ad Chotimiam, & Koniecpolſcius ad Cameneciam.

Tribus itaque de cauſis muniri dicuntur caſtra. *Primo*, in vnius noctis tranſitum. *Secundo*, ad facienda ſtatiua tam in æſtate quàm in hyeme: hæc iam maiore labore & cura ſunt firmanda, hoſte præſertim vicino, aggeriq; è cespite factus, & foſſæ perductæ, addendi ſunt ſudes, vel tribuli lignei per ordinem ita, vt ſine metu ſecurus quieſcat exercitus, quemadmodum facere ſolent Moſcouitæ, longè accuratiùs quàm Bataui aut Belgæ. *Tertio*, cum maior aduerſariorum vis metuitur, ne ſcilicet dum obſidione preminuſ alios, ipſi opprimamur à tergo. Igitur præter aggerem erectum, quo urbem aliquam, aut caſtra aduerſariorum cinximus, ſolent prudentes Duces ſepibus ductis, vel interpoſitis ſtipibus, ramisq; arborum, ne facile terra dilabatur, aliam munitionem circa exercitum ſuum addere, pinnaſq; & propugnacula ad ſimilitudinem muri apponere, quod nunc Belgæ & Galli, melius è cespite qui herbarum radicibus continet terram, vtilius conficiunt, ſtellarumq; inſtar denſiora propugnacula erigunt, ne ſubſidio ſuis veniens hoſtis poſſit tua caſtra expugnare, qualiter tentauit Mauricius Naſſouiſ, obſidente Bredam Marchione Spinola. Sed & cui Ludouicus Naſſo.

Nassouius ope Gallorum, Montes urbem Hannoniæ occupasset, Albanus verò eam recuperare volens, in coronam obsedisset, ita castra sua munierat, ut numerofo cum exercitu fratri suppetiatum veniens Gulelmus Orangius, miraretur tantum modò munitionem castrorum, perrumpere autem multis millibus amissis, nullo modo potuisset; licet ex vrbe quoque tempore eodem obsessi procurrerent, & pertinacissimè pupnarent. Cedere itaque coactus est Orangius, post tot frustraneos conatus, urbem autem Albanus ad deditiorem coëgit, & puniuit. 1a

Et castrorum ipsorum diuersa munitio fieri solet. aut enim muniuntur fossa & muro è cespite facto, qui tegeret propugnantes vsque ad brachia, ut mos Germanorum modò, omniumq; occidentalium est. Aut muniuntur sœpibus sudibusq; de lignis fortissimis, ut faciunt Chineses & Moschovitæ. Aut denique muniuntur curribus & carris, ut Poloni, Mysij, & Sclauones, contra barbaros leuiori armatura videntes; & in itinere faciendo. Sed vbi vis acrior imminet hostium, conuenit semper in promptu habere ligones, rastra, qualos, aliaq; vtensilium genera, quibus si aduersarius incumbat, media pars exercitus, tam equitum, quam pedatum, ducta latissima fossa, muniant castra; media verò pars ad propulsandum hastium impetum ordinentur in acie. Quemadmodum accidit bello Turcico ad Chotimiam, vbi laborantibus cæteris, pars exercitus ingruentes tota die repellebat barbaros. Melius tamen & securius, ut si Dux propè hostem castra sua locare voluerit, ut duæ exercitus partes ad prælium dispositæ in acie collocentur, tertia verò castramentationi relinquatur: siquidem nullus Imperator propè hostem castra sua collocat, nisi is qui prælio quotiescunque id hosti visum fuerit, decertare cupiat. Romani cum res id postularet, hanc operam triarijs demandabant, Principes verò & hastati ad prælium parati stabant: idq; ea ex causa, quòd Triarij postremi omnium essent, & satis ma-

R 2

turè

turè arma sua atque ordines repetere possent, si forte etiam ipsos occasio ad pugnam vocasset. Nos verò idem muneris ad Romanorum imitationem, ijs cohortibus tribueremus, quæ postremam aciem, sicut & Triarij claudunt.

Ordinariè autem Romani castra suo vallo fossaq; muni-
ebant, lata vlnas sex, & profunda tres; eamq; aliquando amplificabant, prout in eodem loco diutius subsistere, vel sibi ab hoste ingruente prospicere volebant. Vallum autem facturi, cespites primum exscindebant ad instar magnorum laterum, quos post fossam in superficie exteriori ad instar muri, in castrorum circuitu collocabant (fossa verò ipsa, vti diximus, pro necessitate maior, vel minor erat) atque ita murum seu aggerem struebant, supra quem valli, siue pali defigebantur; ita densi, & ramusculis connexi, vt ne manus quidem interponendæ spacium esset; neque sine labore magno, vel vnus vallus de aggere reuelli posset. Ita nunc ex doctrina Gallorum, quos ad obsidendum Smolenscum, cum reliquis transmarinis militibus euocauerant, Moschouitæ faciunt; quamuis non semper aggere aggesto, contra Scythas Præcopenses præsertim, sed sæpiùs in planicie roboribus tantùm crassis firmiter vallatis.

Qualitercunque autem Imperator castra sua muniuerit, nihilominus tamen si exercitum in aciem eduxerit, relinquat ad vallum nonnullos, qui castra & impedimenta custodiant, ne si hostium Imperator sola ac deserta illa esse compererit, aliquos alleget, qui ea diripiant, munitionemq; tuam occupent; Quamuis interdum soleant prudentes Imperatores contrarium facere: quemadmodum fecit in Liuania Chodkieuicius, qui cum Suecis ad Volmariam congressurus, castra sua omnino deserta reliquit, (sed nulla munitione firmata) lixasq; & calones omnes in insidijs collocauit; ipse cum parua manu suorum ad latus castrorum dextrum, sed remotiùs parum, in acie stetit; hostis qui castra præteribat prorsus vacua defensoribus videns, primò speculatum præ-

præmisit, mox prædatum maior pars irrupit, ut prædam diuitem asportari à suis vidit. Chodkieuicius reliquos eadem cupiditate spoliolum ardentem, magno animo aggressus, ut acie pepulit feliciter, tum ex infidijs calones, qui metum specie maioris exercitus turbatis augerent, confestim euocauit, & in predantes obuersus, facile sine ordinibus & Duce confusos, omnes ferè deleuit, prædamq; amissam non modò recuperauit, verum etiam hostium spolijs longè adauxit, & triumpho insigni potitus est.

C A P V T X V I I.

De Tessera Militari.

Tessera dicitur præceptum Ducis, quo vel ad aliquod opus, vel ad bellum mouetur exercitus. Et erat tabella, in qua Imperator symbolum aut mandatum scribebat ut docet Statius, atque Pomponius. in leg. 2. de orig. iur. Tesserrarij; illi appellantur, qui tesseram per contubernia militum nunciant. Apud Romanos autem, teste Polybio, vir unus ex decimo quoque signo, id est, manipulo, siue cohorte equitum & peditum eligebatur, qui à reliquo munere excubiarum immunis esset. Is sole iam inclinante, Tribuni tentorium adibat, ab eoq; tesseram siue signum (quod erat verbum aliquod lignea tabella inscriptum) ei ab Imperatore datum, accipiebat, vnde Tesserrarius, uti dixi, appellabatur: acceptamq; tesseram rediens ad suum signum siue manipulum Centurioni dabat: qui deinceps proximo Centurioni dabat; isq; postea proximo, donec ad primum signum siue manipulum perveniretur, cuius Centurio ante lucis occasum necessario tesseram ad Tribunum referre debebat. Quod si omnes tesserae à Centurionibus ad Tribunos relatae fuissent, iam intelligebant tesseram & Imperium Ducis ad omnes peruenisse: sin aliter, inquirebant in culpam, & poenam irrogabant.

Vigiliarum itaque & profectionis tessera petitur ab ipso Imperatore; aut illo absente à Legato eius, qui tanquam Vicarius ipsius, potestatem in castris maximam retinet. Obseruandū tamen Imperatorem signa pugnae aut rei alterius, non per se ipsum, sed per Duces suos dare debere, qui mox proximis sibi nunciabunt, isti quoque ijs qui post se, cæteriꝑ; pariter deinceps sequentibus, donec vltimi, quæ primi sciuerunt, hoc modo rescuerint. Nam obeundo mandata vnicuique nunciare inconueniens est, quia & tempus absumitur? & percunctantibus ex sese invicem omnibus, tumultus suboritur. Quod prouidens Paulus Æmilius Tribunis solummodo secretum edebat imperium, illi Primipilis, & isti Centurionibus, donec à primis signis ad nouissimum agmen perueniret. De Alexandro verò proditum est, eum pileo sarrisæ superposito, non buccina, militi mouendum esse significare consueuisse, cum clam discedere hostem cuperet. Cuius factum Radiuillus Nicolaus IV. imitari cupiens, cum Roxos vsque ad urbem Moscouiam regnante Stephano Battoreo depopularetur, & vndique ad opprimendum sese hostem accurrere sciret, militibus suis, ne signum tesserae voce pronunciant, imperauit, veritus quod sæpissimè accidit, in similitudine linguæ, ne illud voce prolatum hostes quoque exciperent; sed motu tantum corporis exprimi iussit. Si igitur hostes linguæ sunt eiusdem, tessera in castris tuis voce pronunciarī non debet, sed vel manus nutu aut gestu, vel armorum collisione, aut inclinatione hastæ, aut ensis coruscatione signum militibus dandum est. Si autem tui milites diuersarum sunt linguarum, exprimere illud voce, & effari promptè non poterunt, & sic tumultum aliquem ob linguæ ignorationem inter suos concitabunt. Signa verò sine locutione occultè imperata, nullo prorsus modo ad hostes deuenire poterunt: nec seditionē vllam aut trepidationē concitabunt.

Quia igitur voce sola inter præliorum tumultus regi multitudo non potest, pro necessitate autem rerum plura ex tempore

pore iubenda atque facienda sunt, antiquus omnium gentium usus inuenit, quomodo quod solus Dux utile iudicasset, per signa totus cognosceret & sequeretur exercitus. *Tria itaque genera constat esse signorum, Vocalia, Semiualia, Muta.* Quorum vocalia & semiualia percipiuntur auribus: muta verò referuntur ad oculos.

Vocalia dicuntur, quæ voce humana pronunciantur (& hæc propriè vocantur Tesseræ) sicut in vigilijs, vel in prælio pro signo dicitur. IESVS, vel MARIA, vel vtrumque simul aut simile aliquod signum datum ab ijs, qui maximam in exercitu habent potestatem. Et talia vocabula debent quotidie variari, ne ex usu hostes signum agnoscant, & exploratores inter nostros versentur impune; præsertim si hostis eadem lingua, & eodem habitu nobiscum utitur.

Semiualia signa sunt, quæ per tubam aut cornua, fistulam, buccinam, aut tympana dantur; vel tesseram pronunciendo; vel clasicum concinendo; vel ad iter faciendum admonendo. Per talium igitur instrumentorum sonos debet agnoscere exercitus signa, vtrum stare aut progredi, aut certè regredi oporteat; vtrum longè prosequi fugientes, aut receptui canere.

Muta demum signa sunt, Aquilæ, dracones, flammulæ, rufæ, pinnæ, purpura. Hodie apud Christianos sola tantum vexilla, partim grandia, partim exigua: oblonga, vel quadrata, aut semiotunda. Apud Machometanos verò, caudæ equinæ, crinium nodi in comam prolixam artificiosè conglobati, lunulæ deauratæ semicirulares, vella sericea, & cidaris pennata. Quanquam & nostri Poloni sæpius vtantur signi loco, pileo cristis exornato, aut ala pennis aquilæ elaborata in auro, qui tamen communiter vexillis sericeis vtuntur. Et Ioannes Austriacus olim, primum prælium cum confœderatis Belgis ad Gemblacum commissurus, iusserat in vexillo Regio boni ominis causa, ad triumphalem Domini crucem, subiici hæc verba. *In hoc signo vici Turcas. In hoc Hereticos vincam.* Sunc

Sunt autem & alia multa signa muta, quæ Dux belli in equis, aut indumentis, & etiam in ipsis armis, ut dignoscatur hostis, præcipit custodiri. Præterea, manu aliquid, claua aurea (Quod est insigne Supremorū Ducum in Polonia) bacillo, ut occidentalium Europæorum Duces facere solent, vel flagello ut Scythæ, vel certè mota qua utitur veste, aut pileo, explosione uel tormenti, aut sclopeti, significat. Quæ omnia in sedibus, itineribus, inq; omni exercitatione castrensi, vniuersi milites (mercenarij etiam alterius linguæ & moris) & sequi, & intelligere consuescant.

Item mutum & commune signum est, cum diuisæ copiæ, aut vrbs alicuius obsessæ præfidiarij ostendunt socijs, flammæ nimirum de nocte, aut fumum de die; aut erigunt de turribus trabes, aut exponunt hæderas, aut expandunt vexilla; quibus expositis indicant quæ fieri volunt.

Clariora itaque sunt, quæ tuba præcipiuntur. Certiora verò quæ voce indicantur; nisi quid sit impedimento. Sed tranquilliora, quæ signis mandentur, cum videlicet res nulla est quæ obstet, aut obscuret. Nam vox, tam oris quàm tubæ percipi interdum non potest, aut propter armorum sonitum, aut propter tormentorum roboatum, aut propter eorum transitum & hinnitum aut propter impedimentorum tumultum, clamorem pugnantium, gemitum fautiatorum, & totius multitudinis strepitum. Quamuis & signa vexillaq; maiora, sæpius multis rationibus obliterari possunt ac evanescere: nam & crassitudine aëris seu nebula, & pulvere excitato, & imbre, & solis splendore opposito nonnunquam obscurantur. Adde quod interdum fieri non potest, ut signum ad vnumquemque usum præparemus, cum longè plura possint occurrere, quàm quibus assuefacti sunt milites, præcipuè excubatores. De quibus iam atque vigilijs eorum videamus.

CAPVT XVIII.

De Vigilijs, & Excubatoribus.

Quia impossibile est per totam noctem vigilantes singulos permanere, ideo securius est, bis de æstate vigilias mutare, quater de hyeme, in frigidis præsertim regionibus. Zamoscius verò singulis horis, ob immensum rigorem cœli, excubias in Moschouia permutabat, cum Pleiscouiam iussu Stephani Regis arctissimè obsideret. Vbi tanta vis frigoris erat, vt aqua ex editiori loco effusa, priusquam terram contingeret, in glaciem tota concreveret. Quapropter sub arctoo cœlo, non sunt cogendi excubatores solidam noctem peruigilare: sed complures vndique custodes disponantur, vt vicario munere tempore noctis distributo, alij quidem somno indulgeant, alij rebus sedulo inuigilent. nam sæpè fit, vt nobis etiam inuitis, cedentia membra somnus vltro subeat; præsertim si sedent, aut iacent, qui in excubijs collocati sunt. Ideo stent recti, si pedites sunt: si equites, de equis suis non descendant: quia crurum erectio animum quoque ad vigilias erigit: sedentibus autem, aut iacentibus, facilè quies languidum somnium inducit.

Idoneos itaque Dux & probatissimos eligat, qui vigilias assignent & circumeant sobrij, non madidi vino: & si qua emerferit culpa, ipsi renuncient. Præterea, è singulis vigiliarum stationibus, per singulas vigilias eat vnus procustos ad proximam stationem: ex illa item alius, ad sequentem: & ex alijs porro similiter ad alias. Præceptum autem esto omnibus, vt dato signo idem faciant. Hoc autem pacto, & multi simul circuitiorem facient, & paruum singuli spacium emetientur: neque verò apud eosdem ijdem simul diu morabuntur, cum subinde alij procustodes apud alios vigiles sint futuri. Hæc si ita administrentur, quoties res no-

uas moliri vigiles fuerint aggressi, occulta consilia explorandi procustodibus erit facultas.

10 Verum equites extra vallum, nocturnas diurnasq; excubias ubique terrarum faciunt, pedites intra vallum, aut parum procul. Cæterum in Polonicis castris, ante prætorium quoque Ducis, tam de die, quam de nocte equites excubare solent, dum hostis in procinctu est; cui in opinatò ingruenti statim sese opponunt, cum illis qui extra vallum excubant; & sustinent impetum donec alij superueniant. Ita ad Chotimiam, in Vigilia Natiuitatis B. V. MARRIÆ accidit, cum Turcæ castra Polonorum inopinatò assalirent. Ita in Prussia ad Derfauiam, cum Gustauus à nostris saucius fuisset. Et hanc ob causam veteres, semper extra castra (pro-ut & nos Poloni facimus) excubitores habebant, & ascultatores quàm occultissimè paulò remotius à cohorte excubantes dimittebant; sed pedites tantum modò. Nos verò è contra equites communissimè; & viros nobili loco natos, ac patricios semper. Alij verò populi, quod animaduernerent, exercitum facilè ea occasione decipi posse, tam quòd difficulter excubatores isti, an in officio persistant explorantur, quàm quòd facilè ab hoste corrumpi, vel etiam opprimi possint, adeò vt in his spem aliquam, aut omnem reponere, rem maximi esse periculi arbitrati fuerint: eam ob rem omnes excubias intra castra recipiebant, easq; summa cura, diligentia, atque ordine obseruabant, capitis periculo in illos constituto, qui ab officio vel tantillum declinassent. Quod nunc etiam obseruant Germani, & reliqui ferè omnes occidentales, apud quos miles est ex diuersis gentibus aggregatus. Secus apud nos Polonos, qui & extra castra, & intra, cohortes integras indigenarum tam de die, quàm de nocte locare solemus; siue pedites illi sint, siue equites.

Nam de vetere disciplina, Dux ex solis mercenarijs vigilias facere non debet, nisi permixti sint naturalibus: alias periculum subiret vniuersi exercitus. Hinc Abdala Princeps

Sarace.

Saracenorum, cum multos in suis castris haberet Christianos, prohibuit, ne soli vigilias de die obirent, de nocte verò ne ullus ferè inter vigiles foret. Nam incredibile dictu est, nimia fiducia quantæ calamitati soleat esse. Et Guilelmus Orangius, cum in Brabantiam intrare vellet, videretq; ripam Mosæ passim ab Albano Duce custodiri, ita nocturno tempore excubatores omnes fefellit, vt toto cum exercitu fluuium propè Ruremundam superaret, & in acie compareret, Hispanis cum suo Duce obstupescantibus, & mirantibus tantum silentium, & tantam celeritatem, vt transuolasse eum dicerent, non transisse. Cum interim excubatores Hispanorum, Germani, vel religionis Luteranæ prætextu, vel auri cupiditate, vel fauore gentis, quod etiam Germania-pud Orangium fuissent, vigiliarum custodias negligentius obuiissent, aut non retulissent Ducibus Orangij, quem sentiebant, conatum. Quapropter omni cura inuigilare Imperator debet, ne eum vnquam lateat, quinam hominum noctem extra castra transfegerint, & qui recentes ea ingressi fuerint, tum qui in excubiis nocturnis durauerint: & omnes isti accuratissimè examinentur, quinam hominum sint, quid in excubijs egerint, vbi fuerint, vel vnde veniant. Hac enim ratione assequemur, ne hosti ad præfectorum tuorum animos pertentandos, aut ea ratione consilia tua exploranda via sternatur, maximè si mercenarijs abundas. In Valachia siquidem nostris temporibus nonnulli è Germanis transfugerant ad Turcam, & inde reuersi grandibus promissis integras legiones ad transfugiendum sollicitabant; cæterum à puero quodam exauditi, meritis poenis fuerunt afflicti. Ibi-dem equites nonnulli Hungari ad barbarum transiuerant, qui procustodes fuerant, & loca debitorum castrorum nostrorum Turcis monstraauerant, sed conatu barbarorum irritum, quod eo in loco naturales fuerint interea collocati; & Turcæ assaltu facto vt instructi à profugijs illis fuerant Karakas Bassam, virum inter suos primarium tunc temporis amiserant.

Vnde non profugos illos modò, sed omnes ferè transfugas postea interimebant, & ne à nobis transfugerant sua crudelitate nostros mercenarios cohibuerant.

Obseruet quoque Imperator, vt custodiarum ignes, tempore brumali, ardeant à castris longius: Sic enim qui excubabunt, suos procul ab ignibus conspiciere poterunt; ab hostibus autem, qui vltra ignes erunt, non videbuntur, donec ipsi in excubantium manus inciderint. Vt accidit Scythis Rursiæ prouincias Duce Kantimiro præuagantib⁹, qui à nostris, procul ab igne nocturno tempore excitato excubantibus, dum capere vigiles vellent ipsi à vigilibus in id intentis passim capiebantur, apud Riboticios.

C A P V T X I X.

De Commeatu & Pabulo.

RECTè scribit Boterus, *Abundantiam populi & commeatum, maximas esse cuiuscunque Regni vires.* Quia paucitas populi, aut peste facile tollitur; aut a multitudine hostium opprimitur; aut ad diuersas Regni partes defendendas sparsus, non valebit singulis hostibus, si plures simul consurrexerint, pro necessitate resistere. Ita Liuonienses Crucigeri, cum exiguâ populi multitudinem haberent, pressi ab vna parte à Mosco, ab altera, à Polonis, à tertia demùm per mare à Suecis, cum singulis resistere non potuissent, coacti sunt demum Regi Poloniæ Augusto, postquam tot sæculis florentes stetissent, omnimoda subiectionem facere, & transcribi in Prouinciam Regni. Commeatus deinde inopia, vel maximum populum ad miseriam redigere poterit, si viæ omnes intercludentur, per quas annona aliunde importatur, Senserunt hoc sæpius Genuenses, Heluetij, Florentini, Gallis in Italiam irrumpentibus, tam & alij plurimi Guelphorum & Gibellinorū armis intrigati. Quapropter Dux aut Princeps, quam-

quamuis leui suspitione pullatus arcis aut vrbis alicuius ob-
sidendæ, omnem alimoniam victus intra muros debet studi-
osissimè collocare, vt præfidiarijs eius exuberet substantia,
aduersarios inopia cogat abscedere. Sed præcipuè pabula e-
ius congerenda sunt; & quæ apportari nequiuerint exuren-
da: nihilq; quod suis proficiat, hostibus relinquendum est.
Stephan⁹ Valachiæ Palatinus ita Baiazetem secundum exce-
perat & pro suis abundanti prouisione facta herbas omnes
ad Danubium exusserat, vt ille ingenti cū exercitu veniens,
ob solam pabuli inopiam rebus infectis maximo cum da-
mno suorum abscedere cogeretur.

Inter præcipua igitur conuenit Ducem prouidere, siue in
castris, siue in ciuitate consistat, vt animalium pascua subue-
ctio frumenti, cæterarumq; specierum, aquatio, lignatio,
pabulatio, secuta ab hostium reddatur incurſu. Quod aliter
non potest euenire, nisi per loca idonea, qua nostrorum am-
bulat commeatus, præsidia disponantur, siue illæ ciuitates
sint, siue castella munita. Quod si non reperitur antiqua mu-
nitio, oportunis locis circumdata maioribus fossis tumultu-
aria castella firmanur: inter quæ in angarijs aliquanti pedi-
tes, equitesq; degentes, tutum iter commeantibus præstant.
Ita fecerat Rex Stephanus in Moscouia, cum Polociam, Vie-
licolucos & Velisiam deinceps oppugnaret. Ita eius Strate-
gus Zamoscius cum Pleſcouiam obsideret. E contra Ger-
mani maximam passi fuerant rerum penuriam, cum Soli-
manus bellum gereret in Hungaria & Croatia contra Ferdi-
nandum I. Imperatorem. Nam vndecunque Turcæ sciebant
accessum posse fieri ad castra Christianorum & importatio-
nem victualiorum, vbique vias fossis arborumq; truncis ob-
sepserant, & dispositis equitibus venientes cum annona ag-
gresses occidebant aut capiebant; atq; ita fame vexauerant
mirabiliter exercitus Imperatoris. Prout, etiam nuperrimè
Imperiales & Hispani, exercitus Gallicos, apud Louanium,
Iam autem parum proficit plurimum pabuli aut annonæ

collegisse, nisi ab exordio dimensione salubri, per idoneos procuratores erogatio temperetur. Quod cum Pilauix, Sueci, proximè præterita expeditione non obseruassent, & iussu Serenis. Regis Vladislai, tam aquatio naualibus, per totum littus Prussix prohibita fuisset, quam importatio victualium in munitionem Pilauientem, quam plurimos sanè amiserunt de suis, cum & morerentur passim & diffugerent ad nostros. Nunquam autem periclitati sunt fame, qui frugalitatem inter copiam seruare cœperunt. Quod si sufficiens copia deest, aut castra alio loco mouenda sunt tempestiue priusquam ab hoste circumueniari; aut exercitus diminuendus per partitionem, vt ab omnibus partibus necessaria procuret & submittat. Imbellis quoque ætas ac sexus propter necessitatem victus foris frequenter exclusa est, ne penuria opprimeret armatos, à quibus sæpè mœnia seruabantur, Ita dum Moschouix Smolenscum haberent, quamuis plebem viliorem exclusissent, antequam ad obsidendum Rex Polonix Sigis. III. venisset, tamen mensibus aliquot elapsis, iterum decem millia hominum excludere coacti fuerunt, ne armati deinde penuria victus opprimerentur. Quapropter eiecti extra muros, cum perire vltro, præcipitando sese in profluentem Borysthenem statuisent, clementia Regis à tam temerario proposito reuocati, & commeatu prouisi, ad diuersa Moschouix redierunt, & hac benignitate allecti, nostris deinceps commeatum subministrauerunt. Experientia igitur didicimus, sæpius penuria quàm pugna consumi exercitus, vbi aut nulla cura commeatus, aut nulla ratio frugalitatis.

C A P V T X X.

De Frugalitate Castrensi.

Diximus debere prouideri commeatum & papula tempestiue, & tam inter milites, quàm inter animalia valde

dè parcè partiri, vt non ad luxum, sed ad satietatem sobriam, & conseruandum virium robur viuatur: proinde frugalitas hac in re, non solùm militibus, sed Ducibus quoque ipsis, vt exemplo præeant, seriò commendanda est, qua maximè veteres excelluerunt, & grauissima bella, ferè sola frugalitate castrensi, ad finem propositum deduxerunt. Et Romani milites, Spartaniq; ac Thœbani ordinarium panem, nusquã in castris comederunt, nisi subcinericium semper, ex tempore coctum ad carbones; aut farinam cum aqua coctam. Prout eam nunc coquunt Cosachi Zaporosenses. Apud Athenienses verò fuit prohibitum in castris bibere vinum; & per totum tempus belli, miles sub pœna capitis, vinum gustare non poterat. Nimium enim corrumpuntur exercitus in quibus bibitur vinum, & aromata venduntur; nam & scortationes, & homicidia, morbiq; diuersi, ac quæstus cupiditas inde prouenire solet. Taceo proditioes secretorum, inobedientiam ebriesorum, proteruiam propinatorum hinc inde cursitantium lucri causa, qui deinde ab hostibus capiuntur, & metus causa quæ sciunt narrant, aut debiliora castrorum loca ostendunt. Idcirco Scythæ nullas prorsus delicias in castris suis habere solent, quinimo nec pane nostro vescuntur, aut farina, nisi fortè casu oblata, & in summa necessitate. Turcæ vt plurimum ariza, & carnibus siccatis minutatimq; contusis, etiam ditiores, in bello viuunt, vinumq; de lege Machometi etiam domi non bibunt; ac propterea sunt inuincibiles. Sed & Moschouitæ frugalitate maximè pollent, inq; bellis ordinariè solent vti farina ex cocta auena parata, quam aqua dilutam cum sale aut melle, interdum in massam redigunt, & comedunt absque ignis vsu; interdum sorbiciunculam faciunt, & tempore necessitatis, absque panis admixtione vlla expellunt famem. Alias tamen maximam omnium rerum faciunt prouisionem, tam in urbibus, quàm in castris.

Sed reuera, inter ea quæ hoc sæculo summo opere impedi-
mento

mento in castris esse solent, non immeritò panis, vinumq; ac ceruisia seu mulsum recensentur, quibus exercitui prospicere necesse est: & ad eam luxuriam his nostris temporibus iam deuentum est, vt bello Turcico ad Chotimiam in mensa cuiusdam nobilis, Tergiductoris cohortis hastatæ, ipse quinquaginta fercula aromatibus maiori ex parte condita numerauerim. Vbi quantum vini, quam tum hydromelis aut ceruisiæ haustum fuerit, quis explicare poterit? cum illa compotatio subinde alijs atque alijs superuenientibus durasset à prandio vsque in mediam noctem. Maiorq; iam passim in tota Europa habetur à Ducibus cura vini, quam pulueris, aromatum, quàm globorum tormentalium, lautitiarum, quàm armorum, & vestium, pelliumq; preciosarum, quàm equorum aut sclopetorum. Cum veteres omnino vinum negligerent, sed aquam communissimè in castris biberent, cui ad saporem excitandū, parum aceti, aut liquoris ex pane biscocto & aceto facti, admiscebant. Nec panem in clibanis, sicuti in ciuitatibus receptum est, coquebant, sed more priscorum Græcorum atque Romanorum farinam militibus suppeditabant, addito lardo atque sumine, quibus panem condiebant, eoq; vires fouebant; adeo vt per totam ferè Europam, tempore bellorum omnis annona in farina, lardo, aceto, atque sumine consisteret, nisi quod loco aceti septentrionaliores vinum adustum seu crematum habere consueuerunt; Cosachi verò nostri loco farine millium, & loco suminis pisces vento siccatos. Quantum verò ad carnes, tam Græci quàm Romani, omnis generis armenta gregesq; post exercitum agebant, quod hac ratione minori impedimento essent, quàm si macinata caro, siue vento siccata aut fumo, siue sale condita, conducenda esset. Ita etiamnum Turcæ, Persæ, Arabes, & Africani ferè omnes faciunt, qui pane in bellis non vtuntur, sed arisa contusa, & carne veruecina aut bubula. Atque hac ratione freti, sæpius deserta Ægypti, Libiæ, Mauritaniæ, Arabiæ, atque Armeniæ Maioris,

ris, permeare vniuerso cum exercitu solent, quòd annona iustiusmodi ipsis præsto fit, quæ faciliè castra sequitur. Contrarium autem nostris accidere cernimus, in omnibus Europæ plagis bella gerentibus: hi siquidem tam vino carere nescij, quam panibus, & diuersi generis dapibus inhiantes, quibus domi assuefacti sunt, neque interim eorum copiam quouis locorum adipiscentes, fame sæpiùs enecantur: aut si aliquando panes habere contingat, eorum subministratio maximo dispendio atque incommodo te fatigat. Exemplo Galli ad Bruxellas & Louanium fame potius, quàm armis enecati, & exercitus Imperatorij nuperrimè in Burgundiam Duce Galassio introducti, & ad internecionem planè annonæ penuria extincti. Quæ ut vbique suppeditari possit, rapina militibus prohibenda est, & Veneti, Bataui, Turcæ non alia prorsus re copiam commeatum in castris suis habere solent, nisi quod eorum milites rusticorum domus non deprædantur. Veteres hac in parte diligentes fuerant, Romani præsertim qui tam strictè obseruabant abstinentiam in castris, ut memoriæ tradiderit Scaurus, pomiferam arbo-rem, quam in pede castrorum fuerat complexa metatio, postero die abeunte exercitu, intactis fructibus relictam. Idem de Sulla Paterculus scribit. *Putares, inquit, Sullam venisse in Italiam non belli vindicem, sed pacis auctorem: tanta cum quiete exercitum per Calabriam Apuliamq; cum singulari cura frugum, agrorum, hominum, urbium, perduxit in Campaniam.* Cæterum quia necessitas moderamen non diligit, parandus est tempestiuè commeatu; procurandumq; ut habeat miles quod emat, ne cogatur cogitare quod auferat. Ad quod Imperator ipse exemplo præire debet, veterū Ducum imitatione. Nam Æmilianum Scipionem traditur in itinere cum amicis ambulanti accepto pane vesci solitum. Quod & de Magno Alexandro dicitur. *Messanissamq; potentissimum Regem, nonagesimum ætatis annum agentem, meridie ante tabernaculum stantem, vel ambulanti, capere solitum*

T

litum cibos legimus. Et Annibal, cū sub Asdrubale Imperatore militaret plerumque super nudam humum sagulo tectus somnos capiebat, pane vescebatur subcinericio, vino abstinebat. Marcum verò Catonem vino eodem quo remiges contentum fuisse traditur. Ast Epaminundas Dux Thebanorum tantæ abstinentiæ fuit, vt in suppelectili eius, præter ahenum & veru vnicum nihil prorsus inueniretur. Caracalla quoque Imperator, vt scribit Polyænus, tenui mensa, priscorum Romanorum ritu, ac lineolis poculis vasisq; esculentorum solebat contentus esse; panem etiam temere factum comedisse. quippe tritico quantū satis vni foret, manu sua molito, massaq; inde facta, atque in carbonibus decocta vesci solitus. Omnia denique elegantiora aspernari, & vilissimis quibusque, ac vel pauperrimo gregarioque militi facillimis vti. Apud nos tres Nicolai Radiuilli sibi inuicem in officio Imperatorio succedentes, non nisi aquæ potores fuerunt: Tū Vitoldus Lituaniæ Dux in cibo parcissim⁹, & in castrensi frugalitate obseruantissim⁹ fertur fuisse, vt puta cuius exemplo Duces Polonicorum exercituum quoque, qui sub illo militarunt olim, continentissimi fuerunt, Samotulij, Panieuij, Dembinij, Ianseuij, alijq; plurimi veteris disciplinæ Sarmaticæ. Sed iam ad ornatum & vestitum militarem transcendamus, qui itidem modestiam seu mediocritatem necessario requirit.

C A P V T . . . X X I .

De Ornatu & Vestitu militum.

VT nudum militem habere miserrimum est, ita pomposè vestitum periculosum; nam ille cœli iniurijs oppressus, facilè ex morbo in mortem incidet, iste, assuetus superbix miseriam necessitatis tempore haud libenter patietur, magnumq; pro sua pompa stipendium à Repub. exposcet, & fame-

famelico hosti præda certissima erit. Egregia igitur Tacitus, *Fortissimus in ipso discrimine exercitus, qui ante discrimen modestissimus.* Quare, ut in verbis factisq; modestia militi est seruanda, ita & in vestibus eam requiro, quia Magni Duces sic statuerunt. *Horridum, inquit Liuius, militem esse debere, non calatum auro argentoq; sed ferro & animis fretum. Quippe illa, prædam verius quam arma esse: nitentia ante rem, deformia inter sanguinem & vulnera.* Tales prisci illi Macedones, non auro, neque discolori veste, sed ferro atque ære fulgentes. Neque mihi placet luxus nostratium, qui non auro tantum & gemmis in bellis utuntur, ad exornanda sua arma & equos, quæ utique asseruari in longum possunt, tanquam minus corruptibilia: sed pellibus quoque magno precio conquisitis, & panno aureo conteguntur, quæ facillimè corrumpuntur, & in habitu iam quotidiano computantur. At tu qui exercitibus præses Imperator, sperne superuacua ista, & prohibe: nec teneat aut terreat tuos vanus iste aspectus, & auri fulgor atque argenti, quod neque tegit, neque vulnerat. Multo magis hoc vide, ut benè armati tui sint, quam ut ornati. Necessè est enim ut dimicandi acriorem sumat audaciam, qui munito capite & pectore non timet vulnus. Armorum igitur in castris nitor sit, non vestium, aut gemmarum. nam auri & argenti copia, hostem ad prædam accendit; nostrum autem militem vilem animo reddit, cauendo ne ista amitteret, quibus inter commitiones superbiebat. Præterea, multi currus inutiles habentur ista vehentes, qui potius commeatum continere debuissent. Vnde maxime hac in parte peccatur à nostris Septemtrionalibus, quod & purpura & auro, & pellibus preciosissimis in castris utantur: multisq; iam grauis lorica aut galea viderur, quibus loco alas pennatas gestant, aut tygridum, leopardo- rumq; exuuias. Atque ita dum laborem in portandis veteribus munimentis armorum ferre non possunt, detectis corporibus & vulnera sustinere coguntur & mortes: & quod

T 2

gravi.

gravius ac turpius est, aut capi, aut certe fuga Rempub. perdere. Ita accidit Romanis, cum omissa vetere disciplina, barbarorum impetum in acie sustinere non potuissent. Ita Constantinopoleos Imperatoribus, cum eorum exercitus armis defensus ob socordiam nudatus Partherum sagittas, atque Saracenorum lanceas euitare non potuissent.

Ne tamen milites aliquando in tumultu praelij à suis contubernalijs aberrarent, diuersis cohortijs diuersa in scutis signa antiqui Romani pingebant, quæ ipsi nominabant digmata, præter quod habuissent & propria sua signa quælibet cohors & Centuria. Nos Sarmatæ antiquitus vnicolore cum pedites, tum equites adornare solebamus; etiã mercenarios, qui vel è Germania, vel ex Hungaria eligebantur: pedites præsertim, aut leuioris armaturæ equites, cū Poloni ipsi hastis vrentes, facilè vel ab Asiaticis, vel ab Europæis omnib, habitu & vestibus dignoscantur: qui, nihilominus tamen, vnicoloris serica pro qualibet cohorte distincta, hastis suis appensa habent. Nunc quia Tribunorum avaritia intermissum est, vnicolore panno peditatum vestiri, eorum præsertim qui more Germanico in legiones conscribuntur, curet qui exercitibus præest, vt non modò ad differentiam hostium sint vestibus vniformibus coperti, sed etiam propter terrendum oculos aduersariorum, & perferendas commodius iniurias coeli: cum iam passim per Europam nudos planè milites conspiciamus, qui pluuijs, niue, gelu, pruinaq; pressi, aut in morbos statim incidunt, & mox cum maximo damno Reip. contabescunt; aut coeli asperitatem suffere non valentes, ante hyemem tempestiuè aut praelium diffugiunt.

Quandoquidem igitur vsu euenire cernimus, eos qui ad militiam animum applicuere, non modo vestium mox aliam rationem inire, verùm etiam in moribus, consuetudine, voce, quin etiam incessu, omnem ciuilem modum fastidire, ideo animos ipsorum ad immortalitatis gloriam concitare quàm maximè studeamus, non preciosis vestibus quæ luxû
secum

secum attrahunt & superbiam; sed necessarijs, quæ corpus à periculis conseruant & generosiores animos ad quæuis difficilia aggredienda addunt. Sic Romani præter arma, pedes suos cristis ornabant, equites verò exuijs leoninis. Sic Arabes fascijs, maiores nostri aquilarum aut herodiadum pennis, Parthi comis crinitis, brachati omnes strutionum plumis; quod quidem suis iucundum, hostibus autem terribile visu esse solet. Sed quomodo miles à pugna defuetus, ad pristinum animi vigorem reduci debeat, hoc diligenter consideremus, ut non vestibus aut armis tantum sit immutatus, sed etiam diligenti meditatione rerum bello necessariorum, ad pristinam pugnandi alacritatem, viribus & generoso spiritu concitatus.

CAPVT XXII.

De Reformatione militis à pugna defueti.

VT vestem facilius est consuere & parare nouam, quam confarcire attritam, ac reparare vetustate diffluentem: sic facilius est ad virtutem instruere novos milites, quam reuocare perterritos, aut otio diuturno socordiae deditos. Sæpiusq; accidit ut fortissimi exercitus suamet sponte corrumpant, cum domitis hostibus otium à victoria obtinent; quiq; inuincibiles bello fuere, pace imbecilles erunt: eius planè naturæ quam in ferro notamus, quod quotidiano usu splendet, neglectum verò ærugine exeditur, & corrumpitur penitus. Imperator itaque si diu armis defuetum ducit exercitum, singularum legionum siue auxiliorum, nec non etiam vexillationum, vires, animos, consuetudinem diligenter exploret. Ita Stephanus fecit, cum nouiter in Regem Poloniae inauguratus primam in Moscos expeditionem pararet, eo quod regnante Sigismundo Augusto, plurimos nostratum longa pace defueuisse tractare arma intelligeret. Iam au-

tem omnes artes, omniaque opera nonniſi quotidiano uſu, & iugi exercitatione proficiunt. Vnde Scipio Aphricanus, cum ſub alijs Imperatoribus Hiſpanienſes exercitus frequenter victos accepiffet, ita eos diſciplinæ regula cuſtodita, omni opere, foſſisq; faciendis diligenter exercuit, vt diceret *fodientes luto inquinari debere, qui ſanguine hoſtium maderere uoluiffent.* Similiter Metellus in Aphrica Albino imperante, ſubiugatum accepit exercitum, quem ita emendauit veteribus inſtitutis, & diſciplina maiorum, vt poſtea eos, à quibus ſub iugum miſſi fuerant, ſuperarent. Et Tarnouius noſter, conſternatam ſub Alberto Rege clade Bucouienſi Polonicam nobilitatem, ita aſſiduo exercitio armorum ſub Sigifmundo I. erexit, vt quatuor millibus ſuorum non dubitaauerit totam Valachorum potentiam aggredi, & acie aperta decertare, Bogdanumq; Principem eorum tot victorijs glorioſum, ad deditionem coactum, efficere trium menſium ſpacio tributarium perpetuum Regum Poloniæ. Numantini quoque olim ſæpius profligauerat exercitus Romanos, qui diſciplinam neglexerant militarem, quam cum reſtituiſſet Scipio, ſtatim Numantinos acie aperta profligauit, qui cum diſperſi ad ſuos perueniſſent, quæſitiq; à ſenioribus fuiſſent, cur tam citò animo vili ceſiſſent Romanis. Reſponderunt, Oues quidem eſſe eaſdem, ſed paſtorem mutatum. Idem ferè & de Guſtauo quiſpiam dicere poſſet, qui Suecos ſuos toties à Polonis, Moſcouitis atque Danis profligatos, ita exercitio ad præſcripta obſeruato erexit, vt omnibus his vltro bello laceſſitis, etiam in Germaniam arma transferre auderet, & toti minaretur Europæ. Pulchrè itaque Liuius de Camillo. *Omnia, inquit, repente mutauerat, Imperator mutatus: alia ſpes, alius animus hominum, fortuna quoque alia urbis videri.* Vnde & tu Imperator deſuetum à pugna exercitum, diſciplina corrige, laboribus exerce, exemplo excita, prudentia obediẽtem fac tibi, & quemuis fortiſſimum aduerſarium ſecurè aggredi poteris, etiam in itinere inſidiantem tibi, modo caute procedas.

CAPVT XXIII.

De Itineribus faciendis.

DE mouendo exercitu & itineribus faciendis paulò proximius nobis agendum est: Nam qui rem militarem studiosius didicerunt, asserunt in itineribus, quàm in ipsa acie pericula solere contingere. Quia in conflictu armati sunt omnes milites, & hostem cominus vident, & ad oppugnandum animo veniunt parati: in itinere autem minus armatus, minusq; attentus est miles, & superuentus impetu vel fraude turbatur. Ideo omni cura, omniq; diligentia providere Imperator debet, ne proficiscens patiatur incursum; vel si non facilè, at sine damno repellat illatum. Sic præmonitus à Chodkieuicio Nicolaus Kiska, cum annonam in Smolenscum inferret, non modò positas Moscorum insidias euitauit, verùm etiam in insidiantes ultro illatus, octo ex illis milia occidit, nullo ferè suorum damno.

Imperatorem itaque non irritò conatu exercitum ducere cupientem, oportet ad has circumstantias diligenter attendere. *Prima*, vt locorum sit peritus. *Secunda*, vt ordine benè seruato procedat acies. *Tertia*, Vt denso progrediatur non dilatato agmine. *Quarta*, Vt quadrato agmine procedat, non oblongo. *Quinta*, Vt impedimenta in medio agminis collocet. *Sexta*, Vt speculatores præmittat. *Septima*, Vt dum hosti appropinquat, pedetentim suspensoq; gradu iter faciat. *Octaua*, Vt tempus, quo castra mouenda, attendat, & quantum itineris facere debeat animaduertat. *Nonna*, Vt iter per locias regiones faciens, militum manus contineat. *Decima*, Vt hostium possessiones non funditus euerat. *Vndecima*, Vt ad repurgandas vias, si eas hostis occludere contendat, parata instrumenta habeat, *Duodecima denique*, Vt commeatum ad manum habeat, & mercatoribus tutum securumq; iter ad castra præstet.

Quar-

119
Quantum ad primam circumstantiam attinet: Itineraria omnium regionum, in quibus bellum geritur ante omnia Dux debet plenissimè habere perscripta, ita, ut locorum intervalla, non solum passuum numero, sed etiam viarum qualitates perdiscat: compendia, diuerticula, montes, flumina, ad fidem descripta consideret, & depicta habeat, ut non solum consilio mentis, verum etiam aspectu oculorum viam profecturis eligat & commonstret. Ideo non contentus libris Geographicis, qui nunc passim sunt in usu, & delineationibus communibus; à prudentioribus & honoratis, locorumque gnaris, separatim debet vniuersa perquirere, & veritatem colligere de pluribus. Etsi partem copiarum aliquorsum mittit, ductores viarum, idoneos, peritos, scientesque perquirat, (sæpius enim imperita rusticitas plura promittit, & credit se scire quæ nescit: iam autem tali in casu error duorum aut trium, vniuersis discrimen maximum parit) atque eos diligenti custodiæ committat, addita poenæ contestatione, vel præmij. Erunt enim utiles, cum intelligent, nec fugiendi sibi copiam superesse; & fidei præmium, perfidiæ parata supplicia. Sed cautelæ caput est, ut ad quæ loca, vel quibus itineribus sit profecturus exercitus, ignoretur quam maximè. Nec enim solum, qua via ducatur exercitus, prospiciendum est, sed etiam, ut eadem reduci possit, diligenter providendum.

Quo ad secundam verò circumstantiam; monstrabit ingenium suum Imperator tunc vel maximè, quando bono ordine mouebit de loco suo exercitum, bonoque eum ordine per itinera ducet. Et Romani sanè dum castra mouebant, buccina primaria ter signum dabant. Ad primum signum tentoria vasaque colligebantur. Ad secundum sarcinæ curribus & iumentis imponebantur. Ad tertium ordines dispositi mouebantur, quos impedimenta omnium extrema sequebantur Legionibus in medium receptis. Moderni, in medium impedimenta mittunt, Legiones ad frontem, vnà cum tormen-

tormentis, & ad tergum. Cæterum trito iam more, equites primi iter arripiant, inde pedites: impedimenta, pulueres, globi, & grauior armatura machinarum, seu instrumentorum bellicorum; itemq; calones & vehicula omnia in medio collocentur, sagittarijs & sclopetarijs ad latera positis; ita vt expedita pars peditum & equitum subsequatur. Nam ambulantes, interdum quidem à fronte & lateribus, sed frequentius à tergo superuentus infertur. Sed & à lateribus pari quoque armatorum manu impedimenta claudenda sunt, vt si vndique circumfunduntur inimici, vndique præparata inueniant subsidia. Quare, ne repentinus tumultus amplius noceat. ante commonendi sunt milites, (hoste præsertim in vicinia posito) vt parati sint animo, vt arma in manibus habeant, vt ordine seruato procedant, vt conseruent proprias cohortes, vt signa diligenter custodiant, vt ductores suos subsequantur, vt alacriter excipiant hostem. Nam quæ in necessitate subita conterrent, prouisa non solent esse formidini. Quamobrem miles non tantum ex directo, verum etiam ex latere in itinere aggressus, conflictum tum excipere, tum inferre, nimirum per exercitationem debet condiscere in loco, vt in itinere sit ad omnia promptus: maximè cum per hostile solum inceditur, vbi subitarijs excursionibus sustinendis ac reprimendis necesse est vt sint parati.

Quoad tertiam. Si Imperator cupit feliciter reprimere incursum aduersarij subitaneum, curet vt semper denso progrediatur non dilatato agmine: semperq; vitet, ne per negligentiam alijs festinantibus, alijs tardius incedentibus, interrumpatur acies, aut fortè tenuetur. Quare proponendi sunt exercitissimi campiductores, qui alacriores tardent, & pigrius incedentes, accelerare compellant, ita vt omnes simul ac pariter progrediantur; sintq; in itinere diligentes, non palantes, & ad conflictum repentinum, non ad rapinas aut prædam accincti. Signa etiam habeant, seseq; inuicem rectè dispositis ordinibus contueantur, etsi per sociorum amicorumq;

rumq; regiones incedant. Maximè autem cum per aliquam arduam viam ducuntur, ne cohibentibus angustiis, pateant dispersi in vulnera, & leui hostium velitatione frangantur.

Quarto requiritur in Duce iter cum exercitu conficiente, siue in socia terra, siue in hostico solo, vt quam maximè fieri potest quadrato agmine procedat, non oblongo: quia sic ad omnes impetus sustinendos fortior erit, cum inopinatò ingruet aduersarius. Quod si necessitas ferat itinera eiusmodi aggredi, vbi quadrato agmine progredi non possit, curet vt exercitus procedat in minores manipulos distinctus; & partibus, qui pro loci ingenio, & temporis oportunitate illas contrahere & diuidere queat. Ita fecit Melecius, cum in Valachia saltus fagineos transiret, Bogdano loci Regulo, superuentus vbique faciente: absque tamen vllò damno Polonorum, eo quòd Melecius talium gnarus cunctis montium verticibus, angustiarumq; faucibus præoccupandis tempestiuè suos præmisisset. E contra Turcæ & Tartari, quia incauti sunt, & in expeditionibus nullo ferè ordine, & agminis quadrati loco, confusè incedunt, facillimè à tergo & lateribus infestari possunt à nostratibus, vti faciebat sub Iuonia Palatino Cosachorum ductor Suierleczouius, & paucos ante annos Samuel Corecius; qui benè ordinati incurrebant in ipsos. Alias enim, & citò circumfundunt eorum suorum pernecitate, suntq; quasi in instanti infestantibus se à tergo; & fugientes, ferocius occidunt sagittis, si quis incautè sequatur, quam si à fronte aggressi fuissent.

Quintum est, vt impedimenta in medio agminis collocet, quæ si amittat, exercitum in maximam penuriam rerum conijciet, vt accidit Comiti Torquato ad Colbercam in Pomerania, qui licet egregiè impetum Suecorum toto itinere sustinuisset, quòd tamen quatuor millia curruum reliquisset, cum omnibellica prouisione, in frontem omnibus militibus contractis ad defensionem sui, debuerat postea omnium rerum pati penuriam, ingenti damno suorum. Accide-

rat

rat idem & Alexandro M. per saltus Persicos exercitum ducenti, cum commeatus in medium armatorum non repositus, alia via iter conficiens, ab exercitu aberrasset. Vnde Curtius dicit. *Regem non dolor modo, sed etiam pudor temere in illas angustias coniecti exercitus augebat.* Et in prouincia Susitana. *Siti exercitum penè perdidit, & qui arenis superatis ad fluium deuenerant, aquis ingurgitati statim peribant: multoq; maior horum numerus fuit, quàm vnquam amiserat.* Cosachi Zaporosenses cum in Scythiam excurrunt, ipsi cum sclopetis circumcirca, sed ordinè tamen, diffusi, currus in medio habent. Et si vis maior ingruat, intra illos latitantes tanquam ex mœnibus propugnant.

Sexto, Ducis industria, quem omnia prius conuenit explorare, præstabit hoc, vt subseffa inquirat, & depræhensa circumueniat vtiliter & celeriter; sic enim hostis consternatus, plus periculi ipse sustinebit, quàm parabat interre. Quapropter Dux cum agmine exercitus profecturus, fidelissimos, argutissimosq; cum equis probatissimis mittat, qui loca, per quæ iter faciendum est, in progressu, & à tergo, dextra, leuaq; perlustrent, ne aliquas aduersarij moliantur insidias. Maximè cū syluæ penetrandæ, aut circūsepræ collibus solitudines peruadendæ. Sæpenumero enim struuntur ab hostibus insidiæ, quæ si aduersarios fallant, rem eorum vniuersam perimunt opprimuntq;: si verò subtili aliquantulum Ducis diligentia detegantur, maximum prudentiæ argumentum hostium Imperatori exhibent. Quod si per montes iter faciendum est, altiora loca præmissis præsidijs occupet; vt cum hostis aduenerit, cognoscat se esse inferiorem: nec audeat obuiare, cum tam à fronte, quàm supra caput suum cernat armatos. Magister hac in re Iulius Cæsar fuit, qui in expeditione contra Heluetios, *factus certior, inquit de seipso lib. 1. Commentariorum. hostes sub monte consedisse milia passuum octo ab ipsis castris, qualis esset natura montis, & qualis in circuitu ascensus, qui cognoscerent, misit.* Atque hoc illum in

magno semper habuisse, vt locorum nimirum situs & ingenium per exploratores cognosceret, Tranquillus Suetonius auctor est. Chodkieuicius verò vt plurimum ipse locorum situs speculabatur: vel si non poterat ipse longè procedere à castris; Campiductorem cum peritissimis talium rerum præmittebat, gnarus consuetudinis aduersariorum in superuenientibus faciendis. Quia diuersi diuersimodè solent aggredi hostem. propterea noscere debemus eorum morem & consuetudinem: vtrum nocte, vt *Cosachi Zaporosenses*; an incipiente die, vt *Hungari & Croatae*; an hora reficiendis lassis, vt *Tartari & Mosconitæ*, superuenire consueuerint: & id vitare, quod illos facturos ex more putamus. Cum sæpiùs etiam vt in cautos fallant, consuetudinem suam immutare soleant. Quemadmodum accidit in prælio Czezcorenfi, vbi Turcæ & Scythæ de nocte nusquam alias fueti superuenire, nostros audacissimè aggressi fuerant. Præterea scire conuenit, vtrum peditibus, vt Germani Hispani & Galli, an equitibus, vt Turcæ Scythæ, Parthi, atque Arabes plurimum polleant. Vtrum sclopetarijs, vt omnes ferè Europæi, an contatis, vt Narsingani & Mogoritæ; an verò sagittarijs vt Americani & Asiatici communissime; tum denique bipennibus, vt Moschouitæ an verò hastis & acinacibus, vt Persæ & Poloni amplius valeant. Vtrum numero hominum vt Orientales, an armorum munitione, vt Occidentales, præcellant. Item cognoscere opus est, per diem an per noctem iter expediat inchoare: quæ & quanta locorum interualla sint, ad quæ cupimus prosperare: ne æstate aquæ penuria obsit euntibus: ne hyeme difficiles aut inuiæ occurrant paludes, niues altæ, aut male gelu concretæ glacies, maioresq; torrentes: & impedito itinere circumueniatur exercitus, priusquam ad destinata perueniat. Hæc singula, vt ipsi sapienter vitare debemus, ita si aduersariorum imperitia, vel dissimulatio occasionem nobis dederit, non oportet dimitti, sed explorare sollicitè: proditores ac transfugas inuitare, vt quid hostis molia-

tur, in præfenti vel in futurum poffimus agnofcere: paratisq; equitibus ac leui armatura, ambulantes eofdem, vel pabula victumq; quærentes, improuifo terrore decipere.

Septimo obferuet Imperator, ne fuos longo itinere conficiat, dum hofti appropinquat, fed pedetentim fufpenfoq; gradu iter faciat, præfertim vbi vel folum fabulofo, vel viæ vliginofæ, vel afperi colles, fruticesue denfi aut detinentes militem, quia fic multoties defatigatos Veios atque Volſcos à Romanis deuictos fuiſſe apud Liuium legimus. Et Alexander Conſueuius Suecos, Polociam verſus ex Liuonia tendentes facili negotio vicit: Koniecpolſciusq; Guſtauum ad Stumam, eius verò Campiductorem Baldifium ad Nouomlinū in itinere deprehenſos & defatigatos, pauciſſimis cohortibus profligauit, nec fuit respirare Taifelium atque Strephium Amerſtini in Pomerania, cum ſeſe ex itinere eò recepiffent, fed ſtatim ad deditiōem coegit. qui ſi maturè ad deſtinatum locum perueniſſent, potuiſſent procul dubio faceſſere negotium reſumptis viribus ex defatigatione itineris.

Octauo, attendat ad tempus, quo caſtra ſunt mouenda; quantumq; itineris conficere debeat, diligenter animaduertat. Nam sæpiùs accidit vt vrbibus obſeſis, tardè ſuppetiæ adueniant; aut prælio decertantibus ſuperueniat clades, priuſquam auxiliares iungantur copiæ. Ita Maximiliano Archiduci euenit, vt coactus à Zamofcio ad pugnam, non profligatus modò, fed & captus iam Bicinix in Sileſia fuiſſet, antequam Hungaricus equitatus, qui iuſtum exercitum conficiebat, cum Morauijs, ſuperueniſſet. Decet itaque exercitum in ordines diſpoſitum, duo milliaria Germanica quoquo die conficere, ante occaſum ſolis caſtra & occupare, & metari: ſiquidem vt plurimum vrgente neceſſitate exercitus quatuor iſtiusmodi milliaria in dies conficere ſoleat, fed in pacato, in hoſtili autem agro ſufficiunt duo. Aliud ſi de nocte cogitur Imperator caſtra mouere, aut ſuperuentum facere, in qua re expeditiſſimi habentur Bulgari. Hoc tamen vbique ob-

ſeruandum, vt currus & impedimenta omnia ſint in medio, vt ſupra monuimus toties, miles verò in ordines diſpoſitus, tam à fronte, quàm à tergo, quàm etiam ab vtroque latere: Velites autem præcedant aut ſubſequantur à longe quamlibet quadrati exercitus partem, vt ſi hoſtem alicunde conſurgere viderint, admoneant acies, & Ducem ipſum: qui ita milites ſuos aſſuefacere debet, vt hoſte ingruente ſciant tam ex poſtreimo agmine, quàm ex lateribus frontem facere; atq; tandem in priſtinam formam redire norint. Quod ſi hæc facere nouerint, vinci nullo modo poterunt, quamuis hoſtes quadruplo maiores copias habuerint; exemplo Macedonicæ phalanges, cum Perſis & Indis belligerantes; & Hiſpanicæ legiones ſub Albuquerque Imperatore, contra Auſtrales populos in Goa militantes.

Nono, vt per ſocias regiones iter faciens, militum manus à rapina contineat, exq; amicis & confœderatis non faciat ſibi hoſtes, vt ſæpiſſimè accidit. Quapropter ſeuerè edicat, vt milites ſe illis locis abſtineant, nihil illorum aut attingant, aut corrumpant. Omnis enim exercitus dum in armis eſt immodèſte permulta appettere amat, tum præcipuè, cum perpetræſſe aliquid licuit: quæque ſe oculis vltro ſubijciunt commoditates, maximè titillant & alliciunt impotentem habendi cupiditatem, ac ſæpè vel leuiſſima data occaſione diuertunt animi ſociorum; imò & inſenſiſſimi hoſtes fiunt; quod toties experti ſumus Poloni, in Moldauia & Myſia vltiore à Valachis, bella cum Turcis & Tartaris gerendo, eo quod poſſeſſiones eorum imprudenter milites noſtri, tanquam hoſtile ſolum depopularentur. Igitur Dux cum exercitu iter faciens, in fœderatis ſocijsq; regionibus non immoretur: è propriaq; patria, vt primum commodum eſt, & licet, conſeſtim educat: nam in hoſtium agris, ſi optimi ſunt & fertiles, opipare & aſſatim viuet: ſi minus, at certe ſuos non vaſtabit, aut frugalius viuere militem adſueſcet.

Decimo, hoſtium poſſeſſiones non funditus evertet,
quam-

quamuis interdum & funditus omnia perdere, amburere, cædere, ac de populari proderit, præsertim quæ vtilia sibi non fore Imperator prospexit. Damnosa enim clades, & opum fructuumq; penuria, belligerandi vires illi adimet, quas abundantia fouebat, ac suppeditabat. Illis autem parcat, quæ si integra seruentur, suis etiam prodesse poterunt. Ita Scythæ cum in Podoliam & Russiæ oras excurrunt, quæ auferre non possunt comburunt, excidunt, homines autem & iumenta secum abducunt, & partim ad labores, partim ad progenerandam sobolem prudenti consilio asseruant, faciuntq; milites contra nos ex pueris nostris ritu Machometano educatis, quos sæpè Turci in Ianitzaros transcribunt. Nihilominus bonus Imperator aliquandiu ante comminari prouincialibus debet, quàm facere, vt eos benignitate sua ad se alliciat, non seueritate abalienet. Namque calamitatis inferendæ metus, periclitantes admittere multa quæ renuebant sæpè cogit; at vbi ea semel illata sæuijt, dum se nihil eius pati posse animaduertunt, cætera omnia quasi pro derelicto habent. Ita bellis Moscouiticis sub Sigismundo II. durantibus, experti sumus in vrbe Metropoli Moscua, alijsq; pluribus in locis amplissimi Imperij illius, vbi Moscouitæ armis nostris oppressi, vltimam calamitatem euitare volentes, in omnia planè quæ postulabamus consenserant; at postquam immoderatis sese nostri gerere ceperunt, tectisq; tam opulentæ vrbis cupidine prædæ ignem iniecerunt, vniuersi qui deditio- nem fecerant seseq; sacramento Regi Poloniæ obstrinxerant, ab alienato animo arma sumplerunt, & potius mori voluerunt cum caperentur in agris, quam aut absconditum comeatum indicare, aut redire ad pacta sancita.

Vndecimo requiritur, vt iter facientibus cum exercitu Imperatoribus fossores atque id genus homines, quibus itinera sternantur præsto adsint, qui cum leuiore equitatu, atque selectiore peditatu, quorum est itinera explorare, vniuersum exercitum antecedant, & pontes reficiant, fossas
comp

complanent, frutices & arbuſta exſcindant, ſi impedimento curribus atque inſtructo exercitui progredienti eſſe videntur. Quod ſi verò per ſylvas denſiſſimas iter eſt faciendum, vt accidit Zamoſcio Velifium, & Pleſcouiam tendenti in Moſcouia, oportet vt habeat, ſecures, ſeras, dolabras aliaq; neceſſaria inſtrumenta, ad demolandum arbores vaſtiſſimas, & explanandum integras ferè ſylvas. Et Zamoſcius ſanè tunc, Polonico peditatu atque Hungarico abundans, qui de more priſco ad cingulum ſecures appenſas continuo gerunt, per auios ſaltus eluctatus, inſperato ferè deſertum illud Velifienſe, intra dies viginti, cum exercitu ſuperauit, & conſeſtim è ſyluis prorumpens, urbem eam ita obſedit, vt nullo modo potuerint Moſchi ſubuenire obſeſſis, qui in vicinis erant præſtolantes aduentum illius, & tranſitum per paludes impedire volentes. Et in hanc ſolam rem Reges Poloniae in Magno Ducatu Lituaniae certos agreſtes deputatos habent, qui omni tributo & laboribus liberi, hanc vnicam curam habent, vt Rege ſeu Duce belli ſupremo in expeditionem prodeunte, vias repurgent, pontes reficiant, ſylvas excidant, & machinas bellicas conducant. Cæterum ſuaderem ego, vt quorum officij eſt vias ſtrauiſſe, id muneris iſſis militibus iniungeretur, tam quòd idem priſcis receptum fuerit, quàm quod ea ratione minus impedimentorum, nec turba inermis caſtris moleſtia futura ſit: cui quidem rei vnaquæquæ cohors, eum militum numerum, quem neceſſitas poſtulare videretur, ſuppeditaret, atque eorum eſſet ligonibus & id genus inſtrumentis rem adgredi; interim verò arma ſua apud proximos ordines deponere, atque commilitones ijs onerare, quo hoſte ingruente, ea inde repetere, atq; ſe in ordines ſuos conſeſtim recipere poſſint. Quod ita nuper apud Guſtauum, Laponas & Finlandos feciſſe vidimus. Reliquos verò ſi interea temporis, dum iſti opus faciunt, Imperator pabulatum mittet, ſummopere cauere debet, ne per vberes diuitesq; hoſtium regiones huc illucq; prædas opimas perquirendo oberrent, ne hac ratione
in maxi-

in maximas aliquando strages incidant; quia indigesta illa turba, quæstibus prædisq; onusta, neque armis vti, neque mutuum sibi ferre auxilium potest. Ideo Romani per manipulos cohortes atque legiones pabulatum milites mittebant, cū lege, vt tota præda communis omnib; esset, etiam ijs qui opera interim & laborem castrensem conficiebant, quemadmodum nunc faciunt Cosachi Zaporosenses, & Tartari Præcopitæ, cum circumuicinas prouincias depopulantur.

Denique curabit Imperator, vt in itinere cum exercitu commeatum ad manum habeat, non modò modestia id militum & frugalitate efficiente, quod benè obseruasse Neronem, Liuius hisce verbis scribit. *Modestia inquit, certare milites, ne quid ultra vsum necessarium sumerent; nihil morari; nec ab signis absistere, cibum capientes; diem ac noctem ire; vix quod satis ad naturale desiderium corporum esset, quieti dare.* verum etiam ex comoda apportatione, tam populatorum, quàm mercatorum, vt plena securitate impigri, necessarias merces & annonam, terra mariq; apportent. Hinc Zamoscius cum exercitu ad Lucos iter faciens, cum sciret Regem Stephanum cum reliquo exercitu eadem via subsecuturum, in partes certas vniuersum agrum eum per quem iter erat descripserat, quarum vnâ exercitui qui cum illo erat metendam permisit (iam enim matura in agris frumenta, & maximè pabula erant) reliquas sequenti alij exercitui integras seruari iussit. Seuerissimèq; cauit, ne mercatores ad castra cum mercibus accedentes à militibus deprædarentur per viam, sed tam ab hoste, quàm à suis securi, liberum annonæ conuehendæ haberent aditum. Sed videamus etiam breuiter, quemadmodum sanitas gubernetur exercitus.

C A P V T X X I V.

De Gubernanda sanitate exercitus.

Maximè prouidendum est Ducibus, vt sanitas custodiat^r exercitus, Locis, Aquis, Temperie, Medicina atq; Exercitio.

X

Quan-

Quantum ad loca, in primis curabit Imperator ne in peſtilenti regione, iuxta morboſas paludes, neue in aridis collibus aut campis, & ne procul à ſyluis commorentur milites. Nam qui tentoria habere non poſſunt, neceſſe eſt ut tuguria ſibi exſtruant in quibus & à ſole, & à pluuijs ſeſe defendant; & arma, puluerem pyrium, annonamq; ſuam conſeruent; ad hoc autem arboribus & dumetis opus eſt; tum & ad focos faciendos, quibus non victus modo paratur, ſed & minus ſalubris camporum aër perpurgatur. In aridis verò locis pabulum animalibus citò deficit, difficulterq; apportatur. In humidis demum contagies acquiritur, & infectio corporum. Hinc Bataui milites ſuos, quia in locis humidis manent & bella gerunt, humi iacere non permittunt, ſed homines ad id delectos, qui eis lectos ex aſſeribus parant cubito à terra altos, vbique ſecum circumducunt.

Inſicitur quoque ſæpiùs exercitus aquis mineralibus inter montes decurrentibus, aut è paludibus foetidis reſtagnantibus, aut corruptis ab hoſte, quod cauere debet Imperator cum terram ipſius intrat; vel ad lacus nullum decurſum habentes caſtrametatur, ne videlicet lixæ per negligentiam aut malitiam cadauera in aquis demergant, vnde ſequitur corruptio, & morbi occulti in militibus, ut accidit ad Chotimiam in Valachia, vbi in profluentem Tyram & hominũ & animalium cadauera, tam à noſtris, quàm à Turcis paſſim proijciebantur, qui alias perſe, è montibus procurrens, diuerſorum mineralium infectionem ſecum trahebat, & ſic adaquantes morbis diuerſis afficiebat.

Sed & otio corpora humana putreſcunt, ſicut & intemperie aëris nimium frigidi, in Moſcouia videlicet aut Suecia, vel nimium calidi, in Ægypto nimirum aut Lybia, cæterisque omnibus regionibus inter Tropicos poſitis; niſi adhibeatur medicina, veſtis, exercitium temporum obſeruatio, & moderatus ſub dio labor. Quod ut præſtet Imperator, curabit

rabit ne exercitus longum iter faciat (nisi aliter suadeat necessitas) ne tarde de loco moueatur, & sole iam adurente, sed potius ante lucem: ne etiam sole occiso de crepusculo aut de nocte ad locum destinatum eat, sed de die perueniat, & tempestiuè sese disponat, sine tumultu, sine perturbatione: alias facilè ex fatigatione itineris, & morbum contrahent, & ordines negligent, vt accidit Gallis nuper in Italiam per Alpes tendentibus quorum plurimi & ad Susam & ad Pinarolam in Sabaudia perierunt ob diuersa incommoda itineris, quibus in patria sua diuite, & temperata non fuerant assueti. Item caueat Imperator, sæua hyeme iter per niues & pruinas noctibus faciant, aut lignorum patiantur inopiam, aut minor illis vestium suppetat copia. non enim expeditioni idoneus miles est, qui alere compellitur, præsertim è clementiori patria euocatus. Sic Germani & Galli ferè omnes in Moscouia interierant rigori regionis non adsueta, quos vel hostes ipsi, vel Rex noster mercede in bellum euocauerat. Similiter videat ne paludosis aquis vtatur, quia pestilentiam generant. Ne ægris cibis oportunus deficiat. Ne medicorum diligentia desit. Maximè verò ne desides milites maneant, sed & ad conseruandam sanitatem, & ad conflictum, assiduo sese labore, & exercito armorum præparent, vt nihil eis in necessitate prælij accidere possit incognitum.

Præcipuè tamen sanitas militum conseruatur, frequenti mutatione castrorum; nisi milites ea tempestate sub pellibus & tentorijs hybernent, aut in obsidione vrbs alicuius perseuerent. Quod si verò hostibus minimè prementibus, castra diutius habiturus sit: aut si regionis vastandæ causa cōmoretur: aut etiam commodiorem circumspiciet occasionem, eligat minimè humida, aut morbosa loca. *Impurus enim illic, inquit Vegetius, & fœtidus aer morbos ac pestem prægignit, validam multorum valetudinem ledit, & compluribus vitam quoq; aufert: unde & numero & viribus minuitur exercitus.*

citius. Eapropter Hollando in obfisione Ostendæ singulis trimestribus, nouo præsidio urbem muniebant, Et Chodkieuicius obfessum à Moscis Smolenscum, vel per media hostium castra perrumpens, nouo subinde milite reficiebat. Atque id quidem prudenti consilio, cum ex nimia cunctatione aer facile corrumpatur, vnde perniciosissimus nascitur morbus, qui prohiberi non potest aliter, nisi crebra mutatione aëris.

C A P V T X X V.

De Cauenda Seditioe Militum.

FAcilè meherclè, tam in urbibus, quàm in castris reperiuntur, qui rem aliquam perturbent, & dissidijs materiam subministrent: qui verò dexteritatem illam habeant, & voluntatem etiam conciliandi animos, & componendi simulates, vix paucos inuenire liceat. Quapropter sæpius sunt seditiones & tumultus in castris, tum confederationes inter se militum, non contra Duces modò aut Imperatores suos, verumetiam contra patriam ipsam, quòd nostra infelici ætate roties experti sumus Polonis quamuis & Turca, & Christiani Principes ferè omnes, idem à suis militibus senserint malum, non tamen ita frequenter sicuti nos modò, aut vetustissimis temporibus Romani Constantinopolitaniq̃ue Imperatores, de quo videndi sunt Historici eorum.

Tumultus igitur castrensis nihil aliud est, quam timor multus, cum multi multa ob flagitia Ducem metuunt, & ut poenā eo facilius euadere possint, tumultus excitare solent, vt accidit apud nos sub Stanislao Zolkieuio in pugna Czetzorenfi contra barbaros orientis ferè totius, dum lixæ & calones dominorum suorum currus & suppellectilem nocturno tempore diripuissent, & cum præda illa domos suas diffugere voluissent, illis in acie decertantibus.

Quapropter nihil

hil facilius excitatur, nihil occultius, latiusq; dissipatur, & nihil denique difficilius sedatur, quam seditio militaris. Sed & in ciuitatibus benè populatis solent frequenter seditiones fieri, ut præsidium militum eijciant, aut iugum per bellum sibi impositum excutiant, aut tumultu aliquo facto ditiorum bona diripiant. Hinc Sallustius, *Semper in ciuitate, quibus opes nullæ sunt, bonis inuident, malos extollunt, vetera odere, noua exoptant, odio suarum rerum mutari omnia student.* In castris quoque ambitiosi multi, qui dum Ducem negligentius agere omnia vident, ipsi magistratum per tumultum arripere cupiunt, & primùm egentiores ad se, spe alicuius lucri attrahunt, post potentiorum & officialium amicitias exoptant. *Homi- ni autem, inquit idem Sallustius, potentiam quærenti, egentissi- mus quisque opportunissimus, cui neque sua cura, quippe quæ nul- la sunt; & omnia cum precio, honesta videntur.* Ita sæpius vi- demus, leui ex occasione Colachorum Zaporosensium Du- ctores, aut deijci, aut occidi; ita Principes Valachorum Mol- dauorumq; mutari, ita Præcopensium Tartarorum Chanos atque Galgas variè detrudi, Moscorumq; Duces subinde de- poni. Quod ne in tuis quoque castris fiat, quæ militiæ præ- es, *principijs obsta.* Ordinariè enim modicis rebus primi motus confedere: omneq; malum nascens facilè opprimi- tur, inueteratum fit robustius. Quod si & in Czetzorienfi illa expeditione nostra, quam supra memorati sumus, statim animaduersum fuisset in tumultuantes prima nocte ad Pru- tum, nos cladem in vltima illa pugna ad Tyram non retulif- semus. Tacitus in id nobile consilium suggerit, *ut noua cu- pientibus auferatur Dux & auctor: vel si plures sint, separen- tur: omniq; studio id curetur, ut in commune non consulant.* Quod tutissimè fiet, si per causam honoris aliqui sepositi, vel in ordinem redigantur, vel si omnino Reip. periculosi, sint, sic tollantur è medio, ut facti suspicio in aduersarios liberta- tis defensores non redundet. Perijt hoc modo Pilo in itine- re Hispanico, à Pompeianis equitibus, aut adiunctis illi so- cijs

cijs peremptus, cuius morte consilium Cæsaris destitutum fuit, & coniuratio euanuit. Punitus simili modo & Boro-
dauka Cofachorum Zaporosensium Dux à Chodkieuicio in Valachia, octuagintaq; præcipui seditionis auctores nocte obscura nemine sciente submersi. Habent enim hoc in more Cofachi ut seditiosos inter se non nisi de nocte, & valde occultè puniant, gnari in omni factione caute agendum esse, & sæpè illis etiam dissimulandum quibus de facto constat. Nam si temere detegatur, coniurati plerumque prioribus armis alia & validiora addunt, desperationem nempe salutis, prauæ voluntati, ut in iisdem Cofachis toties contra Rempub. insurgentibus experti sumus, sed maximè in coniuratione moderna, cum clade Mosnensi castiganti periissent. Occuratur igitur primo motui, quia *omne malum nascens facile opprimitur* ut inquit Cicero, *inueteratum verò plerumq; sit robustius.*

Et quia impossibile est, ne exercitus magni seditiones faciant, aut contra Principem, ut accidit Sigismundo I. Regi Poloniæ vniuersam nobilitatem contra barbaros ad Leopolum euocanti; aut inter se, ut plurima in Historiis exempla habemus: præsertim cum Duces sunt factiosi, & cupidi rerum nouarum. Ideo si non possunt statim contra hostem Duci, (His etenim duobus modis Romani tam in ciuitatibus, quàm in castris seditiones omnes sedabant: Primo, tollendo capita seditionis. Deinde populum aut militem du-
cendo in hostem, ut habeat quod meditetur, & quo sese occupet) diuidendi sunt in plures partes: quia sic diminutis viribus diminuitur quoque animus factiosorum; militumq; crudelis animus sedatur, cum paucitate, suorum conspecta quisque de periculo suo cogitare incipit. Sic Reges nostri, quotiescunque simul Polonos & Lituanos in castris magno numero conscriptos habuerunt, hoste præsertim adhuc remotè posito, semper vel inter milites ipsos, vel inter Duces eorum dissensiones experti sunt; quòd gens vtraque rerum
prospe.

prosperimarum successum, æmulatione quadam sibi adscribi optaret, & ad gloriæ cupidinem à Ducibus suis, maximis in periculis, incitaretur, vt bellis Moscouiticis atque Liuonicis, toties iam accidit. Consultissimum itaque est principum Romanorum consilium, seditiosos milites periculis obijcere, quo metus ille communis periculi, animos conciliet; quod inter Græcos Duces etiam Pericles cum suis Atheniensibus faciebat. Sed nihil adeò exercitus concordiam fouet seruâtq; ac opinio de Duce concepta, quæ quidem sola virtute paratur: neque vnquam vel natalibus, vel authoritate citra virtutem parata fuit. Omitto hic Metellos, Aemilios, Scipiones, Marios; aut ex nostratibus Seciechos, Gouoricios, Ianfenios, Vitoldos, aliosq; magni nominis & authoritatis Duces, vnicum Turcarum Imperatorem Baiazetem II. adscribam, cui quam filius Selimus I. rebellasset, vellentq; ad eum transire Ianitzari omnes, intrepido animo adeos accessit, & ipsa maiestate sua persuasit eis, ne eum toties in bellis expertum feliciter, aut desererent per ignauiam, aut filio traderent per malitiam prout constituerant. Postea paulatim in seditiosos animaduertit.

Frequenter quoque accidit, vt milites vocati ad bellum è locis, in quibus ociosè delicatèq; vixerunt, pugnare nolint; præsertim ex diuersis locis collectis; ideo multiplex variaq; medicina ab Imperatore huic rei opponi debet: Quia illi asperitate insoliti laboris offensi, quem in expeditione necesse est sustinere, armorum exercitia declinant, prælium metunt, & seditionis sumunt audaciam. Quare campi cursionem, seu inspectionem armorum assiduè faciant: & dum adhuc separati sunt in sedibus suis, tribunorum vel vicariorum ad omnem disciplinam arctissima, seueritate teneantur: exercitia militaria iussu Ducis assiduò peragant, signa obseruent, moderationem discant, Reges aut Reipub. deuotionem custodiant, nullis commeatibus vacent. Et ne Tribuni ipsi aliquid moliantur in ocio, aut tumultus excitent, Imperator

perator eos separatos à castris habeat, & ad agendum aliquid ipsis optabile mittat; puta ad castella vrbesq; muniendas aut seruandas, tanta subtilitate, vt cum abijciuntur, videantur esse electi, & supra alios prudentiores, fortiores, aut fideliores æstimati. Ita Viriatus per multos annos numerosum exercitum suum, diuersis è nationibus conflatum, absque omni contradictione & seditione, in obedientia continuit. Ita Georgius Scanderbergius. Ita Iuonia Palatinus Valachix, & Michael Palatinus Moldauix, & nostra ætate Gustauus Rex Sueciæ, sola suauiloquentia ac libertate adhibita. E contra infelices Carthaginenses fuerunt, quòd hanc prudentiam ad gubernandum exercitus suos non adhibuerunt. Itaque milites eorum finito primo bello, quod cum Romanis habuere, ducibus per seditionem creatis Mathone & Spendio, multò periculosius bellum ipsis Carthaginensibus intulisse legimus, quàm quod cum Romanis nupere gestum erat. Idem fecerunt apud nos Cosachi Zaporosnenses, cum negligerent gubernati, cum quibus aliquoties iam pugnauius, multò periculosius, quàm cum Sueco in Prussia. aut Moscouitis ad Smolenscum.

Quod si igitur medicinam fieri necessitas extrema persuaferit, rectius est more maiorum in authores criminum vindicari, licet sint potentissimi, aut ex antiquissimis familijs, vti Bizantini Imperatores faciebant; vt ad omnes metus, ad paucos pœna perueniat. C. Cæsar seditione in tumultu ciuiliu armorum, ac tum maximè tumentibus animis, legionem totam exauctorauit, Ducibus seditionis securi percussis: mox eos quos exauctorauerat ignominiam deprecantes restituit. & optimos milites habuit. Sed huius rei passim in Historijs occurrunt exempla; nos videamus quomodo etiam prudentia & virtutibus Ducum absque punitione & seueritate, concilientur militum animi.

CAPVT XXVI.

De Conciliando militum Amore.

ETiam si omnis virtus faciat hominem amabilem, Principes attamen & Duces bellorum præcipuè apud subditos & milites *amabiles facit*, Clementia, Humanitas, Comitas, Affabilitas, Iustitia, Beneficentia atque Liberalitas: *venerabiles verò* Animi magnitudo & Dexteritas ingenij. Ex illa procedit Fortitudo & Constantia. Ex ista ingens quædam vis eloquendi, & ciuiliū militariumq; rerum prudentia. Atq; ita Viriatum olim milites amarunt propter liberalitatem eximiam, & æqualem inter ipsos prædæ diuisionem. Cæsarem, ob diligentem curam salutis ipsorum, & tempestiuam victualium prouisionem. M. Antonium ob eloquentiam, affabilitatem, & diligentem curam infirmorum, seu ab hoste vulneratorum. Lucillum ob diligentem officij imperialis executionem, & familiarissimam cum suis militibus conuersationem. Et nuper Gustauum Regem Suecorum, ob hæc ferè omnia. Ioannes verò Zamoscus, quia & viuacitate animi, & promptitudine ingenij pollebat, ideo non à militibus tantum, sed à tota nobilitate Polonica amatus & obseruatus fuit. Maturo etenim iudicio prouidebat omnia, & caua prudentia, suauiter disponebat quidquid aggrediebatur, siue domi, siue in bello; cupiensq; animos militum conciliare sibi, stipendia eorum maturè prouidebat, comitum tempestiuè suppeditabat, exemplo ipse ad omnia præibat, infirmorum curam diligentem habebat, negligentes dulci suada commouebat, & liberalitate perpetua, tenuiorum obsequia sibi deuincebat: omnesq; simul ad omnia munia belli alacres & obediētes velut pater filios habebat. Libentissimeq; pro gloria eius, omnes aduersitates & pericula perferebant, ipsamq; demum vitam profundeabant. Nec

Timoleones apud Græcos in suis expeditionibus alia re gloriosus aut victor exstitit, quam amore militum, & fauore suorum ciuium. Similiter Pelopidas, Alcibiades, atque Cimon. Inter Romanos verò Fabius Rullus, & duo Africani. Ex nostris denique Camenecius, Ostrogius, Tarnouius, & Raduilli ferè omnes. Quamuis è contra, & plebem & milites nimium in partibus habere, suspectum est, & periculosum: ideoq; etiam dum culpa abest, si libertati consultum velimus, non temere ferendum. Apud Venetos Petrus I oredanus, qui triremium præfectura, ante aliquod tempus defunctus, tumultuantes inter se nauticos & milites, quos frustra alij compescere conati fuerant, præsentia sua & auctoritate composuerat, Senatui suspectus, custodiæ mancipatus fuit, è qua nunquam euasit; ne fortassis communi hoc fauore elatus, æqualitatem, cuius in ea Rep. maxima cura est, aut violare conaretur, aut impatientius ferret; sicut apud Romanos fecerat Iulius Cæsar, & postea Augustus, qui militem donis vt inquit Tacitus, populum annona, cunctos verò dulcedine otij pellexerat, vt paulatim insurgeret, muniaq; Senatus, Magistratum atque Legum in se traheret, nullo aduersante. Hinc militarium, politicarumq; rerum peritissimus Dux Clearchus dicebat. *Miles magis debet timere Ducem, quàm inimicum.* Quia secundum Scipionis Numantini opinionem, *Dux facit & indulgens, vilis putatur esse ab hoste, & contemptibilis à suo milite.* Eapropter laudantur ob severitatem T. Manlius Torquatus, & Papirius Cursor apud Romanos, Otto Primus, & Fridericus Barbarossa apud Germanos; Ismael Sofius & Xaabbas apud Persas; Selimus I. & Machometes II. apud Turcas; apud nos Nicolaus Melecius, & Chodkieuicij duo: tum apud alias gentes, diuersi Duces ac Imperatores, olim atque modernis temporibus. Nam quemadmodum Liuius vocat Posthumium Tubertum, seuerissimi imperij virum; sic Germani nunc de Valsteinio dicere possunt, quòd in eo viro vis imperij ingens fuerit pariter in socios, ciues, atque milites, sicut in altero Corbulone. Sed

Sed maximè amorem generat apud milites, liberalitas, & animi magnitudo; quibus rebus apud nos, quotquot è domo Radiuilia Duces exercituum fuerunt, omnes ferè ciuium suorum & commilitonum amore floruerunt. Licet nonnulli obsequentissimum sibi militem reddant, innata quadam authoritate, & reputatione; quæ, non semper quidem ex victorijs assecutis, & felicitate continua procedit sed ex quadam animi magnitudine, & adnatis quibusdam qualitatibus, Magno Imperatore dignis, vt in Nassouijs apud Batavos, apud nos autem in Stanislao Koniecpolscio videmus. Vnde multi talibus dotibus ornati, etiam post aduersa eniterunt, & clariores multò, quàm alij post obtentas victorias exstiterunt, qualis fuerat Mitridates Rex Ponti, de quo narrat Iustinus, quòd licèt toties à Silla, Lucullo, & Pompeio fuerit profligatus, semper tamen animum talem gessit, vt maior, clariorq; resurgeret in restaurando prælio; damnisq; suis terribilior redderetur. Similis putatur fuisse Vladislaus Loëticus Rex Poloniæ, Vitoldus Dux Lituaniæ, Alphonsus Magnus Rex Aragoniæ, & ex eorum disciplina Nicolaus Piccininus, Stanislaus Kiska. Eustachius Ostaphæus, tum nostra ætate Samuel Corecius, & Papenheimius Comes. Sed inter alios, post frequentes clades, mirabiles exstiterunt. Petrus Strozza in Italia, & Michael Palatinus in Mysia cis Alpina. Cæterum quia frequentissimè clades inopinatæ, in transitu fluuiorum accidere solent, ideo quam cautè traducere exercitus suos Imperator debeat, vbi frequentes sunt riui, aut rapidi fluuij, diligentissimè inquiramus.

CAPVT XXVII.

De Transitu Fluuiorum.

FRequenter in transitu fluuiorum grauis molestia negligentibus emergit, præsertim vbi aqua violentior fuerit, aut alueus latior, præsertim cum aut hostem insequentem fu-

gis, aut inopinatum adoriri exoptas. Vt igitur commodè & citò transeas, primùm vada exploranda sunt quæ si reperientur, duæ acies simul equitum, competentibus interuallis separatæ, transeant, medium verò pedites & impedimenta teneant, vt acies superior aquarum impedimentum frangat, inferior verò colligat atque transportet, si qui rapti submersiq; fuerint, Ita Demetrius Visniouecius, Tyram fluuium transiuerat, cum in Moldouiam cū exercitu tenderet: Nicolausq; Sieniauius deinceps, cū inde reuerteretur. At cū altior fluctus nec peditē nec equitem patiatur, si per plana decurrat, ductis multifariam fossis diuidatur, & diminuantur aquæ. Fecerat hoc Alexander Magnus in Cilicia cum Licum amnem superaret, & Tamerlanes in Bytinia cum ad Prusiam obsidendum tenderet, cæterum vterque ponte destitutus facilè ac hoste superari poterat, si interea temporis audacter superuenisset. Vnde Curcius de Alexandro, *Dele-ri potuit exercitus, si quis ausus esset vincere.* Similiter & Tamerlanes, nisi felicitas quæ eum perpetuò vt & Alexandrum comitabatur adfuisset, penè totum exercitum inter fauces montium amisisset. Ideo Iulius Cæsar nusquam fluuios magnos transibat, nisi ponte exstructo: vnde Suetonius de illo. *In obeundis expeditionibus dubium cautior, an audentior.* Eumq; imitatus Cæsar Germanicus, nisi ponticus præfidiisq; impositis dare in discrimen legiones haud Imperatorum ratus. Vnde & Stephanus Rex bello contra Moschos suscepto pontem Kaunæ in Lituania construi portatilem iusserat, qui ex singulis nauibus componebatur, ita, vt quoties opus esset separari, nauis quælibet cum suis tabulatis, quibus inter se naues illæ coniungebantur, facillimè possit, pro latitudine fluuiorum construi, curribusq; singulis vna cum tabulatis impositæ, binis iumentorum iugis non incommodè in quemcunque locum transferri possent. Nam si hoc fieri nequit, vt per fossas multiplicatas fluuius diuidatur, & diminuantur aluei aquæ, necessario vtribus transeundum est,

est, aut nauigio; aut hastilibus fixis superponenda sunt tabulata. Ergo Imperator naues seu scaphas, vel ex corrio factas, vel ex tabulis ingeniosè complicatas vbique secum curribus circumducatur, & dum necessitas postulat, vtatur: vel certè tumultuario opere colligatis inanibus cuppis, aditisq; trabibus transitum faciat. Expediti verò equites fasces de cannis aridis, vel vlua facere consueuerunt; super quos loricas & arma, ne inundentur imponunt; ipsi, equiq; natando transeunt; colligatosq; secum fasces pertrahunt ad vltiorem ripam. Iam verò Scithæ qui Rursiæ, Moscouiæ, & Moldauicæ prouincias incurrunt, colligatis animalibus dorso prædam imponunt, ipsi caudas eorū manibus tenent, clamore perpetuo bestias ad natandum incitando.

Sed quia aduersarij instant ad transitus fluminum, insidiasq; vel superuentus facere consueuerunt, ergo in vtraque ripa collocanda sunt armata præsidia, ne vis aliqua inferatur. Vel quæ parum à se remotæ munitiones in eadem ripa excitentur, in quarum medio exercitus fluuium superet, tormētis æneis in aduersa ripa hostem quatientibus. Ita Gustauus contra Tyllium cum in Bauariam tenderet. Ita Alexander Gonsseuius cum Dunam in Liuania transiret, Comitem de Turribus Suecorum Ducem aggressurus; alijq; complures alibi.

Quod si pons non tantum ad transitum, sed etiam recursum & commeatum necessarius fuerit, tunc in vtroque capite, percussis latioribus fossis, aggereq; constructo, & sudibus præfixo defensores milites debet accipere (vt Turcas ad Chotimiam, nostrosq; paulò superius, Tyra seu Nestro victo, fecisse vidimus) à quibus tamdiu teneatur, quamdiu necessitas locorum postulabit. Quod cum non fecisset Mansueldius Suecicarum copiarum sub Carolo Sudermano Dux, facillimè ad rigam in transitu Dunæ à Carolo Chodkieuicio per superuentum fuit superatus, atque ipse captus quatuordecim millibus suorum amissis. Quapropter ad Derfau-

am Gustauus à nostris constrictus, de pace seriò tractare se simulauit, ne pugnare cogeretur, nocteq; obscura superueniente, pontem per Istulam strauit, atque ita prima luce cum exercitu effugit, cum se imparem viribus Polonorum cerne-
ret. Sed multò astutius fecerunt Romani, eorumq; Dux Quintus Luctatius, cum eum Cimbri insequerentur, ipsiq; flumen traijciendum esset, quòd id per hostes tutius liceret, pugnam se non detrectare simulauit, eamq; ob rem tanquam castra metaturus, fossas ducere, tentoria figere, atque equites quosdam prædatum exire iussit: quod quidem Cimbris facile imposuit, vt etiam ipsi castra metarentur, diuisiq; in plures turmas alimentis prospicerent: qua re à Luctatio animaduersa, ipse flumen traiecit, nec ab hoste impediri amplius potuit. Bannerius verò Sueciarum copiarum in Germania Archistrategus, à Cæsarianis ad Torgauiam nuperri-
mè in Turingia superuentus, ligna super aggerem poni iussit, quod tantæ multitudini imparem se ad resistendum videret, accensoq; igne sub primam vesperam, visum aduersari-
orum fumo impediuit, ne viderent cum Elbim per pontem transiret; quo disfacto in vltiorem Pomeraniam ad Volga-
stum vsque cum suis concessit. Sed hæc, & talia nonnisi be-
nè disciplinatus miles facere poterit: proinde, quid discipli-
na castrensis sit, & in quo consistat, Paulo attentius disquiramus.

C A P V T X X V I I I .

De Disciplina Castrensi.

VENIO nunc ad præcipuum decus, vt inquit Lipsius, & sta-
bilimentum Imperij, militaris disciplinae tenacissimū vin-
culum: ex cuius sinu omnes triumphi manarunt, & de qua
verissimè, Imperator ille ad milites. *Disciplina maiorum Rem-
pub. tenet, quæ si dilabatur, & nomen Romanum & Imperium a-*
mitte-

mittemus: nam paucos viros fortes natura procreat, bonâ institutione plures reddit industria. Vnde disciplina castrorû antiquior fuit parentibus Romanis, quàm charitas liberorum, qua felicissimè vsi Principatum terrarum possidebant. Et de Manlio legimus, cui imperioso postea cognomen fuit, quòd is contra charitatem paternam filium suum vnicum, in conspectu exercitus virgis cæsum securi percussisset, quamuis victorem, eo quòd contra edictum patris cum hoste pugnaverat. Filiusq; exercitu pro se aduersus patrem seditionem parante, negauit tanti esse quemquam, vt propter illum disciplina corrumpere: & obtinuit, vt ipsum puniri parentur. Sed & Ificrates Atheniensis, *non tam magnitudine rerum gestarum, quàm disciplina militari nobilitatus est*, inquit Probus. Cuius instituto, Spartani quoque seuerissimè in castris suis disciplinam obseruabant, cum fuissent Atheniensium interea temporis capitalissimi aduersarij; profugosq; ex acie milites ita puniebant, vt nullus eorum potuisset vxorem ducere, nec filias suas elocare: tenebantur autem vsque ad mortem pallio ex diuersorum colorum frustulis panni facto vti, ac mediam barbam rasam, mediam verò capillis oblongis pilosam portare, quo videlicet virilem sexum præferentes cor muliebre se habere significarent. Et tales per viam incedentes in publico, licitum erat vnicuique protrudere, percutere, atque spueri in faciem ipsorum. Domicius verò Corbulo in Armenia, duas alias & tres cohortes, quæ ad castellum initio hostibus cesserant, extra vallum iussit tendere, donec assiduo labore & prosperis excursionibus redimerent ignominiam. At Consalvus Magnus quosdam Hispanos suos, quòd ex pugna cum Gallis in Regno Neapolitano profugissent, iussit omnes frustatim diffecare, vt reliqui seueritate pænæ, mallent potius in acie honestè mori, quàm in castris proprijs ignominiosè & per vim vitam relinquere.

Est igitur disciplina seuera confirmatio militis ad robur & virtutem: cuius partes siue munia, auctore Lipsio, quatuor præ-

or præcipua habentur, Exercitium, Ordo, Coerctio, & Exemplum. Priores duæ ad robur spectant maximè; tertia ad virtutem, quarta ad vtrumque. Romaniq; orbis domini non alia re victores vbique exstiterunt, nisi virtute, patientia, & disciplina rei militaris: hoc est, per generositatem animi, per tolerantiam laborum, & per obseruationem diligentem legum militarium. Nam *qui legum metuentissimi sunt, inquit Plutarchus, iidem in hostes audacissimi: & pati quidvis minimè verentur, qui malè audire maximè verentur.* Honestas enim idoneum militem reddit: verecundia, dum prohibet fugere, facit esse victorem. Postquam verò hominibus armatis, intra fines suos continendis, neque legum neque hominum metus sufficerent, veteres his rebus tandem authoritatem etiam Numinum coniungere voluerunt. Eamq; ob rem solennibus ceremonijs milites suos ad obseruandam disciplinam militarem obstringebant, vt ab ea declinantibus, non tam homines & leges, quam Numina potiùs extimescenda, omniaq; quam plenissima religione essent. Quapropter *aspéro & absciso castigationis genere militaris disciplina indiget, inquit Valerius Maximus, quia vires armis constant; quæ ubi à recto tenore desciverunt, oppressura sunt, nisi opprimantur.*

Disciplinam igitur militarem populi Romani debes inquirere, si eam plenam legitimamq; habere vis, qui ex parvissimis finibus, imperium suum pœnè solis regionibus, & mundi ipsius fine distendit. Cuius quidem disciplinæ ius & seueritas, & exercitatio, non solum peditum, sed etiam equitum, tam naturalium, quam mercenariorum supremi Ducis iussu fiat, vel eius Legati. Tribunis, vt nunc Germanorum mos est, tanta auctoritas non permittatur, nisi vicariam habuerint ab Imperatore exercitus potestatem; quia auaritiæ dediti, sæpiùs milites capite damnant, dum ab illis debita sibi stipendia efflagitant. Tribunus itaque pœnam capitis non irroget, sed legionem sibi creditam, assiduis operibus, ad omnem deuotionem, ad omnemq; industria mefformet, incre-

increpando, admonendo, & plagis onerando, si proteruius est; sciens optimè ad præfecti laudem subiectorum redundare uirtutem. Capitis verò sententia, ad ipsum Ducem pertineat, ut moris in Polonia est; ne sub prætextu inobediendi innocentes deinde pereant, dum causam suam defendere non possunt: ut præsentibus bellis in Silesia, atque alijs Imperij locis sæpissimè accidisse vidimus.

Fœminas quoque, atque istius generis otiosos homines, quos modernam militiam sequi videmus, apud Romanos prohibitum erat in castris habere; quemadmodum etiamnum barbari omnes prohibent, Turci, Scythæ, Persæ, Moscouriæ, atque nostri Cosachi. Curabit eapropter Imperator, ne per eas militibus debita annona consumatur, ne animi militum emollescant, ne vires eorum eneruentur, ne peccatis assiduis, iram in se Numinis prouocent. Sed ut olim virtutis modestiæq; præcipua cura castrensium fuit, ita nunc procacitatis petulantiaq; certamen est; & ut Tacitus inquit, *omnia indispota, temulenta, pervigilijs ac bacchanalibus, quàm disciplinæ & castris propiora. Imò nec in procinctu & castris habentur: sed per omnia municipia & villas desides, hospitibus tantum metuendi, effundunt se in luxum & epulas, & nocturnos cœtus, assueti suas vires extolliere, hostium paucitatem contemnere, debellaturi super mensa etiam Alexandrum. Cum verò ad ipsos ventum est, neque animo, neque auribus, neque lingua competere: violenti ad prædas, ignavi ad prælia, verè galeati lepores.*

Igitur Tribuni sollicitudo per hanc laudatur iudustriam, cum miles veste nitidus, armis bene munitus ac fulgens, exercitij usu & disciplina eruditus incedit. Iple vero inter suos commilitones, armorum scientia, virtute corporis, animi magnitudine, morum honestate sit præcipuus: non lucro inhians, non rapinæ deditus, non luxuriæ immersus, quales nunc sunt passim Europæi milites nostri, ita ut pudeat videre exercitus transeuntes, quòd inter ipsos maior interdum soleat esse numerus fœminarum, quàm militum, bouum quàm

equorum, aromatum ac vini, quàm pulueris nitrati aut armorum. Non absque causa itaque Xerxes à trecentis Lacedæmoniorum ad Thermopylas vexatus, cum vix eos confecisset, hoc se deceptum aiebat, *quòd multos quidem homines haberet, viros autem disciplina tenaces nullos.* Nam plus in bello potest disciplina, quàm furor militum, & virtus eorum, quàm copia aut numerus. Hinc plurimi veteres nouitiijq; Duces celebrantur ob diligentem castrensis disciplinae conseruationem Epaminondas, Pelopidas, Chabrias, Hephæstion, Eumenes, Phylotas, ex græcis: ex Romanis, infiniti: sed quos omnes Alexander Seuerus superauit, qui Parthicā expeditionem tanta disciplina, tantaq; reueuentia sui egit, vt non milites, sed Senatores transire dicerentur. Quacunq; iter Legiones faciebant, tribuni accincti, cæsuriones verecundi, milites amabiles erant: ipsum verò ob hæc tot & tanta bona prouinciales vt Deum suscipiebant. In nouitijs, scimus Ludouicum XII. Galliæ Regem, & Carolum V. Imp. hanc ipsam curam apprimè curasse, adeo vt exploratores clancularios per stationes dispersos haberent, qui eis referrent, si quos populum concutere, præde intendere, alicui contumeliam & calumniam inferre viderent. Corruptissimo autem hoc seculonostro, Gustauus Suecorum Rex vtili in milites seueritate, in incolas comitate, in omnes iustitia, cum Pomeriniam intrasset, omnium ad se animos conuertit, quod præcipuè militari disciplina potest adscribi. Nam ipsius miles in aduersis constans & patiens, in pugna impiger & strenuus, cum colonis & hospitibus modestus & affabilis fuit: Cæsarianus contra tolerando impatiens, rapiendo insolens, in hybernis petulans, intolerabilis apud incolas, illos in Suecum ita propensos reddidit, vt tanquam liberatorem sui vbique eum exciperent & amplecterentur. Quod temporis progressu, non exigui fuit momenti ad inuadendum Imperium, atque passim in Germania faciliorem ei hoc ipsum reddidit expeditionem. Coercenda igitur diligenter

genter militū insolentia, excessusque omnis contra leges factus seuerè puniendus est, de quo videamus capite sequenti.

CAPVT XXIX.

De Correctione militari.

INter disciplinæ itaque militaris partes, Coërcitio & adstrictio morum obseruanda est, quæ mores scilicet militum coërcet ac frœnat. Nam *et si nescio quo pacto, assidue dimicantibus difficile est morum custodire mensuram*, vt Calsiodorus inquit, *tamen custodiendi aliquatenus, ne aut soluatur aut omnino pereat militia tua*. Neque enim aliam ob causam lex fertur, quam propter eum, qui sine ratione & lege viuunt, armatus præsertim, adq; direptionem hostium & sociorum natus. Sub ferreis siquidem corporum tegumentis, vt plurimum feri ferreiq; animi delitescunt. Sub truculenta vultuum specie, dira morum immanitas, effrœnata violentia, legum contemptus, prædandi sæuendiq; cupiditas, insolentia, perfidia, impietas habitat. In omni itaque gubernatione communitatis vtilia sunt præmia virtuosius, sed poenæ sunt necessariae coërcendorum peccatorum gratia: quia virtus per se etiam potest subsistere absque vllō incitamento vtilitatis, suæ honestatis pulchritudine contenta; malitia verò si nō habet quem timeat, omnia euertet, omnia corrumpet, præsertim in castris, vbi animi hominum sunt elatiores, partim ob exercitium armorum, partim ob multitudinem hominū sibi inuicem studio artis bellicæ coniunctorum; partim deniq; ob consuetudinem licentiosius viuendi, & ob contemptum periculorum & vitæ. Si igitur non ornabis præmijs benè meritos, non habebis amorem militum: sed si non punies excessus, non habebis tibi obediētes, qua re nihil iam deterius in castris. Et hanc solam ob causam omnes præstantiores Duces potius seueritate, quàm clementia, & con-

ſeruatiōe diſciplinæ militaris, quàm conuiuentia res magnas geſſerunt, & gloriā immortalem ſunt conſecuti. Vt igitur hīc omittam infinitos, ſolum hīc Torquatum in exemplum ponam, qui contra rebelles Latinos exercitum ducens, vnicum quem habebat filium, quod extra ordinem à Magiſtro equitum Latinorum prouocatus pugnaret, capite puniuit etiam victorem, *Fortiter inquit, fili mi dimicaſti, eaq̃ de cauſa te corona donabo: ſed quia neque imperium conſulare, neque maiestatem patriam veritus es, ea moderatione aduerſus te utar, ut & virtutis fructum percipias, & contumaciæ pœnas des.* Atque hæc dicens, ait Zonaras, ſimul & coronam capiti eius impoſuit, & caput amputauit. Quem ex nouitijs Imperatoribus imitatus eſt paulò ſuperiore ætate Simon Vignofius Ligur, claſſis Genuenſis Præfectus, qui vrbe Chiotitus, ingreſſum in ciuium prædia poſtquam militibus edicto interdixiſſet, vnicus eius filius, paterna indulgentia ſeſe aduerſus edicti ſeueritatem ſatis munitum ratus, cuiuſdamq̃ ciuis fundum temere ac per laſciuiam ingreſſus, nonnullis vuz racemis aſportatis, comprehenſus, racemiſq̃ collo ad maiorem ignominia notam ſuſpenſis, palam virgis cæſus, tota vrbe iuſſu parentis circumducus eſt, memorabili rigidi atque inuieti animi exemplo; omnemq̃ paternum ſenſum in Ducum imperijs, militarique diſciplina & obedientia ſancienda ſuperantis. Sed & Auguſtus Imperator licet pacis fuerit amiſſiſſimus, ita nihilominus ſeuere puniebat milites, vt decimum quemque occidere iuſſerit, cum ex acie fugiſſent; reliquis verò toto anno pane alio vtī non permiſerit, niſi hordeaceo. Georgeuitzius quoque noſter teſtatur ſe viſiſſe in expeditione contra Perſas, quòd Turcæ Spahiam, vnà cum equo & miniſtro decollari iuſſerint, quòd ſolutus equus arua cuiuſdam ingreſſus fuiſſet.

Iam autem tria ſunt, ſine quibus nec robur in exercitu fieri poteſt, nec ordo. Continentia, Modeſtia, Abſtinentia. *Continentia* in cibo & venere, ne videlicet milites tui effuſe ſint

sint conuiujs & ventri dediti, & turpissimæ parti corporis. Et hinc Romani nullos pueros nullasq; fœminas in castris habebant, eorumq; Duces ferè omnes vetustiores ac nobiliores, non in culcitris, sed in terra aut gramine, & in antro aut specu saxo impendente ac regente dormiebant. quid autem gregarij milites? ad quos sæpius Valerius Coruinus dicere solebat. *Facta mea non dicta vos milites sequi volo: nec disciplinam modo, sed etiam exemplum à me petere.* Idem præstabat Marius, nec vlla re in laboribus & periculis à gregario milite differebat, nisi officio Ducis. *Modestia*, in verbis, vestibus, & factis: ne videlicet sint iactabundi, vani, buccæ turgidi, & opere ignaui: & qui in vestibus etiam modestiam non iactantiam habeant, iussisq; Ducum suorum obnoxij, non curiosi aut refractarij. Laudatur Hadrianus hac in parte maximè, quod nimirum & militem modestissimum haberet, & ipse non modò in vestitu, sed in victu etiam modestiam obseruaret, libenterq; in vrbe etiam ipsa cibis castrensibus in propatulo vteretur, hoc est, larido, caseo, poscâ: exemplo Scipionis, Æmilianî, Cincinati, Metelli, & auctoris sui Traiani. *Abstinentia* denique in arcenda violentia, qua scilicet volo milites à vi rapinisq; ab esse, & habere manus puras, & vt Vopiscus in Aureliano dicit. *Nemo pullum alienum rapiat, ouem nemo contingat, vnam nullus auferat, segetem nemo deterat, oleum, sal, lignum nemo exigat, annonâ suâ contentus sit.* Hoc soli nunc à milite suo Veneti atque Bataui exigunt, tum inter Machomætanos Turcæ atque Scythæ: reliqui omnes tam Christiani, quàm barbari, ad rapinam videntur esse collecti. Prudens igitur Imperator, non permittet milites esse possessoribus insolentes. *Vinant cum prouincialibus iure civili, nec insoleat animus qui se sentit armatum, quia clypeus ille exercitus tui, vt inquit Cassiodorus, quietem debet præstare paganis, non infestare prouinciales.*

CAPVT XXX.

De Exemplis punitiōis.

VLtima pars diſciplinæ conſiſtit in exemplis Pœnarū & Præmiorū, quia vtraq; hæc valdè poſſunt ad excitandā militum virtutem & robur. Præmia quidem, ſi benè meritis ea tribues, & Promotiones, Honores, Opes miles ſperabit ab inſigni aliquo factō, de quo inferius, hīc autem monſtrandum eſt, quomodo Pœnis miles in diſciplina continetur. Nam hoc certiffimum eſt, quòd ſeueritas ad militiam firmandam eſt efficaciffima. Zamoſcij vox, à Clearcho mutuata, identidem in expeditione Moſcouitica audita fuit, à militibus Imperatorem potiùs quàm hoſtem metui debere. Cumq; ad Velifiam caſtra mouenti plerique tyrones animis conciderent, veriti famem & inſidias hoſtium in illa immenſitate ſylvarum, per quas duci ſe audiebant, paſſimq; diffugerent veſtib; acceptis & ſtipendio, Zamoſcius in vnum atque alterum deſertorum grauiori pœna conſtituta facilè reliquos continuit, & paucorum coeſione omnes ad ſeruandam diſciplinam excitauit. Etenim *indulgentia & largitio*, inquit ipſe qui largitionibus corruperat exercitus Iulius Cæſar, *ſpecioſum reddunt præſentem exercitus amorem, paulatim tamen & occultè militarem diſciplinam ſeueritatemq; minuit. At delicta militum nullā veniā proſequi, uſu ſalubre, & miſericordia melius ſemper apparuit.*

Duplices autem pœnæ fuerunt apud Romanos. Aliæ quæ afferebant ignominiam. Aliæ quæ dolorem & damnum. Ignominia erat cum degradarentur de ſuis locis, & publicè repræhenderentur ab Imperatore. Dolor verò & damnum cum capti ab hoſte non redimerentur, nec permutatione captiuorum liberarentur; cum decimarentur ad mortem, cum ſtipendia merita perderent & annonam, cum extra patriam
uſque

vsque ad mortem militare cogerentur. Ita fecit M. Marcellus, suis militibus cum ex acie profugissent in pugna cum Annibale. Ita Sempronius Grachus, Ita Iulius Cæsar, & alij. Sed discrimen tamen aliquod hic militaris Doctor ingerit, cum inquit, "Milites pœna & timor in sedibus corrigunt, in expeditionibus spes & præmia faciunt meliores." Præmia præcipua sunt, honor, libertas, ciuitas, opes, tutela; Pœnæ sunt, vel maiores, vt est crux, crematio, decollatio, disceptio in partes; vel mediocres, vt metallum, ludus, deportatio, tormenta: vel denique minores, vt relegatio, exilium, infamia, opus publicum, vincula. Quemadmodum igitur nihil non aggressuri sunt homines, si magna conatis magna præmia proponantur, ita si scelera neglecta aut leuiter castigata fuerint dissoluitur disciplina castrensis, & Ducis contemptus oritur. Semperq; pœna leuior, turpi exemplo, maiorem peccandi occasionem suggerit, dum cuncti latere se posse sperant, aut si detegantur non difficulter euadere. In exemplum igitur cæterorum grauiter scelera puniantur in castris, quia hoc modo conseruatur disciplina; nimia autem conniuentia seditiones parere solet, & Ducis, vt dixi contemptum. Quod vt facilius vtrumque euitaret in bello Turcico Chodkieuicius, qui Lituanicarum copiarum Dux Supremus existens Polonicorum exercitum quoq; fuerat pro tunc declaratus Imperator, ut igitur in aliena prouincia auctoritatem sibi adstrueret, vt ad Chotimiam venit, recusantem quendam Tergiductorem excubias peragere, quod à Præfecto cohortis suæ missionem, pro libertate Polonica, post exactum trimestre spacium peteret, iussit statim capite plecti in exemplum cæterorum, ne suis Centurionibus dicto contrairent, & missionem tunc postularent, cum iuberentur aliquid agere. Iam autem multo magis clarorum quàm obscurorum virorum pœnis vulgus frenatur: pluresq; ex magnatibus etiam pœnarum metus, quàm pudor aut reuerentia legis, rationisue ductus efficit obedientes, ac temperantes. Ita Venetis cum

Antisti-

Antiftite Aquiliēfi & Goriciano Comite pugnantiſſis, cū plurimi gregarij milites ſecreta ad hoſtē deferrent, venit quoq; in ſuſpicionem perfidiæ Gardanus quidam multi nominis homo & Præfectus in caſtris Venetis, qui poſtquam fuiſſet ſcleris conuictus, tormentali machina in hoſtium caſtra coniectus, metum intulit reliquis ne ad hoſtem deſciſcerent, aut proderent ſecreta Venetorum. Modus itaque hic ſeuerior puniendi, efficit vt tam ſecceſſiones euitentur, quàm iuſtitia intemerata ſubſiſtat. Quod Patrum ætas in caſtris Ducis Albani maximè vidit & approbavit: is ſiquidem, haudq; ſcio an ullus vnquam alius Imperator ab eo tempore, tanta diſciplina exercitum ex Italia vſque in Belgium, deduxit, vt non modo oppidorum nulli, ſed ne vni quidem ruſticorum calæ illata viſ a quoquam, aut iniuria memoretur, ſi facinus vnum excipias, quo equites ſclopetarij tres in aditu Lotharingiæ, totidem verueces è grege vicino abegère: qui ſtatim ab Duce Albano, re compertâ, ſuſpendi o damnati, ac pecudes remiſſæ ſunt. Quanquam intercedente Lotharingo Centurione, qui Principis ſui nomine, Albano in limite accurrebat, duorum vitâ Principis honori conceſſa, tertius nihilominus aliorum exemplo, in furcam actus eſt, talis inter eos ſuper tympanum iactis, fatoq; non temere in eum cadente, qui ſocijs author extiterat maleficij.

Quoniam igitur ita ſerpit illud inſitum in natura malum conſuetudine peccandi libera, ſinem vt audaciæ ſtatueret ipſe ſibi homo non poſſit; proinde aduertant Duces bellorum ne in caſtris vel minimum etiam ſcelus impunè tranſeat, ſi authoritatem ſuam conſeruare volunt. Et Romani quidem capite plectebant qui vigilias neglexiſſent, qui loca ſua in pugna deſeruiſſent, qui occultè caſtris quædam extuliſſent, qui egregium quoddam facinus perpetratum falſò ſibi adſcripſiſſent, qui præter voluntatem Ducis pugnaſſent, qui arma timidi abiēcſſent. Ac ſi fortè contingeret cohortem vel legionem integram officium ſuum neglexiſſe, ne omnem dele-
re neceſ-

re necesse foret, ad decimationem descendebant, atque decimum quemque sorte productum necabant. Qua quidem seueritate id assequebantur, vt omnes poenam quam pauci sustinebant timerent, & quodammodo experirentur. Modum autem puniendi fontes talem receptum habebant: conuictos Tribunus vel Consul virga leuiter feriebat, inde reo fugam capeffere, at militibus fugientem occidere licebat, adeò, vt subito saxis, iaculis, alijsq; id generis telis obrueretur, vt paucissimi sanè eorum euaderent; quos tamen tot incòmoda atque ignominia, si lares suos repetere contingeret, sequebantur, ut perire multò satius fuerit. Non multum ab hoc puniendi modo hodiernum abscedunt Heluetij, quibus moris est fontes per commilitones occidere: quod quidem prudenter constitutum apparet, nam quo quis à reo defendendo abducatur, nullum promptius remedium exquiri possit, quam eundem in punishmentem eius incendere, si quidem alio animo ipsi benè cupit, & longè alio desiderio eius punishmentem expetit, si nimirum ipsimet res exequenda sit, quam vbi executio ad alium transfertur. Carthagenensibus verò peculiare supplicium fuit imbelles & corpore infames cœno ac palude, iniecta insuper crate, mergere: facientis siquidem culpam obtinet, qui quod potest corrigere, negligit emendare, & totum exercitum conniuentia sua corrumpit. Iam autem vltor vnus, est conseruator plurimorum; qui sanè si improbi sint, metu poenæ, neminem iniurijs laceffunt; si probi, eadem ratione à nemine iniurijs prouocantur. Sed ne ad duella quoque more militari prouocent, inhibeat Imperator.

C A P V T X X X I.

De Prohibendis aut permittendis Duellis.

Veterem Francorum morem laudat Agathus, quo Reges cum Regibus, vel iure certare, vel singulari inter se

Aa

certa-

certamine concurrentes, rem transigere iubebantur. Quod si hodie Reges obseruare vellent, melius profectò cum Europa nostra ageretur, quæ impotentia Principum exagitata tot miliones hominum, vel nostra ætate, Marte absumptos. vidit. Erat hic quidem modus litium finiendarum inter priuatos, Danis olim permissu Frontonis Regis receptus, & ab ijs in Italiam, Germaniam, Galliam atque Poloniam traductus, sed tanquam iustitiæ & ordini iudiciorum aduersus, constitutionibus Principum, & bona ratione moribus sublatus est. Inter maximos tamen Reges qui nec iuri parent, nec sanguini subditorum parcent, iure merito deberet obseruari, vt sic citius bella finiantur morte vnius Regis proterui, quàm tot myriadum innocentum. Et hac ratione ductus Carolus V. Imp. Regem Galliæ Franciscum I. ad singulare certamen velle se prouocare, in consistorio Pontificis Romani professus est. Eademq; sanè de causa Stephanus Rex Poloniæ, Ioannem Ducem Moscorum ad certamen singulare per epistolam prouocabat, ne videlicet sanguis Christianorum vtrunque absque causa iusta profunderetur.

Si itaque bellum publicè suscipiendum facilè non est, consequens est, ne duelli vsum permittendum, inter ciues aut milites nostros: sed bene cum hoste duella fieri possunt, si prouocauerit, quia agitur de gloria gentis; alias à nobis prouocandus non est, nisi etiam opprobrio aliquo te afficiat. Ita Ioannes Zamoscius scripto contumelioso à Carolo Sudermaniæ Principe læsus ad singulare eum certamen prouocauit, quia *nemo est tam agrestis, vt inquit Cicero, quem non, si ipsa minus honestas, contumelia tamen, & dedecus magnopere moueat.* Propriumq; hoc humani ingenij est, contemptum difficilior, quàm rei cuiuslibet detrimentum pati. Nam vulnera illata & rapinæ corpus tantum & patrimonium lædunt; at contemptus & despiciatio in ipsummet animum, vbi situs honor est, penetrat. Ab hoste itaque prouocatus & Dux & miles, ad singulare certamen descendat, quia

quia agitur de gloria gentis: obseruato nihilominus hoc, ut cum pari decertet; semper enim natura gaudet æqualibus. Ne igitur Dux, cui cura Reip. & exercitus commissa, cum gregario congrediatur: neque permittat Tribunum decertare cum simplici milite, & præsertim barbaro; sed æqualem cum æquali, & illustrem ex familia cum Præfecto legionis aut exercitus. Ita C. Marius, Theutono cuidam ex gregarijs prouocanti eum, & postulanti ut prodiret respondit; *Si cupidus mortis esset laqueo eum vitam posse finire*: cumq; demonstraret ei gladiatorem contempnæ staturæ, & prope exactæ ætatis, obiecit ei dixitq; si eum superasset cum victore congressurum. Ut autem ipse victor euadas, & gloriam genti tuæ compares, licitum est etiam industria ingenij uti, & astutiam militarem adhibere, absq; tamen transgressionem limitum honestatis, ne dum tu videlicet in intentum incurris, alius à tergo vel à longinquo tua suggestionem eum interficiat, sic enim nihil tu ipse laudis consequeris, gentem verò tuam ingenti ignominia afficies: nisi forte casus aliquis interueniat, & te inscio progredientem ad certamen fato aliquo interimat, uti accidit Friderico Regis Daniæ filio ad certamen cum Iacobo Piccolomineo prodeunti, quem à longe gregarius quidam è castris Cæsarianorum conspiciatus, sclopo exploso confecit. Rectius sanè Melanthus Dux Atheniensium, qui cum prouocatus à Rege hostium Xantho Bœotio descendisset ad pugnam, ut primum cominus stetit, *inique inquit Xanthe, & contra pactum facis, aduersus solum enim cum altero processisti*: cumq; admiratus ille quisnam se comitaretur, respexisset, auersum vno ictu confecit. Virtus enim an dolus, quis in hoste requireret, cum nihilominus tamen inter tam illustres personas omnis fraus abesse deberet. Sed quia res cum hoste, tolerandum, inter milites verò tuos aut ciues nusquam omnino permittendum, quia & seditiones inde exercituum, & odia discordiæq; militum, & contemptus Imperatoris nascitur. Imò & numen diuinum offen-

ditur: exemplo Henricus II. Gallia Rex, qui in ipso regni principio serium duos inter iuuenes ex præcipua nobilitate duellum approbauerat, spectaueratq; cum aulae Proceribus, ipse deinde ludicro induello, vitam regnumq; funesto fine terminauit, cum Prætorianæ cohortis Præfecto, Gabriele Comite Mongomerio, contra suorum preces congressus. Vt igitur delicta militaria omnia, sic & duella seuerè castiget Imperator, fortes autem ac probos viros præmijs & honoribus afficiat: honorata siquidem virtus cessare nescit, sed ut flamma ventis præmijs & honore excitatur, & ardua petit: neglecta verò languescit primùm, deinde sensim extinguitur.

C A P V T X X X I I .

De Præmijs & honoribus militariis.

ROmani ad milites suos, tam metu poenæ, quàm spe præmij in officio continendos, omnibus qui egregij quid perpetrassent, præmia constituta habebant: siquidem qui ciuem seruasset, qui primus vallum murumue superasset, qui primus in castra penetrasset, qui hostem pugna singulari interemisset, qui eum equo deiecisset, atq; adeo quidquid virtutem sapiebat à Consule cognoscebatur, remunerabatur, atque publicis laudibus celebrabatur. Tum ij qui dona istiusmodi militaria consecuti essent, præter gloriam atque famam, quæ apud comilitones ipsis surgebat, cum ad lares reuerterentur, ea solenniter gestabant, atque ab amicis gratulabundis honorificè excipiebantur. Mirum itaque non est, populum hunc tam latè vndique imperasse, siquidè tam poena, quam præmia ijs in parato essent, qui vel benè, vel malè re administrata laudem aut vituperationem meriti fuerant; quarum rerum maiorem quidem partem etiam nobis imitandam esse duco.

Igitur

Igitur duo fulcra præcipua militiæ sunt Præmium & pœna, illud excitat ad virtutem; ista cœrcet peccandi voluntatem; vtrumq; verò continet disciplinam castrensem, & conseruat in obedientiâ militem. Præmium consistit in honore, & vtilitate: honorq; ipse exhibetur partim viuis, partim mortuis. Mortuis ponuntur statux; eriguntur columnæ, & sepulchra; scribuntur epitaphia & orationes. Viuis eadem præmia, excepto solo epitaphio; sed in locum huius dignitates seu magistratus in patria, & vtilitates ex eis simul. Cæterum præcipuum fuit ornamentum corona à Duce publicè data, siue ciuilis, siue muralis, siue vallaris, licet nullius valoris fuerit, ex gramine aut folijs quærcus facta. Nihilominus tamen dabantur illis & catenæ aureæ, & vasa diuersa aut arma argentea; præcipuumq; ac solidum inter illa virtutis præmium torques fuit: quod qui meruisset, præter laudem etiam commoda consequeretur. Fueruntq; torquarij alij simplares, alij duplares, qui binos torques ad instar crucis in humeris gestabant: his magnus honor fuit constitutus, & de gradu in gradum honoris ascendebant primariò, vt cæteri milites ex tota legione omni labore ac deuotione contenderent ad tanta præmia peruenire. Hoc enim proprium ac genuinum præmium inter milites est, de vno gradu promouere in alium, vt faciebant Medi, Persæ, Babylonij, Iudæi, Græci, Romani, omnesq; aliæ nobiliores in Orbe gentes; tum augere stipendia, dare prouisiones mutilatis sufficientes ad vitam: quia magis paupertatem miles timet per totam vitam cum mutilatus fuerit, quàm mortem, quæ eum statim absumit. Similiter si occisorum filijs à Principe subuenitur, tunc nullus mori recusabit. Liberalitas enim in duobus rebus consistit. in subleuatione miseriæ, & in promotione virtutis: promouere itaque viros fortes & bonos ad gradus honoris Regium est; subleuare verò in opiam egenorum & pauperum omnino diuinum. Quapropter excellentes hac in re fuisse leguntur Imperatores illi omnes Magni cognomi.

gnomine insigniti, Constantinus, Carolus, Theodosius, Iustinianus, Basilius, Otto: Alphonsusq; Aragoniæ Rex atque Robertus. Tum Ludouicus IX. Rex Galliæ. Ioannes II. Rex Portugaliæ, Iagello Rex Poloniæ, & Ludouicus Dux Sabaudiæ, quorum omniū familiæ, vel propter hoc ipsum, diu Regna & Imperia tenuerunt, Deo ipsis hanc beneficentiam remunerante. Et de Alexandro Seuerò, Lampridius dicit, *Aurum & argentum rarò cuiquam nisi militi diuisit: nefas esse dicens ut dispensator publicus in delectationes suas, & suorum conuerteret id quod provinciales dedissent.*

Sic igitur Dux & Princeps liberalis in milites, & promoveat ad honores, sed non indignos; & non immodicè; & non in vno tempore; quia *liberalitas hoc ipsum exigit, ut sit sub mensura, cum ratione, & successione facta.* Necessumq; est, ut acrius ille dimicet, quem ad opes ac dignitates ordo militiæ, & Imperatoris iudicium consuevit euehere. Vnde notum illud est, eò impendi laborem ac periculum, vnde emolumētum ac honos speretur: & nihil à quoquam expeti, nisi cuius fructus antè prouiderit. Itaque Romani hic mirifici, qui non solum altiores ordines assignabant à virtute: sed etiam publicè laudes cumulabant & honores, donabantq; pro concione, cum alias res diuersas, tum hastas, phaleras, coronas, & ut adnotauimus præcipuè torques.

Postquam verò virtutis præmia occupasset ambitio, & per gratiā promouerentur milites, qui promoueri consueuerant per laborem ac merita, statim robur militiæ fractū est, in vniuersa Europa; & Centuriones Tribunique pecunijs honores affecuti lucrum respicere cœperunt, non armorum honestatem aut gloriam. Hinc occisis non substituunt alios; & morbo debilitatos, ut bruta animalia inutilia relinquunt, sacramentum recusant, disciplinam detrectant; comparere in ordine, ne numerentur à Ducibus omninò recusant, nullaq; prorsus tam in castris, quam in hybernis exercitia adhibent; nec aliud quidpiam curant quam prædam, rapinas, latrocinia,

nia, furta: eorum verò Præfecti, vt stipendia ex integro ipsi capere valeant, quæ integræ legioni aut cohorti debebantur. Sicut igitur deplorandus est illius Reip. status, vbi pecuniæ non meritis dignitates conferuntur, ita proximus interitui exercitus ille, in quo indignis munia bellica committuntur, quibus nec virtus, nec prudentia, nec rei militaris experientia est, sed in omne fas nefasq; auidi, non sacro non profano abstinent, à priuatis cotrumpi se sinunt, pœnas innocentium, impunitates noxiorum diuendunt; quin & hostium donis facile expugnantur, quibus quæcunque arcana Patriæ & Principis sui proditores reuelant, vt passim præsentibus bellis per totam Europam fieri videmus.

Designentur ergo honores militares & officia bellica, quos virtus, fides, in patriam & prudentia commendant, non quos fortunæ munera obtrudunt. Nam vbi diuitiæ claræ habentur, ibi omnia bona vilia sunt, fides, probitas, pudor, pudicitia, vt inquit Sallustius, sequiturq; ambitio & auaritia, atque ex ea militum coniurationes contra Principem aut Patriam; seditiones contra Imperatorem & Duces ordinum, ferocia contra miseros agrestes & provinciales. Et quamuis hoc naturale est, & proculdubio laudandum, ijs nos magis fauere, quos vel sanguis, vel affinitas arctiori vinculo nobis adiunxit. Imperator attamen si vir bonus est, & quæ vita potior esse debet, Reipub. salus illi est cordi, curet vt ijs quos ad honores militares prouehere optat, industria sua aut meritis dignitatem ante mereantur, quam suffragio illius vel commendatione, non in castris modò, verùm etiam in Rep. obtineant. Aliter enim dum amicis studemus; exercitus perdimus, patriam in periculum adducimus.

Cæterum maximus honor esset, si Historiæ scriberentur iussu Regio, & vniuscuiusque meritum præcipuum commemoraretur. Nam si propter Epitaphium multum sudatur à viris fortibus, quod vix aliquot legent, qui sepulchrum eius videbunt, multo magis excitarentur ad virtutem, vt possent esse

esse in Historijs notati, quas totus mundus legere poterit. Licurgusq; olim voluit, vt sui ciues non aliam ob causam in eloquentia exercitarentur, quam vt laudarent eos qui pro patria moriebantur, & reprehenderent illos qui fugerent ex acie. Spartaniq; deinceps ipsi nemini Epitaphiū ponere permittebant, nisi illi qui pro patria in acie occubuiſſet. quia vt corpora nostra suo viuunt cibo, sic & virtus suo viuunt præmio, sua augetur laude, *Nec quisquam est*, inquit pro Archia Cicero, *tam auersus à Musis, qui non mandari versibus æternū suorum laborum facile præconium patiatur.* E contra verò sæuit neglecta virtus, furit, ac nimium seditiosa est, resq; ipsas communes perire cupit, cum videt se esse relictam, hinc legimus viros magnos ac excellentes, tum apud Græcos, tum etiam apud Latinos, cum se neglectos esse non ferrent, patrias suas funditus euertisse. Quod ne fieret, maturè providendo Athenienses, non præmia modò patriam amanti- bus, vel pro ea pugnantibus proponebant, sed sepulturæ etiam eorum qui in bello occubuiſſent curam habuere, adeò vt si quis Ducum bello peremptos sepulchro honestare (in quibus post celebratam vt diximus orationem, epitaphia incidebant) neglexisset, capitis pæna puniretur. Ipsis verò Ducibus, vitis quidem Ouatio & Triumphus mittebatur, tum magistratus in Repub. diuersi; defunctis verò Obelisci, statuæ, columnæ, templa, & id genus alia, quæ tam in Græcis quàm in Romanis Historijs legimus. Vbi maximè laudatur Alexander Seuerus, vigesimus quintus Romanorum Imperator, qui sic suos vbique sciuit, vt in cubiculo haberet breues, & numerum, & tempora militantium; & promouendos annotaret. Hinc si quis locus vacaret, hoc vnum ipsi renunciabatur, & optimus Imperator, non ambientes muneribus præficiebat, quicunque sanè essent, sed quos ex commentario promouendos cognoscebat. Iuuat quoque virtutem, cum occisorum pro patria inopes liberi iuuantur & promouentur, vti faciebant iidem Romani. Sed & Philippus Macedo cum

do cum audisset Pythiam quendam bonum pugnatores alienatum sibi, quod tres filias inops vix aleret, nec à Rege adiuuaretur, monentibus quibusdam uti eum caueret. *Quid si,* inquit, *partem agram corporis haberem, abscindere potius quam curarem?* deinde familiariter secreto elicitum Pythiam, accepta difficultate necessitatum domesticarum, pecunia instruxit, ac meliorem fidioremque habuit, quam habuerat antequam offenderet. Alphonfus verò magnus è nauicula in mare prolapsus, beneficio remigis liberatus est. Huic ergo meriti gratia quotannis dum viueret duodecim vncias auri pendendas ex ærario statuit. Plura plures alij Reges atque Imperatores fidis suis amicis atque fortibus viris, omnes tamen vnica ista intentione, ut virtutem alerent. *Cuius enim rei præmium est in ciuitate,* inquit Romanæ Historiæ scriptor, *ea maximis semper auctibus crescit.* Si igitur adulatores in aula præmia consequuntur, omnes milites castris relictis current ad aulam, si autem viri fortes & bellicosi meritis consequuntur laudes & honores, aulici relictis artibus flagitiosis, induent animum generosiores, & è regia current in castra; ubi quomodo per æmulationem sint excitandi ad virtutem, hoc vltimo capite videamus.

CAPVT VLTIMVM.

De Æmulatione Militari.

Tanta quippe est animi humani superbia, ut non solum multos æquare annitatur, sed omnes etiam post se relinquare contendat, atque ita per omnia Regna & Imperia vsu venit, ut continua inter ciues sit æmulatio, non tam ipsius virtutis, quam nescio cuius vmbrae dignitatis. Hinc olim, inquit Comminæus, Aragoniæ Reges æmulam habere Andegauorum Ducum familiam, Mediolani & Insubriæ Vicecomites, oppugnabantur ab Aureliana domo. Venetis

infesti fuere Principes Itali & Florentini. In Germania inter Austriacam & Bauaricam domum nusquam bene conueniebat. Geldri semper impugnabantur à Cliuensibus; illi rursus valde fuere iniqui Iuliacensibus. Nunc Turcæ Persas odio prosequuntur, Scythæ Indianos, Iaponenses magnæ Chinæ populos, aliæq; gentes alios, quia in rebus humanis ita comparatum est, ut nullus ferè sit populus, cui non æmulum aliquem & aduersarium Deus excitarit.

Sed si qualibet in re animus crescit ex æmulatione, tum maximè in re militari, tam inter vicinos populos, quam inter vnius gentis ciues, ubi quisque sanguinem suum non in vanum vult effundere, sed quam laudatissimè aut viuere, aut mori: cum & sagati viri eadem bona inuidencia naturaliter appetant excellentiores vnus alio fieri, præsertim in rebus honestis, & quæ sibi & familiæ suæ possunt esse ornamento. Et propterea semper inter æquales, aut sibi similes, perpetua est æmulatio, & quod vni diuinitus datur, id sibi ademptum alter arbitratur, statimq; animi quandam ægritudinem concipit, si eo quod concupierit, alius potiatur, ipse careat. Quod cum probè Romanis perspectum esset, ad nutriendam æmulationem, primùm Legiones integras collaudabant, & se velle aliquid efficere monstrabant, hac & non alia Legione, quæ ne inferior esse videretur, quasi contempta à Duce, vtrò suam alacritatem offerebat, & vtramque simul eo mittebat, ut honesta æmulatione ducti fortius rem gererent, & ipsa contentione decoris accenderentur. Deinde quia diuersarum nationum auxiliares cohortes Legionibus adiunctas habebant, nominatim vnâquamque gentem ad strenuè sese gerendum incitabant, simulq; tres aut quatuor nationes diuersas ad ineundum prælium emittebant, ipsi quasi censores virtutis ipsorum à tergo stantes. Quod etiam in oppugnatione Syluæ Ducis Henricus Nassouius fecit, & in obsidione Traiecti: Gallos, Anglos Germanos atque Barabos suos, nominatim & ad labores & ad prælia incitando.

Simi-

Similiter Rex Inuictissimus Vladislaus I. Vfecit, cū ab ob-
dione Smolensci Moschos repelleret, vtiliorem inquiring esse
peditatum ad deuincendum tam potentem hostem, quā e-
quitatum qui spectator tantummodò munitionum hostili-
um esset; quo ita commouit nobilitatem Polonam, vt equis
descensis, subito vallum hostilem diruerent, munitionesq; e-
orum lunatas, quæ inexpugnabiles videbantur esse, cum tor-
mentis bellicis caperent. Præterea inter Germanos & Polo-
nos æmulationem excitabat, itemq; inter Lituanicum & Po-
lonicum equitatum, tum inter Cosachos leuioris armaturæ,
atque hastatos, qui præcipuum robur exercitus nostri. At-
que ita omnes ac singulos nominatim compellando, paruo
suorum exercitu, numerosissimas aduersariorum copias de-
uicit, & Duces ipsos ad deditionem coëgit. Sed & cum
Stephanus Polociam à Moschis recuperasset, & ad mensam
in præsentia Ducum dixisset, nusquam eam expugnari po-
tuisse, ni Hungari sui adfuissent, continuò Melecius Poloni-
carum copiarum Summus Præfectus, cum solis Polonis ad
Socolum arcem munitissimam processit, & pro concione,
Regis opinione de gentis Polonæ fortitudine explicata, ad
tantam eos æmulationem accendit, vt intra quatridduum
munitionem, quam Rex toto cum exercitu oppugnare non
audebat, vi maxima expugnaret, reuersusq; cum victoria &
captiuis, gloriaretur palam se nullum in castris suis Hunga-
rum habuisse, præter vnicum agasonem, quem ex itinere sta-
tim recensito exercitu, ad regia castra redire iusserat. At-
que ita in rebus militaribus perpetua quædam apud nos æ-
mulatio est inter gentem Lituanam & Polonam; inter Cosa-
chos Zaporosenses & peditatum Polonicum atque Germa-
nicum; tum inter equites leuioris armaturæ & cataphractos
seu Hussaros. Industriaq; bellica communiter attribuitur
Germanis, diligentia Lituanis, robur Polonis, vigor Roxo-
lanis, omnibus autem animi magnitudo ex libertate, & for-
titudo ex rerum gestarum gloria. Valet & copia annonæ,
licentio.

licentiosaq; exactio victualium à prouincialibus, vnde & spiritus generosiores animi, & vires corporis crescūt. Quod etiam Turcæ suis Ianitzaris permittunt cum nimia licentia, vt impunitate commissorum syluescant, & quasi obdurescant animi ipsorum, quo deinde in prælijs ita hostem contemptui habeant, sicuti solent eos, quibus impunè iniurias inferunt. Licet itaque scelera commissa apud nos per Duces, & eorum Præfectos delegatos puniantur, duri tamen sunt nostri milites in miseros aggreſtes & plebem oppidanam nimia exactione pabuli & victualium, in quibus ipsis, non præscribitur modus. quæ res nunc euertit Germaniam; sed & Gallia atque Italia iam persenserunt, sentientq; tanto magis, nisi ad veterem disciplinam militiam reuocabunt.
de qua nunc satis.





SIMONIS STAROVOLSCI INSTITVTORVM

Rei Militaris

LIBER QVARTVS

De Acierum instructione, & Pugna.

CAPVT PRIMVM

De Exploratione hostium.



NTEQVAM in aciem descendat Imperator, aut manus conserat cum aduersarijs, necesse est, vt certò ac exploratò habeat, qui nam illi sint, quales, quanti, & vbi locorum. Nec sufficit enim scire, bellum nos gesturos cum Mosco, qui est publico Reipublicæ decreto hostis declaratus, sed perquirendum diligenter, qui ex confoederatis illius in castris eius erunt, aut qui mercede conducti? tum qualiter instructi, vel in terra, vel in mari? quanti numero, aut quam diuersos exercitus habeant? & quibus in locis? quibus vijs procedunt? num obuiam prodire, an in proprio solo expectare nos volunt? & similia. Sed in primis, vt Ducis ipsius ingenium noscat. Annibal hac in re à Liuiο maximè laudatur, cum inquit, O-

omnia ei hostium, haud secus quam sua nota erant. Et I. Cæsar, ad quem ceu scopum quendam Imperatores mentis aciem dirigere debent, exercitum neque per insidiosa itinera duxit vnquam, nisi præspeculatus locorum situs; neque in Britanniam transuexit, nisi ante per suos, portus & nauigationē, & accessum ad insulam explorasset.

Igitur mitte exploratores, tam in mari, quàm in terra: sed fideles, ac prudentes, peritosq; locorum & linguæ eorum ad quos mittuntur; per quos inquire non modo quot, aut vbi essent, sed etiam qui & quales; eorumq; mores & naturam nosce. Nam quorundam in impetu vis est, qui parua iisdem morâ lanquescunt; quorundam verò & impetus non adeò acres, & ipsi facile in perfidiam mutantur. Ergo ne te moras, muta locos, & missis occultè corruptoribus, exuendam ad fidem hostes emergere. Omnia hæc tentabat Xantippus, omnia Annibal, Scipioq; ipse; qui in Africam transgressus, vt se Græcorum astus, Penorumq; fraudes flocci facere monstraret, compertis Carthaginiensium in castris suis exploratoribus, iussit eos vbique circumducere, & omnia monstrare; atque ad suos remittere, vt quæ vidissent Ducibus referrent. Quo facto consternati animo Carthaginienses amplius exploratores in castra Romanorum non miserunt, & quomodo ille omnia ad pugnam procedens immutauisset nesciuerunt, ac propterea in acie succubuerunt. Quapropter exploratores Imperator, & itinerum duces bene stipatos munitosq;, & tam pollicitationibus onustos, quàm poenæ metu terrefactos ad iter inuestigandum aut hostem cognoscendum emittat. Imprimis autem curet, ne vlla ratione animi sui sensa exercitus subodoretur, nihil enim in bello vtile adeò est, quàm ea, quæ conari velis quàm studiosissimè occultare. Chodkieuicius Polonos in Osmanum ducturus, priusquam ipse in castra iuisset, duodecim exploratores nemine è suis domesticis sciente, Leopoli in Turciam per vias diuersas misit, quorum quoque nullus de alio sciuit:

vnicui-

unicuique autem in mandatis dedit, ut si Turcarum exercitus selectus & numerosus erit, quisque secum tritici sacculum perpetuò deferret; sin verò mediocris & ex tyronibus conscriptus, sacculum hordei. Accidit ut Armeni mercatores qui habitant Constantinopoli, Armenis qui sunt in Polonia, scriberent captos esse nonnullos exploratores Polonorum diuersis in locis, & conductos omnes Constantinopolim ad examinandum, quorum quilibet sacculum tritici penes se gestabat, cum vnus ex eis fuerit Cayri in Ægypto comprehensus, alter Iadræ in Sclauonia, alij alijs in locis, (quinque etenim perierant, septem verò diuersis vicibus in castra ad Chodkieuicium redierant) statim Chodkieuicius ex rumore illo plebis sciebat, & suos exploratores perijsse, & magnum barbarorum exercitum, atque ex veteranis conscriptum futurum. Dux igitur nihil incognitum habere debet, quod hostis agit, quantas vires habet, qualem militem & duces, tum consilia, loca, apparatus, mores, astusq; hostium maturè præuidebit & sciet. Carolus V. quod Albis vadum per rusticum explorasset, quem Protestantes ignorabant, accelerauit victoriam, & hostium animos magna confusione repleuit.

Iam verò commune est hoc incommodum ijs, qui in hostili solo bellum gerunt, ut non probè res aduersarij cognoscant. Nam cum indigenis exploratoribus adhibere fidem nequeant, suosq; non bene regionem callentes habeant, hostium consilia ut plurimum penetrare non possunt, cum sua contra passim prodantur. Ita mouens in Turcam Stephanus Potoci⁹ succubuit in Valachia. Ita Iasloueci⁹ ante eū incidit in casses ad Oczakouiā. Ita Zolkieuius perijt bello Czecoren⁹; ita plurimi à diuersis hostibus oppressi, sed nouissimè Tyllius in pugna Lipsiensi, licet hostes eiusdem linguæ & moris habuerit, tamen cladem passus est, ob defectum peritorum exploratorū, qui hostem non benè scrutari, ei significarunt solum Saxonem cum exercitu venire, qui Lipsiensibus au-

bus auxilium ferret; de Guſtauo autem Rege Suecię nil quidquam admonuerunt, qui viribus ſuis cum Saxone coniunctis veniebat, vt vna acie decertaret. Nec Tyllius Regem adefſe intellexit, niſi tum cum eius ſigna in ipſa pugna conſpexiſſet. Eapropter Polybius docet, Imperatorem in hoſtilem agrum proſecturum, ſi regionis naturam ipſe non ſciat, eam à ſcientibus ſtudioſe quærere & diſcere debere, præſertim vbi ſaltus plurimi aut ſyluæ denſæ ſunt. Ideo in Dacia tenebras ſaltuum prudenter expauit Curio: & Fabius Maximus non ante per Ciminiam ſyluam exercitum in Hetruriam duxit, quam fratre præmiſſo explorafſet accessus. Perijt cum tot legionibus in Germania Varus, in Parthia Craſſus, dum opportuna inſidijs loca vterque non vitat. Et Io. Albertus præcipuam partem nobilitatis Polonæ in Valachia eadem ex negligentia amiſit, cum temere, nec explorato hoſte contra Stephanum Palatinum mouiſſet. Nuperri-
mèq; Ioannes Verdius Gallos in Lotharingia in inſidias tractos clade foediſſima affecit. Multi itaque Imperatores cum reliquis diffiderent, ipſi per ſe explorare omnia voluerunt: vel maximos viros in eam rem elegerunt. Non enim temere vilioribus fides adhibenda eſt: sæpe illi per ignauiam aut negligentiam officio ſuo minus functi, vt vel pœnam euadant, vel promiſſa ſibi præmia non amittant; ne nihil referant, plurima fingunt, & non leui periculo credulos exponunt. Imò ſubinde tranſeunt in hoſtium partes, quorum vt rebus ſtudent, peſſimam nocendi voluntatem differunt in occaſionem. Quo pacto trium à ſe emiſſorum ſcelere, interceptus fuiſſet à Turcis Caſtriotus Scandebergius, ni bono Deo volente, ſtructas ſibi inſidias, ferè ſerò, detexiſſet.

Et quia tutius operantur exploratores noctibus quàm diebus (nam quodammodo ipſe ſui proditor inuenitur, cuius ſpeculator fuerit ab aduerſarijs deprehenſus) ideo exploratores emittendi ſunt viri prudentes & audaces, ne per tenebras aliquid aliud conſpicati putent hoſtes adefſe, & à ſuo propoſito

proposito deterreantur. Quemadmodum quibusdam accidit in Podolia, qui cicere campum latissimum confemina-
tum, dum floribus emissis per tenebras albesceret, nocte illu-
ni conspicati, stagnum aliquod immensum (ut ea regio pi-
scinas ingentes habet) esse existimarunt, & non explorato
quid esset, alio viam direxerunt, ac postea à locijs derisi, re
infecta in castra redierunt. Quidam millij manipulos per
campum latissimè, ut madefacti à pluuiâ sicciore aura hu-
morem deponerent, stantium hominum more dispositos,
Scythas adesse rati, per tenebras diffugerunt, trepidantes ti-
more ubi nullus erat timor. Sed, & de die ridiculus error
speculatorum in Belgio accidit. Albanus suscepta in Frisi-
am expeditione contra Ludouicum Nassouium (qui Comi-
tem ibi Arembergium profligatum cum legionibus Hispa-
nicis occiderat) Dauentriæ in Transiselania substiterat, ex-
pectato Cressouerio cum septemdecim curulibus tormentis.
Ibi exploratores præmissi utrum pontes sustinendis tormen-
torum oneribus pares forent, tympanorum strepitu procul
exaudito, mox & vexillis quatuor inspectis, illicò ad Alba-
num redierunt, aduentare hostem, inq; proximò esse refe-
rentes. Is cum acie celeriter instructa, cum alios qui prius
obseruent hostem, numerum, ac vires, emisisset, cognouit
nouam nuptam, quatuor cum vexillis, totidemq; curribus
velo ac fronde intectis, vicinum in pagum magno agrestium
circumludentium comitatu, belli securam, deuehi. Hinc
factum militare prouerbium, ut procuratores explorato-
resq; si reditum ad suos paulò meticolosius festinauerint,
Num sponsam viderint, militari ioco interrogentur.

Quod si fortè exploratores aduersariorum comprehensi
sint, de illis Imperator variè censeat. Etenim si exercitus sui
vires hostium copijs longè inferiores arbitretur, illicò eos iu-
beat interfici, ne aut signo aliquo suos admoneant, quid fie-
ri vellent; aut corruptis custodibus, diffugiant, quod sæcipis-
simè accidit, cum sint morum nostrorum & linguæ periti.

Si verò exercitum meliorem, & rebus omnibus instructiorem habet, dimittat incolumes, ostenso toto exercitu suos aut negligentius custodire eos iubeat, quo citius effugiant, & suis nuncient res aduersariorum superiores esse. Sic enim hostes formidant & conturbantur si se inferiores vident: confidunt, maioresq; sumunt animos, si aduersarios debiliores, Ita cum in Polonos Osmanus Turcarum tyrannus moueret, & Danubio ponte (qui è sexaginta triremibus constructus fuerat) superato, in Valachia exercitum suum totum iam congregasset, siquidem ibi Scythæ Præcopenses, Bessarabi, Valachi, Moldaui, atque Transyluani, illi sese iunxerunt; adductum ad se è castris Polonicis captium quendam plebeium quidem, & Tergiductorem cohortis Piotrouianæ leuioris armaturæ, equitatus, inseruienti, sed sat prudentem, & vti barbaro videbatur capacem rerum, iussit circumducere per tota castra, quibus tot centena millia hominum continebantur, totq; centenæ bombardæ vno in colle locatæ fuerant. Et cum lustrasset omnia, quæsiuit ab eo quid sibi suæ copię, & tantus in Regem Poloniæ apparatus placeret? cui ille, Ducem quidem exercitus Polonici exiguas penes se copias habere, sed ad ventare Regem ipsum cum vniuersa nobilitate Polonica, quæ haud scio inquit, annumerotuum exercitum non sit superatura; quandoquidem ait & filius Regis Vladislaus, octuaginta mercenariorum millia è Germania secum trahit. Cui barbarus; Scio non fore octo millia de integro, at tu quæ vidisti vade refer tuo Duci. Sicq; vestibus panni aurei, aureisq; centum & equo generoso donatum, iussit vsque ad castra nostra deducere: cæterum qui deducebant spoliatum omnibus flagrisq; cæsum more suo barbaro, in quadam sylua castris Polonicis vicina dimiserunt. Minimè verò scire potuerunt, quomodo fuerint castra nostra disposita aut munita, in quibus horridam illam tempestatem expectabamus. quod vtique prudens Imperator omnino ignorare non debet, præsertim cum hostis in campū
prodi-

prodire, aut non vult, aut non audet, vti in Prussia faciebat Gustauus, qui continuò ferè suos intra munitiones prudenter continebat: nam vbicunque extra munitiones prodibat, semper cædebatur. Quapropter de hostilium quoque castrorum metatione consideranda, necessarium monitum adnotemus.

C A P V T I I.

De Hostilium castrorum metatione consideranda.

Sapientis profectò Ducis est, non sua tantùm vota vireſcēque, sed & hostis expendere: secumq; sedolò, & quasi subductis rationibus rputare, quem sibi, quem hosti fructum afferre possit, secunda aut improspera belli fors. Maximè si eum videamus numero validum, situ ac subsidiorum opportunitate tutum, munitione vallatum, syluis adiacentibus interseptum, aut aliquo alio modo à natura vel arte adiutum. Eapropter Scipio, vt Syphacem Regem, cuius potentiam meritò timebat, facilius falleret ac superaret, misit ad eum per speciem legationis Lælium, adiunxitq; illi seruili habitu selectissimos quosque ex centurionibus ac tribunis, vt quæ notatu digna erant accuratè obseruarent. Qui vt liberius & minus suspecti scrutarentur omnia, equum de industria dimiserant, tanquam fortuitò elapsum, fugientem persecuti, pleraque castrorum munimenta circuierunt: quorum cum conditionem ac dispositionem Scipioni nunciaſſent, bellum incendio confectum est. Pari ferè modo Konięcpolscius, Murtasbassam in Valachia ad Danubium cum exercitu præstolantem occasionem aliquam in Polonos, per suos legatos amicissimè salutauit, munuscula misit, & vt valeret suus Imperator honorificè quæsiuit: qui nuperrimè in Persiam mouens, literas ad Konięcpolscium amicitiae plenas, & septuaginta captiuos Polonos panno precioso vesti-

tos miserat, symbolum beneuolentiæ, & pacis inter vtramque gentem perpetuò conseruandæ arrhabonem. Nihilominus è Prætorianis prudentiores seruorum loco legatis attribuerat, & qui linquam Turcicam callerent, vt pro more licentius per castra barbarorum vagati, inquirerent omnia, & scrutarentur singula quæ scitu suo digna essent. Verùm & Valsteinius hac in parte non ignauus fuerat, qui Praga recuperata, quasi pacis tractandæ causa, misit ad Aruheimum Saxonici exercitus Ducem, præcipuos exercitus sui ductores tubicinum instar vestitos, ijsque iniunxit vt castrorum situm, & quæ digna notatu erant obseruarent.

Non sufficit itaque, vt imperator sua castra ordine disponat, & optimè circūcirca muniat, sed necesse quoque est, vt hostilium etiam castrorum positionem peritè prospiciat, & loci figuræq; rationem diligenter consideret, certo certius persuasum habens, quòd neque in arctum coactæ copiæ omnino contemnendæ sunt, neque in longitudinem effusæ, nimis pertimescendæ; siue in plano circulariter castra metata fuerint, siue in collibus nimium protensa & addensata. Nam & circularis ambitus plures capit, quam oculis designari videndo queat: & in longitudinem diffusa valli latera, pauciores vt plurimum continent milites, quàm quæ orbiculariter circumscripta sunt. In montibus præsertim, vbi multæ intus partes hominibus vacuæ & nudæ relinquuntur; partim propter voragines profundas & arbuistorum densitates, partim propter inhospitales & inaccessas asperitates, quæ vallo cingi non possunt. Iam autem communissimè loca quæ in accessu esse existimantur, obsidentibus aut oppugnatibus prodesse solent, quia minus accuratis vigilijs custodiri solent. Peritus verò Imperator, quid faciendum sit, facilè tum excogitabit, atque audicissimorum nonnullos, tum præmiis, tum pollicitationibus faciet, vt vel ardua illa loca euadant, vel vallo celeriter conscenso, aliquid emoliantur, & in media castra taciti penetrantes hostes contrucident. Cum & vrbes

bes ipsas animaduertam⁹ ea sæpissimè parte capi solere, quæ sunt munitissimæ, & de quib⁹ ne spè quidē vllā hostes videntur posse habere. Quod verissimū quoque esse Geneuenses non ita diu didicerunt, qui à Sabaudò obsessi, periclitati sunt ea vrbis parte, quæ omnium consensu minitissima erat; & hosti aditū ad urbem præbuisset, nisi vnus excubitorum in inopinantes catarractas soluisset. Idem planè accidit in Prussia, cum Sueci Toruniū inopinatò intercipere voluissent, missis audacioribus qui per Istulæ ripam, vnde nemo hostem accedere ad urbem sperabat, portam occuparent, quæ præ ciuiū trepidatione clausa tunc non erat, obuensis omnibus in hostem: sed forte fortuna sutor quidam mentis parum compos per infirmitatem, illustratus à Deo ratione meliori, hostes subeuntes animaduertit, & catarractas soluit, viciniamq; totam clamore in subsidium euocauit.

Instructus igitur de castris hostium Imperator, suadente occasione hostem per equitatum, aut etiam peditatum subeuntem è castris euocet, & castra ipsa à tergo, vel à pluribus locis inuadere iubeat: quia sæpissimè supina negligentia incauti aduersarij, dum castra sua benè munita esse sciunt, incompositi è suis stationibus in hostem subeuntem excurrūt, solitaq; incogitantia negligentiores in periculis fiunt, dum hostem simulantem metum recedere vident. Quisquis autem has artes nouerit, etsi ijsdem dolis aduersario suo oppugnetur, sapienter omnia geret & prouidè cauebit; nempe à quibus didicit, quæ aduersus alios struenda sunt, ab ijsdem etiam, quonam modo fraudes ac doli euitari possint, docebitur. Et quisquis alteri parare nouit pericula, idem quoque parata facilè deteget effugietq;

C A P V T I I I.

De Nuncijs admittendis aut emittendis.

Imperator admittat quemlibet volentem aliquid nunciare, & seruum, & liberum, & transfugam: tam noctu,

quàm interdiu aduenientem: siue ipse sit in tabernaculo, siue in balneo: siue quieti, siue mensæ indulgeat (cautè tamen, ne à ficcario lædatur aut occidatur) Cunctatores enim, & inaccessæ seueritatis, quiq; seruis imperant, accedentes iniuriosè repellere solent, vnde in multis & magnis persæpè falluntur negotijs, immò rem aliquando rotam negligentia sua labefactant. Prætereuntq; multi communissimè, quod in puncto temporis gerendum vtiliter iudicassent, si alloqui se volentes etiam infimos homines patienter audire sustinuis-
sent. Et Iulius Cæsar non aliam ob causam ita miserè mortem subiit, nisi quòd indicem coniurationis libellum sibi porrectum, statim legere neglexisset: igitur manu cum tenens à Bruto & Cassio principibus coniurationis confossus est. Eandem ob causam & Lampfacenorum tyrannus Astyanactes interiit: & multi alij Duces atque Reges, tum vrbes quoque cum illis & Respublicæ integræ. E contra Veneti salui manserunt, cum indicante quodam, obscuro licet & gregario milite, Viceregis Neapolitani Ducis Ossoniensis astum, quo die Ascensionis Domini in cælum illis solenni & festo, urbem capere intenderat, extemplò ad inquirendos coniuratos in urbem iam immisos, curam adhibuissent. Similiter Gabel Battoreus Transylvaniæ Princeps, quod se alloqui volentem Hungarum quendam, excitatus ab vno ex suis ephæbis nobili Polono, statim noctu audire sustinuisset, factam in se coniurationem euasit, milites in se adductos feliciter profligauit, & capita coniurationis intra aliquot horas prælio capta, merito castigauit. Atque hæc quidem de nuntijs admittendis & audiendis statim. Quid de emittendis? Primò curandum vt per fidos homines, prudentes, & secreti tenaces, res nostras significemus. Deinde vt notis occultis litteras nostras scribamus. Denique vt occulto aliquo modo per nuncios transmittamus, hoc est, vel in calceorum soleis, vel in balteis, vel in baculis excauatis; vel denique in occultis vestium locis, quæ prudens tabellarius melius facere sciet, aut Imperator ipse edocebit.

Sed

Sed præcipuè obfessi varijs modis vtuntur, vt rerum suarum statum amicis significant, ita vt ne tabellaris quidem rem concedere necesse habeant; quia & signis certis ex cōdictamine vtuntur, & notis ex arbitrio constitutis scribunt, easq; variè occultant. Quidam enim vaginæ interiorē partē epistolæ conscripserunt: alij literas panibus inclusērunt, eosq; tabellario transportandos tradiderunt: alij partibus corporis minus honestis eas commiserunt: alij millo canis eas inseruerunt, quem tabellarius familiarem haberet: alij vrinatores non per fluuios modò, sed per maria etiam ipsa cum litteris miserunt, & innumeris modis secreta sua amicis communicarunt. Cumq; obsideretur Harlemum in Hollandia, à Friderico Ducis Albani filio, fuit patrum nostrū memoria in ea obsidione repetitum ex antiquitate ministerium columbarum litteras transferentium. Paulo enim antequam clausa fuisset nuncijs via, Harlempjes ex vrbis columbarijs ad Orangij classem, & vicina fociorum oppida columbas aliquot cicures asportarunt: quæ deinceps vbi opus fuit, cum literis subter alas alligatis emissæ, tectiquæquæ sui prolis; memor Harlemum reuolabant: ac per aërios hosce tabellarios Orangius ad perferendam tribus postremis mensibus obsidionem ciues obfirmavit. Donec earum vna dum ab volatu defessa castris Hispanorum insidet, à milite artificij ignaro fortè transfixa, literarum arcana patefecit. Quo factum, vt quotquot exinde transuolarent per aëra columbæ, quamquam innoxia, certatim à militibus figerentur. Ita enim Bruto, Mutinæ olim obfesso vndique, omnia quæ eum scire oportebat, per columbas indicabat Hirtius. Nec ita pridem Alexandrinus quidam Præfectus, qui Ægyptijs Admiral dicitur, columbas ita instructas ad mensam suam habuisse dicitur, vt Cairum etiam cum litteris volarent & reuolarent. Tum naues quoque eius speculatoriæ in mari, semper aliquot columbas eiusmodi secum habebant, & de omnibus rebus per easdem litteris collo-

alliga-

alligatis Præfectum certiozem reddebant. Menezius verò qui Arzilæ in Africa pro Hispano præerat, cum serò penè intellexisset Tingitanæ vrbi Regem Fessæ insidiari, cum ob tēporis angustiam per homines non posset, per canem opportunè à Tingitano ciue Arzilæ relictum, verberibus prius egregiè exceptum, vt ad priorem dominum velocius recurre-
ret, alligata ad caudam eius epistola, Roderico de Castro, qui Tingitanos regebat, imminens indicauit discrimen. Verum talibus nuncijs fidendum semper non esse, factum vr-
bis Ptolæmaidos edocuit. Cum enim Galli & Veneti qui eam obsidebant, columbam interceptissent adfuturi post paucos dies auxilij nunciam, alias eam literis instructam di-
misere, quibus cum nulla auxilia sperare iuberentur obsessi, ad deditiōem inducti fuerunt.

C A P V T . I V .

De Transfugis recipiendis.

TRansfugis Imperator non temere credat, si res suas sal-
uas habere cupit: vti enim qui bona fide contrarias
partes elegit, multum solet prodesse; ita qui mala, multum
sæpè potest nocere. In Cannensi prælio Annibal per simu-
latos transfugas terga Romanorum cecidit; sex enim millia
equitum Numidarum iussit transfugere, qui ad fidem faci-
endam, gladios & scuta Romanis tradidere: & in vltimum
agmen recepti, vbi primum concurrere cepit, strictis minori-
bus quos occultauerant gladijs, scutis iacentium assumptis,
Romanorum aciem ceciderunt. Cautiores in simili casu
Turcæ fuerunt, ad quos, cum ex acie Iuoniæ Palatini Vala-
chiæ, eius copiarum Præfectus Czarnieuičius cum trede-
cim millibus Valachorum defecisset, non in vltima acie quæ-
admodum fecere Romani, sed in prima transfugas constitu-
erunt, & tergiuersantes quodammodo confestim aggressi
cecide-

cecidērunt. Memnon quoque olim Rhodius Rex, cum equitatu præualeret, & hostem in collibus se continente in campos vellet deducere, quosdam ex militibus suis, sub specie perfugæ misit in hostium castra, qui affirmarent exercitum Memnonis iam pernicioſa ſeditione furere, & vt ſubinde aliqua pars eius dilaberetur. Huic affirmationi vt fidem faceret, paſſim in conſpectu hoſtium iuſſit parua caſtella muniri, velut in ea ſe recepturi eſſent, qui diſſidebant: hac perſuaſione ſolicitati qui in montibus ſe continuerant, in plana deſcenderunt, & dum caſtella tentant, ab equitatu circumuenti ſunt.

Si qui igitur transfugæ aduenerint, hoſtium aggrediendo ſibi opportunitatem indicaturi, aut copijs tuis viam ab hoſtibus tutam præituri, ducito eos tecum vinctos, certosq; facito ſe, dummodo vera narrent (magna enim fiducia eſt in ſolicitandis ſuſcipiendisq; hoſtibus ſi cum fide veniant: quia aduerſarium amplius transfugæ frangunt, quam perempti) totiuſq; exercitus ſaluti ac victoriæ vtilia conſulant, in libertatem cum præmijs ac muneribus aſſerendos. Si verò vana conſingentes decipiant, aut ſi prodicionem moliantur, ipſo ſtatim momento ac puncto, quo inclinare & periclitari incipiet exercitus, in vinculis iugulandos. Tunc enim transfugæ aliquid indicanti fides haberi poterit, quum vitæ ſuæ arbitrium non penes ſe, ſed penes Duces ipſos eſſe nouit. Quibus tamen, vt monui, haud temere credas: quòd vitio quodam naturæ fiat, vt quod volumus, credamus libenter; & quæ ſentimus ipſi, vel quos etiam ſentire credamus, ad voluntatem eorum ficta reſpondeamus. Cræſſus olim dum Mazaræ Syro temere credit, ab eo in mediam camporum vaſtitaſtem deductus, vnà cum exercitu vndique hoſti expoſitus fuit. Simili planè modo Taranouius Nobilis Polonus ſuaſit Solimano Turcarum Tyranno, vt in Moſcouiam exercitum, non per fines Poloniæ, vt à Rege Sigifmundo Auguſto petijt, ſed circa Caſpij maris littora, inopinatò in

Dd

hoſtem

hostem emitteret, quem si ita placeret Tyranno, ipse uti peritus locorum deducere sponpondit, legationis qua fungebatur munere, in alium quempiam ex suo comitatu nobilem Polonum translato, ut recta ad Regem responsa ferret. Annuit Turca; & Taranouius Bassas cum exercitu, gnarus regionum illarum, in vastissimos campos Madziarienses deduxit, ubi totus ferè exercitus fame, siti, & superuentibus Tartarorum atque Moscouitarum assiduus deletus est, Taranouius verò tempestiua fuga sibi consulens, primò ad Chanum Tauricanum peruenit, postea in patriam incolumis redijt. Valsteinus quoque nuperrimè à transfugis deceptus bonam partem exercitus Cæsarei in Pomerania amisit. Obsidebat etenim urbem maritimam Stralsundam nomine, quam primò Danus, deinde Suecus suo præsidio tuebatur: Igitur hic misit ad Valsteinium transfugarum specie ciues aliquot loci illius, qui graues sibi nimium Suecos conquæsti, promiserunt aliquot in locis urbem succendere, si ille interim urbis mœnia audacter aggredideretur, & Suecos auxilio etiam consociorum ciuium ad internecionem deleret, sibi verò pro præstita opera, præmium aliquod notabile conferret. Dimissi illi promissis onerati, sed malè ab ipso examinati, & nocte concubia in præparatos eam in rem rogos ignem subiecerunt; hostis verò in Cæsarianos accedentes ad vallum, intentus ex condicto, missilibus eos & tormentorum globis acerrimè diuexauit, & excursionem facta aliquot millia occidit. Non igitur facilè credendum transfugis: quia ut plurimum animo nocendi veniunt. Mitridates à Lucullo virtute frequenter superatus, insidijs eum appetijt, Adathante quodam eminente viribus sobornato, ut transfugeret, & fide pacta hosti, ipsum interficeret, habens equos in fugam benè præparatos. Sed receptus à Lucullo in gregem equitum, non sine tacita custodia habitus, sine euentu conatus est: & cum non admitteretur ad Lucillum accedere. diffugit. Stenippus verò ad Tegeatus fugiens, ab ijs qui verè eum

rè eum ab Ephoris multatum, ideoq; irritatum iniuria fugisse credebant, exceptus: eorum, quos corripit, auxilio, Aristoclem Principem sacrificantem occidit.

Qua autè ratione proditoribus & transfugis. occurrendum sit, docuit suo exemplo Dux Pænorum. Cum enim frequenter auxiliares Galli ad Romanos transfirent, & iam ex consuetudine vt socij exciperentur, sibi fidelissimos subornauit ad simulandam transitionem, qui Romanos excipientium causa eorum progressos ceciderunt. Quæ solertia Amilcari, non tantum ad præsentem profuit successum, sed in posterum præstitit vt Romanis veri quoque transfugæ forent suspecti. Propriè hoc ipsum accidit bello Turcico ad Chotimiam, cum inopia annonæ pressi in castris Polonicis mercenarij Hugari atque Germani cõplures ad Turcas profugerent, monstrarentq; faciliorem accessum ad irrumpendum in castra nostra, Turcæ postquam non successisset opugnatio illo in loco, vbi insuper præcipuum bellatorem ex suis Caracas Balsam amiserunt, in censi ira ob tam graue damnum, omnes statim transfugas occiderunt, effeceruntq; vt ad eos amplius è castris nemo profugere vellet, sed placuit adiungere quod Lucullus solerti ingenio in transfugas repente in ipso prælij congressu ex cogitauit. Cum enim animaduertisset turmā Macedonum equestrem ad hostes confugere, classicum canere, atque suos tanquam prælio decernere decreuisset, hos confestim insequi iussit. Hostes igitur Lucillum ad prælium prodire suspicati, Macedones istos adeo strenuè exceperunt, vt his necessario pugnandum esset: eaq; ratione fugitiui qui fuerant, egregiè centarent. Cæterum iam instructionem acierum videamus.

C A P V T V.

De varia instructione acierum.

Præmissis leuioribus artibus belli, ad publici conflictus incertum & fatalem diem nationibus ac populis, ratio
D d 2 discipli.

disciplinæ militaris inuitat. Nam victoriæ plenitudo in aperti Martis euentu consistit, non in obsidionibus aut velitationibus leuioribus. Hoc igitur tempore tantò magis Duces debent esse solliciti, quanto maior speratur diligentibus gloria, & maius periculum comitatur ignauos: in quo inomento peritiæ vsus, pugnandi doctrina, audacia militum, consiliūq; prudens dominatur. Quapropter instruendarum acierum scientiam complures viri periti, tam Græci, quàm Romani literis mandauerunt, vt etiam lectiones Imperatores viuentur. Nostræq; ætatis authores multa, partim ex obseruatione recentiori, partim ex antiquorum scriptorum præceptis connotauerunt, volentes rem iam lapsam, desitā, & prorsus neglectam, repetere & in vsum reuocare. Quos quidem omnes enumerare longum & super vacaneum est; sufficit vnicum Mauritium Comitem Nassouium hic in exemplum ponere, qui multa ex antiquitate eruens, & fecit, ipse contra Iberos feliciter, & scripsit ad informationem aliorum haude eleganter.

Acies itaq; dicitur, exercitus instructus, qui in publica pugna, si sapienter disponitur, plurimum iuuat: si imperitè, quamuis optimi bellatores sint, mala ordinatione franguntur. Vnde in eo tam prouidi fuere veteres, vt pro nullo habuerint exercitum, qui non rectè ordinatus esset. Instructionis autem vetus lex est, vt in prima acie exercitati & veteres milites collocentur, quos Romani Principes vocabant. In medijs aciebus leuioris armaturæ, sed circumdati cataphractis, spacio iusto interposito, vt nec acies interluceat, & spacium sit arma tractandi, & cum saltu cursuq; hostem aggrediendi: quia melius est plures acies facere, quàm milites expandere. A tergo autem & in vltimo ordine, & ætate maturi, & vsu confidentes, & muniti grauioribus armis. Nam si quid primis ordinibus accideret, de horum viribus reparationis spes tota penderet. Apposite Xenophon. *In bello illos primo, & vltimo ordinare oportet, qui fortitudine excellunt: in medio*

dioverò peiores, ut à primis ducantur, ab ultimis verò impellantur. qui apud Romanos Triarij appellabantur. Legitima etenim eorum acies, constabat Hastatis, Principibus ac Triarijs, Velitibus, siue levis armaturæ militibus admixtis, qui ex manipulis fere educebantur. Et quia primi prælium committebant, Rorarij, inquit Festus, appellabantur, quòd ut ante imbrem rorare solet, sic illi ante grauem armaturam prodibant cum missilibus, quæ rarenter sparsi mittebant in hostem. Alæ autem equitum dictæ, quod dextra, sinistraq; tanquam alæ auium pedites ambirent, ut Gellius scribit. Globus denique nihil aliud est, quam militum manus ab acie reliqua separata, vago superuentu inimicos incurans: qui ab Imperatore immissi, & suos simul iam fatigatos recreabunt, & hostes iam fractos ac languidos, alacres ipsi vrgebunt.

Multipliciter autem & varie instruitur acies: quia primò armaturæ, deinde militum, tandem locorum, ad extremum verò copiarum hostilium habenda est ratio. Maxime autem necessitatis, quæ, cum vbique & semper, tum in bello maxime ante rationem est: Imperatoremq; non pro arbitratu suo, sed secundum hostiles copias acies disponere cogit. Quocirca summa ratio in eunda à Ducibus belli est, ut acies pro numero sui, & hostis exercitus, proq; temporis & loci circumstantia disponatur. Et quo acuratiùs armis instructus, atque in ordines dispositus exercitus fuerit, eò firmiorem tutioremq; esse sciendum. Græci & Romani in instruendis exercitibus peritissimi fuerunt; & illi quidem suis Phalangibus Asiam debellauerant, Romani verò suis Legionibus omnes fere populos, quicunque ad ipsorum notitiam deuenerant, quia melius disponebantur legiones, quam phalanges, ut probatum fuit in pugna Pauli Æmilij cum Rege Perseo. Nam *phalanx*, inquit Liuius, *immobilis, unius generis*, nec poterat bene pugnare nisi in planicie: legio verò ex multis partibus quasi corpus quoddam composita, & in montibus diuidi poterat interruptis ordinibus, & in plani-

cie in vnum corpus conuenire. Et propterea Liuius dicit. *Romana acie distinctior ex pluribus partibus constans facilis parcienti quacunque opus esset, facilis iungenti.* Heluetij imitantur modo phalangem potius quam legionem, nisi quod loco sarissarum vtuntur lanceis oblongis ad repellendum equitatum. Persæ equitatu suo præualent in pugna Turcis, quia in ordinem bene disponuntur per cohortes, non verò turmatim concurrunt vt isti: sed hi deinde peditatu suo, quos Ianitzaros vocant, præualent. Cæterum pedites Europei, præsertim è Germania, multo sunt meliores Ianitzaris, vt bello Chotinenfi obseruauimus. Quapropter Persæ quoque euocarunt Centuriones, ab Hispanis & Hollandis qui nauigant Orientem, vt instruerent peditatum ipsorum, quo antea carebant, suntq; Turcis nunc magnopere graues. Sed reuertamur ad acies. Has veteres variè, vt diximus, ac variè instruebant; quadratas, rotondas, triangulares, semilunares, oblongas, pro loci atque situs necessitate: semper tamen grauioris armaturæ pedites, in prima acie locabant, qui cassides cataphractas, ocreas, scuta, gladios habebant, & impetum hostis melius quam nudi, aut leuiter armati, sustinere poterant; & tanquam murus ferreus stabant, non solum missilibus, sed etiam gladijs dimicando. Et si hostes fugassent, non sequebantur cedentes, ne aciem suam ordinationemq; perturbarent, sed leuis armatura, cum funditoribus, sagitarijs, & equitibus fugientes sequebatur inimicos. Quadratis itaque aciebus Persæ, Siculi, & Græci olim vsi sunt. Scythæ & Turcæ nunc, Thracum more cuneatis vtuntur aciebus. Ad rhombi similitudinem equitatum suum Thesali disponere solebant, quia constituti in hac forma, vetere sese in quemuis prospectum possunt; minimeq; vel à tergo, vel à latere capientur. Qualem dispositionem vtilem putarem, extra aciem ordinariam in subitaneos casus habere, præsertim leuioris armaturæ equitum. Cæterum aciem ipsam veterum Romanorum exemplo nunc, parte altera

tera longiorem Duces facere consueuerunt. Ex omnibus autem quos exercitum ad praelium prudenter disposuisse constat, primæ tribuuntur Hannibali & Scipioni, cum ij in Africa de summa dimicarent.

Prælio igitur decertaturus Imperator, formam & ordinationem aciei, Tribunis, Centurionibus, ac reliquis officialibus, quem locum capere & tueri debeant, indicet: singulis turmis proprios chiliarchos assignet: edoceatq; eos, priusquam ad manus veniatur, quomodo in certamine, in subsidio ferendo, in clade denique, aut victoria sese gerere debeant. Legato verò Imperatoris, & castrorum Præfecto certus locus non est designandus, quòd libere huc illuc vagari debeant, ut periclitantibus succurrant, & decretorum executionem procurent. Sed ante omnia ordinaturus aciem Imperator, hæc tria debet antè prospicere; solem, puluerem, & ventum. Nam sol ante faciem eripit visum. Ventus contrarius tua inflectit ac deprimit, hostium adiuuat signa & tela. Pulvis denique à fronte congestus, vna cum fumo è sclopetis exploso oculos implet & claudit. Conuenit etiam diligenter explorare, quid sentiant milites ipsa die qua certaturi sunt: nam formido, vel fiducia ex vultu, verbis, incessu, motibus, cernitur. Nec confidas satis, si tyro praelium cupit, inexpertis enim dulcis est pugna: & noueris te oportere differe, si exercitati bellatores metuerint dimicare. Ita fecit Stanislaus Zolkieuius in campis Originésibus, cum Scythæ numerosissimo cum exercitu superuenissent: maluitq; suasu veteranorum insultantem hostem patienter ferre, quàm non benè inter se conuenientibus magnatibus, qui ære suo cohortes scripserant, ad instantiam tyronum praelium cum hoste multo potentiore inire. Monitis attamen & oratione Ducis, etiam trepidanti exercitui virtus accrescit & animus: præcipuè si futuri certaminis talem acceperis rationem, qua sperent se faciliè ad victoriam peruenturos.

Scire quoque Imperator debet, contra quos hostium
globos,

1620
 globos, quos equites oporteat ponere: nam nescio qua oc-
 culta ratione alij contra alios dimicant melius; & qui fortio-
 res vicerant, ab inferioribus sæpe vincuntur, vt pugna Pra-
 genfi experientia probatum est; qui enim cataphractis toti-
 es, hastati Hungari, terribiles fuerant, illi in monte Albo (&
^{multo} ties deinceps) à seminudis Polonis velitibus, turpissime pro-
 fligati fuerunt, licet quadruplo fuerint plures. Similiter ad
 Strafniciam in Morauix finibus, & ad Posonium in Hunga-
 ria. Instruat itaque Imperator suum velitem pro paratu ex
 consilio hostium, modo in fronte, modo in dextra, modo in
 leua, nonnunquam etiã in tergo, videlicet quemadmodum
 res vsusq; exigit. Semper tamen peditum latera protegenda
 sunt à fortioribus equitibus: & hostium cornua perfindenda
 sunt atque turbanda, à velocioribus & expeditis copijs, quẽ-
 admodum fecit Radiuillus Nicolaus III. ad vlam contra
 Moscos, qui à velitibus Polonicis ab vtroque latere turbati,
 priusquam à fronte premi cæperint, statim diffugerunt, &
 triginta de suis millia in acie amiserunt. Quapropter opti-
 maratio est, & ad victoriam plurimum conferens, vt lectis-
 simos tam de peditibus (multis siquidem placuit pedites
 quosdam leuiter armatos sic exercere, vt iter equites pugna-
 re sciant, quod quidem equitibus maximo adiumento esse
 solet) quàm de equitibus Dux post aciem præparatos habe-
 at; itidemq; alios circa cornua; & alios circa medium: vt si-
 cubi hostis vehementer insistit, ne rumpatur acies, prouo-
 lent subito, & suppleant loca; additaq; virtute, inimicorum
 audaciam frangant. Nam qui superueniunt, terribiliores
 sunt hosti ijs, qui in manibus sunt & pugnant: quia inopina-
 ta maximè mouent, & vt Doctor militaris ait, *subita conter-*
rent hostes, vsitata vilescunt. Ita clamor aliquis repentinus,
 aut imago & aspectus, fuga semper exercitum impleuit: &
 hæctalia, magis quàm gladius, consternant hostem. Pri-
 miq; in omnibus prælijs oculi vincuntur, deinde aures: vi-
 debisq; militem sapissimè vanis & inanibus magis, quàm iu-
 stis

stis formidinis causis moueri. Et hoc planè modo Constantinus Ostrogius, celebrem illam toto Orbe victoriam de Moschis ad Orsam obtinuit. Hocq; eodem ante illum stragemate, Vladislaus Iagello acie Gruneualdensi, totam potentiam Teutonum Prusiæ fregit, & centum quadraginta millia, horis aliquot acie confecit: quia vterque illorum præparatos post aciem habuit, qui & clamore hostem inopinatò perterruerunt, & condensatum in pugna à latere hastis per-ruperunt. Hanc autem artem & dispositionem, primi Lacones inuenerunt: quos deinde imitati sunt Carthaginenses, Romani postea vbique seruauerunt. Quorum exemplo Saraceni primùm Byzantinos Imperatores fregerant, deinde Mamaluchi in Ægypto acies suas inuictas effecerant. Sed & Turcæ nunc, non aliter victorias de Christianis reportant, quàm & Ianitzaros pedites, & Spahios equites, ad instaurandum inclinatæ acies opportunè submittendo. Sicq; Vladislaum Hungariæ & Poloniæ Regem ad Varnam occiderunt: sic Sigismundum Imperatorem ad Columbanum pro-fligarunt: sic Rudolphi II. exercitus ad Sigetum dissiparunt: Persasq; multoties iam victores & triumphantes penè, hoc eodem astu acie pepulerunt. Nam directæ acies hoc solum agere debet, si potest, vt hostem repellat aut fundat: iam verò si cuneus aut forfex agendus sit, superfluos habere debes post aciem: si etenim de loco suo ordinatum militem transfere cæperis, vniuersa turbabis. Et si globus hostium separatus, aut alam tuam, aut partem aliquam vrgere cæperit, nisi superfluos habeas, quos possis opponere, difficulter aciem restaurabis. Eapropter si tibi bellatorum copia non abundat, melius est aciem habere breuiorem, dummodò in subsidij colloces plurimos, qui maturè possint subuenire suis. Vnde Marcellus ab Hannibale non aliam ob causam cæsus fugatusq; fuit, nisi quòd lente subsidio veniret laborantibus suis, quibus in fugam coniectis, cum reliquo exercitu vim hostilem solus sustinere nequiuit. Quapropter subsidarij

Ee

matu-

maturè suos iuuent, priusquam in plenam auertantur fugā, quæ vtrisque, tam insubidijs, quàm in acie stantibus, terrorem maximum solet incutere: & fugientes animum protinus despondent, ordines deserunt, nec faciliè Ducum imperio amplius parent. Quod euitare cupientes Romani, Pœnorum vti dixi exemplo, post profligatum Marcellum, post singulas acies ponebant subsidia. Et Agricola, vt refert Tacitus, haud dubiè in Britannia cæsus profligatusq; fuisset, nisi id ipsum veritus, quatuor equitum alas, ad subita belli retentas, venientibus opposuisset.

Imperator itaque, etsi ne ab hostibus circumueniatur, maxime cauere cupiat, non ideo tamen in tantam latitudinem phalangem extendat, vt imbecillis omnino tenuisq; sit. Hanc enim citò perrumpere inciperent hostes, viamq; sibi vi facerent: nec iam, cornua circumdare, sed disiectis medijs copijs terga aduersariorum opprimere tentarent. Istam verò cladem non solùm curret euitare, sed etiam conetur inferre, si inualidam & exilem esse animaduertat hostium phalangem. Nullam enim exercitus formam adeò periculis expositam esse experientia constat, quàm cuius frons plus iusto distenditur; quæ frequentibus ordinibus potius constituenda est: cuius extrema latera, si copię tibi minores quàm hosti sint, flumine vel palude cingere, vel fossa munire suadeo, ne facile terga tuorum ab hoste circumueniri possint; sicuti à Cæsare in Gallia factitatum legimus. Si verò hostem numero antecedas, & loca patentia nactus fueris, militemq; probe institutum habes, poteris ordines tuos latius explicare, quo hostem circumdare possis. Locus præterea superior est capiendus, vnde imperus procliuior in hostem sit; sed ita, ne hosti aditus supra te pateat; siquidem eo casu locus ille tuo superior, præsertim ob tormenta, magno tibi damno esset. Vbi verò numerosæ hostium copię apparent, putarim equidem quadratā aciem præferri, quod tutissima semper sit, teste Thucijdice, aduersus hostium irruptiones ista aciei

ciei densitas. Magisq; expedit, ut conferti pugnent, quàm longius separati à suis: nam si nimium fuerit acies attenuata citò ab aduersarijs facta impressione perrumpitur, & nullum postea poterit esse remedium, ut accidit Vitoldo Duci Lituanix, cum Scithis Catainensibus ad Borysthenem pugnantibus; & Polonis ad Trebniciam in Silesia cum iisdem barbaris prælium habentibus. Omnes enim barbari de more hoc habent, ut confisi suæ multitudini ingentibus turnis exiguas Christianorum acies perrumpant, aut in coronam circumdatos opprimant, nisi te astu aliquo iuues; quemadmodum fecit Sylla, qui in campo aperto cum Archelao congressurus, ne à Macedonica phalange, equitatu maximè superante, circumdarentur, fossas amplæ latitudinis in utroque latere duxit & cespite contexit, in quas barbari præcipitabantur, cum in coronam Romanos oppugnarent. Gustauus quoque similiter fossas ante aciem, ne ab equitatu Polonico conculcaretur, ad Mæuam sibi elegerat, aliasq; item ipse fecerat, ut dum hastis vibratis concurrissent nostri, præcipites caderent in fossas, quas tamen peditum præmonitione euitarunt.

Observandum est quoque, cum hostis in proximo est, ut ante omnes milites egrediantur portas, & aciem prius construant, quàm hostis adueniat, siue ex castris, siue ex ciuitate producas ad prælium; ne dum per angusta portarum particulatim procedit exercitus, à collectis & præparatis debilitetur inimicis quemadmodum fecit Zamoscius in Moscouia dum Plescouiam obsideret; & Georgius Basta in Hungaria, cum Budam oppugnaret, vterque enim præparatos milites & in id ipsum intentos collocabat, ut dum portas hostis exiret, turbatum globis bombardorum, pernecitate equorumq; vfi, ex templò eum aggredierentur: quod maximò cum damno inclusorum erat, quia utrobique Cosachi prodeuntes in suas munitiones reiciebant. Quare Chodkieuicius cognito quòd Osmanus iam in proximò esset, educto maturè

è castris exercitu, in acie eum expectabat; eaq; sua vigilantia
 & alacritate pugnandi, ita animum barbari turbauerat, vt li-
 cet centenis millibus pugnatorum, nos superaret, ad præli-
 um tamen iustum nusquam descendere auderet, etiam mor-
 tuo iam Chodkieuicio; quod illi probè cognitū erat. Quod-
 si verò intra ciuitatem, manentibus, imparatis hostes adue-
 nerint; aut differatur egressus, aut certè dissimuletur, vt fe-
 cit Gustauus in Liuania suis prope Rigam munitionibus in-
 clusus, cum Christophorus Radiuillius ante castra illius par-
 uo licet exercitu comparuisset, & ad martem apertum pro-
 apertum prouocasset. Et hoc propterea, vt cum aduersarij
 incæperint in stultare his, quos non putant exituros, vbi vel
 ad prædam, vel ad redeundum conuerterint animum, & or-
 dines soluerint, tunc illis stupentibus lectissimi quique pro-
 rumpant, & confestim aggrediatur ignaros, vt fecit Zamo-
 scius ad Cracouiam & Maximiliani Archiducis lectissimum
 exercitū quasi nolens aut ludibundus in momento disiecit
 & fugauit. Quapropter semper studere debes, vt prior in-
 struas aciem quam hostis, quia ex arbitrio tuo potes facere,
 quod tibi vtile iudicas, cum nullus obsistat: deinde quod &
 tuis auges confidentiam, & aduersarijs fiduciam, minuis,
 quia fortiores videntur qui prouocare non dubitant; sem-
 per enim plus animi est inferenti periculum, quàm propul-
 santi. Inimici autem incipiunt formidare, qui vident con-
 tra se acies ordinari. Ita & Abasibassa congredi totis copijs
 cum Koniecpolscio ad Cameneciam non est ausus, quod e-
 um in acie paratum inuenisset, nec potuisset scire numerum
 aut ordinem nostrorū: facto igitur assaltu vnico statim cum
 numerosissimo exercitu suo retro abiit, & in abitu plurimos
 ex suis Turcis desiderauit. Maximum enim ad vincendum
 commodum additur, quia tu instructus paratusq; inordina-
 tum & trepidum aduersarium præoccupas: victoriæq; pars
 non contemnenda est, inimicum turbare antequam dimices,
 aut vexare cum turbatus abit. *Solentq; sapius*, inquit M. Tul-
 lius

lius pro Roscio Amerino, hoc boni Imperatores facere, cum praelium committunt, ut in eo loco, quo fugam hostium fore arbitrabantur, milites collocent, in quos, si qui ex acie fugerint, de improvviso incidant.

Observatur etiam ne longo spacio fatigentur milites, ne lassos post cursum equos ad publicum praelium cogas, qualiter accidit Papenheimio ad Lutzam cum Gustavo pugnanti, qui tota nocte cum suis in itinere fuit, ut ab Valsteinio accersitus, possit certamini interesse. Vnde licet maturè adveniret, & Gustavus Rex à suis militibus occisus fuerit, tamen & ille ipse in eadem acie occubuit, & multi ex militibus eius cum ipso interierunt. Nam labore itineris defatigatus & anhelus miles, difficile ei resistere potest, qui viribus integris & animo parato ad pugnam in acie expectat, aut debilitatum in somnio inediaq; curatus omnibus aggreditur. Hoc & veteres declinarunt: & superiore ætate, cum Turcicis bellis Christiani Duces per imperitiam non cauissent, pluribus in locis (ut de Canisia nihil dicam) exercitus perdidit. Impar enim conditio est, lassum cum requieto, sudantem cum alacri, currentem cum eo qui steterit inire conflictum. Præsertim si Imperator ignoraverit, quem cui in praelio opponendum esse censeat: nam alij equitatu valent, ut Turcæ, Scythæ, Arabes, Persæ, Hungari, Moscovitæ, Poloni, Croatæ. alij peditatu, ut Itali, Hispani, Germani Helvetij, Bataui, & totus plerisque occidentis. Quibusdam primo impetu vis magna, quam resistendo confringas facile: quibusdā animus & vis in pugna augetur, nec vlla mora aut tædio languescunt. Alij labore arduo exanimantur, frigore debilitantur, æstu solvantur; Alij quos nec labor insolitus, nec æstus, nec locus asper, nec frigus, nec temporum iniuria afficit: atque hoc pro genio cuiusque nationis; quam ut noscas, & quam cui opponas, maximi refert.

Fuit quoque veteribus sæculis mos, parco cibo curatos milites ad certamen educere, ut citatiores sumpta redderet

esca, & longiore conflictu non fatigarentur inedia. Cæterum hac ætate neminem ſcio, qui hoc obſeruet, Præter Coſachos Zaporofenſes, qui ſiue iter capeſſere volunt, ſiue prælium inire, ordinariè ſummo mane ad capiendum cibum commilitones tympani ſono excitant. Eſt etiam prudentis Imperatoris acies ita diſponere, vt fratres cum fratribus, amici cum amicis, & familiares cum familiaribus ſint vnà collocati: quia ſe inuicem in diſcrimine iuuabunt, & ſocius à ſocio fugere erubeſcet. In mutua enim notitia innascur magis omnibus verecundia: qui autem ignorantur, videntur procliuioreſ quodammodo ad deſidiam, tanquam verſentur in tenebris; nec curat alter alterum iuuare, quia nulla ab eo gratia eſt obſtrictus. Hinc Plutarchus ſacram Thebanorum turmam (quæ aliter Amicorum turma nuncupabatur) inuincibilem iudicabat. Hinc apud nos Topororum, Vieniauitarum, Iaſtrzenbciorũ aliorumq; plurimorum, qui gentiliſijs armis utebantur, vexillationes & turmæ inuincibiles fuere, quando nimirum ipſa nobilitas Polona, non per ſtipendiarium militem, ſed per ſeipſa bella gereret; & vniuſcuſque Satrapiæ, incolæ, à ſuo Palatino per turmas & cohortes diſpoſiti, inimicum fortitudine ſuperare contenderent. Quapropter etiamnum dum mercenario vtimur, & militem ad ſonum tympani conuocamus, non legimus, vtile valdè in ſtruenda acie, per gentes eam nationeſq; diſponere, cum ob alias cauſas, tum vt diſcretus labor, fortes ignauoſq; diſtinguat; atque ipſa contentione decoris accendantur. Idque ita, vt exteri aut mercenarij proximi ſint diſcrimini: tibi ſcilicet ingens victoriæ decus, citra domesticum ſanguinem bellanti. Sic fecit Henricus Naſſouius in oppugnatione Syluæ-Ducis, & poſtea Traiecti; ſeparatimq; Angloſ, Galloſ atque Germanoſ poſuerat ad aſſaltuſ faciendos præmonitoſ; quiq; operibuſ & virtute præcellere vellent, æmulationem iniecit. Atque ita ſanguine externo Batauoſ ſuoſ victoria beauiſt.

CAPVT VI.

De Tempore eligendo ad pugnam.

Inter alia ad rem militarem suo modo peragendam etiam tempus idoneum belli gerendi vetetes prospiciebant, qui æstiuo solummodò tempore militabant ordinarie, hyeme verò exercitum sub tecta ducebant. Et ratio est, quod omnis industria quoad artem militarem in hoc vertitur, vt Dux ad prælio decertandum omnia accurate disposita habeat, siquidem id bello finem, vel vincendo vel occumbendo imponit. Iam autem cælo sæuo aut pluuiis, machinæ bellicæ conducì nequeunt qua voles; miles sub dio durare non potest quantum voles; commeatus & pabulum vel pruna corrumpitur paratus, vel si te de loco in locum moueas pro necessitate, difficulter inuenitur. Quod si verò aptius aciem disponere noueris, militemq; disciplina imbutum & algoribus assuetum habeas, quin magno hostem interuallo antecellas, atque ad victoriam potior adspires, vix quisque negauerit te posse hyeme bellum gerere. Quemadmodum toties nostri gesserunt in Moscouia, Liuania, & Prussia. Gustauusq; Suecie Rex in Germania, cuius milites ex vltimo Septentrione collecti, Finui, Gotti, Lapones Germanicum fagus veris loco habuerunt. Etsi nostris aliquando eam mentem Deus inspirare vellet vt Turcam aggredi toto conatu velimus, non alio certè tempore, quàm brumali, bellū occipiendū esset; partim quod prouinciæ illæ, versus austrum positæ, nobis hyeme autumnum repræsentarent: partim quod barbari illi nō nisi statis temporibus de consuetudine & lege Machometica in campum prodire soleant.

Attamen de prælio publico loquendo, caueat Imperator ad manus cum hoste venire, tempore nimis rigido, aut pluuijs obnoxio, quia nihil tātō opere disponendis seruandisq; ordinibus

nibus obstat, quàm altæ niues, aut pluuiis fracta terra, quo tempore etiam nec arcus benè extendi, nec sclopeta puluere onerari possunt, nec denique gradum ordines promouere, si in loca aspera incidas. Præterea nec coadunatum exercitum diu in loco poteris habere, nec machinarum bellicarum rectum vsum: sed necessitate ipsa constringeris disiunctis copijs tecta querere, atque neglecto ordine in vicos, oppida, atque arces te recipere. Ita euenit Koniiecpolscio, cum Tauricanus in Rûssiæ prouincias media hyeme incurrisset, nam frigore intensissimo durante, neque militem maturè è hybernis coadunare poterat, neque fugientem in Valachiam barbarum toto cum exercitu assequi. Vix cum aliquot cohortibus ad Nestri ripam extremum agmen apprehendit, & quam secum abducere tam citò prædam non poterant, cæsis non nullis excussit: quin & bombardas ipsorum æneas cæpit. Maior attamen eorum numerus frigoris intensitate obriguit, quàm fuerint occisi à nostris. Chodkieuicius quoque cum totum exercitum de nocte in Turcas ducere vellet, confurgente ex insperatò pluuia ingenti, vellut è cælo monitus, non suo tempore non belligerandum, militem in castra reduxit, quòd nullum vsum sclopetorum fore videret.

Idem euenit oppugnantibus non suo tempore urbem aliquam, quibus necesse est iniuriam tempestatum & algoris vincere, vt toties nostris in Liuonia, & Moscouia, sub Stephano Rege, Sigismundo III. Serenissimoq; Vladislao IV. feliciter nunc imperante, accidit, vbi vel maior pars, vel ferè omnes mercenarij intemperie àëris perierunt, non assueti nimirum tanto rigori cæli illius. Iam autem semper oppugnantes longè maioribus cum difficultatibus conflictantur tempore hyberno, quàm obsessi qui sub tecto manent; militibusq; quibus vis tempestas in alieno solo exitiosior esse solet, quàm in proprio. Vnde Romani, quibus constitutum erat omnes res in commodum suum transferre, quibus tanta indu-

ta industria inuigilauerant, non minus hyberna tempora & tempestates, quam montes arduos, locosq; difficiles, planeq; ea omnia, quæ virtuti exercendæ impedimento esse possent, fugiebant. Superuentus tamen communissime, & applicatio scalarum ad muros hostiles, nocte tempestuosa & illuni fieri consuevit. In qua re maxime Hungari, atque Cosachi Zaporosenses valent.

Exercitus igitur Imperator, dum pugnandum est, quantum licet studet, vt nec pluuio cælo, nec rigido gelu in aciem descendat. Præterea vt nec ventum, nec solem patiatur iniquum. *Hic enim fulgore, inquit Zeuecotius, excæcat: ille, puluere, & vi simul sua pugnantiū telis, vel adimit impetum vel addit.* In eo, quod ad Blancyum commissum est, prælio, Maximiliani Imp. exercitus præludia ante pugnx infauista expertus, tam diu se conuertit, dum à sole iniuriam pati non posset, & eo pacto nobilem victoriam obtinuit. Eodem stratagemate Gandenses, quorum quinque tantū millia fuerunt, Ludouicum Comitem quadraginta millibus instructum superarunt, & Brugensem simul urbem sui iuris fecerunt. Quo ad ventum verò, solent nostri milites præsagire, semper inferiores fore illos, qui ventum sibi contrarium habent. Cum quæ olim Gamalam Iudeæ urbem inuaderet Titus, turbine, qui obsectorum tela in mittentes reflectebat, adiutus maxime fuit. Sed loquamur etiam de loco ad publicum cerra-
men apto.

C A P V T VII.

De Loco eligendo ad pugnam.

BReue monitum, sed permagnæ vtilitatis, apud Liuium. *Tuum & hostium exercitum, locorum situm, naturam regionis nosce.* Nisi enim benè noueris hostium vires, consilia, & prouinciæ in qua bellum geris, genium, nequaquam me-
Ff her-

herclè proficere poteris. Quod ſi verò loco iniquo aciem tuam locabis, abſque dubio victoriam tuo aduerſario volens ac lubens concedes. Antiqui hac in re cauti fuere. Sed & viciniore ætate Fridericus Barbaroffa apud Germanos hac in parte laudatur. Apud nos verò Nicolaus Melecius, qui cum paulò ante exceſſum Sigifmundi Auguſti, Bogdanum exiguis cum copijs in Valachiam reduceret, expulſum à Turca, præterque opinionem numeroſiſſimis barbarorũ copijs circumuentus eſſet, quia & aduerſariorum morem, & regionis naturam probè nouerat, uſus locorum oportunitate & tempore pro ſua prudentia, incolumem exercitum in Poloniam & victorioſum reduxit, exq; eo ſibi in poſterum ingentem virtutis & ſcientiæ rei militaris gloriam parauit.

Locus itaque conſiderandus diligenter, vtrum inimicis, an tibi videatur accomodus: bonum enim Ducem conuenit noſſe magnam partem victoriæ, ipſumq; locum in quo dimicandum eſt, idoneum eligere & poſſidere; quia ſæpè amplius prodeſt locus, quàm virtus. Propinqua autem munimenta aut mœnia, quantò plus ſpei ad effugium, tantò minorem ad reſiſtendum animum dare ſolent. Olim Carthaginiſes fuerunt, à Marco Regulo multoties in Africa victi, quòd neſciuerint locum ad pugnam eligere, & ſemper in vicinia alicuius vrbis conſurgerent; vnde milites ipſorum primò congreſſu territi aut diſſipati, ſtatim ad munitiones confugiebant. Quapropter vocatus è Græcia Xantypus Lacedæmonius, monſtrauit eis errorem inquiens: nō fortitudine Romanorum ſed loci commoditate fuiſtis victi, quia nō in æqualibus locis prælium commiſiſtis, vbi Elephantes veſtri, & equitatus quo abundatis potuiſſet eos proterere; ſed in locis aſperis, vbi Romani & peditatu plus poterant, & inſidias inter colles facilè locabant. Præuenire itaque Dux in loco capiendò idoneo aduerſarium debet, ne deinde cogatur in loco incommodo & ſibi nociuo pugnare, vti fecit Iulius Cæſar, Afranio, Petreio, atque Pompeio ipſi, qui maxime

ximè existimationis Dux fuerat. Tu igitur eorum exemplis monitus, elabora quam diligentissimè, ut conferturus manum primum auxilium capias ex loco, qui tanto utilior iudicatur, quanto superior fuerit occupatus: in subiectos enim vehementius tela descendunt, & maiore impetu obnitentes pars altior pellit; qui aduerso nititur cliuo, duplex subit, & cum loco, & cum hoste certamen. Ne sit tamen locus nimium elatus, quia sclopetis & tormentis æneis expositi essent milites; sed leuiter decliuus, & ad procurrendum, tam equiti, quam pediti facilis. Quales cum passim in omnibus terris, tum præcipuè in Valachia & Podolia natura, quasi Marti velificans fecisse videtur; ubi nusquam quies, sed assiduæ aut barbarorum incursiones, aut ciuiles motus. Quod si igitur de peditibus tuis victoriam speras contra equites hostium, loca aspera, in æqualia, montosa, & stricta debes eligere. Si verò de equitibus tuis contra aduersariorum pedites victoriam quæris, sequi debes paulò quidem editiora loca, sed plana atque patentia; neque syluis, neque paludibus impedita. In quo tibi subministrabunt doctrinam prælia Alexandri Magni, & Iulij Cæsaris, si diligenter notaueris.

Qualemcunque autem locum nactus fueris, aut coactus sumpseris, vide ut de equitibus supernumerarijs, mixtis peditibus expeditis, possis aduersarium circuire, & à tergo aut latere inuadere: tuam verò aciem ita collocare, ut & cornua sint secura, & occipitium. Quare tres semper duces constituas; *unum in parte dextra*, qui & consilio regere, & auctoritate ad pugnam possit hortari: *secundum in media acie*, qui fortissimos pedites secum habeat, de quibus aut ipse cuneum faciat, & hostium aciem rumpat, locoue meliore pellat: aut si aduersarij cuneum fecerint, & de loco potiore in eum procurrerint, ipse forficem faciat, ut cuneo illi possit occurrere: *tertium denique in sinistra parte*, qui ipse bellicosus & prouidus, velocissimos tam equites, quam pedites secum habens, ita cornu suum semper extendat, ne circumueniatur ab ho-

stibus. Quod si verò vtraque cornua tua montibus asperis, aut fluminibus, aut lacubus munita fuerint, eo securius hostem à fronte inuadere, & loco suo pellere poteris.

Hoc autem obseruabis, ne clamor prius attollatur, quam acies sese iunxerint quia solent concauæ rupes sæpius repetitas voces reddere, & turbare militem, quasi ab infinito exercitu prolatae fuissent. Sic Macedones intra suos montes à Romanis vociferantibus consternati, Regem & Regnum vno prælio amiserunt. Sic Turcæ à Vladislao Poloniae & Hungariæ Rege, clamoribus intra montes Bulgariæ perturbati, victoriam illi insignem præbuerunt. Sic Stephanus Valachiae Regulus. Sic Scanderbegus Epirotarum Princeps, eosdē barbaros inter cauas rupes de nocte clamore sublato multoties vicerunt, vt historias legentibus videre est. Sed nos quoque videamus quam alacer ad pugnam miles venire debeat.

C A P V T V I I I.

De Alacritate pugnandi.

Cato Senior, quando docebat iuuenes intrepidè pugnare, sæpenumero dicere solebat. *Verba plus quam gladium, & voces plus quam manum, hostes in fugam vertere attentosq; reddere.* Et talem militem Catonianum fuisse, M. Coriolanum Plutarchus scribit; videlicet non manu tantum promptum, iectuq; timendum, sed & vocis sono & aspectu hosti terribilem. Cum igitur Imperator militem & voce & vultu, gestuq; alacrem videt, de futura victoria benè sibi ominatur. E contra miles alacriter Ducem se in aciem producentem conspicatus, certam sibi pollicetur victoriam, prædam, & gloriam. Quod si itaque Dux ab hilaritate suorum militum, præcipuè veteranorum, capit internum solatium, & audaciam in hostem, multo magis miles à sereno vultu.

vultu Ducis sumit spiritus, robur, & fortitudinem, quem diligenter considerat, dum ad pugnam procedit, & magnitudine animi illius perspecta, omnia sibi facilia ex difficillimis facit. Proinde ne ipsos contristet, aut facie pallida conturbet, necesse est etiam in aduersis frontem hilarem monstrare: quod maximè apud Romanos Papirius Cursor, & Scipio Africanus facere solebant, suaq; alacritate ita milites animabant, ut nusquam ex acie nisi victores descenderint. Apud nos tres eiusdem nominis Reges Boleslai, hac ex parte laudatissimi fuere: quorū alter Audacis cognomen promeruerat alter Chrobrus, quasi temerarius & aduersæ etiam fortunæ obnitens ab aduersarijs appellatus fuerat: tertius Criuostus, ab ore distorto, ab hostibus per obprobrium vocabatur, quod sub eo miles nusquam in aciem descendens titubauerit, solo vultu ipsius ac voce animatus. Nostra etiam ætas Chodkieuiciū inperterritum Ducem vidit, & cui vulgare erat ipso aspectu excitare milites ad pugnam, licet aduersarij eum decuplo copijs suis superarent. Quare ad maiorem fidenciam suis militibus monstrandam, nusquam galeam aut thoracem induebat, sed nudato brachio, cum gladio euaginato, ut primus velitationes incipiebat, ita & ad congressum hastatos suos præcedebat. Stanislaus verò Koniecpolscius, tam contra Turcas aut Scytas, quam etiam contra rebelles Cosachos & Suecos, splendide vestitus, pennisq; exornatus acies ducebat, ut vel sic animi sui magnitudinem & alacritatem pugnandi, tam hostibus, quam militibus suis declararet, qui ex vultu tristi, & tardo incessu Ducis sui malum omen sumere solent, ut accidit Marchioni Vastio ad Cerisofolam. Quem Germani sui conspicati tristem & abiectum, statim animos desponderunt, & ab aduersarijs aggressi, ex acie subito diffugerunt. Leonidas Græcorum omnium aduersus Xerxem Persarū Dux, tantæ fiduciæ seu audaciæ erat, ut cum imperaret ei Xerxes cum grandi exercitu veniens & inquietus, *mitte arma* respondit in corona militum suorum, &c.

niſſe cape. Atque ita eo reſponſo milites ſuos ad pugnam alacres reddidit, vt venienti fortiffime reſiſteret. Sæpiſſimè enim animoſorum virorum verba magis, quam hæſtæ vecordiū territant. Hinc prudenter Hannibal ad Cannas manus cum Romanis conſerturus vnico reſponſo territos ſuos animauit, & ipſe alacriter ordines diſponens, omnes ad præliandum alacres fecit. Quum enim cum Giſcone ſuo amico collem quendam conſcendiſſet, & Giſco conſpecto exercitu Romano totus conſternatus, cæpiſſet ad Hannibalem loqui, quòd Romani & multi eſſent, & mirabiliter armati: proinde abſtinendum eſſe cenſeret à prælio vniuerſali, ſed inſultibus & leuioribus prælijs primū tentandos putaret. Cui Hannibal ſe vehementer admirari reſpondit, quòd inter tot millia Romanorum nullum Giſconem videret. Riſerunt ad hanc vocem Hannibalis circumſtantes, & quodeorum Dux in tali neceſſitate quaſi ſpernendo hoſtem iocis vteretur, futuræ victoriæ omen ſumpſerunt. In caſtris quoque Polonicis ad Chotimiā, multis bellis exercitatus Vir Simon Kopincinius, cum primum aſſaltum Turcarū in caſtra noſtra perumpere conantium conſpexiſſet totq; bombardas (à multis annis ſurdæſter) reboantes, & tot centena barbarorum millia clamantes exaudiſſet, conſenſo eminentiore loco ſingula benè contemplatus, ad circumſtantes dixit, ſe vidiſſe iam aliquoties proceſſionem ſolennem die Corporis Chriſti, Cracouiæ, nuſquàm tamen ſimilem apparatus notafſe. Riſerunt commilitones, & ioco ipſius ad præliū excitati, cum ingenti alacritate ſecuti ſunt eum, & barbaros ab oppugnatione valli, tota die ſtrenuè ſubmoueabant: quia viles tantum modò ardua terrent, & quibus cor in calcaneo eſt, ſtrenuos verò & fortes, ſtimulant & inuitant ad gloriam. Hinc lex Ægyptiorum præcipiebat, vt fortiffimus quiſq; cantharon, id eſt, ſcarabeum in annulo ſculptum gereret: hoc enim animal ſine foeminis eſſe aiunt; ita legumlatore innuente, mares minimeq; effoeminatos eſſe oportere, qui ſtrenuè pro patria

tria essent dimicaturi. Sed si consternati fuerint milites quid faciendum?

C A P V T IX.

De Metu militum.

M*etus est futurae agritudinis sollicita expectatio*, inquit Cicerone, cui subiecta sunt pigritia, pudor, terror, timor, pauor, exanimatio, conturbatio, formido, & si qua sunt de genere eodem, quæ in percussos metu aliquo milites cadere possunt. Iam autem nullus timor ijs incuti potest, qui honestè occumbere, quam turpiter viuere, satius atque prius putant. Hinc optimus quisque miles, qui patriæ defendendæ incensus studio nobilem ex armis gloriam quærit, otij impatiens ad nascentium bellorum famam exhilarescit, gaudiumq; concipit. Nihil volupe magis quàm premere equum calcaribus, obtegere crimen casside, concurrere cum hoste aduerso, euadereq; in hostiles muros, pro gloria & victoria nullum laborem, periculum, extimescere. Qui autem non timet mori, ille nihil timet prorsus: vilissimoq; cuique crescit audacia, si se timeri sentiat. Inde Romani timoris Deum colebant, Pauorem dictum, cuius officiū erat, timorem ex animis militum eximere, & fortitudinem illis aduersus hostes ingentem addere: cui illi quotiescunque ad bellum prodibant, sacra faciebant. Nam facilius est impetum sistere torrentis, quàm cohibere gradum militis ex prælio fugientis. Sæpèq; accidit, vt cum semel vehemens aliquis mentes hominum incescit timor, etiam ijs quæ timenda non sunt, animi eorum magnopere perturbentur. Caroli VIII Galliarum Regis milites in reditu ex Italia, saltus montium à Veneris obsessos videntes, grauissimū sibi impendere casum arbitrabantur: & pluuia nocte sequenti adaucta, crebrisq; coruscationibus, ac terrificis tonitruis timorem conduplicantibus

tribus, vltimam iam sibi noctem illam fore existimabant, & nec diffugere audebant, nec hostem expectare. Flaminio autem ad Aretium cum Hannibale congresso, tanta perturbatio, tantusq; terror milites Romanos inuaserat (sub noctem enim mediam multum sibi fidentes eos aggressus erat) vt terræ motus, qui tum fiebant, non sentirent, quâuis multa ædificia corruerint, multi montes partim finderentur, partim collapsi valles complanarent, & flumina veteribus alueis exclusa, alio verterentur.

Si itaque pauor aliquis aut metus exercitum inuasit, vel quia noua sociorum accessione, hostium numerus accreuit, vel quia potior quodammodo genius illorum videtur, tum maximè Imperator, hilarem, lætum, ac intrepidum vultum militibus ostendat. Nam ad Imperatoris adspectum, quasi ad exemplum cæterorum animi conformantur. Ita Carolum Chodkieuicium in summis interdum angustiis, in Liuania præsertim, constitutum, semper animo infracto, hilari ac læto, velut alterum Fabium Dictatorem, contra Hannibalem pro Imperio decertantem, nouimus; quem & in Moschouia deinceps, atque Valachia contra Turcas, etsi aduersa valetudine conflictatum, & morti iam vicinum, attamen semper grauem vultum, & iras in hostem spirantē vidimus. Stanislaum verò Zolkieuium in pugna Cetzorensi magnitudine barbarorum vix non oppressum cum tota acie, non aliud quidpiam quàm animi magnitudo iuuit, vt paucis ex suis desideratis, omnia ex integro signa in castra reduxerit. Cumque sub vesperam copiæ Turcarum, Præcopensium Tartarorum aduentu auctæ fuissent, trepidantibus panico pauore de nocte cunctis, & castra cum Ducibus deserere volentibus. Zolkieuium vultum composuisse ferunt, magisq; iactabundorum antea Tribunorum metum & fugam risisse, quàm vt decorem, aut animi consternationem præ se ferret: qua generositate innata ac sagacitate, animos milit ac Ducum suorum conseruauit, perq; dies octo ad limina patriæ retro-

retrocedendo, barbarorum multitudinem sustinuit. Non de nihilo itaque Seneca scripsit. *Duces rebus afflictis hilaritatem de industria simulare, & aduersas res adumbrata letitia abscondere, ne militum animi, si fractam Ducis sui mentem viderint, & ipsi collabantur.* Iam autem semper in bello, vt Sallustius inquit, *ijs maximum est periculum, qui maximè timent: audacia pro muro habetur.*

Et quia timor varijs hominum sermonibus celeriter augetur, ideo falsorum rumusculorum auctores Imperator coerceat, præsertim talium, quibus milites plerumq; animis cadunt. Reliqua prudenti ratione dissuadeat. Cum Guilelmus Orangi⁹ ingenti exercitu in Germania collecto contra Albanum in Belgium venisset, positisq; castris ad Mosæ ripam, haud procul Traiecto, omnes prouincias fama ac terrore compleisset, ita vt metum inde Hispanus miles conciperet. Albanus mirus bellicorum discriminum dissimulator, quiq; nihil magis timebat, ne timere videretur; adeò famam illam in speciem contempsit, vt Centurioni copias hostium sollicitè denarranti, amplificantiq; conspirationem tot Principum Regumq;, placidè responderit. Scire se quantum illud demum fœdus esset; nec magnopere timendum, ab ea rebellium coniuratione, contra quam Rex Hispaniæ fœdus longè maius inierit, cum Rege Neapolis, Siciliæ Sardiniae, Duce Insubriæ, Burgundiorum, Belgarum, præter Peruiij, Mexici, Brasilis, Philippinarumq; Insularum Reges. Hoc autem differre vtrumque fœdus, quòd in illo Hæreticorum fœdere, nationum ingeniorumq; sit, dissimilitudo: & (si cætera desint) propria cuiusque vtilitas dissensionem, mox & dissolutionem societatis essent allatura. In hoc autem fœdere Regis Catholici, omnibus lubere, quod vni lubeat, eoque æternum fore.

Quod si verò nimis abiectos & afflictos milites Imperator deprehendat, roboret eos & confirmet spe bona, subsidia in-
quiens sub manu esse, eaq; mox præsto futura, vt fecit Stani-

Gg flaus

flaus Lubomierscius ad Chotimiā; cum enim rei annonariæ penuaria miles premeretur, multiq; ex obitu Ducis Chodkieuicij consternarentur, ille Legati munere fungens, primò Regem cum tota nobilitate aduentare dixit, qui iam Leopoli solueret, & affatim commeatus secum adferret. Deinde è Cosachis Zaporosensibus aliquos, habitu & moribus atque loquella Cosachis Donensibus (qui Moschouitarum Principi subsunt) per quam similes, in mediū produxit, & astu instructos, legatos esse à Donensibus ad Zaporosenses dixit, qui amicis suppetiatum venirent viginti millia & amplius, iam que in proximo castra habere. Sustinerent igitur paulisper, nec barbarorum multitudinem exhorrescerent, qui ad monstrandā suam numerositatem, & incutiendū nobis timorem, bufalos de longinquo dispositos in ordines, eisq; impositos gramineos manipulos vestibus loco sessorū contectos, & hastis armatos, mōstrarēt. Ad cuius rei certitudinē, captos nōnullos in mediū produxit, atq; ita titubātib; metu audaciā auxit.

Optimum quoque est, præmonitos esse milites, vt ij apud quos initium pauoris fuerit exortum, quieti in loco se contineant, donec ab Imperatore aliquid in mandatis haberint: præsertim si quid ex inopinato interueniret. Nam bene Tacitus scribit, *Primi in omnibus prælijs oculi vincuntur*: conspectaq; re aliqua nobis periculosa insperatè, sic vertimus terga, quemadmodum illi, quos pulvis motus fuga pecorum, exiit castris. Cum Aquileiam obsideret Attila, qui ex occulto cuniculo eruperant milites, & eum pacis comitatum in uaserant: postea confessi fuere, nulla se re magis perterritos fuisse, quàm scintillis ardentibus, quas ex pugnantis Attilæ, illis tum ignoti, oculis emicare notarant. Similiter cum in Gallia Belgica Iulius Cæsar dimicaret, & ab hoste raptus, equo eius portaretur armatus, occurrit de hostibus qui eum nosset, & insultans ait, *Cecas Cæsar*, quod Gallorum lingua vetere, dimitte significat. Ibi solo Cæsar nomine audito, Gallus adeo pauore consternatus fuit, vt dimisso captiuo, hanc vnam ob causam equo delaberetur. Sed

Sed & spectris interdum oculi pugnantium turbantur, non tantum Ducum famosorum presentia & vultus gravitate. Cum regnante Machomete II. Scodram Illyrici urbem munitissimam Turcæ oppugnarent, à viris statura humana maioribus à tergo se inuasos dicebant. Sueci in Liuania itidem Volmariam intercipere conantes, Eustachij Tiskieuicij opera, qui cum octo equitum cohortibus eam præsidio tenebat, acie aperta cæsi fuerunt, septemq; suorum millia in eo prælio amiserunt, affirmantes se ruptos fuisse ab equitatu quodam albo à latere dextro venienti, qui eos acie in Gaviæ fluuij glaciem pepulerant, vbi maxima eorum pars submersa fuit. Quapropter in id maximè incumbere debent Imperatores, ut quantum est possibile suos contra ista muniant, metum excutiant, & nulla eorum animos superstitione capi permittant. Paulus certè dum cum perse pugnabat, ne terrentur milites, imminens Lunæ deliquium, non indicari tantum à Tribuno militibus, sed & causas illius iussit explicari.

C A P V T X.

De Adhortatione facienda ad milites.

Militem cuius manibus seruanda est Respub. oportet excitare ad prælium vehementi aliqua oratione, eundem commonere ad exercitium militare. Studiosius enim oportet scientiam dimicandi, vsumq; rei bellicæ, iugibus exercitijs custodire, quàm mæchanicas artes propter exiguam mercedem, aut fauorem plebis, quotidiana meditatione conseruare; quod militi contingat non tantum gloriosa victoria athletæ, sed etiam amplior fama ut hostium spoliato: & quem ad opes ac dignitates ordo militiæ, & Imperatoris iudicium consuevit euehere. Propterea Spartæ hunc morem fuisse accepimus, ut quotiescunque è castris educeretur exercitus ad prælium, in Regium tabernaculum mili-

tes conuocarentur, vt audirent Tyrtæi carmina, in quibus erant conscripta belli consilia, damnorum solatia, incitamenta virtutum: eorumq; inflatu atque instinctu, è vestigio non fortem tantum, sed gaudentem etiam ac libentem animum offerent ad mortem pro patria, si opus esset, oppetendam.

Quoniam itaque monitis & oratione Ducis exercitui virtus accrescit & animus, ideo ipsi partim ignauia inimicorum, partim error ostendendus est, partim commemorandum quomodo antea à nobis superati fuerunt. Qualiter fecit in sua cohortatione Posthumius Consularis, qui cum interrogatus esset à militibus, quid imperaret? dixit, vt se imitarentur. Et arrepto signo hostes primus inuasit, quem secuti, victoriam adepti sunt. Dicenda etiam quibus militum mentes odio aduersariorum in iram, & indignationem moueantur, vt fecit paulò superiore sæculo Iuonia Daciæ regulus, cum è Polonia Cofachos Zaporosenses in subsidium contra Turcas euocasset; qua sanè oratione etiam plebè Valachicam (alias natura mobilem & fraudulentam) diuersarumq; gentium militem ita commouerat in fœdam illam gentem Machometanam, vt eos sibi in perpetuum fideles & constantes efficeret; obtineretq; breui spacio de memorabiles barbaris victorias. Animis enim penè omnium hominum hoc naturaliter euenit, vt trepident cum ad conflictum venerint: sed hoc remedio formido lenitur, si antequam dimices, frequenter exercitum tuum idoneis exhortationibus confirmes, & locis tutioribus ordines, vnde & videre hostem & agnoscere consuecant: inimicorum mores, aduersariorum arma & equos recognoscant & interdum audeant aliquid ex occasione, aut fugent, aut interimant inimicos. Nam quæ ex usu sunt, non timentur. Sic Albertus Lascus paucis cum cohortibus Moldauiam ingressus, cum Alexandrum Principem Prouinciæ priuata authoritate constitueret, primo leuioribus certaminibus cum Turcis milites suos ad audendū maiora assueuit, deinde animatos adhortatione, publico prælio

prælio decertauit, & in signi clade barbaros affecit. Sic quoque Lesniouius Moschos ad Neuelliam profligauit, Zborouius Gedanenses ad Derfauiam, Chodkieuicius Suecos ad Kircholmiam, Chmielecus Scythas ad Burstinum, & alij alios hostes suos.

Nonnulli verò Duces vltra exhortationes factas, sacramento etiam suos milititer solent obstringere, ne excederent è prælio. Ita M. Fabius Consul iurare suos iussit, cum prælium cum Tuscanis inire vellet. Ita L. Paulus, ita M. Varro, Afrubal, & alij, præcipuè Germani & Saxones.

Alij, sola laude militem suum excitant in hostem & obtinuerunt victoriam, vt Vitoldus de Tertaris ad Borysthenem, Seciechus de Pomeranis ad Choiniciam, Corecius ad Iassos de Turcis, & alij de alijs, quòd nimirum dixissent, Polonum esse non numerare hostem in campo. Sed & C. Cæsar aduersus Germanos & Regem Ariouistum pugnaturus confusior animis pro concione dixit, nullius se eo die opera, nisi decimæ legionis vsurum: quo affecutus est, vt & Decumani tanquam præcipuæ fortitudinis testimonio concitarentur, & cæteri pudore, ne penes alios gloria virtutis esset.

Alij item Duces solent explicare militibus suis ignauiam inimici, defectus armorum, iustitiam bellandi, & modum ad pugnam procedendi, vt rebus cognitis & perceptis essent animosiores, & scirent quomodo aggredi suum aduersarium debeant. Ita Marius captos in velitatione Cimbro suo militibus monstrabat, & imperitiam tractandorum armorum ostendebat. Ita Iulius Cæsar in Africam transiturus, ne milites Elephantos quibus hostes abundabant, extimescerent, curauit aliquot in Italiam adduci, vt milites viderent, & quomodo eos ferire & occidere deberent, attrectando addiscerent. Ita Chodkieuicius bello Chotimensi camelos & dromedarios quibus Turcæ maximè utebantur, adduci in castra sua Cosachis imperauit, vt milites adductis ad eos equis suis, timorem eis per assuetudinem excuterent.

Hinc sanè opere prætium est Duces in oratoria facultate pollere: nam nisi vniuersum exercitum alloqui possis, & sinistram quandam opinionem, quæ vel bono publico, vel sententiæ tuæ aduersetur, multitudini eximas, vix quidquā ex animi voto tibi succedet. Siquidem oratione metum adimimus, insidias detegimus, belli causas exponimus, præmia pollicemur, pericula vt instent, vt deuitentur, demonstramus; reprehendimus, oramus, minitamur, spem fouemus, laudamus, vituperamus, atque adeò ea omnia perficimus, quarum medio humani affectus, aut reprimi aut accendi queant. Neceffe itaque est, vt milites Ducem orantem frequenter audiant, atque hic ipsos aptè alloqui nouerit, maxime excitando ad prælium. Qua in re vt scribit Suetonius, superabat omnes quotquot ante eum fuerunt maximi Duces, Iulius Cæsar: sed & Scipio Africanus plurimum suā suadā in castris valebat. Et viciniore sæculo Georgius Scanderbegus, Alphonfus Magnus, Nicolaus Picininus, & apud nos Magnus Zamoscus.

C A P V T X I.

De Acie hostium turbanda.

Vtile quoque est simulatione adhibita, cum virtute hostem acie pellere non possis, vanos interdum rumores spargere, quo vel nostri excitentur tempore prælij, (aut imminentis periculi) vel hostes percellantur, nostrorum præsertim virium ignari. Inter alia verò fingat Imperator noua subsidia venire, atque sic suos confirmabit, hostes verò magnopere conturbabit. Ita fecit Papyrius Cursor filius Consulis, cum æquo Marte aduersus obstinatos Samnites concurreret: qui ignorantibus suis, præcepit Spurio Nauicio, vt pauci calones & agasones mulis insidentes, ramosq; per terram trahentes, à colle transuerso magno tumultu decurre-

currerent: quibus prospectis proclamauit victorem adesse collegam, ut occuparent ipsi præsentis prælij gloriam. Quo facto & Romanis fiducia concitatis, propulere facile erat, & propulsi terga vertere statim. Simili stratagemate Chodkieuicius in Suecos usus, qui lixas omnes & agasones in ordines dispositos inscijs suis militibus, à latere cum signis militaribus venire iussit, castris suis omnino desertis, iussitq; proclamari, ut hostes etiam exaudire possent, Ducem Raduillum cum auxiliaribus copijs venire. Atque ita Polonis pugnantibus animus creuit, Suecis verò, qui multò plures fuere metus & animum & vires excussit, membraq; debilitauit, ita, ut à tribus millibus nostrum, quatuordecim millia aduersariorum fuerint cæsa. Eodem astu & Lissouiani Cosa-chi in subsidium à Sigismundo III. missi contra rebelles Bohemos Ferdinando II. Imp. adq; Vstopeciam Morauos profligarunt, lixis & calonibus à tergo circummissis; qui pugnantibus suis quasi nouæ cohortes, ostentare se de longinquo cæperunt, & turbatis re inopinata Hæreticis tantum terrorem incusserunt, ut iam penè victores fugere debuerint. Tantum persæpe utilitatis adfert, suos & hostes iuxta decipere: illos quidem fausto, istos verò luctuoso mendacio.

Iuuat quoque interdū, si longiuscule dissitus sit hostium Rex aut Dux, ut Imperator proclamet Ducē hostiū occisum esse; idq; ita contenta voce, ut hostes quoq; exaudire possint. Commilitones enim qui suos virtute præstantiores hostibus esse audiunt, duplo fortioribus ac promptioribus animis roborantur. Contra, hostium vires, strage sui Ducis percepta, metu debilitati concidunt. Quin & aliquando ad huiusmodi rumorem illico in fugam sese dant. Ita Valerius Leuinus aduersus Pyrrhum, occiso quodam gregali, tenens gladium cruentum, exercitui utrique persuasit, Pyrrhum interemptum. Quamobrem hostes destitutos se Ducis morte credentes, consternati à mendacio, se pauidi in castra receperunt. *In bellicis enim rebus, inquit Liuius, parua sepe momenta in*
spem,

spem, metumue, militum impellunt animos. Ita Hispani contra Hamilcarem, boues vehiculis adiunctos, in prima fronte constituerunt, vehiculaq; rædæ, & seui, & sulphuris plena, signo pugnae dato, incenderunt: actis deinde in hostem bobus consternatam aciem perruperunt.

Aliquando etiam, si in dextro suorum cornu est, exclamet Imperator, milites qui in leuo sunt, dextrum hostium cornu vicisse: si in sinistro sit, dicat superiores esse in dextro: siue id ita verè fiat, siue secus, *Necessarium enim*, inquit Onofander, *mendacium dici oportet, ubi certamen existit ingens, ut possis victoria frui.*

Cauendum attamen ut docet Io. à Chokier, ne crebro simulationum fallacis exercitus aspergatur. id quod Cyrus etiam apud Xenophontem monet. *Si quis frequenter bonorum expectationes iniiciens fefellerit, vir huiusmodi, ne tum quidem potest persuadere, cum spem veram attulerit.* ut accidit Maximiliano Astriaco, ad Biciniam in Silesia cum Zamoscio decertanti, nam cum videret suos nimium trepidare, non poterat persuadere, quibus toties recentia auxilia apud Cracouiam frustra promittebat, ut impetum paucorum Polonorum tantisper sustinerent, donec Hungari aduenissent, qui iam reuera in proximò octo millia equitum fuerant. Sed clade Germanorum audita statim diffugerant, metuentes periculum simile, quale acciderat Austriacis paucos ante dies auxilium Maximiliano ad Cracouiam hærenti ferentibus, qui cum tarde venirent Maximiliano iam apud Cracouiam decertanti, à Gabriele Holubcone Cosachorum ductore apud Rabstiniã fuerunt cæsi omnes. Quare ante præliũ adhuc opus est suos confirmare, hostes verò quam maximè terrere.

C A P V T X I I.

De Terrendo hoste.

Semper ingenio vtendum, ubi vires deficiunt; nam hoc à natura omnibus animantibus comparatũ atque insitum est,

est, ut quæ eis plurimū obesse possunt, fugiant, si robore suo ac viribus repellere non possunt; homini verò datum est ingenium & ratio intellectus ut eo ad sui defensionem utatur, & manus labori non nisi præuio consilio adhibeat: Et antequam ad manus cum suo aduersario veniat, omnibus eum modis terreat, ut debiliorem faciat. Persæpè enim magnas alias viri & Imperatores, infesto aliquo casu, timore & formidine ita percelluntur, ut animum & fiduciam omnem abijciant. Et in Hierone Syracusanorum Principe legimus, qui deuictis prælio Syracusanis Messanam obsidentibus, audito falso rumore de subsidijs, quæ illis venire dicebantur, adeo timore perculsus fuit, ut non solum incensis castris atque tentorijs, per noctem Syracusas fugerit, verum etiam munitissima quæque loca, quæ in Messanorum regione sita erant, dereliquerit. Variè itaque terrendus est hostis, modo recentium auxiliorum aduentu, modo pecuniæ & annonæ copia, modo simulatione literarum quibus aduersa de amicis hostium significantur: modo crudelitate in deuictos eorum amicos, modo casu aliquo inopinato; quia nemo est tam fortis qui non rei nouitate perturbetur. Alij sola animi magnitudine quæ facilia ex difficillimis facit, hostem repulere. Cum Albertus primus Prusiæ Dux, contra Sigismundum I. Regem Poloniæ Auunculum suum arma mouisset, multasq; ciuitates Prusiæ vi cæpisset, accidit ut Reslam quoque obsidione cinxisset & tormentis bellicis magnā murorum partem diruisset ut iam ad oppugnandum & capiendum oppidum militem in ordines disponderet, Tuorouius vnus è Tribunis Regijs inopinato è syluis prorumpens, per mediam hostium aciem in oppidum cum mille equitibus euasit, & ad Albertum tubicinem ex templo misit, ut nunc statim velit assaltū ad mænia facere, & secum pro muris fortunam tentare, si vir bellator est, & tantarum copiarum strenuus Imperator. Albertus viri audacia territus statim ab obsidione recessit, & profectione fugæ simillima, complures ex suis Tu-

orouio tergo inhærente, in itinere amisit. Sepronius verò Gracchus in Hispania olim, cum eum legati Celtiberorum interrogarent, *in quo tandem consideret, quod cum paruo exercitu contra ipsos procederet?* respondit, *in optimo milite quem haberet.* Iussisq; omnibus in aciem prodire, circumduxit eos, ut suis quæ viderent referrent. Obstupuerunt attoniti legati, & ita suos reuersi perculerunt, ut statim ad sua reuerterentur, nec darent succursum ciuitati, quam Gracchus obsidebat. Valerius quoque Leuinus Consul, cum intra castra sua exploratorem hostium deprehendisset, magnamq; copiarum suarum fiduciam haberet, circumduci eum iussit: terrendiq; hostis causa, exercitus suos visendos speculatoribus eorum, quoties voluissent patere. Quod etiam paulò supra fecisse diximus Osmanum Turcarum Imp. cum bellum in Valachia cum Polonis gessisset. Germanicus verò Cæsar Henricus IV. bello contra Polonos suscepto non modò copias suas legatis Polonorum monstrauit, sed etiam thesauros. Cæterum vnus ex eis annulum quem in digito tunc habebat, in cistam auro plenâ imperterritus proiecit, & vadat inquit aurum ad aurum quo tu Cæsar gloriaris virtus penes nos maneat qua & tuos exercitus tam ingentes cum Deo bono dissipabimus, & auro isto cras mane potiemur. Consternatus animo Imperator qui terebat, ad vocem legati non aliud quidquam respondit, nisi *hopdank* quod Germanis significat, gratias habeo. Atque ex eo tempore cognomen familiæ legati illius Habdanci impositum, vsque in hodiernum manet, Imperator verò die sequenti profligatus, etiam thesauros illos quos legatis ostendebat, fugiens victoribus prædam reliquit.

Sed astu ut plurimum militari & stratagematibus, non superbia aut præsumptione, hostes, sunt terendi, quia ficta feueritate nihil est in viro militari ineptius. Callidis igitur consilijs, sed honestis vtendum, ut ingenium in te probetur, non verò malitia & fraus aperto exprobetur. Ita Castalius in

us in Pannonia terrebat, hostem astutia, qui vnà cum Battoreo & Nadaſdo, vix quatuor millia habebat contra Turcas, singulis attamen diebus venire milites simulabat, castra indies dilatando, & emissos de nocte milites, cum salutatione & explosione tormentorum recipiendo.

Iuuat interdum quoque aggredi hostem & præuenire, quam expectare assaltum ab illo & oppugnationem, quia sic monstratur animus hosti, qui te putat aut numero esse potētiorem, aut armis, aut fortitudine, aut stratagematibus: atque ita statim languet animo, cum ad omnia promptum & expeditum videt. Vnde L. Martius dicebat. *Audeamus quod credi non potest ausuros nos: eò ipso quod difficillimum videtur, facillimum erit: scio audax videri consilium sed in rebus asperis & ambiguis, fortissima quæque consilia tutissima sunt.* Vbi igitur vi non possumus, astu agamus, vti Lisander Lacedæmonius facere solebat, qui cum maximæ sagacitatis Dux esset, potius stratagematibus aduersarios suos vincebat, quàm Marte aperto.

C A P V T X I I I .

De Officio militum in acie.

TRia militis munera esse Paulus Æmilius dicebat, vt bene Liuius adnotauit, *Corpus vt quam validissimum & perniciosissimum habeat. Arma apta. Animum paratum ad subita imperia. Cætera dijs immortalibus & imperatori curæ esse.* Enimuero, inquit Tacitus, diuisa inter Duces militesq; munia, illis arma & animus sint, istis consilium & virtutis suæ regimen relinquunt. quia parendo potius, quàm imperia Ducum sciscitando res militaris continetur. Pulchrum sanè Brasidæ monitum quamuis breue. *Censete hæc esse bonæ militiæ Velle, Vereri, Obedire.* Odi curiosos illos aut refractarios, qui iussa Ducum interpretari malunt, quàm exequi, in

aciem præsertim educti; vbi, cur hoc aut illud faciat non est inquirendum, sed exequendum. Nec enim vnquam consilia Ducis, iudicio exercitus; sed exercitus prouidentia Ducis regendus est: quia male tunc imperatur, cum regit vulgus Duces. Experientia igitur constat nihil magis prodesse in pugna, quàm vt milites officio suo fungantur, hoc est, vt ordines seruent, vexillum suum custodiant, iussa Ducis exequantur, fortiter dimicent, aduersis non turbentur, non audiant proclamatos ab aduersarijs in suum terrorem aliquos casus, aut Ducum mortes, & vt verbo concludam cum animo resoluti & armis splendidibus in aciem descendant, vt victoria, præda, & gloria potiantur.

Videat itaque Imperator, vt exercitus armis splendidibus instructus fulgeat, & gladij ipsorum probè acuantur, galeæq; ac loricae frequenter abstergantur, ne miles otio torpescat & sordidus in acie compareat. Nam micantibus armorum scintillis terribiliores exercitus apparent; multæq; per oculos species in animo delapsæ, perterrere aduersarios solent. Turcæ hoc vel maximè obseruant; & sublatis in altum gladijs cum clamore ingenti, huc atque illuc eos ad solem vibrant, vt qui illorum prælijs non sunt assueti, conspecto mucronum tanto splendore, incipiant statim animo cadere. Sed & Mario olim, inter alia quæ victoriam de Cimbris pepererunt, fuit quoque fulgor iste armorum, si L. Floro credimus.

Præcipuè verò ordines in acie dispositos milites indefinenter obseruent, nec vltra magis quàm expedit, aut conglobent agmen, aut laxent. Nam & constipati sibi inuicem impedimento sunt ad pugnandum; exponunturq; periculo sclopetorum atque tormentorum bellicorum: & rariores atque interlucentes aditus perrumpendi hostibus præstant, nec sese inuicem iuuare possunt. Quapropter æquali legitimoq; spatio miles distet a milite, præsertim cum gladios accipites in manibus, aut bipennes, pilasue gerunt, vt solent armari pedites Polonici, & decuriones peditatus Hungarici.

His

His præcipiendum est, ut sciant subito duplicare aciem; aut eam quadratam, trigonamue repente constituere; vel etiam instruere orbes, si hostis in circuitum obequitat. Hæc si iuniores assidua meditatione perceperint, facilius in ipsa dimicatione seruant, iam autem ratio ipsa docet semper in ocio debere fieri, quod necessario faciendum videtur in prælio; sed maximè in hoc instruendi sunt, ut sciant ordines diligenter seruare. Apud Thucydidem Chaones cum cæteros nimis præcessissent, locis id ignorantibus, à Stratijs profligati fuerunt. Et apud eundem victores Lacedæmonij dum neglecto ordine fugientibus Atheniensibus instant, à iam victis superati sunt. Nec aliud Corradinum & Regno Neapolitano, & vita exiit, quàm quòd Germani vana obtentæ victoriæ opinione seducti, ordinibus desertis, cladi se, & vniuersum exercitum reddiderunt opportunos. Idem illis accidit in prælio cum Turcis ad Segetum, cum itidem neglectis ordinibus ad spolia colligenda conuersi fuissent; à superuenientibus enim Tartaris qui in sylua vicina occultati fuerant, deleti sunt.

Eapropter mandatis Ducum sint in acie milites obediētes, nec diffugiant à prælio tamdiu, quamdiu Duces eos manere iusserint, aut retrocedere ordinibus quantum fieri potest seruatis, Et hanc ob causâ Clearchus Dux Lacedæmoniorum exercitui dicebat, Imperatorē potius quàm hostem metui debere: significans eos, qui in prælio dubiam mortem timuissent, certum, si deseruissent, manere supplicium. P. verò Cornelio Nasica, atque Decimo Iunio Coss. qui exercitum deseruerant in pugna, damnati virgisq; cæsi publicè vniuerunt.

Denique vexillum suum attentè comitentur milites, si non præda modò atque victoria, sed gloria etiam & laude frui percipiunt; sintq; signorū militarium periti, quia nihil magis ad victoriam proficit, quàm monitis obtemperare signorum. Quare versatos esse milites in omnibus vocabu-

lis & præceptis militaribus oportet, quo facilius quæ per aciem imperantur intelligere possint & facere: hoc est, *declinationem, immutationem, conuersionem, reuersionem, inflexionem, condensationem, diductionem, intercalationem, progressionem, retrogressionem, postpositionem, & appositionem*; quæ quisque in sua lingua aliter vocat, rem tamen eandem præstare potest, quamuis è diuersis gentibus & linguis militem collectum habuerit, si eum prius longa meditatione erudierit: Quod maximè vtile est, ad subitos hostium superuentus, quos vel à latere, vel à tergo intulerint. Eapropter assuefaciendæ sunt copiæ, tam pedestres, quàm equestres; partim voce, partim signis, quæ visu percipi valeant, vt rem aptè ac oportunè, quam quisque exigat vsus, possint expedire.

C A P V T X I V.

De Committendo prælio.

PVgna seu prælium fit vel Marte aperto in campo, vel oppugnando seu defendendo munitionem. In campo verò, vel pugnando prælio vniuersali, vel turmatim & velitatione, vel denique viritim & duello.

Quo ad pugnam vniuersalem, necesse est vt sit Imperator resolutus, & cum absoluta authoritate: ne videlicet aut propter hanc, aut propter illam causam tergiversetur descendendo in aciem, vti faciebat Aratus Princeps Siciniorum, Lotrechius Imperator Venetorum: quia & cogitationibus obruitur, nec scit deinde quid debeat facere; & miles ardorem deperdit & audaciam, atque indies languescit. Vnde Paulus Æmilius in principio belli Macedonici, suis militibus dixit, *ne essent solliciti de prælio & de bello, sed haberent lacertos robustos, & corpus agile, arma benè tersa & acuminata, seruarentq; ordines suos quàm diligentissimè, quia breui Marte aperto decertabimus.* Idem bello Turcico Chodkieuicius suis

fuis militibus, cum ingens apparatus Osmani nunciaretur, & bellum per plures annos cum barbaris duraturum omnes putarent, quemadmodum in Hungaria sub Ferdinando. I. & Rudolpho II. Imperatoribus duravit *Relinquit*, inquit *curas belli mihi & estote viri fortes tanquam veri Sarmatæ, & ego efficiam, ut antequam lardum vestrum consumatis, consumetur & bellum.* Facta itaque resolutione decertandi, faciat necessitatem pugnandi, qua nullum incitamentum, dicebat Hannibal, ad vicendum homini à Dijs immortalibus acrius datum est. Quapropter introductis militibus suis in mediam Italiam, exhortando ad fortitudinem dixit eis. *Nil usquam nobis relictum est. nisi quod armis vindicauerimus. Illis timidis & ignavis esse licet, qui receptum habent, quos suus ager, sua terra, per iuta ac pacata itinera fugientes accipient. Vobis necesse est fortibus viris esse, & omnibus inter victoriam mortemue certa desperatione abruptis, aut vincere, aut si fortuna dubitabit, in prælio potius, quàm in fuga mortem oppetere.* Et Cato maior commissurus prælium cum Hispanis, longè à mari deduxit milites suos, nauesq; remouere in altum iussit. *Nusquam nisi in virtute spes est, inquit, & ego sedulo ne esset, feci; inter castra nostra & nos, medijs hostes: ab tergo hostium ager est, quod pulcherrimum idem tutissimum est, in virtute spem positam habere.* Idem planè & fecit & dixit Mauricius Nafsoius, cum ad Neiportum cum Hispanis configere voluisset, remotisq; Catonis exemplo in altum nauibus, necessitatem vincendi suis militibus imposuit, & hostem profligauit. Marius quoque cum Cimbris manus conserturus studio exercitum suum in loco sicco & petroso collocavit: requirentibusq; militibus aquam, fluuium à tergo hostis ad ciuitatem Aix ostendit, inquiens, *qui vult bibere necesse est ut eò eat.* Atque ita milites penuria adaecti fortissimè Cimbros aggressi sunt, & profligarunt; castrisq; eorum potiti, de fluuiio illo biberunt. Verum maiorem necessitatem pugnandi militibus suis nemo vnquam imposuit, sicut Gulielmus Dux Nor-

Normandiæ, cum Angliam intrasset: statim enim naues quibus eò traiecerat comburi iussit. Quod etiam fecit, Ferdinandus Cortesius apud veram Crucem, in Nouo mundo. Et Philippus Augustus Rex Galliæ, superato Scaldi, contra Ottonem Imperatorem, statim pontem disijcere iussit, ne suis militibus spes aliqua ad effugiendum esset. Fecit idem & Chodkieuicius Nestro superato ad Chotimiam contra Turcas progressus; ne verò procures murmurarent quod non haberet commoditatem mittendi causa commeatus delicatioris & cupediarum Cameneciam, dixit pontem nocturno tempore fuisse ruptum à Valachis cum aquæ accrescerent, nec iam tempus esse aduenientibus barbaris reparare eum.

Et quia in præliis maximus nunc usus tormentorum est, igitur ne ab illis in acie offendatur miles, quod eminus ferire soleant, nullum aliud Imperator remedium excogitare potest, quàm si summa cum celeritate ea occupet: quæ si hostes defendere cupiunt, necesse est ut ea à tergo relinquunt, unde fit, ut dum ea ab utraque parte impediuntur, ferire tutò non possint. Eadem celeritas adgrediendi valet & contra hastatos equites, & contra pedites sclopetarios ut plurimum; quia nec illi poterunt hastas suas absque procursu vibrare; nec isti semel explosos sclopos denuo onerare. Et hoc est, quod Cæsar nobis scriptum reliquit, in Gallia militem suum tanta celeritate atque audacia ab hoste circumuictum fuisse, ut suis pila ex more Romano emittere locus non fuerit. Ne igitur tormenta hostilia valdè tibi noceant, oportet illa tormentis tuis impedire; ita tamen ne in explosione tui milites offendantur. Constat autem nihil esse quod exercitum tantopere turbet, quàm si visui impedimenta obijciantur; eamque ob causam multos florentissimos exercitus interiisse, quod prospectus ipsis aut à sole, aut à puluere ademptus fuisset. At nihil est quod prospectui tantopere obsit, quàm fumus ille, qui à maioribus tormentis excitari consuevit. Hanc igitur ob rem consultius existimarem hosti
locum

locum dare, quo sibi ipsi oculos præstringat, quàm visu à te ipso præpedito, in illum impressionem facere. Ideo aut tormenta tua non emittas, aut (cum isthoc vix cuiquam ex occidentalibus probari queat, quòd tormentis nunc apud eos permultum tribuatur) ea in cornibus exercitus colloca, ne fronti exercitus tui, in qua summum momentum situm est, fumus nocumento fortè sit. Ita autem illa colloca, vt facilè defendi possint, si hostis ea occupare conatus fuerit.

Tempus quoque pugnae commodum Imperator non omittat, quod rerum omnium est primum. *Nec enim rerum occasiones tarditatem & ignauiam expectant*, vt ex vero Demosthenes quondam inquebat. Prudenter itaque Claudius Nero, cum aduersus Asdrubalem certaturus cito gradu proficisceretur, monentibus quibusdam, vt militem itineribus ac vigilijs fessum reficeret, respondit. *Commodam decertandi opportunitatem haud omittendam*: & porro milites precatus est, ne consilium suum, quod tutum celeritas fecisset. temerarium morando facerent. Nec parum tamè aliquando confert, temporis oportunitatem expectando, non statim instructis præpropera fastinatione copijs accelerare, sed prope vallum castrorum manere, donec hostilem procinctum, qualis ille sit, quibusq; in locis stet, exploraueris. Ita Chodkieuicius aduentante Osmano Turcarum, nondum vniuersum habens penes se exercitum, militum partem illam qui in castris cum illo Tyra superato fuerunt, in aciem eduxit, ne timere videretur; à vallo tamen castrorum, & insidijs quas parauerat, recedere noluit, ne à multitudine barbarorum circumdaretur. Sed turmatim solummodò suos in conflictum mittebat, vt interim procinctum ipsorum, & dispositionem acierum specularetur. Ac propterea Iulius Cæsar providebat, vt potius in nocendo aliquid omitteretur, quàm cum aliquo militum detrimento noceretur. Militarisq; ille Doctor propterea inquit. *Dux vigilans, sobrius, prudens, tan-*
Ii
quam

quam de civili causa inter partes iudicaturus, adhibito consilio, de suis & aduersarij copijs iudicet; & similtis rebus superior inuenitur, opportunum sibi non differat conflictum. Cum hac cautione tamen, ut primum velitationibus & equestribus prælijs tentet, & experiatur, quid hostis vires possint, quidue nequeant. Proptereaq; Turcarū Tyrann⁹ Ducib⁹ suis cū hoste pugnandi, omniaq; in bello gerendi. arbitrium concedit, nihil sibi præter belli indicendi, & pacis faciendæ potestatem retinens, ne videlicet commodam decertandi opportunitatem, expectando mandata Principis, omittant. Male itaq; sibi consulunt reliqui Reges, qui Duces bello præficiunt restricto imperio, ne manum cum hoste conserant, nisi prius ea de re suam Senatusue sententiam explorarint, cum ex distantibus terrarum spacijs, ut Tacitus inquit, consilia post res afferantur. Quidam etiam, hostium virtutes metuentes in prælium nō nisi sub noctem progressi sunt, quo, si suos vinci contingeret, noctis præsidio sese in tutum recipere possent. Sic Gustauus ad Mæuam & ad Dersauiam contra nostros non nisi sub vesperam processit, lauciatusq; globo sclopeti, statim ex acie suos reuocauit. Alij superstitione fascinosos hostes, præliumq; animaduertentes eo tempore detrectare, id ipsum tempus ad certamen arripuerunt ac vicerunt. Sic Cæsar in Gallia Arionistum: Vespasianus in Syria Iudæos oppressit. Patriarcha Aquiliensis Alphonsum Magnū die Natalis Domini, cum antelucano tempore sacris adesset, cum copijs Pontificijs inuasit. Sic Teutones Crucigeri Polonos ipso die sacro Palchatis ad Nessouiam aggressi, sed puniti à Deo fuere.

Caueat etiam Imperator, ut supra monuimus, ne ieiunos milites ad certamen educat: quia cibo refectioni solent esse in prælijs fortiores. Nec rarenter profligati sunt exercitus, deficientibus nimia esurie viribus, quando scilicet non momento, sed nocte sera adueniente, certamen dirimitur. Ideò periti illi Duces non aliter decertandi tempus capiebant, nisi

iam

iam ante milites cibassent; quod & apud nos vñ iam ipso obferuatur, nec vñquam arma milites capiunt, nisi prius firmatis cibo viribus. Et Pub. Æmilius cum Thuscis olim prælium commissurus, vt pranderent milites, tesseram dari iusserat. Scipio quoque cum Asdrubale pugnam initurus, tesseram vesperi per castra dedit, vt ante lucem viri, equiq; pransi essent, & armatus eques frænatos teneret equos. *Optimo itidem consilio Hannibal Romanos oppugnans, milites suos obsequitare iubet hostium castris, iaculando laceffere (verba Polybij) ad pugnam hostem, cupiens eum imparatum improvidūq;, & quod plurimi faciebat, nondum pransum aggredi.*

Variæ quoque fuerunt veterum Ducum opiniones, num scilicet cum clamore, de quo etiam supra egimus, concitatoque, gressu; an verò cum silentio atque lento gradu pugna instauranda esset? quia illud ad accendendos animos facit: hoc autem postremum, ad percipienda Ducum imperia opportunius est. Vnde putarem veterum Romanorum morem sequi, qui post primam impressionem reliquum exercitum cum silentio committebant, quòd in prælio perniciosissimum sit impedire Ducis imperia. Igitur relinquamus clamorem istum perpetuum barbaris, qui & ante congressum, & post pugnam diremptam continuo vociferantur, & Ducum suorum vocem opprimunt, qui sæpius exhortatione sua fugientes restituere deberet. Veteres Poloni ante congressum Peana Diui Adalberti, Virgini Mariæ canebant. Nunc solummodò ter nomen salutare IESVS clara voce omnes ingeminant, & procurrunt statim in hostes cum silentio, in virtute, non in vlulatibus spē victoriæ collocantes.

Dux igitur antequam ad prælium descendat, ponderet diligenter, atq; perpetuò obseruet, ne vnquam prælij aleam experiatur, nisi quapiam in re hostibus præstet: aut sanè necessitate aliqua eò adigatur. Præstat autem vel situs, vel ordinum ratione, vel copiarum magnitudine, aut denique militum præstantia. *Necessitatem verò vocamus, si per-*

spectum habeas, licet praelium detrectes, nihilominus tibi
 pereundum esse: cuius generis sunt, si pecunia destituaris,
 eoq; metuendum sit, ne exercitus tuus dilabatur: si fame ali-
 as laborandum fuerit: si hostem auxilia expectare comper-
 tum habeas. His enim casibus omnino ad praelium, licet
 cum discrimine deueniendū est; si quidem praestat fortunā
 experiri: nisi fortè panico pauore perculsos tuos esse videas.
 Omnium siquidem maximè tibi cauendum erit, ne militē
 trepidum, aut aliquo saltem modo de victoria ambigentem
 in praelium educas, certum quandoquidem ad cladem prae-
 sagium fuerit, si vincere te posse minus credas. Postquam
 autem praelium commiseris, tuos assiduis cohortationibus
 incita, subsidia tempestiuè laborantibus submitte, hostibus
 terrorem omnibus modis incute, & vbi acie pepuleris, in vi-
 ctoria tibi scias prouide esse agendum, quia frequenter fusa
 acies dispersos ac passim sequentes, reparatis viribus intere-
 mit, vti paucos ante annos Poloni Ferdinando II. in subsidi-
 um contra rebelles missi, haud procul Polsonio fecēre, & fu-
 gientes aciem Gabrielis Battorei, quæ & hastatos complu-
 res & cataphractos habebat, nudi ferè, & velutum more fra-
 meis solummodò armati, omnes penitus ad internecionem
 deleuerunt. Iterumq; apud Cassouiam, cum Duce Franci-
sco Racocio eiusdem exercitum, similiter acie ab hastatis
 pulsī, reparatis viribus, septem millia interemerunt, quin-
 quaginta duobus vexillis potiti. Sed & nuperrime Bernar-
dus Vaimariensis, profligatus apud Regenbergam à Ioanne
Verdensi, collectis suis fugiētibus viceuersa Cæsarianos pro-
 fligauit, illumq; ipsum, cum Duce Sauelio cepit. Satis itaq;
 citò incipis victoriam, vbi prouisum fuerit, ne vincare; quia
 sapissimè etiam victis ira virtusq; adest, si nimium instans.
*Clausis, inquit Vegetius, ex desperatione crescit audacia: &
 cum spei nihil est, sumit arma formido.* Hinc Pyrrhus inter
 cætera praecepta Imperatoria, memoriæ tradidit. *Non esse
 pertinaciter instandum hosti fugienti, non solum, ne fortius ex
 neces-*

necessitate resisteret, sed ut postea quoque facilius acie cederet.
Denique à præda etiam arcendus miles, quia nimis sæpè ob-
stitit vincentibus prauum inter ipsos certamen, omisso ho-
ste spolia consecrandi.

CAPVT XV.

De Resistendo virtuti atque dolis hostium.

VT aduersarium vincas, virtuti illius virtutem, dolo do-
lum, vel vtrique vtrumque oppone: nam vim vi repel-
lere licet, & dolum auertere dolo: non tamen in fide data li-
cet hostem vindicare, quia sic patentem fraudi portam ape-
riremus. Exceptis igitur superuentibus, vel incursionibus
repentinis ex occasione (quam nunquam Dux exercitus o-
mittere debet) iam in itineribus; fatigatis: in fluminum trās-
gressione, diuisis: in paludibus, occupatis: in iugis monti-
um, laborantibus: in siluis, sine ordine incedentibus: in cā-
pis, sparsis, atque securis in mansione dormientibus: opor-
tunum prælium semper infertur, cum alijs negocijs occupa-
tus hostis, vt prius interimatur, quàm præparare se possit.
Hac in parte diligentissimus fuit Alphonfus Magnus eiusq;
exercituum Dux Braccius: & ita contra omnes totius Italiæ
Principum cōatus, Regnum Neapolitanum possedit, nec
vllō deinde modo eijsi inde potuit. Apud nos Ostaphæus
Dascouicius Cosachorum Zaporosensium omnibus Hordis
seu tribubus Scytharū, cis & vltra Tanaim habitantium, si-
mili vigilantia formidabilis fuit. Bernardus verò Prætifici-
us, licet priuatus nobilis fuerit, Tauricam nihilominus &
Bessarabiæ totam barbariem à frœno tenuit. Alexander Mis-
souius cum aliquot millibus equitum totum Moschorum
Imperium vltra Album lacum atque Astracanum peruasta-
uit: nec virtuti illius aut dolis vaferrima Russorum gens re-
sistere vllō modo potuit.

Quod si verò cauti sunt aduersarii, & insidiarum nulla sit copia, tunc aduersum præsentem, scientem, videntemq; , æqua conditione pugnatur, & audacia, fortitudine, animiq; generoso conatu vincitur hostis, licet copijs multo superior fuerit. Ita Boleslaus Chrobrus contra Roxolanos Criuostus contra Pomeranos, Locticus contra Crucigeros, Vitoldus contra Scythas, Zolkieuus contra Moscouitas, Chodkieuicius contra Suecos, Corecius contra Turcas, infinitiq; diuersarum gentium Duces, contra suos aduersarios, numero longè superiores, decertarunt.

Cauendum tamen vel maximè in acie, ne ab ala, cornuque sinistro (quod sæpius in prælijs euenit) aut certè dextro, circumueniantur tui à multitudine hostium, vel à vagantibus globis, qui è supernumerarijs in hoc asseruantur. Quod si acciderit, vnum remedium est, vt alam cornuq; replicas & rotundes, quatenus conuersi tui, sociorum terga defendant. Ita dextrum cornu disposuerat Chodkieuicius ad Chotimiam, cum in acie Turcam cum numerosissimo exercitu aduentantem expectaret; eo quòd à castris, quæ tergum defendebant, cornu illud paulò in planiciem protensum esset. Et ideo in angulo ipsius extremitatis, secundum artem bellicam fortissimos collocauerat, insidiasq; in sylua vicina posuerat, quia ordinariè ibi impetus amplior fieri consuevit.

Item aduersum cuneum hostium, certis resistitur modis. Est enim cuneus multitudo peditum, quæ vineta cum acie primo angustior, deinde latior procedit, & aduersariorum ordines rumpit, quia à pluribus in vnum locum tela mittuntur. Contra quem, veteres forficem ponebant, vt scilicet lectissimi milites conferti in V. literam, illum cuneum ex parte vtraque concluderent, & non permetterent aciem perrumpere. Sed nunc tormentis bellicis ortis, cunei non solent esse in vsu, quia globis ignitis & catenis explosis, maxime cum damno militum deletur. Durantibus tamen bellis Liuonicis inter Carolum Sudermanum, & Sigis. III. Re-

gem

gem Poloniæ, Sueci cuneo ex sclopetarijs facto, apud Vol-
mariam procedebant contra Polonos, sed dextrum latus eo-
rum Cosachi sagittarij valdè offende-
bant, leuum verò vnica
cohors hastata ita perrupit, vt ex septem millibus vix cla-
dis nuntij manserint, globis equitum insuper à tergo eos in-
uadentibus. Cæterum contra globum vago superuentu in-
cursantem, non datur aliud remedium, nisi vt alter globus
populosior, vel fortior contra eum emittatur.

Obseruandū quoque est, ne sub tempore, quo iam com-
mittitur pugna, velis ordines commutare, aut de locis suis a-
liquos numeros ad alia transferre: statim enim nascitur tu-
multus atque confusio, & imparatis conturbatisq; facilius
hostis incumbit, vt accidit Michaëli Daciæ Transalpiæ Re-
gulo, Duci alias bellicosissimo cū Ioanne Zamoscio decer-
tatur. qui (recedentibus ab eo Polonis, quod contra patri-
am pugnare non liceret, qui operam suam non nisi in barba-
ros erant ei polliciti) cum acie Zamoscij perspecta, ordines,
suos permutare vellet, à Zamoscio interea temporis aggres-
sus, prælium amisit & vix mettertius manus illius euasit.

Si vero & plures, & fortes bellatores habueris, fronte lon-
ga, & quadrato exercitu depugna, vt ex vtroque cornu ho-
stem circumuenias, & quasi in sinum sui concludas exerci-
tū aduersarij. Ita faciunt Scythæ & Turcæ, quia & suis equi-
tibus nimium fidunt, & numerosos semper solent habere
exercitus.

Quod si minus poteris aduersarium sustinere, noli in aci-
em descendere, nisi prius aut montem, aut mare, aut flumen,
aut lacum, aut ciuitatem, aut paludes, aut abrupta in parte v-
na habeas, ex qua hostis non possit accedere. Huius rei obser-
uantissimus fuit Nicolaus Picininus, celebris è Bracciana di-
sciplina exercituū Dux, & Ioannes Camenecius Polonica-
rum copiarum Imperator, qui eo stratagemate vsus, non po-
terat à multitudine Tartarorum ad Visnioueciam circum-
ueniri, & sex atque viginti millia barbarorum, parua suo-
rum

rum manu inter paludes deleuerat. Victoria enim per paucos fieri conſueuit: tantum eſt vt electi à Duce ſapientiſſimo in his locis, in quibus ratio & vtilitas poſtulat, ordinentur.

Cæterum plerique rei militaris ignari, pleniorẽ victoriam credunt, ſi aduerſarios, aut locorum anguſtijs, aut armatorum multitudine circumdederint, vt aditum non inueniat abſcedendi. Sed falluntur magnopere: libenter enim cupit commori, qui circumdatus ſine dubio ſcit ſe eſſe moriturum. Cuius rei memor Chmielecus cum ad Buſtinum Tartaros aggredere, ab illa parte, qua Tyram fluuium tranſituri erant, vel ſecus fluuium fugituri, nullas inſidias locauerat, vt multitudo perterrita, cui ille par non erat, eo facilius ad præbenda terga conſentiret. Alias etenim clauſi, licet exigui numero, & infirmi viribus, hoc ipſo, tamen ſunt hoſtibus pares, quia deſperantes ſciunt aliud ſibi licere non poſſe. Nam vna ſalus victis, nullam ſperare ſalutem. Suierſczouius qui cum Coſachis ſuppetiaturum Iuoniæ Moldauicæ Regulo inerat, cinctus à multitudine Turcarum, ita ex deſperatione pugnavit, vt multa ex eis millia occideret, nec prius in potẽſtatem illorum deuenit, quàm omnes ſui commilitones occidiſſent in acie. Et Carolus VIII. Gallorum Rex, è Neapolitana expeditione rediens, cum à confæderatis Italis ad confinia Inſubricæ conſuſus eſſet, reſumpto animo, ita obiectos ſibi aduerſarios aggreſſus eſt, vt proſtigati, pacem ab illo exorare cogerentur, à quibus ille paulò ante, tranſitum liberum obnixè petierat. Non eſt igitur hoſtis includendus cum fugam meditatur, ſed aureus etiam ei pons ſternendus eſt, vt in prouerbio habebat Sigismundus I. Rex Poloniæ. Sed & fugæ hoſtili fidendum eſt, nam qui hoſtes decipiunt, poſſunt eos tum iniecta fiducia incautos offendere: tum fugandi ſui facultate tradita, reddere turbatos; tum ſimulata fuga, in locos difficiles ſubducere, hicq; adoriri. Quapropter ſi multi hoſtium paucos tuorum fugiunt; (verum & hoc ſæpiſſimè ſolet ex vero fieri: neque enim ibi re-

quiren-

quirendus est numerus, vbi animus semel territus, non tam tela hostium cupit declinare, quàm vultum) si pauci hostium multos tuorum adgrediuntur; si hostes præter rationem subito in fugam se coniiciunt; istis casibus insidiæ tibi semper metuendæ sunt: neque vnquam credideris hostem sibi minus constare aut rebus suis non aptè prospicere, sed potius illum te decipere velle, & eo magis periculum declinaturū esse, quantò debilior fuerit; atque adeò quo minus cautum se præbuerit, eò magis tibi æstimandum cauendumq; fore. Maximè si hostis prædam tibi exponat, intellige escam eam esse, qua irretiare, atque in insidias pertrahare.

C A P V T X V I.

De non desperando, si vel pars, vel totus exercitus fugerit.

QUamuis verissimum illud prouerbium sit. *Timori nulli munimenta satis sunt.* quo maximè in acie milites perculsi, nullam fugiendi metam, nullum finem habent; Duci attamen cordato minimè desperandum est, si pars exercitus ex acie fugerit; nam in eiusmodi necessitate, sæpissimè Ducis constantia, totam sibi solet vindicare victoriam: ut accidit in illa celebri pugna Gruneualdensi cum Crucigeris Prussicis, vbi dextrum Polonorum cornu, quod constabat ex Tartaris Lituanicis ferè nudis, totum penitus diffugerat, nudentibus & ipsis equitibus Lituanicis, qui leuiter armati non poterant cataphractorum Germanorum impetum sustinere: attamen manente constanter ipso Rege Vladislao Jagellone cum grauiore armatura, victoria penes Polonos stetit: & qui fugerant ex acie, pudore instigante, quod Principem suum in acie reliquissent, obuersi iterum cum hoste strenuè decertarunt. Innumerabilibusq; hoc accidit bellis, & pro superioribus tamen sunt habiti, qui minimè desperarunt: nam in simili conditione, fortior creditur, quæ aduer-

ſa non frangunt. Attilius Regulis in bello cum Samnitibus, videns pedites ſuosex acie ad caſtra fugere, cum gladio euaginato eis occurrit, & equitatum eis totum oppoſuit, inquit, niſi obuerti pugnaueritis cum hoſte, mecum pugnare debetis. Et ſic animati & perterriti ſeueritate Ducis, hoſtem iterum aggreſſi ſunt, & vicerunt. Metellus verò Celtibericus, ad fugientes milites miſit ſignificans, quod omnes ipſe occidet in caſtris, niſi reuertantur ad locum amiſſum, & hoſtem ex eo deiſciant. Quod & fecerunt, timore ac pudore coacti. Seleucus in vltimo prælio factò cum Demetrio Rege, cum videret fugientes ſuos, equo deſcenſo, & galea capiti dempta, vt melius agnoſceretur, proſtrauit ſe in terra, vt per ipſum fugientes irent, & conculcarent ipſum. Quo factò in pudorem & ardorem pugnandi milites verſi, hoſtem vicerunt. Iulius quoque Cæſar fugienti vexillifero, aquilam eripuit, & ſe iubens ſequi, omnes in hoſtem obuertit. Idem & Georius Scanderbegus ſæpius fecit (qui diuerſis in prælijs, ſua manu vltra duo millia Turcarum occidit) & fugientes ſuos in prælium reduxit.

Nonnulli clamore ſublato, & buccinis victoriæ ſignum canentibus prælium reſtituerunt, fugientesq; quaſi ad ſpolia reuocando ad prælium accenderunt, vti fecit Stephanus Dacix Regulus in pugna cum Baiazete II. qui aſtu tali valachos ſuos ad ſyluas paſſim diffugientes, ad inſtaurandum certamen reuocauit, animauit, & multa Turcarum millia apud Targouiciam cecidit.

Etiam toto exercitu fuſo pernicioſa clade, reparationis fortuna multis non defuit, & Humiadem contra Turcas apud Albam Regiam decertantem, bisq; acie iam pulſum, inſigni victoria decorauit. Sed & Iſmalem Soſſi Perſarum Regem, cum Selimo I. ad urbem Taurim in Media pignantem haud parum viuit, cum reuocatis ex fuga ſuis, Turcas in cæſorum ſpolijs hærentes, ad internecionem ferè deleuiſſet, vt vix ſelimus ipſe euadere potuiſſet.

Dux

Dux igitur confidens & lætus, primò in trepidatione suos hortetur ad audaciam, preces misceat, exemploq; eis in hostem primus eat, vbi maximum discrimen esse videt: memor quòdeuentus omnium, aut certè plurium præliorum, inter initia contra illos magis fuit, quibus victoria debebatur. Quapropter hic animo opus, vt nullum in tali trepidatione, constantis Ducis, aut fortissimi militis officium omitas: occursa pauentibus, retine cedentes: vbi plurimus labor, vnde aliqua spes, consilio, manu, voce, insignis hosti, conspicuus tuis. Ita Boleslaus Criuoustus in prælio cum Russis. Ita Vitoldus cum Tartaris ad Borysthenem, & cū Crucigeris apud Gruneualdum. Ita Alphonfus Magnus contra Sfortiam apud Caietam & Beneuentum, Bucquoius ad Pragam. Dampierus ad Possonium, Gustauus ad Lipsiam, qui trepidantes suos milites, acieq; iam cedentes, non modo retinuerunt sua constantia, sed & victorias obtinuerunt sua solertia, militum fortitudine. Eapropter Imperator prouidus, sub ea cautela publico debet Marte configere, vt si quid pro varietate bellorum, vel conditionis humanæ, secus acciderit absq; graui detrimento liberet victos. Nam si vicini fuerint colles aut syluæ, si post terga munitio, si cæteris abscedentibus, fortissimi quique restiterint, se suosq; seruabunt, vt fecerunt iidem Turcæ, in pugna Varnensi cum Vladislao Rege Poloniæ, & ad Mohatzium cum Ludouico Rege Hungariæ: itemq; cum Campsongauro Sultano Ægypti in prælio apud Damascum, & cum eius successore Tumumbeio in pugna Memphitica, quos omnes recollectis iā ex fuga suis, & audaciam eis addentibus fortissimis quibusque, qui in subsidium fuerunt reseruati, deuicerunt & occiderunt. Sæpiusq; deinceps in bellis Hungaricis fusas acies suas, cum maximo damno Christianorum recollegerunt, & triūphantes de exuijs suis interemerunt. Nam nōnunquā exultantibus, prædæq; inhiantibus maius solet esse discrimen, quàm cum ex exhibita ferocia subito in formidinem commutantur.

Quicumque igitur euentus fuerit, colligendi sunt superstites, bello erigendi, adhortationibusq; congruis, & armorum instauratione refouendi. Qua in re dexterrimi habiti sunt, Franciscus I. Sfortia, Robertus Rex Neapolitanus & Alfonsus II. eius filius, tum alij plurimi nominati Duces Italiæ, quibus addam & Michaëlem Regulum Mysiæ. Hi siquidē & nouos delectus, nouaq; auxilia, subito post cladem acceptam, conquirere sciebant; & quod amplius prodest, captatis occasionib; in ipsos victores, per occultas insidias, & superuentus inopinatos, impetus faciebant, atque ita audaciā in militibus reparabant. Neque enim tali in casu oportunitas deerit, cū pro felicitate superbius & in cautius mentes efferantur humanæ. Et ad hunc modū Martius Romanus exercitū Carthaginensium deleuit, quod duob; Scipionib; extinctis, ipsorumq; exercitu profligato, copias quæ apud Martium residuæ erant, minus æstimarent: qui negligentia ipsorum cognita, ipsos subito adgressus obtruit. Videre siquidem est, nihil tam facile sibi effectum dari, quàm id quod hostis non credat accidere posse: sæpissimè etenim euenire solet, homines inde potissimum offendi, vnde minus timent. Pulchrè T. Liuius Asdrubalem in pugna aduersa, officio optimi Ducis fungentem describit. *Ille, inquit, pugnantes hortando, pariterq; obeundo pericula sustinuit: ille fessos abnuentesque tædio & labore nunc precando, nunc castigando accendit: ille fugientes reuocauit, omissamq; pugnam aliquot locis restituit.* Similia & Tacitus de Antonio. Nullum in illa trepidatione Antonius constantis Ducis, vel fortissimi militis officium omisit; occurre pauentibus, retinere cedentes, vbi plurimus labor, vnde aliqua spes, consilio, manu, voce, insignis hosti, conspicuus suis, eò postremò ardoris prouectus est, vt vexillarium fugientem hasta transuerberaret: mox raptum vexillum in hostem vertit. Idem fecit Constantinus Ostrogius in pugna cum Scythis ad Caniouiam, Idem Sigismundus Batoreus in pugna cum Turcis ad Themeluariam. Idem mulci alij Duces.

Sed

Sed maximum remedium, punire fugientes: ita Camillus ad expugnandum Veios progressus, inquit Liuius. *Omniū primū in eos, qui à Veis in illo pauore fugerant, more militari animaduertit; effecitq; ne hostis maximè timendus militi esset.* Ideo Scipio Numantinus sæpius dicere solitus erat, quòd Duces indulgentes, & coniuentes militibus suis, vtilēs maximè sunt hosti: animaduertentes autem in locordiam & crimina illorū, vtilēs Reipublicæ: quia indulgentes fiunt cōtemptibiles, sæueri verò obedientem, semper militem habent, & possunt vbique absque mora defendere patriam. Nam sicut medicina quæ amara est, maximè proficua fit ægroto; sic & regimen seuerius paulò vtilius Reipublicæ.

C A P V T . . . X V I I .

De Insidijs locandis.

Qui aut corporis vires absque ingenij consilio, aut consilium absque viribus probant, falluntur maximo opere, & nec hilum proficiunt. Nimirum omīssa prudentia, nihil sapienti calliditate consulitur; viribus deficientibus, nihil rectè consultum proficitur. Vtroque coniuncto non modo repelles aduersarium, sed & desideratam referes ex illo victoriam. Vt enim sublato gubernatore, inquit Polybius, nauis vniuersa cum ipsis vectoribus in potestatem venit: sic vbi in bello hostium copiarum Ducem astu & consilio circumueneris, eodem non raro etiam vniuersum exercitum in tuam redegeris potestatem. Ita Alexander sagacitate ingenij vsus, ex Epirotis aduersus Illirios collocata in insidijs manu, quosdam ex suis habitu Illiriorum instruxit, & iussit vastare suam, hoc est Epiroticam regionem: quod cum Illyrij viderent fieri, ipsi passim prædari cæperunt, eo securius, quòd præcedentes veluti pro exploratoribus habebāt; à quibus ex industria in loca iniqua deducti, cæsi fugatiq; sunt. Le-

ptenes quoque Syracusanus aduersus Carthagenenses, vastari suos agros, & incendi villas, castellaq; quædam imperauit. Carthagenenses à suis id fieri rati, & ipsi tanquam in adiutorium exierunt, exceptiq; ab insidiatoribus fusi sunt.

Imperatis itaque, cibum capientibus, in itinere lassis, equos suos pascentibus, ac nihil tale suspicantibus, superuentus assolet fieri, insidiæq; negligentibus locantur; quæ & nobis vitendæ sunt, & hosti in eiusmodi occasionibus pernices inferenda. Hoc enim casu oppressis, nec virtus potest, nec multitudo prodesse: quia qui in acie publica vincitur pugna, licet & ibi ars plurimum profit, tamen ad defensionem suam potest accusare fortunam, vt ad Cannas Consul Romanus ab Hannibale victus. Qui vero superuentus & subseffas insidias passus est, Culpam suam non potest excusare, quia hoc euitare potuit, & per speculatores idoneos ante cognoscere. Quapropter multi, si per syluas ituri sunt, præmittunt qui abrupta vel angusta occupent loca, ne ibidè ab aduersarijs patiantur insidias: de qua re totus plenus est Curtius in rebus gestis Alexandri Magni. Et rursus post se præcisis arboribus vias claudunt, quas compedes vocant, vt aduersarijs facultatem adimant persequendi. Ita consueuerat facere Valachiæ Palatinus Stephanus cum bellum aduersus Mathiam Regem Hungariæ gereret. Ita nostra ætate Michaël Mysiæ vltraalpinæ Regulus, cum bello Transylvaniæ Principem Sigismundum Batorem persequeretur, mōtesq; illos præruptos Sicolorum cum exercitu toties huc atque illuc transiret, quos etiam à parte Turcica (nam & hos vnà bello laceffebat) arboribus præcisis occludebat, ne dum hic cum Germanis atque Transylvanis rem haberet, a tergo à barbaris inopinatò inuaderetur. Nam qui præcedit, oportunis vallibus, vel syluosis montibus, quasi post se relinquit insidias, in quas cum inciderit inimicus, recurrit ipse & adiuuat suos.

Et quia vtrique penè in itinere ad subseffas communis

occa-

occafio eft, ideo qui fequitur, auerfis femitis, longè antè deftinat expeditos, & præcedendo aduerfarium arcet à tranfitu, vt deceptum à tergo & à fronte concludat. Et ita Demetrius Viſniouiecius, Scytas Tauricanos per ſyluam nigram vulgò dictam in Pidoliam incurrere conantes, ad Bohum fluuium, temporibus Sigifmundi Auguſti Regis, concluserat & conciderat. Quia in transfretatione fluuiorum, qui præcedit, illam partem tentat opprimere, quæ præmiſſa tranſierat, dum reliqui alueo ſeparantur. Qui autem feſtinato itinere ſequitur, illos qui non potuerunt tranſire conturbat, vt fecit Michaël Glinſcius, dum Scythas fluuium Słuckam tranſire conantes aſſecutus eſſet, quorum paulò ante viginti quinque millia ad Lidam in Lituania proſtigauerat, inter paludes & loca vliginoſa deductos, temporibus Alexandri Regis. Non ſolùm itaque in obſidionibus, qui vult aut collocare aut euitare inſidias, ſed in vniuerſo genere bellorum, ſuper omnia ducitur hoſtium conſuetudinem explorare diligenter ac noſſe. Oportunitas enim inſidiarum aliter non poteſt inueniri, niſi ſcias quibus horis aduerſarius, à laboris intentione diſcedat, quibus reddatur incautior : interdum medio diē, interdum ad vesp̄um, ſæpè nocte, aliquando eo tempore quo ſumitur cibus, cum vtriuſque partis milites ad requiem aut curanda corpora diſperguntur.

Accidiſſe etiam non rarò conſtat, vt inſidiæ vel ab aui- bus, vel à puluere proderentur, ſiquidem fieri nequit, quin hoſtis ad te pergens puluerem excitet maximum, vnde quidem ipſius aduentum ſuſpicari poſſis. Sic Duces inſidias ominatos eſſe aliquoties compertum eſt, quòd inde, quā ipſis pergendum fuerat, palumbas aliasue aues, quæ gregatim volare ſolent, emigrare, attamen nec auolare, nec redire, ſed per gyros eandem ſemper partem peragere conſpexerant; indeq; exploratoribus miſſis inſidias non ſaltem declinaſſe, ſed hoſti cladem, quam ille molitus fuerat, intuliſſe.

CAPVT XVIII.

De officio Ducis pugna dirempta.

Imperator pugna dirempta si cladem in suis accepit, curet refarcire damnum, vt supra monuimus: si verò victoria potitus est *Primo*, curet castra hostium occupare. Cæsar nullum vnquam hostem fudit, inquit Suetonius, quin castris quoque exueret. Ita nullum spatium perteritis dabat Pompeius, nondum expugnatis hostium castris; nec veram victoriam obtineri, nec Ducem vllum cognomen Imperatoris mereri aiebat. Quamdiu enim hostis vires suas post cladem reparare potest, nondū est victus; quod illi factu facillimum erit, si fugientes propinqua castra habeant pro receptu. Amurathes itaque Secundus, occiso Vladislao Rege Poloniæ apud Varnā, etsi cladem ingentem ipse quoque passus esset: abire tamen cum saucijs inde noluit, donec post triduum castra nostrorum expugnasset, vt plena de periuro Rege victoria potiretur.

Secundo Victis instet, & territōs prosequatur, alioquin victos resumere animos, & ipsos non raro superare victores multoties experientia docuit, præsertim si hoste omisso spolia consecretantur, vt accidit Mansfeldio, qui venientes suppetiatum Ferdinando II. Polonos die eadem qua se venisse Imperatori significauerant, nocturno tempore aggressus prope Viennam dissipauerat; sed quia diffugientes in vicinam syluam territōsque non erat persecutus, ideo illi redeuntem ad suos versus Cremsum, sequenti die, resumptis animis circa meridiem, victorē clade ingenti affecerunt, & quinquaginta duo signa cum Duce Anhaltino capta, Viennam miserunt. Hinc Lycurgus olim noluit interfectorum hostium cadauera spoliari, ne prædæ incumbentes milites, pugnam negligerent, quod Germanicos exercitus toties in Hungaria clade ingenti

ingenti affecit. Et Hollandi Lyra occupata, dum temere ad prædam se conuertunt, porta vna quæ in hostium potestate adhuc erat neglecta, non sine clade eieciti fuerunt. *Victor itaque non est, qui victoria non insistit*, inquit Stobæus, *nec eam gloriam quam iactat exitu belli coronat.*

Tertio. Hoste in acie profligato, statim ad primariam urbem cum victore exercitu accedat. Ita Ioannes Austriacus profligatis atque cæsis ad Gemblacum confœderatorum Belgarum copijs, statim exercitum ad urbem promouit (quam hostes belli sedem statuerant, ac multorum mensium commeatu, armisq; ac telis, ac cætero belli instrumento communierant) eamq; clade suorum perterritam in potestatem statim recepit. Quod si Hannibal profligatis, aut verius cæsis ad Trasymenum lacum Romanis, statim Romam petiisset, quantum intra diem inquit Florus, in Capitolio epulari potuisset. Quamdiu verò præcipua vrbs salua est, licet minora fortè oppida occupentur, tantum abest vt de salute conclamatum sit, vt non raro etiam illa quæ perdita sunt, iterum facile recuperentur. Ideo prudentiores quibus cum Repub. aliqua bellum est, statim urbem principem petunt; quod Carolus V. cum Senenses & Florentinos oppugnaret egisse docent Historiæ. Idem ante Iulius Cæsar fecerat, cum desertam à Pompeio urbem relictis omnibus alijs oppidis statim inuasisset. Ioannes Andeganensis è contra, in genti prælio victor, minora prius oppida expugnare maluit, quàm regni caput petere Neapolim, interim victus & penè profligatus Ferdinandus respirauit: & cum nouis iterum viribus collectum exercitum firmasset, Gallos non vicit tantum, sed etiam penitus regno eiecit. *Virgenda itaque est fortuna, benè capta vltiore conatu promouenda, ne ubi virtuti blanditur otium, labatur è manu inchoatum feliciter negotium*, inquit Basilius Magnus.

Quarto. Vnumquemque ex Ducibus, & primarijs militibus, laudibus & præconijs publicè adornet; suam cui-

que virtutem, ſuum facinus, grandibus verbis plenisq; gloriarum, magnificè repræſentet. Deinde præmijs quantum poteſt remuneret, Martialemq; illum vigorem in eis excitet. Denique literis ad Regem ſuum, aut Rempublicam ſcriptis, eorum fortitudinē, & animum in pericula promptum commendet; & ad maiores ordines prouehat. Ita faciebat Zamofcius, & mirum quam ſibi omnium amorem in Regno conciliauerat.

Quinto. In eos quorū notabilis fuerit ignauia in exemplum cæteris, diligenter animaduertat. Sic enim in poſterum peccare metuent, ſed fortiter faciendo gloriam ambicioſè adfectabunt, vt næuum ignominix abolere poſſint. Boleſlaus Chrobrus deſertus in prælio Halicienſi à quodam ex Palatinis ſuis, reuerſus domum, miſerat illi pellem leporinam, penſum lanæ, & reſtem canabeum; eo quod inſtar leporis ad fugiendum promptus, non eſſet dignus virili dignitate, ſed officio muliebri ad nenda fila compoſitus; quodque è pugna Rege ſuo relicto in periculis diſceſſiſſet, dignus furca putabatur. Palatinus donis talibus à Rege ſibi miſſis receptis, indignū ſe vita putauit, & ad campanile vicinum abiens, reſte ſeſe ſuspendit. Hinc apud Macedones erat in more poſitum, vt qui in acie ſe minus fortiter geſſiſſent, eorum eos ignominix gratia capifthro cingeretur. Valſteinius verò tribunos qui prælio Lutzenſi diffugerant, omnes ſuſpendio necauit.

Sexto. Deo exercituum (idq; inprimis) & victoriarum largitori ſacrificia & grates, ac pompas exhibeat, prout temporis feret occaſio. Conſtantineſtius quod Grægæ religionis eſſet, nec calleret litteras Latinas, obtenta illa celebri Orſenſi victoria, poſtquā Poloni hymnum Te Deum laudamus decantaſſent, ille etiam Miſſam de SS. TRINITATE lingua Sclauonica, propter Roxolanos ſuos ſolenniter cantari iuſſit.

Septimo. Interfectos honeſtè ſepeliat, vt fecit Chodkieuici-

uicius post victoriam Kircholmensem in Liuonia, qui hostium præcipuis sumptu ingenti parentauit, & funus toto exercitu deducente præsentia sua cohonestauit, licet illi fuerint aduersæ religionis. Quo sanè facto mirificè sibi hostes obligauerat.

Octauo. Captiuos non interficiat, sed recognoscat & humaniter tractet, videlicet illustriores, & vulneratos in prælio, quos publico ære curare iubeat: Sin autem pecunijs ad magnos publicosq; sumptus indigeat, æquis diuendere precijs poterit, aut commutare pro suæ gentis captiuis. Ita Scythæ nobiscum, ita Turcæ agunt. Hollandi verò vnus mensis stipendio pro eis accepto liberos faciunt.

Nono. Si pugna succubuit, cladem acceptam quanto citius resarcire curet: & è suis militibus captiuos omni conatur liberare studeat, vulneratosq; in prælio, tãto magis quàm hostes publico ære sanari iubeat. Isabella Princeps Belgarum amissos nauali prælio apud Bergosanam milites, clenodijs suis oppignoratis, liberari curauit à Batauis, summamque ingentem quamuis pro gregarijs inimico miserat.

Decimo. Non solum præcipuos ex suis, aut singulos remuneret, qui se strenuè in pugna gesserunt, sed toti exercitui periculorum fructum ex præda impartiri debet: sic enim spe prædæ paratiores promptioresq; ad pericula erunt militum animi. Romani ex æquo suis militibus prædam partiebantur. Hoc modo faciunt Cosachi Zaporosenses, etiam illis qui ad diuersa munera fuerunt in castris relictæ, partem æquam reseruando.

Vndecimo. Rebus benè ac feliciter gestis, superatisq; periculis, conuiuia, epulæ & feriæ militibus concedantur, vt suauem bello confecto victoriam esse intuentes, viam rursus ad eam, ardua quæquæ fortiter tolerando sibi faciant. Ita Alexander M. Babilonia subacta, occupataq; Persopoli. Ita triumphatores Romani. Ita Bizantinorum Impp Duces, & inter eos Belissarius & Narsetes, ille Vandalis, hic

Gottis superatis. Ita nostra demum memoria Sigismundus III. expugnato Smolensco, qui repurgata cadaueribus vrbe publicum suis militibus epulum præbuit, & ipse cum eis mensæ assedit; tum more patrio, collaudatis laboribus & fortitudine ipsorum, apprecatisq; votis vltioribus, erectus in pedes, capite aperto, in sanitatem ipsorum, poculum exhausit.

Decimo ac vltimo. Viētis clementiam atque omnem humanitatem exhibeat: neque in omnibus rebus, quorumlibet hostium possessiones vexari ac diripi sinat, sed aliquando quidem patiatur, aliquando verò prohibeat; quibus eos sibi amicos efficere poterit. Nam ea demum victoria, & apud Deum, & apud homines, maximū gloriæ, minimū inuidiæ habitura est, quæ plurimum erga hostes humanitatis habet.

C A P V T X I X.

De Præda ex hostibus capta.

EXpugnatae vrbis præda ad milites, deditæ ad Ducem apud Romanos pertinebat, quorum prudentiam lubet hic laudare simul & admirari; cum enim scirent omnium penè animos communi naturæ vitio, in prædam magis inclinari, quàm in pugnam: nè assignatas sibi stationes vlli defererent (quod non vnum Principem & regno & vita exuit) prædam vniuersam in medium proferre, ante, nihil se auersuros, iureiurando obstricti, omnes iuebantur. Æquis deinde illa portionibus inter omnes diuidebatur: nec negligebantur, quos aut ægros iniqua valetudo, aut mandatum Imperatoris alibi detinebat; multo minus illi qui in subsidij vel castris iussi erant manere. Quod soli nunc, vti dixi, Cosachi nostri Zaporosenses obseruant; sed Poloni reliqui, calones in id plurimos agasonesq; habent, qui etiam in ipso ardo-

ardore belli, pessima consuetudine, pugnantibus sese inter-
miscent cupiditate prædæ, & sic multoties partim à suis,
partim ab hostibus conculcantur equis, aut ceduntur; vel e-
tiam à peditibus in spolia ruentibus, malè excipiuntur, qui si-
bi pro susceptis periculis omnem prædā deberi existimant.
Nam equitibus, præcipuè grauioris armaturæ, & pudor
prædam attingere, & capitis pœna, si ad spolianda cadaue-
ra, equo defiliisset. Nihilominus huius sæculi bellis pleri-
que tam eorum qui vincunt, quàm qui vincuntur, ad inopi-
am rediguntur certissimò; nec quemquam belligerando à
tot ætatibus suam patriam ditiozem fecisse vidimus præter
Gustauum Regem Sueciæ, qui solus in occupandis prouin-
cijs leges antiquorum seruare intendebat, & quidquid a-
sportari poterat, in Sueciam ablegabat: Fecerunt hoc & Ba-
tani aliquoties classe Hispanica expugnata, prouincijsq; tam
in nouo Orbe, quam in Belgio acquisitis, vt omnia publico
ærario cederent, quæcunque publica in occupatis vrbibus
censebantur. Reliqui omnes in Europa dum bella inter se
gerunt, à parte vtraque depauperantur: siquidem si hic pro-
uincijs spolietur, alter opibus exuitur, quod quidem anti-
quitus aliter, atque victori semper aliquid opum & diuitia-
rum accedebat. Hoc verò inde est, quòd prædæ apud nos,
non ea quæ apud veteres ratio habeatur, sed ea omnis militi-
bus cedat. Vnde duo incommoda enasci solent grauissima:
Vnum nimirum, quod & nostras prouincias bello destrui-
mus, & hostiles annihilamus. Alterum, quòd inde miles
prædam potius, quàm ordines suos, disciplinamq; milita-
rem spectare discat. Multa siquidem exempla sunt in
promptu, vbi prædæ cupiditate victores qui iam erant, vi-
ctoriâ excidère. Romani itaque tanquam authores huius
disciplinæ, vtrique incommodo satis prospexerunt, volu-
eruntq; omnem prædam in ærarium deferri, atque inde e-
am prout visum erat distribui: eamq; ob rem quæstiores suos
in exercitu habebant, penes quos præda omnis, atque subsi-

dia deponenda erant, inde conſul eam tam militum ſtipendijs, quàm ægris, faucijs, alijsq; egentibus elargiebatur. Quæ quidem res milites accendebat, vt pro victoria potius, quàm præda pugnarent, quæ proſtigato hoſte viritim, prout quiſque meritus eſſet diſtribuebatur. Hinc etiam opes illæ Romanorum publico accreſcebant, quas Conſules, dum triumphos agerent in ærarium conferebant. Tu fac ſimiliter, ſi & victoria potiri, & rebus tuis exhaustis mederi exoptas. Quod autem ſemel militi promiſeris, caue exſoluas fideliter, ne videlicet aut periculum aliquod, aut detrimentum ſubeas. Marcus ſiquidem Poſthumius Religiensis, Conſul exiſtens, iuerat in Hetruriam, vbi dum arctè ciuitatem quandam obſideret, nec potuiſſet expugnare, proclamari iuſſit, prædam omnem militum fore (nam ante hunc casum omnis præda ærario cedebat: poſtea autem expugnatæ urbium ad milites ſpectare cæpit) ſi vi facta, corona urbem expugnaffent. Pertæſi laborum milites in caſtris, dum liberalitatem conſulis inaudiuiſſent, accenſi ſpe prædæ, multo ſanguine urbem expugnarunt: cum interim ſignum datur à Conſule, ne prædam attingerent, ſed eam ad Quæſtores deferrent. Quapropter videntes milites illuſos ſe eſſe, arreptis ſaxis Conſulem primùm obruerunt, tandem omnes habitatores interfecerunt; prædamq; omnem inter ſe diripuerunt. ne quidquam reclamantibus & ſeditionem ſedare volentibus tribunis, & cohortium præfectis.

C A P V T X X.

De Captiuis humaniter excipiendis.

IN captiuos multi olim ſæuiunt, & hodie ſæuiunt non nulli, ſed indecore, more barbarorum. Multos etenim Epidamnios à Corcyræis interfectos ſcribit Thucydides; & quinque captiuorum millia ab Hannibale occiſa fuiſſe diſci-

mus

mus à Dione. Ioannes quoque Tarnouius expugnato in Moscouia Starodubo, multa captiuorum millia occidere iussit, eò quòd duplo exercitum Polonorum superarent, omnesque ad gerenda arma habiles essent. Ego illos Imperatores laudo, qui quos occidere poterant, maluerunt seruare: ita Nicolaus Firlei bello Prussico cum Crucigeris, captiuos quia infiniti erant, statim sacramento obstrictos, ne intra decennium contra Polonos arma sumerent, dimittebat. Ita Chodkieuicius in Liuania bello Sudermanico. Ita Koniecpolskius bello Suecico cum Gustavo Rege; ita denique Serenissimus Vladislaus IV. bello Moscouitico ad Smolenscum, ubi licet multò plures captiui fuissent, quàm noster exercitus, nil quidquam attamen crudele statui volebat in ipsos, imò ægrotos, omnes, qui quinque millia superabant, ne frigoris intensitate perirent, ex castris hostilibus in urbem transportari & curari permisit.

Durante itaque bello Imperator captiuos non interficiat, vt fecit Turcarum Imp. Osmanus, sed cogitet incertos esse ac mutabiles fortunæ casus: diuinum quoque Numen ferocibus sæpè succensere. *Natura enim, inquit Nicetas, iniuriam facit, & humanitatis legem, violat, qui ultra victoriam, & superatis hostibus iracundia indulget* Scanderbegus inclytus ille Turcicarum viarum oppugnator adeò humanus fuit, vt barbaros illos in prælio captos, mensæ suæ admoueret, attentus semper ad incertas & mutabiles fortunæ reuolutiones. Quid dicam de Philippo Maria Insubrium Duce, qui Alphonsum Magnum cum tribus fratribus captum regali pompa ac si hospitem excepit? Quid de Sigismundo III. qui Maximilianum Austriam, ad Biciniam in Silesia per Zamoscium captum, vt fratrem, in honore ac rerum omnium affluentia Crasnostauix habuit? qui Magno Moscorum Duci Demetrio Suiscio, per Zolkieuum in triumphum ducto, honorificentissimè assurrexit, benignè compellauit, ac tandem post annos plures in custodia defuncto, pompa regali sepul-

sepulturam parare iussit. Sed & Stephanus Rex, Polocia expugnata, captiuos Moschorum proceres, ultra merita ipsorum (nimium siquidem in captiuos crudeles sunt Moscovitæ) honestè habuit. gregarios verò & urbicam plebem, quoquo abire placeret, libere dimisit: additis insuper, qui ab iniurijs insultantium eos defenderent

Verum enim uero quia propter dubium præliorum discrimen, metu conturbatur sæpissimè exercitus, ea propter Imperator si quos captiuos habet ex velitatione corpore præstantes, animoq; ac virtute generosos, militibus non ostendat; sed eos aut è vestigio interfici iubeat, si barbari sunt, examinatos in secreto, aut vinctos ijs. quibus hæc mandata cura erit, diligenter adseruandos tradat, ne à multis conspiciantur. Si verò imbelles, & demisso abiectoq; animo sint ante militum suorum oculos constituat, increpitos prius perterritosq; minaci & toruo vultu suo, & quam ignaui sint & humiles, nulliusq; precij, ipse per concionem demonstret.

C A P V T X X I .

De Interfectis honestè sepeliendis.

Imperator siue vicerit, siue victus fuerit, militū occisorum funebribus & exequiis prospiciat, neque incuriam, aut occasionis, aut temporis, aut loci, aut metus nomine prætexat. Nusquam non laudatissimi hac in parte Græci atque Romani fuerunt, qui clade etiam accepta, solerti sanè studio curabant ut interfectorum corpora humarent vel comburerent. Et Nicias Atheniensium Imperator, omnem exercitum subsistere iussit, ut duos tantum peremptos milites sepulturæ mandaret. Cimon quoque Miltiadis filius, se captiuum exhibere non dubitauit, ut pater sepulturæ mandaretur. Sed & Vlysis generosa mansuetudo erga defunctum Aiace, licet hostem acerrimum in adiuuando Teucro commendatur,

datur, qui cadauer Aiakis, prohibentibus id Agamemnone & Menelao sepelire, & vltimum officium amico præstare volebat. Sancta enim hæc & religiosa circa eos, qui sic abierunt pietas est, eiusq; necessaria inter superstites demonstratio. Et enim vnusquisque militum sibi ante oculos ponit, eodẽ modo se, si forte in bello occiderit, ludibrio despectuique fore, & insepultum se remansurum prælagiẽs, mortis honore carere, non ferendam putat contumeliam. Quare Turcæ etiam atque Scythæ occisa suorum corpora, maximo conatu ex acie asportare curant, ne ab hostibus ludibrio habeantur, & vel sepulturæ ea mandant, vel accensis hostium villis concremant. Quodq; Philippum Macedonum Regem legimus, Atheniensibus ad Cherouiam profligatis, captiuos superstites remisisse, & bello consumptorum corpora sepulturæ tradidisse; hoc vidimus fecisse Chodkieuiciũ in Liuonia propè Rigam, cum insignem de Suecis apud Kircholmum victoriam obtinuisset. Sed fecit hoc & Stephanus Rex patrum nostrũ memoria captis Lukis in Moscouia, vbi præceperat, vt calones sepelirent hostes in expugnatione munitionis illius occisos, milites verò ad restitutionem arcis conuerterentur omnes. Zamoscus quoque in obsidione Plescouiensi, cum excurrentes Moschos cõplures interemisset, vltro ad obsessos misit, vt corpora occisorũ, vel in campo liberè sepelirent, vel intrà moenia vr̃bis inferrent. Quo audito qui in muris erant, laudibus hanc eius pietatem, Christianiq; animi sensum magnopere extollebãt. Apud maiores enim nostros, vix vllum olim militiæ tam solenne munus erat, quàm humandi suos.

C A P V T XXII.

De Recedendo ab hoste.

Quomodo ab hoste recedendum, si consilium pugnae displiceat, nullus vnquam Ducum scripsit, aut sine da-

no suo fecit. Nam disciplinæ bellicæ & exemplorum periti, nusquam maius periculum imminere testantur, quàm cū recedit aliquis ante congressum ex acie; aut superueniente aduersario castra sua retro mouet: quia tunc & suis fiduciam minuit, & inimicis addit audaciam. Verùm quia hoc sæpius necesse est euenire, vel vt commodiora loca occupentur, vel vt incommoda effugiantur, vel ne copiæ configere nolentes cogantur; ideo digestis omnibus, quæ ratio militaris experimentis & arte seruauit, quibus modis id tuto possit fieri declarandum esse breuiter.

Primum itaque curandum est, vt tui nesciant ideò te recedere, quia declinas inire conflictum, sed credant arte aliqua se ideo reuocari, vt ad oportuniorem locū inuiteretur hostis, vt facilius superetur: aut certè sequentibus aduersariis, secretiores collocentur insidiæ. Nam necesse est ad fugā parati sint, qui Ducem suum sentiunt desperare Chodkieuicius superuentus ab octodecem millibus Suecorum, periculosum existimans esse, aut in castris illis manere, vbi in coronam oppugnari posset, aut in aciem cum duobus millibus suorum prodire, cum quibus aduersario resistere erat impossibile, sparsit rumorem inter suos, Curlandiæ Ducem cum duobus millibus auxilio sibi venisse, sed substitisse ad muros Rigenses, quòd non auderet in castra sua venire, audita hostium tanta multitudine, ideò nescire est vt cum illo sese coniungere possit, retrocedendo parumper, ad quem iam miserat vt sibi obuiam veniret. Fictus erat rumor, nam Curlandus ne somniauerat quidē de suppetijs Polonis ferendis. Persuasit attamen suis Chodkieuicius, & spe animauit dispositisq; per aliquot ordines curribus, quibus nostri exercitus maximè abundant, tanquam è munitione aut vallo propugnando, vsque ad mœnia vrbs Rigensis, per duo miliaria Germanica retrocessit, & secus ripam Dunæ in securo suos collocauit, adiutus de nocte à ciuibus Rigensibus, qui ei & tormenta complura, & peditum cohortes aliquot suppeditarunt.

Secun-

Secundo, vitandum est ne hostes te retrocedere sentiant, & statim irruant, vt euenit Zolkieuius in Valachia, cum è campis Cetzorensibus versus Poloniam mouisset. Vt enim ex rumore Turcæ nostros abire cognouerunt, statim parte ab vna Dacos & Scythas immiserunt, ipsi parte ab altera cum tormentis bellicis impressionem fecerunt: atque ita retrocedentes nostros inter currus more Polonico dispositos, per octo continuos dies ac noctes vehementissimè oppugnarunt; atque demum insomnio atque assiduis vigilijs fractos, cum iam sedecem milliaria confecissent, & patriæ limiti vicini essent, perumperunt, & ex septem millibus, maiorem ferè partem cum ipso Duce trucidarunt Guilelmus quoque Orangius prima vice cum exercitu in Belgiū è Germania adueniens, cum aperto Marte configi cum Hispanis non potuisset, retrocedere ab hoste voluit, eo quòd superuentibus Duci Albano eum premere placuisset, trigesies itaque castra mutauit, nusquam tamen clanculo effugere Hispanos potuit, quòd ita diligenter tergo ipsius inhærerent, & ad extremum in Hanouia reliquum exercitus ipsius delegerent.

Tertio denique astu aliquo militari in retrocedendo vitandum, vt cum viribus non possis saltim ingenio aduersarium tuum superes. propterea plerique veterum Ducum, ante pedites suos equites posuerunt, cum abirent, vt discurrentes aduersarios videre non finerent, quando pedites abscedebant. Fecit hoc Liuianus magni nominis Dux, cū Insubribus parem se non videret. Fecit in Moscouia Lobfouicius Moscorum Dux, sed parum feliciter, cum ad Putiuliam, Polonis Demetrium Principem deducantibus, congreddi non auderet. Item, particulatim incipientes à primis, singulas acies subducebant, retroq; reuocabant, in gradu suo manentibus reliquis, quos sensim postea cessimq; ad illos iungebant, quos subduxerant. Ita Marchio de Pescara ad Manfredoniam, durantibus bellis inter Gallos &

Hispanos in Regno Neapolitano. Et primùm aliquanti exploratis itineribus, noctu cum exercitu recedebant, ut hostes die orto, cum intellexissent, non possent compræhendere præcedentes. Præterea levis armatura præmittebatur ad colles, à qua subito tuto reuocaretur exercitus: & si hostes insequi voluissent, à leui armatura, quæ antea occupauerat locum, additis equitibus fundebantur. Nihil enim periculosius existimatur, quàm si inconsultè insequentibus, ab his qui in subseffa fuerint, vel ante se parauerint, obuietur. Hoc enim tempus est, quo oportune collocantur insidiæ, quia aduersum fugientes, maior audacia & minor cura est: iam autem necessariò amplior securitas grauius solet habere discrimen. Iulius Cæsar hac in parte summus magister fuit, qui sæpius castra mouendo, ita exercitum bene ordinabat, ut nusquam damnum ei inferre hostis potuisset, licet & à tergo & à lateribus ei semper immineret; præsertim cum bellum cum Pompeio, Petreio, & Afranio, Ducibus veteranis gereret. Vnde ad Gergouiam audacius milites suos succedentes, grauitè repræhendit, quòd plus se, quàm Imperatorem de victoria, atque exitu rerum sentire existimarent.

Nonnulli, multis accensis ignibus recedebant, quia sic adhuc consistere exercitum hostes existimant. Ita Tuoruius ad Medzibossiam in Podolia, quòd Scytharum multitudini impar fuisset, & non nisi superuentibus eos aggredi placeret. Ita Aurangius in Belgio, cum ab obsidione ciuitatis Leodiensis, recessisset, datis insuper tergiductoribus in mandatis, ut suburbanam ædem, D. Laurentio dicatam amburerent.

Etiam nonnulli ex antiquis fuere, qui hisce angustiis circumuenti, dum se subducere securè non potuissent, fossam post se ducerent, eam palea lignisq; replerent, atque ignem iniicerent, hosteq; ea ratione retardato, flumen traijcerent, aut sese cum toto exercitu occultè subducerent. Vti nuper rimò

rimè Dux Suecorum Bannerus fecit, qui ad Albim prope Torgam oppidum castra sua communierat: superuenientibus autem Cæsarianis, quòd ad resistendum se imparem videret, igne sic infossis & vallo excitato, fluuium superauit, & non sentientibus aduersarijs ex Turingia in Pomeraniam abiuit. Timori enim nulla munimenta satis sunt, proinde ingenio quærenda ad euadendum via, vt te saluare possis.

C A P V T XXIII.

De effugiendo, cum securè recedere non poteris.

PRobatū toties experientia, nunquam sine aliquo discrimine reuocari exercitū, ac receptui signū dari, vt capite superiori dixim⁹, quamuis id scitè, & militariter peragatur. Iam autem victoria magno emptā non est victoria, interdū enim felicius est non assequi, quā nimio mercari quod ambis. Quid si certum periculum & interitum tuum vides? clanculum fuge, & rebus te melioribus serua: fecerunt hoc maximi quique Duces, neque tu erubescere, quia miles fugiens iterum pugnabit vt Cicero dixit, & tu poteris cum meliori occasione vti fortuna tua. Quintus Sertorius pulsus acie à Q. Metello Pio, ne fugā quidem sibi tutam arbitratus, milites dispersos abire iussit, admonitos in quem locum vellet conuenire quibus deinde fuit nimiū Romanis grauis ac molestus. Prout & Bassa ille Turcicus, qui anno sequenti post insignē illam victoriam Naupaetensem non erat ausus cum triremibus Christianorū congregari, sed explosis simul omnibus tormentis bellicis, triremes suas retro remibus egit, cum Christianorum oculos fumus impediuisset, & sic effugit. Postea dispersis confœderatis, & non valentibus resistere solis Venetis, omnia maria infestauit.

Triphon verò Syriæ olim Rex, victus ab Antiocho acie, per totum iter fugiens, pecuniam sparsit, atque ita sectantes

equites moratus, ad munitionem effugit. Quod ipsum etiam faciens Seriffus, à Rege Marochitano profligatus, insequentium Arabum manus euasit, & restaurato exercitu deinceps vtrumque regnum tam Fessæ, quam Marochi solus possedit.

Hannibal quoque astuum militarium & dolorum vaserrimus fabricator, exercitum in Apuliam retracturus, noctu castra mouit. P. Æmilio & Varrone prope ipsum castrametantibus, quod efficiens extinguere lumina iussit, & quædam impedimenta è tentorijs auferri noluit, quo vel hostis discessum non suspicaretur, vel suspicans aliquem subesse dolum timeret, haud dubium est.

Dux Albanus pugna ad Gemingam in Frisia Orientali cum Ludouico Nassouio commissa, cum hostem castris exuisset, & per Amisiam fluuium fugientes, victor infectaretur, Nassouius vt Albani manus euadere posset, arma ac vestes, quas illo ipso induerat die, fugiens deposuit, vt pro mortuo habitus, quæri desineret.

Philippus verò in Epiro victus, ne fugientem eum Romani premerent, indicias ad sepeliendum eos qui cæsi erant impetrauit, & ob id remissioribus custodibus clam euasit. Simile quid fecit Gustauus in Prussia, arctè à Polonis ad Derfauiam pressus, misit qui tractarent de pace, ipse verò interim cum exercitu nocte illuni Vistulam superauit, & securè euasit. Secutus forsan consilium Lisandri Lacedæmonij, qui dicere solebat, *ubi non potest pellis leonina, succedat vulpina*. Et quod Carbo dicere solebat de L. Sylla, quòd in eius animo nidum haberet leo & vulpes, id nos de Gustauo Rege dicere possumus, quòd & vir fortis erat, & nusquam sine astu aliquo militari arma in manus sumebat. Nam & populorum genios, & locorum situs, & temporis oportunitates exactè cognoscebat, atque illis pro sua cōmoditate vti sciebat.

Current ergo Duces, vt vbi viribus efficere non possunt quod intendunt, id ingenij solertia consequantur: & vbi ho-

sti resistere ob certas causas non audent, temerè in periculū suos nō adducant; sed vel recedant in loca securiora, fortiter & per subseffa repugnando, vel vbi honestè & cum damno aduersarij resistere non poterunt, ingeniosè effugiendo. Sēper autem curent, vt seruatīs exactè ordinibus agmen procedat, atque hoc quidem noctu maximè. Nam vt Cyrus apud Xenophontem inquit. *Turbari per noctem longè maius negotium est, quàm interdiu, & emendatione difficilius, cuius rei gratia, tum taciturnitas exercenda est, tum ordo custodiendus.* Id quod suo malo & pessimo publico didicit Metellus, qui magnam stragem Romanis attulit, quòd noctu agmine confuso incideret: de quo Sallustius. *Ipse (Iugurtha) cum selectis equitibus Metellum sequitur: nocturnis & auis itineribus ignoratus, Romanos palentes repente aggreditur, eorum plerique inermes cadunt, multi capiuntur, nemo omnium intactus profugit.* Quapropter Cosachi Zaporosenses & noctu & interdiu maximum silentium in castris suis seruant, & ita ordines suos diligenter custodiunt, vt extincta passim disciplina militari, soli videantur veterum Romanorum belli scientiam callere. Vnde & in superuentibus de nocte faciendis sunt boni, & in effugiendo semper cauti.

CAPVT XXIV.

De cladibus acceptis sarcieendis.

HAbet has vices conditio mortalium, vt aduersa ex secundis, secunda ex aduersis nascantur. Mors communis & victum sæpe erigit, & affligit victorem. Infirmi itaque ingenij est lapsu aliquo, summæ rei diffidere, cum exiguis momentis subito inclinentur omnia quæ in bello geruntur. Etsi igitur vniuersus fuerit cæsus exercitus, incolumis modò sit saluusq; Imperator, multas sæpe fortuna occasiones largitur, damna eiusmodi casibus accepta, resarciendi

endi ac vires reparandi. Hinc prouerbiū. *Facile exercitum inuenit miser Imperator.* Igitur spem non projiciat, nec omnino turbetur, sed occasionem obseruet, detrimentis & cladibus acceptis sarcieendis oportunam, si fugato suo exercitu sospitum animos solari ac reficere voluerit. Sæpe numero enim re benè gesta incautiores ac remissiores fiunt milites, & aduersarias, quamuis in proximo sint despiciendo, circa res suas negligentes, ac nimium securi esse solent. Vnde fit, vt res secundæ interdū magis, quàm aduersæ noceant. Qui enim aliquando succubuit, pericula in quæ iam incidit, alias cauere didicit; at qui nullam adhuc calamitatem pertulit, nō benè res custodire prosperas edoctus est. Nec si superior euadat, tantam adhibebit prudentiam pericula cauere negligens, quantam adhibuerat, vt hostes in cautos & segnes opprimeret. Itaque tempestius metus, prudens securitas est: nimius verò contemptus, temeritas insidijs facile excipienda. Cum autem fortuna per vias inflexas & incognitas incedat, idcirco nemo frustra desperare debet, sed semper meliora sperare, in bellis præsertim, vbi vis & potestas fortunæ maior apparet. Siquidem si multi exercitus vna sola voce, vel falsa quadam specie, in fugam fuerunt cōiecti; multi cum victi essent, denuo victores extiterunt. Michaël Palatinus Moldauix, toties à Rudolpho Imp. & Sigismundo Batoreo victus in Transyluania, à Turcis in Bosna, à Polonis in Valachia, nusquam tamen animum despondit, sed semper audacior consurrexit, & clades acceptas ita vlcisci conabatur, vt non semel fuerit visus victor, & prouinciarum circumiacentium Dominus. Sic robur animi incredibile laudatur in Vitoldo Lituaniæ Duce, qui cum Scythijs Crucigeris, tam Liuonensibus, quàm Borussicis; cum Russis & Ducibus Moscouiæ, bella assidua gerens, toties acie pulsus, prouincia expulsus, carceri teterrimo inclusus, indefatigabili tamen animo semper iras reassumpsit, bellum vltro intulit, & clades acceptas breuissimo temporis spacio sarcieuit.

uit. Idem scribit de Vladislao Loethico Rege Poloniæ Martinus Cromerus. Idem de Carolo Audace, qui sub eo septem annis militauit Philippus Cominæus. Idem de Cazimiro Iagielonide, filiorum eius præceptor Ioannes Dlugossus, quem accepta ad Choiniciam clades adeo non fregit, ut magis animaret non in Crucigeros solummodo Pruthenicos, sed in Liuonienses etiam, in Moscos, Scythas, Valachos, Hungaros & Bohemos. Quid de Ludouico Nassouio, Mauritio, & Henrico fratre illius, quid de Bernardo Vaimariensi, Gabriele Bethlenio, & Duce Masfeldio dicam? *Viles illi sunt, qui fortunæ succumbentes, inquit Zeuecotius, calamitatem suam deplorare malunt, quàm ulcisci.* Egregius & nomen istud meretur Imperator, non tam accepti mali meminit quam ei studet mederi. Apud Tacitum lego, *fortes & strenuos etiam contra fortunam insistere spei, timidos & ignauos ad desperationem formidine properare.* Certissimum itaque magni animi indicium est, fortunæ non cedere, prospera non extolli. Bene Vegetius. *Fortior creditur quem aduersa non frangunt.* Qualis erat Ferdinandus II. qui à Friderico Palatino Rheno, Regno Bohemiæ exutus; à Gabriele Bethlenio Principe fœdifrago Transylvanorum vix non tota Hungaria spoliatus; à Gustavo Succorum Rege vniuerso quasi Imperio priuatus; insuper vexatus à Dano; inuasus à Gallo; turbatus ab Anglo, Turca, subditis Principibus, vrbibus Electoribus Imperij, Venetis, atque demum rusticis rebellibus; omnia tamen constanti animo tulit, ac tandem diuinitus adiutus, omnes omnino superauit, profligauit, suæ potestati subiecit, & victor ac triumphator moriens palmam filio non absimili Ferdinando III. vna cum sceptris Regnorum, & Imperij, tradidit. Verè de illo dici potest, quod de Iulio Cæsare Sallustius scriptum reliquit. *In te præter cæteras vnā artem egregiè mirabilem comperi, semper tibi maiore in aduersis, quàm in secundis rebus animum fuisse.* Ut nihil supra eum Mithridates Rex Ponti videatur habere, qui toties

Nn

victus

victr, roties victor exsticit, & ad extremū à Pompeio Magno, prælio superatt ingenti (vt testatur Vellei⁹ Paterculus) ad amicos minimè desperans dixit. *Omnis mihi etiā aduersa, cuius author Pompeius esset, fortuna tolerabilis est futura, non enim est turpe ab eo vinci, quem vincere esset nefas neque ei inhonestè aliquem submitti, quem fortuna super omnes extulisset.* Ioannes verò Magnus Dux Moscorum, ad Venam in Liuania à Polonis profligatus, quod castra, & in eis tormenta bellica eximij præcij & laboris amisisset, ad potentiam suam ostendendam pertinere existimans, nihil à fortuna ademptum sibi videri, quod non breui à facultatibus suis, insigni cum accessione expleri posset, mox alia, & complura præterea, iisdem insignibus & nominibus conflare iussit; militemque per omnes suas prouincias scribi continuo mandauit, vt cladem acceptam quantocius refarciret. Robertus verò Brusius Scotorum Rex, duodecim continuis quasi prælijs superatus ab Anglis, nunquam vincendi animum aut spem abiecit, donec penitus patriam à iugo hostili liberaret.

Notandum hic erit, vt in eiusmodi euentu, fuga instituat in castra, quæ in futuras clades ante pugnam muniri, & præsidio firmari solent. Iam autem reditus in castra fugæ speciem non habet, nec victos nos esse arguit, quia poterimus omnibus Stratagematis vti, vt victoriam à nostris partibus stetisse hostibus persuadeamus. Ita Consalius Magnus à Gallis in Regno Neapolitano profligatus primum in castra refugit, deinde cautior in omnia factus, Gallos toto Regno eiecit. Et Zolkieuius prælio Cetzorensi, multitudine barbarorum pressus, in castris se saluauit, saluauissetq; ad extremum, si in eis ad tempus sese retineret. *Ita sæpè est cernere eos, inquit Polybi⁹, qui superiores iam iam videbantur euasisse, mox vniuerso prælio esse victos: alios contra, qui per initia offenderant, postmodum mutata rerum facie, summa rei victoriam sua solertia præter opinionem omnium esse consecutos.*

CAPVT XXV.

De Inducijs faciendis.

INter exacerbatos hostes, reconciliatæ amicitiae fidē plerumque lubricam atq; infirmam esse, experientia docemur. Proinde Imperatoribus familiaris est ars, temporis lucranda causa, pacem, vel fædus, induciasue aut transactionem speciosis & irritis nominibus iactare, homines suos mittere; qui vbi innexis studiò difficultatibus, aut concessis leuioribus, negotium eòusque protelauerint, vt interim licuerit domino prouidere rebus suis, cum ad causæ caput ventum est, non posse se de eo, sine nouo mandato agere, aiunt. Propterea Thucydides monet, ut cura geratur, ne colloquiorum de pace prætexto, infidiæ aut prodiones velen- tur; vel rei tantum suæ ac tempori studeat inimicus. Certissimum enim est non magis à pace abhorrere eum, qui in expectatas planè, & nimis faciles condiciones proponit, quàm qui nimis iniquas. Vtrasque Bethlenius Ferdinando II. nobis tam in Prussia, quàm in Liuonia proponebat Gustauus, modo deluderent incautos. Quapropter ego illos prudentes esse iudico, qui quod per legatos vrgent, vel statim fieri, vel statim volunt negari. Nam tempus quod ad deliberandum petitur, insidiosum plerumque est; & ideo diligenter antè, in omnia inquiri oportet, quàm id concedatur.

Imperator itaque dum se superiorem suo aduersario esse videt, aut eum nondum benè paratum ad prælium probè nouit, inducias nullo modo faciat, neque tractationibus pacis tempus consumat, sed progrediatur in suo proposito firmiter. Aut si omnino hostis condiciones pacis vel induciarum exigit, commissarios ad id in loco securo assignet, ipse verò nihil de conceptis suis progressibus contra eum omit- tat. Ita faciebant Turcæ cū ad Chotimiam per duas aut tres

septimanas cum Polonis de pace tractarent: continuè etiam castra nostra oppugnabantur, nostrique de noctu superuentus in castra eorū faciebant, commissarij verò interim condiciones pacis moderabant. Cumq; castra nostra nullo modo expugnare potuissent, & iam hyems aduentabat, tempus que missionis in hyberna imminebat, quo adueniente, funes tentorij Imperatoris sui Turcæ præcidere solent; & rebus suis conuasatis, contra omnem illius voluntatem abire tumultuariè sæpius consueuerunt. Ne aliquid inde damni nasceretur, ad pacis condiciones seriò descenderunt, & ponte nobis relicto, impedimentisq; compluribus, priores domum abierunt.

Quod si verò Imperator Inducias fecerit, & eas subscripserit seu scriptas per commissarios approbauerit, nullam interim impressionem fieri iubeat, sed in omnibus fidem hosti ex integro seruet. Nihilominus tamen custodijs positis prouidè sibi caueat, siue induciæ sint diuturniores constitutæ, puta ad annos aut menses, siue breuiores, ad dies scilicet aliquot, aut horas (quales sæpiò Germani pugnando defessi, statuebant tempore prælij cū maioribus nostris, cū in Prussia pro Crucieris Teutonibus bella nobiscum grauissima gererent. Et accidit vt in pugna Pucensi, quæ tota die durauit, incipiens ab ortu solis, vsque ad occasum, ter ex condicto per horam integrā qualibet vice eiusmodi induciæ fuerunt, seu cessatio veriùs à prælio & morte) ne quid fraudis in te aut insidiarum hostis moliatur. Infinita enim sunt exempla, quomodo Reges & Principes post diuturna bella, aut acerrima euentu, pacis dulcedine capti, dum induciarum tempore negligentiores fuerunt, in grauiiores postea quàm belli tempore calamitates inciderunt. Itaque ex vero est, quod Seneca scriptum reliquit. *Nunquam Imperator bonus ita pauci credit, vt non se paret bello, quod, etiam si non geritur, indictum est.*

Dum verò de pace aut inducijs tractatur, armistitium, in
interea

interea temporis Imperator non faciat, neque vrbis obsidionem relinquat, nisi rebus ia in toto conclusis. Ita Stephanus Rex, Moschorum legatis in castris illius apud Lucos de pace tractantibus, & tempus solummodò in vtilibus quæstionibus protelantibus, urbem in oculis ipsorum expugnauit. Quod si te à tergo, aut domi difficultas aliqua premit, pacem ne sperne, & inducias paciscere. *Melior enim, ait Liuius, tu-
tiorq; est certa pax, quàm sperata victoria. Illa in tua, hæc in Deo-
rum manu est* Paulo Aemilio ne cum superato Perse, & iam facilè, vt existimabant, penitus delendo, pacem iniret, suaserunt amici. At is respondit, *notum sibi esse, sæpè eos quorum
res fractæ esse putantur, vltimis viribus, quas fortunæ ante non
commiserunt, sibi salutem, victoribus damnum aut perniciem
parere. Malle se ideo parcere supplici, quàm cū desperante ideoq;
alacrius pugnaturò dimicando tentare fortunam.* Raro nempe bellum, eò quo euasurum putatur, euadit; & Vladislaus Iagello post victoriam Gruneualdensem quia cum obsessis Mariæburgi, pacem concludere noluit, bellum vsque in nepotes illius cum Crucigeris durauit. Maluit ideo Totilas iterum Romæ victor Paulo Cilici, qui cum quadringentis equitibus Adriani molem occuparat, vltro offerre, vt, vel equis & armis traditis ipse & milites abirèt incolumes (quòd ob agentem Constantinopoli cum liberis vxorem, cum socio vnico Paulus fecit) vel retentis omnibus in partes suas militaturi transirent.

CAPVT VLTIMVM.

De Imperatorum hinc inde collocutionibus.

Quia non semper Duces pugnant, sed sæpè per Inducias, aut casu aliquo positis armis, cum amicis aut hostibus loquuntur, vbi falli, seu agreste vel ineptum loqui aliquid, turpe est. Vt igitur in prodeundo ad hostem, existima-

cio est seruanda, ita & in colloctionibus cautio semper est adhibenda. hoc est. Vt in medio exercituum seu castrorum. Vt cum eximijs militum. Vt splendido armorum ornatu. Et vt æquo spacio à suis militibus. Romani in hoc prudentes fuere, sed maximè Julius Cæsar, quo neminem scio meliorem moderandis militiæ habenis, imò nec parem. Is igitur colloquium suum cum Ariouisto Germanorum Rege, ita describit. *Planicies erat magna, & in ea tumultus terreus satis grandis: hic locus a quo ferè spacio ab castris utrisque aberat, eò, ut erat dictum ad colloquium venerunt. Legionem Cæsar, quam equis deucxerat, passibus ducentis ab eo tumultu constituit. Item que equites Ariouisti pari intervallo constiterunt Ariouistus, ut ex equis colloquerentur, & præter se, denos ut ad colloquium adducerent postulauit &c.* Omnes hic requisitæ ad securitatem conditiones à parte vtraque obseruatæ: quod non fecit Sigismundus III. cum è polonia in Sueciam iterato iuisset, Carolumq; patrum suum, quem inde ante paucos menses abiens Regni Cubernatorem fecerat, tunc iam hostem factum, venientem cum exercitu contra se, pro virili excepisset. Itaque egressus ex arce Lemcopinca, cū illa manu Polonorum quam secum habebat, publico prælio Martis aleam experiri maluit, quā menijs debilibus vetustate inopinatò includi, sine milite, sine munitione: Siquidem eò vnica tantum cum naui appulerat, classe tota tempestate disiecta Igitur post longum & acre certamen, quod in diem Dominicum inciderat, cum pro Rege suo omnes Poloni in acie cadere destinassent, nec vllus hosti loco suo cederet, Carolus sub tempus meridiei sanguini suorum parcere volens, Sigismundum nepotem ad colloquium euocauit, acceptisq; secum duobus armatis, secus decursum fluuij ad littus maris longe à suis castris processit, quo etiā Sigismundus Rex cum duobus Episcopis Polonis perrexit, tandemq; & ab his grandi spacio remotus, vltra duas horas colloquium cum patre habuit. Imputabant hoc Regi suo prudentiores, & male ab eo esse

eo esse factum clara voce dicebant, quod contra militiæ instituta, & nimium longè à suis recesserit, & contra viros armatos ac robustos, duos secum Episcopos inermes, & ex pri-
diana nauigatione pessimè valentes assumpserit, qui præter
sanctioris vitæ professionem, natura etiam imbelles fuerant.
Quod si itaque ille, vt in cætera perfidus erat, in personam
quoque Regis violentius quidquam agere statuisset, Antisti-
tes illi, nihil prorsus adiumenti ipsi dedissent. Melius, & cau-
tius longè, cum filio eius Gustavo Rege Sueciæ, Christo-
phorus Radiuillus in Liunia ad colloquium accessit: parem
quidem vt & ille numerum militum, secum habens, sed sele-
ctissimorū; & qui Suecū in admirationem raperent. Erant
enim quique præstabiles iuuenes, robusti, decori, proceri,
atque splendidis armis insignes. Iam autem sæpe inspecta
parte, de totius rei præstantia iudicari solet: atque hinc ho-
stium Imperator, non tantum de ijs quæ audiuerit delibera-
bit, quantum illis quæ viderit, terrebitur. Quod etiam acci-
dit Gustavo, qui cum Hastatos nusquam vidisset, petijt à Ra-
diuillo, vt totum exercitum lustrare posset, Annuit hic, & il-
le existimans linguam suam Radiuillo non esse notam, cum
multò inferiores numero Polonos suis copijs cerneret, ad
Campiductorem suum Comitem de Pontibus, *si mei inquit
milites tam fortes ac strenui essent, non modò pacem à Radiuillo
non exposcerem, sed extemplò Turcæ etiam ipsi bellum indicerem;
at nunc cedendum tempori & necessitati, Cui Comes non dubi-
tet maiestas vestra, quos enim virtute superare non potuimus,
tractatione pactorum faciliè eludemus.* Zamoscius quoque in
Campis Cetzorensibus cum Kazigereio, Tauricanorum Scy-
tharum Principe, post longum certamen ad colloquium de-
ueniens, obsides viros præstantissimos barbaris misit, veni-
entem vero ad se Principem illorum, quem illi Chanum vo-
cant, non ad colloquium modò, sed & ad mensam suam ad-
misit, donatumq, munificentissimè cum suis comitibus, ad
Pacem cum Polonis seruandam seriò adhortatus est.

Oportet

Oportet itaque cautissimum esse Imperatorem, aliosq; magnos viros in congressibus & colloquijs cum aduersario, ne se imprudenter in hostium manus misisse dici possint. Quapropter, quoties in conspectum hostis prodire voluerint, vel vt cum eo sermones aliquos misceant, vel vt eum de quibusdam rebus audiant, dent operam, vt secum prodeant quoque selecti viri, & prudentes. Narrat Tacitus, quod cum Cæsar cum Arminio bellum in Batauia haberet, instituto colloquio inter Cerialem Ciuilemq; aduersarum partium duces, scisso Vahalis fluminis ponte, in eius abrupta progressi, colloquuti sunt. Ludouicus quoq; XI. Galliarum Rex, cum suo Equitum Magistro, quo cum similtates exercebat, in colloquium descensurus, pontem amni cuidam imponi iussit: in eo medio cancellatæ velut fenestræ factæ, vt conspici inter se, exaudiriq; colloquentes possent, ac dextræ interiungi. Sed & Ludouicus Sfortia Mediolani Dux, cum Galliarum Rege non aliter congredi volebat, quàm in fluminis cuiusdam medio, vbi pons aut nauibus, aut alia ex materia ita structus esset, vt inter vtrumque firmum ac robustum ex lignis vallum intercederet: quia frequentissimè in eiusmodi congressibus fraudes interuenire solent. Et primo bello Punico, cum primùm mare populus Romanus ingressus est, Cornelius Asina Consul, simulato colloquio à Pœnis euocatus, interceptus atque oppressus fuit. Posterioribus verò sæculis Albertus Comes Francorum, à Ludouico Bauaro in arce quadam obsessus, iuramento etiam addito, fuit ad colloquium ab Othone Moguntino Archiepiscopo euocatus, & proditus Ludouico ad plectendum caput. Omitto quomodo olim Pharasmanis Iberiarum Regis filius, ad decipiendum Mithridatem Armeniarum Regem, auunculum suum fœdus confinxit, & ad colloquium auocatum, vita priuauit vnà cum vxore & liberis. Quomodo Paches Dux Atheniensium, Hippiam Arcadum Ducem, in colloquio comprehensum sagittis confixit. Quomodo infiniti alij, suos

suos aduersarios colloquiorum causa in insidias traxerunt. Equidem multis simulationum inuolucris regere, & quasi velis obtendere homines sciunt adgenitæ prauitatis indolem: lingua aliud sæpè loquitur; aliud tacito clausum pectore reconditur. Sub humana effigie, ferarum sæpè animi: sub Angelicæ pietatis larua, diabolicæ malitiæ fœditas delitescit. Quare cautus sit Imperator, & cum omnia benè prius examinata in bello agat, tum ad colloquium quoque circumspectus cum hoste accedat: quia valde sunt prona ad fallendum hominum ingenia, non quorumlibet modò, sed Regum quoque & Imperatorum: quoque potentiores sunt Principes aut Duces, eo maior est insidijs & improbitati locus.





SIMONIS STAROVOLSCI
INSTITVTORVM
Rei Militaris

LIBER QVINTVS

De Bello Nauali.

CAPVT PRIMVM

De Apparatu Naualis Belli.



ERRESTRIS prælij rationibus absolutis, naualis belli artes describere statui-
mus, quas tum ex vsu præfenti, tum ex
diuersis authoribus, pro publica utilita-
te collegimus. non quidem ita sufficien-
ter, aut scienter, vt omnibus placere pos-
simus, sed saltem vt ijs qui vsum nauigationis non habent, &
tamen maria possident, aliquem modum parandæ classis, &
facilem viam debellandi Turcas vicinos, indigitemus. O-
ptimum etenim quemque niti & contendere decet, vt vel a-
liquo modo Reipublicæ profit; & commune bonum, quo
potest meliori modo, consilio, studio, & opera, promoueat,
defendat, conseruet. Romani itaque omnibus exemplo
esse

esse poterunt, qui terrestribus bellis potentes, non aliter hostibus suis extra Italiā existentibus, terribiles esse poterant, nisi nauibus paratis; nec orbis prouincias possederunt, nisi conscenso mari. Hi itaque dilatato Imperio suo ultra maria, & tropicos Solis, pro decore & utilitate magnitudinis suæ, non propter necessitatem tumultus alicuius, classem parabant ex tempore, ita ut intra dies triginta, aut minus interdum iustum in mare exercitum emittere possent, triremium septuaginta vel octuaginta. Ne autem aliquando necessitatem sustinerent, semper habuerunt classem præparatam, in omnes occurrentes casus, uti modo habere solent Veneti, & in armamentario & in excubijs sinus Adriatici. Illorumque exemplo Bataui, Genuenses, & diuersi Principes, tum Asiæ, tum Europæ. Nemo enim bello laceffere, aut facere audeat iniuriam ei Regno vel populo, quem expeditum & promptum ad resistendum vindicandumque cognoscit. Promptior autem ultio esse non potest, quam cum nauibus emissis eò exercitu in vno aut duobus diebus peruenis, quò terrestres copię tuæ vix induobus mensibus peruenire possent. Iam verò in rebus bellicis, celeritas amplius interdum solet prodesse, quàm virtus. Quia igitur alij Principes, qui classes suas habent expediti non sunt, & militem assuetum mari non habent, ideo nec Venetis pares apparatu nauali sunt, nec Turcam, qui omnibus resistere nequit, per maria aggredi audent. Oportet enim ut nauibus ij præficiantur qui in societatem expeditionis timorem non admittunt, sed & pugnare pro patria didicerunt, & mori pro Religione non curant. Olim, inquit D. Hieronymus, qui nauali prælio erant dimicaturi, prius in portu, marique tranquillo uncus præparabant, remos trahebant dispositumque, per tabulata militem firmiter stare consuecebant, ut quid in hac ficta naumachia, simulacroque navalis pugna didicissent, in vero certamine non perhorrescerent. Et Polybius. Dum verò quinqueremes parabantur, interea multitudo omnis ad remigium exercebatur, per hunc modum.

Subſellijs in arena per ordinem diſpoſitis, remiges inſidentes ad vocem præcipientis, qui in medio eorum erat, omnes unà protendere brachia ac reducere, remosq; per arenam remouere pariter docebantur: ad illius vocem ſimul omnes incipiebant, ſimul deſinebant. Per hunc modum nauigandi artem edocti, & perfectiſ interea nauibus mare ingreſſi, poſt paucos dies circa Italiam nauigantes, ſecundum Ducis uſſum, verum in undis periculum fecerunt. Exercent remiges ſuos & Veneti, præcipuè comdemnatos; tenuiorisq; ſortis nobiles ſuos, vt rei maritimæ aſſueſcant, iuuenes adhuc per triremes diſponunt, ſumptu publico prouiſos, vt à Præfectis claſſium veteranis ſcientiâ militarem addiſcant. Similiter filios artificum, certò numero librationem tormentorum, ſtatis diebus per annum, edocent, vt in occaſionem belli, non quærant extraneos, qui minus fideles erunt.

Quapropter Principes gloriæ cupidi, & emolumentum, militem bello nauali exerceant, vt aſſueti nō extimeſcant fluctus æſtusq; violentos; ſciantq; ex arte torquere remos, & ludificari fuga roſtra. Id aſſiduè præ oculis habentes, quòd non alia re creuere Romani, vt dixi, niſi quòd mare tranſire fuerint auſi: primumq; Appio Claudio Conſule, rudis ille & paſtorius populus, fretum ingreſſus eſt, & apud Liparas cum Hierone Syracuſano Rege, Duillio Duce congreſſus eſt & victoriam obtinuit.

C A P V T I I.

De Modo fabricandarum nauium.

DIxi de nauali apparatu cōſulendos nunc eſſe Venetos, qui præ cæteris Principibus, aut Rebus pub. pollent induſtria huius rei & diligentia: habentq; in armamentario ſuo omnem materiâ, & inſtrumenta omnia ad fabricandas naues ita præparata, vt ſpacio horarum aliquot vna Liburnica conſtrui

strui possit, integrâq; classis paucos intra dies in mari conspicui. Præter naues paratas, quæ & in Candia, & in Corcyra, & plurimis alijs in locis habentur. Quod verò nauium genus præferendum sit, grauiorum an verò leuiorum, dubitare meritò quis posset, nisi litem illam præsentis sæculi praxis soluisset: nam Thunetanæ triremes præstant Italicis sola celeritate. Italicæ deinde expeditiores habentur Turcicis, & Batavicæ Hispanicis. Angli quoq; licet minores, leuiioresq; naues habeant, quàm Sueci, aut Dani, multò tamen potiores sunt in prælio nauali, quàm reliquæ omnes, quæcunque in Germania fuerint fabricatæ. Quamuis Florus dicat, Carthaginensibus celeres & expeditas naues nil quippiam contra Romanos grauioribus instructos profuisse. Cum enim C. Duilius videret graues suas naues mobilitate Punicæ classis eludi, irritamq; virtutem militum fieri, excogitauit manus ferreas, quæ vbi hostilem apprehenderent nauem, superiecto ponte, transgrediebatur Romanus, & in ipsorum ratibus cominus eos trucidabat. Sed quia nauigia quæ modum excedunt, regi nequeunt, idcirco bellicæ naues mediocres debent construui, vt & fugere, & sequi hostem possent. Quo autem velociores sint ad currendum, necesse est vt sæuo hircorum atque oleo benè inungantur supra picem. Sic Rhodia nauis inuncta aliquoties portum Siracusanum, frustra prohibentibus Romanis, ingressa & egressa: nec à tota classe capi potuit, nisi occluso trabibus portu. Et nauis qua Sigismundus III. è Polonia in Sueciam uehebatur, ad capiendum Regnum hæreditariū, licet maior omnibus alijs quæ cum ipso ibant, fuerit, quia tamen melius inuncta erat, quàm reliquæ, ideò vnico tantum velo expanso eoq; minimo, præcedebat omnes plenis velis nauigantes. Vnde, idē Florus scribit, quòd in illa pugna nauali, quæ fuit inter Augustum Cæsarem, & M. Antonium, propter nauium agilitatem, victoria stetit penes Cæsarem. Nec sæculis sequentibus grauiiores naues profuerūt, Genuensibus, cum promptas & leues haberent Vene-

ti. Et non ita pridem agiliores naues Anglorum, ingenti clamore affecerant classem Hispanorum, sub Isabella Regina; & Batauorum nuper sub Philippo IV.

Sed quantū ad modū fabricandarū nauīū attinet; Aliter ad bellū fabricantur naues in Europa, & aliter in Asia atque Africa. In America verò nullæ visæ sunt naues aptæ bello ab illis barbaris constructæ, sed quæ litt̃ tantū legere possunt aut onera minora portare; quæ autem ad prælium nunc habiles conspiciuntur, ab Europæis sunt constructæ.

Quæ igitur in Asia ad portanda onera naues fabricantur (dico ab illis indigenis, nam Europæi homines vbique suo modo ac more fabricant) illæ & prægrandes nimium sunt, & discopertæ desuper; eo quòd Oceanus ille Australis per medium annum habeat ventum orientalem, & per medium occidentalem; nec turbetur alijs fluctibus transuersantibus, qui aut auertere, aut contorquendo submergere nauim possint. Quæ verò ad bella construuntur, illæ nimium longæ sunt, & discopertæ similiter; in Regno autem Calecutano octuaginta remi in vna parte nauis, & totidem in alia collocantur. Sunt & alij generis naues bellicæ, sed quæ omnes lyntrium formam præferunt, nec coperiuntur desuper, quia quietius mare habent, quàm nos septentrionales. Et quia in pluribus locis magnes lapis sub aquis reperitur qui extrahendo clauos naues dissoluit, & nauigantes submergit; ideo communissimè Asiaticæ naues, clauis ex ossibus piscium (aut ligneis) factis, compactæ sunt. Sed iam naucleri Europæi periti sunt locorum illorum, & cum nauibus suis finis illos euitant.

In Europa denique ipsa naues ad bellum aliter fabricantur in Oceano, & aliter in mari Mediterraneo, atque sinibus diuersis. Nam triremes in Oceano Septentrionali facilè à fluctibus franguntur, aut submerguntur, quia raræ sunt stationes & impet̃ ventorū vehemētes. In Mediterraneo verò aut Euxino mari, & fluctus sunt minores, & portus frequentiores,

res, & aquatio facilis. Vnde interrogatus quidam, quis potissimum commeatus nauigatoris in longinquas oras necessarius esset? Aquam respondit. Rursumq; rogatus, quid secundo loco necessarium esset, Aquam iterum respondit. Tertio quoque idem interrogatus, eodemmodò respondit. Qua loquendi figura, quàm esset huius elementi copia nauigaturis necessaria declarauit, videlicet & ad sitim extinguendam, & ad ignem ab hoste iniectum suffocandum, & ad nauigandum denique absque breuib; & vadis. Maris enim aqua potum nauigantibus ob suam falsedinem non præbet, flammam conceptam non extinguit, & vbi non est sufficiens ad sustinendū naues onerarias, facillimè eas insurgente tempestate allidit & dirumpit. Atque ita in conflictu illo inter Gallos & Anglos sub Ludouico IX. duæ naues Britannicæ, & Gallica vna inusitatæ magnitudinis, quàm Cordigeram appellabant, vno tempore miserabili exitu conflagrarunt; aqua enim salsa maris flammā magis excitabat, quam discerpta tormenta adauxerunt, & supra duo millia hominū præcipitarunt. Similiter pugna inter Danos & Suecos durante 1564. erat inter cæteras Suecicas naues vna Magelesia appellata, quæ eximia magnitudine, & apparatus insigni copia, omnium admirationem superabat, sic vt multi nullam maiorem, vlla hominum memoria in Septentrionali Oceano visam esse affirmarent. Sed victi eam Sueci amiserunt inflammatam.

Igitur Architalassus naues quæ modum excederant, non iubeat fabricare, quia & ab vndis intumescantibus franguntur, & prælij tempore difficulter reguntur, & oppugnantibus velut scopus aliquis ad incendendum aut perforandum globis ignitis exponuntur, vt multoties experientia docuit in pugnis Hispanorum, tam cum Anglis, quàm cum Hollandis factis. Præterea nautis & militibus semper aquam recentem procuret. Tum coria ad obtegendos malos, ne flammam concipiant ab ignitis contis; tum Velamina ex golsipio

pio molliter facta ad contegenda latera, vt lenius globos tormentorum excipiant. Sic fecere Almeida & Albuquerque peritiſſimi Regis Luſitanix Emmanuelis in Indijs Orientalibus Duces. Sic Dracus Anglus, Sic Andreas Auria Genueſis: ſic alij infiniti naualium bellorum magiſtri, & triumphatores.

Triremes autem Italicæ vniformiter quidem vbique parantur, & ſimiles ſunt Africanis, & quæ à Conſtantinopoli veniunt; nihilominus inter ſe quadam proportione fabricæ, atque figura differunt; idcirco capite ſequenti de hac earum diuerſitate differemus

C A P V T I I I.

De Diuerſitate nauium.

QVia diuerſæ olim gentes, diuerſis temporibus mari plurimum potuerunt, ideò diuerſa quoque eis genera nauium fuerunt. Velut Auguſto Imperatore dimicante Actiacoprello, cum Liburnorum auxilijs præcipue victus fuiſſet Antonius (Liburnia autem eſt pars Dalmatiæ, Iadertinae ſubiacens ciuitati) propterea ſequentibus temporibus Romani naues ſuas more Liburnorum texuerunt: quorum exemplo nunc etiam per totum mare Mediterraneum triremes (nam aliter extruuntur onerariæ, quibus itidem ad bellum vtuntur omnes Australes, more Septentrionalium populorum) fabricantur, & appellantur Liburnæ. Quarum aliæ ſunt maiores, aliæ minores: aliæ grauiores, aliæ leuiiores, & ideò magis capaces ad portanda onera: item, aliæ tardiores obtuſitate formæ ſuæ, aliæ velociiores: aliæ capatiores diſtenſiones laterum & vniuerſi corporis, aliæ verò plus iuſto longiores & ad frangendum à fluctibus marinis quadam ſui diſpoſitione procliuiiores. Harum ſingulæ ſingulos nauarchos habere ſolent, qui exceptis cæteris nautarum officijs, gubernatoribus atque remigibus & militibus exercendis, quotidianam

dianam curam & iugem industriam exhibere debent. Africanæ attamen triremes, multo sunt minores, quàm Liburnæ Europæorum quamvis sint eiusdem figuræ; & ideò sunt expeditiores in aggrediendo, & celeriores in aufugiendo. Europeæ verò fortiores sunt ad congressum in pugna, & aptiores ad ferenda tormenta maiora, & instrumenta belli, quibus etiam vrbes munitæ oppugnantur. Naues demum bellicæ quibus Septentrionales vtuntur in Oceano, aliæ sunt maiores, aliæ minores, quæ scaphas sibi adiunctas etiam habent; & sunt capaciores quidem rerum portandarum Liburnis, securioresq; in tempestate: cæterum superueniente malacia, expositæ sunt omnib; periculis belli, cum nec progredi in hostem queant, quòd remiges nō habeant, nec diffugere superueniente aduersario cum rostratis, quæ remibus aguntur. Vnde sæpius malè fuerunt exceptæ eiusmodi naues Christianorum à Turcis, præsertim apud Præuesam & Gerbim: & anno sequenti post Neupacteam pugnam in mari Egeo, sub Pio V. Ideò tempus totum perdiderunt Duces confæderatorum Principum, quod plures haberēt naues magnas cum velis, quàm triremes seu Liburnicas cum remis: vento itaque contrario semper existente, classis rebus infectis discessit, cum Turcæ accedere ad nostros non auderent, nostri verò ad ipsos vento contrario flante, non possent. Quapropter & his quæ velis solummodò vtuntur, & illis quæ remis atq; velis aguntur, scaphæ diuersæ, & Myoparones, in copia sunt adiungendi, nā per huiusmodi nauigia minora & satis expedita, partim superuent; peraguntur; partim commeatus adfertur, aut aduersario aufertur: partim denique speculatio hostium peragitur. Dalmatæ, Istrij, Albani & Rugusæi talibus scaphis plurimum valent in bellis propter velocitatem, quia non plures vicenis militibus portant, qui simul sibi & remiges sunt; ad plurimum tricenos milites habent. Sicut & lyntri Cosachorum Zaporosensium quibus Pontum Euxinum fulcant: qui hoc tantum solo differunt, quòd ex v-

na arbore crassa sint elaboratæ seu edolatæ, non verò ex asseribus compositæ: vnde tardiores quidem sunt in nauigando quàm Dalmaticæ, aut Germanicæ scaphæ; cæterum firmitates ad congregiendum rostris, securioresq; à submersione in tempestate, quod certâ herbâ circumcirca sint suffultæ, quæ non sinit mergi. Solent aliæ naues eorum esse capaciores, vt puta quæ sexaginta viros præter commeatum ferre possunt, sed paucæ sanè, quia non passim tam crassa tilia, aut populus reperitur. Has enim arbores leuiter cuneis distentas leuiter ad ignem calefactas, edolant, & in latum vt satis ferramentis extensas, asseribus ad latera superadditis profundiores faciunt, & sic ad solem exsiccant postea manipulos herbæ colligatæ firmiter per circum applicant, quæ & globos tormentorum minorum aduenientes sua mollicie retinet, & vel in maxima tempestate submergi non patitur.

Ne verò speculatoriæ naues candore prodantur, colore veneto, qui marinis fluctibus est similis vela tingenda sunt & funes. Cera etiam qua ungere solent naues, aut pix inficitur. Tum & nautæ ipsi ac milites venetam vestem induunt, vt non solum per noctem, sed etiam per diem facilius lateant explorantes, siue myoparonibus veniant speculatum, siue scaphis grandioribus ad superuentum deputatis. Cosachi Turcicas naues Trapezuntum, Bursiam, aut Capham euntes sic eludunt de die etiam, non tantùm de nocte: nec vllò prorsus colore conspicuo in nauali expeditione vtuntur.

Quantum denique ad construendarum nauium materiam, quotidianus iam vsus omnium architectorum edocuit, arbores pro extruendis nauibus non præcidi, nisi à quintadecima luna vsque ad vigesimam tertiam; quia his tantùm octo diebus cæsa materies immunis seruatur à carie: reliquis autem diebus præcisa, etiam eodem anno interna vermium labe exesa, in puluerem vertitur. Vtiliusq; æreis clauis quàm ferreis naus bellica configitur; quæ licet grauior aliquanto videatur expensa, tamen quia amplius durat, lucrum probatur

batur afferre: nam ferreos clauos tempore & humore celeriter rubigo consumit, ærei autem etiam in fluctibus propriam substantiam seruant. Cæduntur autem trabes vtiliter post Solstitium æstiuum, id est, per Menses, Iulium, Augustum, & per Autumnale Æquinoctium vsque ad Kalendas Ianuarias. His namque mensibus arescente humore ficciora, & ideo fortiora sunt ligna. Quæ autem in Septentrionalibus partibus brumali tempore cæduntur, illæ arbores dum æstate ad solem siccantur rimas faciunt, humore naturaliter foras erumpente prouocatione caliditatis; & sic non sunt aptæ ad fabricandas naues, nisi longo tempore prius ad ventum siccentur. Nam illud maximopere cauendum est, ne continuò vt deiectæ fuerint trabes secentur, vel statim vel sectæ fuerint, mittantur in nauem. Etenim quæ virides compinguntur, cum natiuum humorem exudaerint, contrahuntur, & rimas vti dixi faciunt latiores, quo nihil est periculosius nauigantibus maria

C A P V T I V.

De Telis, Tormentisq; naualibus.

Multa quidem armorum genera prælium terrestre desiderat, sed nauale certamen nõ solum plures armorum species, verum etiam machinas & tormenta flagitat, vt tanquam in muris dimicetur & turribus. Quid enim crudelius congressione nauali, vbi & aquis homines perimuntur, & armis, atque flammis? Præcipua ergo esse debet tegminum cura, vt cataphracti vel loricati, galeati etiam & ocreis more antiquo muniti sint milites. De onere namque armorum nemo potest conqueri, qui stans pugnat in nauibus: vnde & scuta validiora propter ictus sclopetorum habere non impediret, cum non omnes ferreis thoracibus possunt armari. Oportet enim non nullos expeditos esse, qui ad

motis Liburnis iniiciant pontes in aduersariorum naues, aut transeant per remos distentos extensosq; à remigibus tuis, ibiq; gladijs manu ad manum cominus dimicent. In maioribus quoque Liburnis, propugnacula turresq; constituunt nonnulli, Veneti verò præcipuè, vt tanquam de muro, ita de excelsioribus tabulatis facilius vulnerent & perimant inimicos; quare maximè Turcas in Arcipelago, & ad Nauptum fregerunt: Genuensibusq; olim per sæpè graues fuerunt. Sed nunc iam & magnus Dux Hetruriæ, & Rex Galliæ in mari Tyrreno eiusmodi nauibus maioribus cum propugnaculis vti cæperunt.

Inter machinas autem quæ ex nauigijs aguntur, & quibus maritimæ ciuitates deuiantur, veteres primo loco ponebant Sambucas, dein Elepolis, hoc est, paruas machinas vrbiū deuiatrices, quæ tum cum nauigia propè murum aduenerint, aut funibus, aut contortis torcularibus, supra murum aditum præparantes eriguntur. Harum apud Græcos Danis Colophonius magister præcipuus fuerat, qui & pontes ratibus impositos excogitauerat, cum propugnaculis à latere vtroque constitutis, vt hoste in aduersa ripa existente, exercitus innocuè transire possit. Nunc omnia bombardis maioribus, minoribusq; aguntur, quæ pro certa proportionē certis quoque nominibus insigniuntur ab artificibus earum, vtpote Canones, Medijcanones, Quartapars, canonum, Falcones, Colubrinæ, Mortaria atque demum sclopeta: quæ itidem, pro ratione proportionis, ab vnaquaque gente aliter atque aliter insigniuntur.

Vtuntur quoque in pugnis naualibus de super ex cacumine mali diuersis proiectis & missilibus, tum contis, lanceis, & lapidibus artificiosè præparatis ad deiiciendum in capita pugnantium aduersariorum super tabulatis. Tum oleo incendiario, stuppa, sulphure, arena calida & ardente, igne Græcanico, globis incensuis, pomis granatis ignem eiaculantibus, & sagittis ardentibus bitumine obuolutis, quæ
per

per varia instrumenta, in hosticarum nauium alueos infinguntur; inunctasq; cera, & pice, & resina tabulas, tot fomentis ignium repentè succendunt. Qualiter Bassa Alexandrinus, quas capere non poterat pyratarum Anglorum naues, igne immisso in mari Ionio succendit. Et Paucos ante annos Hispani complures naues Hollandicas ad Littus Regni Congu in Africa, cum eorum Architalasso exusserunt, cum ipsis ex America redeuntibus obuij facti prælium præsentassent. Similiter & naues Dantisco emissæ in Suecum, tempore belli Prussici cum Gustauo, eius naues aliquot, atque Ducem ipsius classis succenderunt cum Prætoria.

Cn. verò Scipio bello nauali cum Pœnis, amphoras pice & teda plenas, in hostiū classem iaculatus est, quarum iactus & pondere foret noxius, & diffundendo quæ continuerant, alimentum præstarent incendio. Annibal quoque eius antagonista Regi Antiocho monstrauit, vt in hostium classem vascula iacularetur viperis plena, quarum metu perterriti milites, à dimicatione, & nauticis ministerijs impedirentur. Idem fecit iam cedente classe sua Prussias, & prælium restaurauit: consternati enim rei nouitate Pontici, & ancipiti periculo circumuenti, hosti victoriam cessere. Simili stratagemate Veneti contra Genuenses in pugna nauali apud Fossam Clodiā vsi, qui vasis fictilibus cineres imposuerunt, congressique cum hoste, clamore ingenti excitato in naues ipsorum coniecerunt; atq; ita visu militum impedito, naues ipsorum celeriter conscenderunt, & victoriam facile ex perturbatis re inopinata obtinuerunt. Bello denique Belgico exorto Guilelmus Orangius suscepta contra Philippum II. Regem suum rebellione, cum Ludouicus Requesenius Zelandiæ insulas aggrediretur, nouum in aquis castellum fieri excogitauit, quòd in ipso æstuario tranantibus Hispanis derepentè opponi posset, miram ignium copiam ex se euomendo: prout & illa machina Antuerpiensis, in Alexandrum Farnesium, per Scaldim emissæ.

Sed quia nunc omnis claſſis tam barbarorum, quàm Christianorū æneis bombardis armatur, & naues non ſemper maiores ad manum eſſe poſſunt, aut vbique ſufficientem ſufferendo ſuo oneri aquam habent; ideò remedio barbari Regis, ſed minimè barbaro vtendum. Is fuit Abas Rex Perſarum bellicoſiſſimus ante annos aliquot deſunctus, qui conſultando de Ormazana expeditione cum Ducibus ſuis, vt intellexit naues ſuas portandis maioribus tormentis, quæ ad arcem feriendam neceſſaria erant, ineptas eſſe, reſpondit. *Si non potero traijcere integra tormenta, metallum in fruſtra conciſum tranſportabo, fundamq; tormenta in ipſa Inſula.* Conſilium certè non aſpernandum Ducibus, quibus ſuperare montes, aut minoribus nauigijs tranſire ſinus maris, aut lacus neceſſe eſt: cum etiam Turca hac ſæpiſſimè vtatur arte in longinquis expeditionibus, præſertim cum illi deſetta Ægypti, aut Arabiæ, tranſeundum ſit. Camelis ea propter metallum portat, & caſtris iam in hoſtico poſitis, tormenta fundit.

C A P V T V.

De Notitia locorum in mari.

QVoniam in diuerſis regionibus, diuerſo lunæ creſcentis minuentiſq; ſtatu, certis horis aquæ variantur, fluxuſq; & refluxus maris variè vbique & non vniformiter creſcit aut decreſcit, ideò prælium nauale geſturus, conſuetudinem pelagi, vel loci, ante congreſſum debet agnoſcere, ne forte ab aduerſario opprimatur, vt euenit Ioanni Naſſouio, ab Iſabella Belgij Principe, cum decem millibus ad intercipiendum Bergozomum ſcaphis minoribus Antuerpia miſſo, qui congreſſus cum Hollandis in id inuigilantibus, cum refluxu maris abſcedente, naues in rheumate conſediſſent, & nec pugnare, nec fugere aduerſarios potuiſſet, vniuerſum exercitum amiſit.

Nauta-

Nautarum itaque gubernatorumq; solertia est, loca in quibus nauigatur portusq; cognoscere, vt infesta prominentibus vel latentibus scopulis, vadosa ac ficca vitentur; quia tanto securitas maior est, quanto mare altius fuerit. Hac arte olim Dalmatæ & Bytini; postea Græci, & Rhodij; tandem Ligures & Pœni: postmodum Biscaini & Marfilienfes floruerunt. Nunc peritia rei nauticæ, penes solos ferè Portu- galenses & Holandos mansit, qui Orbem penè circumnauigantes, & Syrtes & charibdes omnes pernouère; librisq; ea de re in publicum vsum conscriptis, omnium portuum & viarum maris doctrinam seu notitiam posteris tradidère.

Quapropter in nautis diligentia, in gubernatoribus peritia, in remigibus virtus eligitur, cum descendendum est ad prælium; naualis siquidem pugna tranquillo committitur mari, Liburnarumq; moles non ventorum flatibus, sed remorum pulsu aduersarios percutit rostris, eorumq; rursus impetus vitat: in quo opere lacerti remigum, & ars clauum regentis magistri victoriam præstat. E contra naues absq; remis in Oceano magno aut lacubus finibusq; Septentrionalibus præliantes, venti prosperitatem attendere debent, ne fluctibus consurgentibus tempestuosis, vna cum aduersario pereant, aut superueniente malacia stent ociosæ, mirantes solummodò hostiles naues. Sæpè autem post eiusmodi quietem, maris tempestates vehementes insurgere solent, quæ & integras prouincias submergunt, & naues longè à littore in campos apertos eijciunt, vt paucos ante annos in Frisia orientali, & tractu Bremensi accidit: & antiquissimis quoque sæculis multoties euenit, vt in historijs patet. Et Valentiniani Imper. anno tertio, tantus terræ motus per totum ferè Orbem fuit, vt ad littus Alexandriæ, quemadmodum testatur Zonaras, subductæ naues, supra magnum vrbis murum fuerint elatæ. Et nautæ narrauerunt, cum medium Adriaticum mare nauigarent, naues ipsorum ad fundum desedisse: moxq; reuersa aqua, nauigationem confecisse.

Impe-

Imperator igitur prælio nauali decertaturus, & maris tempeſtatem vitet, & locorum notitiam habeat. Laudatur hinc Ludouicus Requeſenius Belgij Gubernator, qui Zelandiam aggreſſurus, primò Ioannem Arandam præmiſit, vt per homines fidos ac gnaros exploraret vada, ediceretq; ſub aquis eminentias illas, & colles, in quorum iugo præalta illa, quæq; inaccessa videbantur maria, pedum veſtigio transmitti poſſent. Raphaëlem autem Barberinum, non modò ad tranſuehendos milites actuaras fabricare iuſſit naues, & lembos planioribus carinis, & pentones, & trabibus intextas rates, ſingula æſtimatis antea æſtuarijs accommodata; ſed etiam ſubitarias aliquot munitiones & caſtella in ipſo aditu Zelandiæ ad capita & flexus Euriporum excitare, vbi cibariorum inuectiones reponerentur. Atque ita rebus hunc in modum impigrè curatis, expeditionem aggreſſus, & victoriã aſſecutus eſt, quamuis magna cum difficulata; quòd illud fretum æſtu remittente, claſſi quidem in acceſſum erat, pedib; autè difficulter trãſmitti poſſet, propter inobſeruabiles lacunas, cæcoſq; ſubterlabentium riuorum occurſus paſſim intercedentes. Quapropter mutationis fluxus cauſas, & ſigna tempeſtatum à nautis peritiſſimis cognoſcas neceſſe eſt, ſiſis abſque damno militum tuorum victoria potiri.

C A P V T VI.

De ſignis tempeſtatum.

Q Vicunque exercitum armatis claſſibus vehit, turbinum ſigna debet ante prænoſcere, ne pereat; nam procellis & fluctibus Liburnæ grauius quàm vi hoſtium ſæpè perierunt, vt hitorias Orientalis & Occidentalis Imperij, legēti videre eſt. Et Veneti Cyprum defendere volentes, aut alias Pelopeneſi vrbes, non ſemel iacturam paſſi ſunt à tempeſtate. Caroluſq; V. detrimentum ingens ad Tunetum ſubiit,
& pau-

& paulò ante eum Alphonfus Magnus ad Gerbim. Tum alij Principes, alijs in locis sæpius. Quapropter Naturalis Philosophiæ, & Mathematicarum scientiarum peritos habere secum necesse est; sed multò magis nautas solertes, & longa nauigatione probatos: quia sicut cautos & prouidos cautela tutatur, ita pro acerbitate pelagi, negligentes extinguit incuria. Hinc ipsum etiam Imperatorem nosse debere astrorum siderumq; motus, meritò in suo Strategico Onofander docet cui subscribit & Polybius inquiens. *Debet igitur Dux exercitus perspicuè cognoscere Solstitium Æstiuale & Æquinoctia, & intermedias dierum ac noctium, tam auctiones, quàm diminutiones. Sic enim dumtaxat, secundum rationem commensurare potest, quæ tam mari, quàm terra perficienda veniunt. Maxima noscenda ei sunt signa Zodiaci, & motus lunæ, qui naualis belli Architalassus est, ut possit scire pro Regione qualibet imbrium & fluuiorum inundationes.*

Igitur ventorum numerum atque vocabula ars nauigandi primum debet inspicere: qua in re maximam nunc cognitionem habent Ligures in Italia, Bisaxin in Hispania, Bataui verò inter omnes Septentrionales, prout Arabes inter Australes, nam licet Iaponenses præcipuè inter omnes cognitione tempestatum & natura ventorum excellunt, illi tamen nostratibus Europæis adæquari non possunt, quia tantummodò sua maria nauigant, nec vltra Cocincinam portus alios norunt, Bataui verò vniuersum Orbem circumnauigant, & peritia artis ipsos etiam Lusitanos, qui ibi sparsi per indias habitant, absque controuersia superant. Iam autem difficilè naufragium pertulit, qui ventorum rationem diligenter inspexit. Quapropter & quibus mensibus tutius nauigetur, apud peritos inquirendum, & deinceps obseruandum est: neque enim integro anno vis atque acerbitas maris patitur nauigantes; sed quidam menses aptissimi, quidam dubij, reliqui classibus intractabiles sunt lege naturæ. Post ortum enim Pleadum, id est, à primis diebus Iunij vsque

ad Arcturi ortum, id eſt ad medium Octobrem, ſecura nauigatio creditur: quia æſtatis beneficio ventorum acerbitas mitigatur. Poſt hoc tempus uſque ad medium quaſi Nouembris incerta nauigatio eſt, & discrimini proprior. Reliquum tempus anni uſque ad medium Martium, crebris tempeſtatibus nauigia conturbat; quinimo ad finem ipſius Maij periculoſè maria tentantur: non quod negociatorum ceſſet induſtria, ſed quia maior adhibenda eſt cautela, quando exercitus nauigat cum Liburnis, quàm cum priuatorum mercium feſtinat audacia.

Vnde non Menſium ſolùm. ſed etiam dierum, quibus ortus occaſusq; ſyderum tempeſtates vehementiſſimas cōmouent, rationem diligenter nauæ prudentes obſeruant. Inter luniorum verò dies tempeſtatibus plenos, & nauigantibus quàm maximè metuendos, non ſolùm peritiæ ratio, ſed etiam vulgi uſus intelligit. Sed neceſſe eſt, vt Duces etiam ipſi intelligant, & maiorum luminarium defectus, hoc eſt ſolis aut lunæ Eccliſpes obſeruent: & ſi turbantur ex eo milites, aut nauæ, in bonam partem interpretentur. Ita nauigans cum exercitu in Africam Agathocles, territos ob ſolis defectum portenti religione militum animos erexit; affirmās ſi ante profectionem id eueniſſet, ſe pro ominoſo plane, & aduerſo ſibi prodigio id habiturum: at iam proculdubio hoſtibus, quos oppugnatumibant, Deos minari. Addēs ſimul naturalium ſiderum defectum, præſentem ſemper ſtatum mutare; certum ideo eſſe florentibus Carthaginenſium opibus, rebus è diuerſo ſuis afflictis, ſignari & imminere commutationem.

C A P V T VII.

De Pugna nauali, Marte aperto committenda.

Qui Marte aperto nauale cupit committere prælium, curet imprimis, vt alto & libero mari eius ſemper claſſis

sis vtatur, inimicorum verò semper pellatur ad littus: quia pugnandi impetum perdunt, qui detruduntur in terras. Itē curet, vt sint à tergo ipsius aut ad latus insulæ aliquæ, ad quas possit insidias locare; quemadmodum fecerunt Genuentēs, cum apud Caietam cū Alphonso Magno classe decertarēt, sub auspicijs Philippi Mariæ Insubrium Ducis; in eaq; pugna captum cum tribus fratribus tantum Regem, Mediolanum in triumphum deduxerunt.

Præterea, iubeat Imperator milites suos in conflictu vociferari, vt faciunt Turcæ: committaturq; classis cum iubilatione & barritu, & cursu nauium concitatissimo; vexillis expansis, tubisq; sonantibus, vt faciunt omnes ferè Italicæ triremes. Nam & adspectus, & clamor, & rigidi armorum horrores, hostium mentibus terrorem stuporemq; iniiciūt, vt fatentur naues Thunctanæ atque Algerienses, captæ vel à Melitanis Equitibus, vel ab Hetruscis Sancti Stephani. *Si enim equorum cursus, ait Calsiodorus, hominum clamoribus incitatur, & sonantium manibus agitur, vt à multis animalibus velocitas appetatur, quantum inde homines stimulari posse credimus, quos ad laudum audiditatem natos singulariter inuenimus?* Vetus itaque & omnibus penè gentibus vsitatus hic mos, imminente pugna, inclinare, & vociferari ad ardorem excitandum, hostium verò animos percellendum: præsertim cum ex inopinatō & à tergo pignantium existit.

Cum autem tria armorum genera, ex vetere militia, in certamine nauali solent ad victoriam plurimum prodesse, Asseres, Falces, & Bipennes. Ex moderna verò seu recenti militia, bombardæ æneæ, lanceæ, & sclopeta: idcirco curabit Dux, vt hisce quàm maximè abundet, cum ad certamen descendit: globorumq; ac pulueris nitrati, copiam sufficientem habeat. Dicitur autem Asser, trabs subtilis ac longa ad similitudinem autennæ, quæ utroque capite ferrato pendet in malo: hunc, siue à dextra, siue à sinistra parte aduersariorum se vixerint naues, pro vice arietis vi impel-

lunt, qui bellatores hostium, siue nautas, sine dubio proster-
nit, ac perimit, ipsamq; nauem sæpius perforat. Falx verò
dicitur, acutissimū ferrum curuatum ad similitudinem fal-
cis, quod contis longioribus inditum, collatorios funes, qui-
bus antea suspenditur, repentè præcidit, collapsisq; velis
Liburnam pigriorem & inutilem reddit; multò verò magis
onerariam, quæ non nisi velis nauigat. Bipennis denique
est, securis habens ex vtraque parte latissimum & acutissi-
mum ferrum: per has in medio ardore pugnandi, peritissimi
nautæ vel milites, cum minoribus scaphulis secreto inci-
dunt funes, quibus aduersariorum ligata sunt gubernacula.
Quo factò, statim capitur tanquam inermis & debilis nauis.
Sed hæc iam non sunt modo in vsu; restaurata tamen mul-
tum credo, vel sola nouitate sua iuuissent, aut perturbassent
aduersarium.

C A P V T V L T I M V M.

De Insidijs in bello nauali collocandis, aut euitandis.

ETiam in mari ad instar terrestris prælij superuentus fi-
unt ignorantibus nautis: vel circa opportunas insula-
rum angustias collocantur insidiæ; qua in replurimū nunc
valent triremes expeditæ barbarorum, tam è Regno Algerij,
quàm è Regno Thunetano, quæ totum ferè mare Tyrrhe-
num infestant, sed præcipuè Italiam. Audent hoc ipsum &
Turcæ in mari Ionio atque Aegeo, sed non pari exitu, vt pu-
ta grauiores habentes naues, & quibus facile opponuntur
Liburnæ Melitenses, & Magni Ducis Hetruriæ, quamuis lon-
gè numero pauciores. In Oceano verò Germanico nulla
gens superuentibus & insidijs faciendis aptior, quam ex Flan-
dria Durkierkanæ naues, quæ & ardore pugnandi, & peritia
nauigandi superant omnes Battauorum conatus, & multi-
tudinem nauium spernunt. Sicut & Angli, qui per omnia
maria

maria pyraticam exercent. Omnes autem isti tales, hoc ipsum agunt, ut imparatos circumueniant ex inopinato, si vel longo remigio fatigati sunt aduersariorum nautæ, vel si vento vrgentur aduerso, aut pro rostris est rheuma: tum si nihil suspicantes dormiunt inimici, si statio quàm tenent exitum non habet, si dimicandi optata venit occasio, fortunæ beneficijs iungendæ sunt manus, & ex opportunitate prælium conferendum.

Quod si cautela hostium, euitatis insidijs, publico Marte confligat tunc Liburnarum instruendæ sunt acies, non directæ, ut in campo, sed in curuæ ad similitudinem lunæ, ita ut productis cornibus acies media sinuetur; ut si aduersarij per-rumpere tentauerint, ipsa ordinatione circumdati depri-mantur. In cornibus autem præcipuum robur & militum & liburnarum collocetur, quemadmodum fecerat contra Turcas Bragadinus Classis venetæ Præfectus, & Ioannes Au-striacus in pugna illa Naupactensi; tum quoque Andreas Do-ria in pugna cum Hadruccio atque Hariadeno, fratribus Iu-dæis, præfectis Classium Turcicarum.

Quantum verò ad insidias, illæ variè ac variè in mari collocantur pro oportunitate loci, & insularum circumiacentium, quæ tamè astu militari seu stratagemate peraguntur felicius; quia nemo tam oculatus est, ut falli non possit. Et Alcibiades sane aduersus Lacedæmonios cum classe ab Atheniensibus missus, constituit, prælio decertaturus, malos quosdam in promontorio, præcepitq; his quos ibi relinquebat, ut cum prælium commissum sensissent, panderent vela. Quo facto consequutus est, ut hostes aliam classem in auxilium superuenire ei arbitrati, verterentur. Contra, Memnon Rhodius nuali prælio, cum haberet ducentarum nauium classem, & hostium naues elicere ad prælium vellet, ita ordinavit suos, ut paucarum nauium malos erigerent, easq; primas agi iuberent: hostes autem procul conspicati numerum arborum, & ex eo nauium quoque coniectantes, obtulerunt

se certamini, & à pluribus occupati superatiq; sunt. Marcus verò Porcius impetu in classem hostium cum transiluisset, deturbatis ex ea Pœnis, eorumq; armis & insignibus inter suos distributis, multas naues hostium, quos sociali habitu fefellerat, merfit. Fecerunt hoc, & quidem non semel Dunkierkani Holandis, Holandi Portugallensibus, & hi denique Calecutensibus, Goanis atque Arabibus ab Delu in subsidium illis venientibus. Sed & Poloni non nulli Duce Marco Iachimouio è seruitute Turcica vindicati, sumpto vestitu & insignibus barbarorum, quos interemerant in eorum triremibus, multas denide naues ex Ægijpto cum mercibus venientes diripuerunt ac submerferunt, ipsi que Rhodo terribiles fuerunt; sed quia pauci erant, nihil tentarunt.





SIMONIS STAROVOLSCI
INSTITVTORVM
Rei Militaris

LIBER SEXTVS
De Strategematibus.

CAPVT PRIMVM

De Strategematis in genere.



STRATEGEMATA Græce vocantur callida & astuta Ducis belli consilia; credo, quia aut manant inueniunturq; à Duce, vel quia bono illo maximè digna, vt vult Iustus Lipsius antiquitatum peritissimus.

Cuius opinione semper in bellis vtile fuit moliri aliquid in hostes, nouis præsertim inuentis & vafra-
mentis. Nam sicut in Musicis, ait Xenophon, noua queque
& florida habentur in prætio: sic in rebus bellicis noua inuenta e-
xistimantur longè illustriora, quoniam hæc queunt magis hostes
decipere. Qua in re maximè excellebat Agesilaus apud Græ-
cos; Scipio apud Romanos; Hannibal apud Carthaginen-
ses; Ismael Sophi. apud Persas; & nostra ætate Mauritius
Nassouius apud Hollandos.

Quia

Quia verò bellica Strategemata sunt iam inter Duces vfitata, & iure gentium à tot sæculis probata, ideo qui illis decipitur, aut per illa cladem in pugna refert, non de dolo hostis, sed de sua imprudentia conqueri debet. Corporis siquidem robore, vrsi, leones, apri, atque lupi dimicant, qui vt viribus superiores nobis, ita ingenio & ratione infra nos sunt, qui ingenij solertia hostes nostros deuincere debemus. Hinc supra nominatus Xenophon ait, *Operam dandam bono Duci, vt cum suis paratis hostem non instructum deprehendat, cum armatis inermem, cum vigilantibus dormientem, conspectu ab se, cum is illum non videret; denique vt locorum difficultatibus impeditum, ipse constitutus in loco commodo adoriatur.* Strategematum itaque vis propriè posita est in arte solertiaque Ducis, tam vbi cauendus, quàm vbi opprimendus hostis sit. Qua nimirum solertia pulchrè certarunt inter se, maximi illi Duces, Annibal Italiam, Scipio Africam; vterque habuit exercitum è diuersis populis & linguis collectum; vterque in mari & interra imperabat; & vterque astu militari & ingenio valebat. Sed magis dolis præualebat Scipio, quibus ille superauit Asdrubalem in Hispania, Siphacem Regem Numidiæ in Africa, atque demum ipsum Annibalem; qui occisis centum millibus Romanorum ad Trebiam, Trasimenum & Cannas: consumptoq; inaniter tempore circa Casilinum, Cirignuolam, Cumas, & Nolam, debebat necessario relinquere Italiam, & defendere patriam suam à Scipione, qui hostem Pœnum in Italia non vidisset.

Quatuor autem partes habet sagacitas militaris, qua præditi Duces aduersarios suos in bellis stratagematibus superant. Prima est. Prouidere pericula. Secunda. Scire vti occasione ad decipiendum hostem. Tertia. Effugere damnum cum incideris in periculum. Quarta denique, & omnium maxima. Paratas sibi insidias conuertere in damnum aduersarij.

Quantum ad primam partem spectat: dicebat Timoteus
è Du-

è Ducibus belli præcipuus, quòd providere pericula nil aliud est, quàm habere oculos non solum in facie, sed etiam in tergo. Vel ut dicebat Sertorius, *cauere sibi etiam à tergo, non solum à fronte.* Cautissimus hac in re dicitur fuisse Viriatus, quem Hispani elegerant sibi in Ducem, inquit Iustinus, *ut cauendi scientem, declinandiq; peritum.* Talis quoque dicitur fuisse Erasmus Gattamelata, & posteriori sæculo Alexander Farnesius.

Quantum ad secundam: nimirum vti occasione & commoditate ad decipiendum astu aliquo egregio inimicū, primarius quidem fuit Annibal, qui nusquam publico Marte congressus est, non præparatis antea aliquot insidijs. Sciebat enim benè, quòd occasiones rei ex animo gerendæ, non semper occurrunt, & semel amissæ raro redeunt, interuersæ verò omnino euanescent; ideò si vnus ei dolus non successisset, habebat in promptu alium, modò aduersarium non dimitteret absque aliquo damno. Idē faciebat Georgius Scanderbegus; Idem Mathias Rex Hungariæ; tum Alphonsus Secundus Rex Neapolis, & Ludouicus Sfortia Dux Mediolanensis.

Quantum verò ad tertiam partem, scilicet cum incidetis in periculum, saluum educere ex insidijs præparatis tuum militem, hoc nemo melius sciebat Annibale solo, qui à Q Fabio interclusus cum euadendi viam nullam videret, aliquot millia bouum præmisit lignis ficcis ad cornua ipsorum alligatis & accensis, qui igne adurente, cum boitu & impetu magno irruerunt in Romanos, pellentibus à tergo Pœnis; totumq; exercitum Fabij nouitate rei conturbarunt, & Annibali viam aperuerunt. Suppar huic Themistocles dicitur fuisse, de quo ait Thucidides, quod *ἔξ de instantibus atque impronisis verè, ἔξ de futuris callidissimè conijciebat.*

Quantum denique ad quartam atque vltimam sagacitatis militaris partem, quæ supra omnia requirit ingenij vires? & non solum hoc vnum exigit, ut se Dux belli eximat periculo,

culo, cum in insidias cum suis præcipitatus fuerit, sed ut periculum quoque illud in hostem conuertat; hac in re inquit Plutarchus, nemo vnquã ex Ducibus superauit Sertorium: ex Sarmatis verò nemo affecutus Boleslaum Chrobrium. Et licet Probus ita celebret Alcibiadem, ut dicat eum tanta fuisse sagacitate, ut decipi non posset, præsertim cum attendisset ad cauendum; nihilominus consideratis rebus ab illo gestis, & nonnollorum Polonorum nostrorũ, puto nec Seciechum Palatinum Cracouiensem, nec Vitoldum Ducem Lituaniæ, nec denique Carolum Chodkieuicium, illo inferiores fuisse: quandoquidem neque acutius alicuius Imperatoris cogitatum, ut Vitoldi, neque celerius factum, Chodkieuicio Duce video. Et Bohemi, Morauï, Saxones, Pomerani, Rusi, Prusiiq; victi fuere, magis consilio Seciechi, quàm armis Polonorum: quamuis probe sciam, non aliu magis, quàm vera virtute bella gessisse maiores nostros.

Iterum Stratagemata, seu gesta, consiliaue militaria, quadrifariam diuiduntur. In ea videlicet quæ competant prælio nondum comisso. In ea quæ tempore prælij ad obtinendam victoriam conferant. In ea quæ post prælium ad conficiendam pacationem pertineant. Et in ea quæ inferendæ soluendæq; obsidionis habent solertiam & artificium. De prioribus tribus generibus hoc præsentì, de vltimò verò sequenti libro agemus.

C A P V T . . . I I.

De ijs quæ facienda sunt ad ante pugnam.

Quemadmodum nulla in terris pictura tam absoluta est, quin pictor alius aliquid in ea corrigere non præsumat. Ita laudatissimorum etiam Imperatorem nemo vnquam fuit, aut esse potuit, qui virtutibus altis & ingeij solertia eminens, erroris alicuius in bello, & vitiorum in moribus

bus non arcessetur. Vt melior ipso dici non possit. Accusabatur Cæsar, non in Curia tantum, sed in castris etiam, non ferendæ ambitionis, Alexander temulentiaæ arguebatur, Pyrrhus præcipitis consilij Hannibal dubiaæ fidei & voluptatis, Fabius tardi certaminis, Marcellus affectatæ pugnaæ, Seuerus crudelitatis barbaricæ in milites. Attamen omnes hos, non tantum antiquitas in celebratissimos Imperatores habuit, & venerata est, verum etiam posteritas, inter optandorum Imperatorum Archetypos, omnium sæculorum consensu inseruit. Quorum solertia facta in bellis, prudentissimaq; consilia breuibus futuro bellorum Duci adnotare statuimus, addendo selectiora exempla, & ex alijs diuersarum gentium bellatoribus congesta; cerrocertius sciens, quod quemadmodum nemo omnium adeò bonus est, vt nihil in eo reprehensione dignum inueniatur; nemoque adeò malus, nihil in eo laude dignum appareat. Ita quoque nullus populus, nullumq; Regnum in terris adeò sterile est, vt nihil habeat laude dignum, nihil gerat posteritati commendabile, nullos producat viros magnos tam in toga, quam in sago excellentes. Quandoquidē nulla etiā gens, aut natio est tā perfecta, vt nihil habeat repræhensione dignū. Proinde nō Græcorū tantum, aut Romanorum, Dux belli futurus imitetur exempla, sed ex omnibus omnium qui in Orbe sunt populorum, rebus in bello præclare gestis, colligat sibi militarem prudentiam. Et antequam ad publicum certamen descendat, vt eò faciliore victoria potiatur, hæc diligentissimè obseruet.

1. *Noscat ingenium aduersariorum: tum maximè Ducis ipsorum.* Ita Cæsar, primum Gallorum impetum plus quam virorum esse, ceteros minus quam fœminarum, optimè sciens, vt cum feroce gente, non statim dimicare cogeretur, nihil missis ad se legatis negauit, nihil etiam concessit: donec opportunum ad pugnandum tempus aduenisse iudicans, cum securi illi nihil minus quam pugnam timerent, vsus occasione facili negotio superauit. Ita quoque Gustauus, sciens

Polonos parum in expugnandis munitionibus valere, nihil verò in mari audere; toto bello Prussico, intra munitiones suas se continuit; ut nusquam à mari, aut Vistula recessit.

2. *Consilia sua occultet quàm maximè: potiusq; ea per signa denunciet, cum opus est, quàm per verba.* Sic Tarquinius Superbus pater, Principes Gabiorum interficiendos arbitratus, quia hoc nemini volebat innotescere commissum, nihil nuncio respondit, qui ad eum à filio erat missus; sed eminentia papauerum capita, cum fortè in horto ambularet, virga decussit. Nuncius sine responsione reuersus, renunciavit adolescenti Tarquinio, quid agentem patrem vidisset: ille intellexit, idem esse eminentibus faciendum. Cæterum in occultandi suis consilijs nostra ætate, nemo vnquam superauit Mauritium & Henricum Nassouios, Imperatores Batavorum, qui vel hoc solo astu plurimas in Belgio vrbes Hispano ademerunt. Secretissimè enim faruandum suis Tribunis dicunt, hoc se velle facere vel aliud, cum tamen hoc faciendum nusquam intendant, sed semper quid diuersum, & inopinatum.

3. *Hostium consilia diligentissimè exploret.* Ita Carthaginenses cum animaduertissent Alexandri Magni ita magnas opes, ut Aphricæ quoque immineret, vnum exciuius virum acrem, nomine Hamilcarem Rhodinum, iusserunt simulato exilio ire ad Regem, omniq; studio in amicitiam eius peruenire, qua is potitus, consilia eius nota ciuibus suis faciebat. Chodkieuicius duos fratres Liuonenses in aula Caroli Sudermani sumptu ingēti alebat, per quos omnia deinde eius consilia cognoscebat; honorato siquidem apud eum loco (exulum nomine) habebantur, ordinesq; in castris ducebant primarios. Carolo autem defuncto, penes filium ipsius Adolphum Gustauum usque ad obitum Chodkieuicij manserunt.

4. *Principium belli procuret quàm optimum fieri.* Ita Scipio Aphricanus cum exercitu contra Pœnos missus in primis.

primis procurabat Nouam Carthaginem euertere; gnarus, ut initia belli prouenissent, famam in cætera fore. Atque ita curauit, ut expugnaret eam. Quapropter ubicunque aliqua difficultas reperiiebatur, ipse ibat in persona, volens animi sui magnitudinem monstrare: in alia verò loca mittebat Martium Sillanum, Lælium, & fratrem suum, quod Liuius hisce verbis expressit. *Martium secum habebat cum tanto honore, ut facile appareret, nihil minus eum vereri, quam ne quis obstaret gloriae suæ.* Idem planè fecit Zamoscius, à Stephano Rege omnium cum inuidia exercitibus in Moscouia præfectus, cum munus illud Nicolaus Melecius, magnæ experientiæ Dux, vltro resignasset, offensus a superiori dicto Regis Stephani in gentem nostram, cum expugnata Polocia Rex in corona Senatorum dixisset, nequaquam se tam cito potitum fuisse victoria, aut omnino expugnare potuisse Polociam, ni Hungaros pedites secum adduxisset. Quare multo fortiori munitione absque ope Hungarorum intra tri-duum Melecius expugnata, munere sese Imperatorio abdicauit, & cum bona Regis venia, domum discessit. Zamoscius, qui Procancellarij munere pollens, vir pacis & litterarum tantum existimabatur, eo honoris fauore Principis inopinatò progressus, ut in omnia semper prudens erat, ita & in bellico munere quàm optimum procurauit fieri principium; progressusq; Lucos, ita fidissimam illam urbem expugnauit, ut omnia pericula solus obiret; reliquos autem qui eo munere & dignitate defungi auebant, in alia loca mitteret, ubi minus quidem periculorum, sed & famæ haberent.

Luki

5. *Suspectos reddat hosti amicos illius vel è contra illis, Ducem ipsum belli.* Ita Metellus cum in Iugurtham moueret, qui cum omnibus legatis, quos Iugurtha ad ipsum miserat, egit ut Iugurtham traderent, litteris quoque ad eosdem crebro ea de re missis: quibus effecit ut Iugurtha omnium necessariorum fidem suspectam haberet, atq; eos varijs modis extingueret. Et Hannibal absumptis igne prædijs Romano-

rum solius Fabij agris pepercit, (Tum ante eum Coriolanus vrbi cum exercitu imminens nobilium prædia seruasse scribitur, plebis verò agros vastasse) cui viceuersa Romani effecerunt cum ad Antiochum confugisset; omnes enim legatos suos quos ad Antiochū mittebāt, iusserunt familiariter Hannibalem habere, adeò vt Antiochus in suspicionem ea re pertractus, consilijs ipsius deinceps parum fidei adhiberet.

178 6. *Etiam sapientis Ducis est, inter hostes ipsos discordiarum serere causas, & sic distringe eos.* Ita Annibal Fabium, cui ueque virtute, neque artibus bellandi par erat, odiosum populo Romano reddere omni modo curauit, perq; subordinatos homines laudauit virtutē cæterorum Imperatorum, de Fabio verò sinistre omnia loquebatur, præter quod sibi amicissimum prædicaret. Sciebat enim quod sic conflatum inter ciues odium, ad inimicorum perniciem præceptum est, ad vtilitatem vero suæ defensionis incautum. Ita Emmanuel quoque Comuenus dissidia inter Pontificē & Fridericum Imperatorem aluit: nec vlla erat in Italia, cæterisq; Imperatoris Germanici ditionibus ciuitas, in qua non addictū sibi hominem haberet Emmanuel. Nostraq; ætate Kantimirus Scythæ, deuictis vastatisq; cæterorum Procerum in Podolia villis, vt odiosum nobilitati redderet Stanislaum Zolkieuium Ducem exercituū Regni Poloniae & Cancellarium Supremum, agrorum illius populationem inhibuit; sed nihil effecit, prudentioribus astum barbari, minorum gentium Quiritibus, cur ab hoste factus sit, oportunè interpretantibus. Alexander verò Zolkieuius Palatinus Smolenscensis, cum tempore belli Moscouitici, deductæ illorum vrbi Metropoli Moscuae præesset, nec haberet vires ad resistendum aduersarijs, qui diuersis è partibus ad recuperandam urbem, cum exercitibus confluebant, fictis illorum nominibus, literas diuersimodè ad diuersos Moscorum Proceres dedit, quibus illos Duces sibi amicos, tantis corruptionibus factos demonstrabat, rogabatq; simul vt illi quoque paria ab illo munera.

munera capere vellent, & in fide Regi Poloniæ semel data, constanter permanerent. Quo actu effecit, ut ciuile inter se bellum exercendo, Demetrium Suiscium, quem Principem suum inaugurauerant, prorsus desererent; nec agnoscerent dolum, nisi cum periissent omnes.

7. *E contra diligenter caueat ne in eius castris discordia suboriantur: & litteras hostium quibus militum ciuiumue fides ad scelus sollicitatur supprimat.* Et si enim satis beneuolentiæ & fidei suorum confidat, tamen non sunt imbuendæ aures militum promissionibus & corruptionibus. Ideo prudenter Senatus Polonicus litteras Gustauæ igni publico in comitijs Varsouiensibus mandauit, quod per eas varij varijs promissis, sed præcipuè Cosachi Zaporosenses, & diuersæ ab Ecclesia Catholica religionis homines, in partes Sueci sollicitarentur. Quod si verò pluribus innotuerit prodicionis merces, in parte consilij erit, Eumenis Regis factum. Epistolæ sparsæ erant totis castris, quibus, qui Eumenis caput ad Antigonom detulissent, maxima præmia definiebantur. Eumenes vocatis ad contionem militibus, primò gratias egit, quod nemo inuentus esset, qui spem cruenti præmij fidei sacramento anteponeret. Deinde callidè subnectit, confictas has à se litteras ad experiendos suorum animos. Hoc facto & in præsens dubios fidei deterruit, & in futurum prouidos, ut si quid tale accidisset non se ab hoste corrumpi, sed à Duce tentari arbitrarentur. Amorem itaque militum Imperator sibi conciliet, & diligenter caueat ne inter eos aliquæ seditiones suboriantur, sed perpetua concordia & obedientia maneat.

8. *Copias hostium imminuat atque discriminet.* Quasane via usus fuit Fabius, cum Gallos, Tuscos, Umbros, atque Samnites aduersos haberet; bellum siquidem in eorum ditionem transtulit, & sic eos ad sua defendenda reuocauit qui parte exercitus in agro Romano relicto, maiorem partem contra Fabium miserunt. Fabius ut diuisas hostium copias animaduertit, cum parte pugnare facilius esse putauit.

uit, quàm cum integro exercitu: igitur prælio commisso victoriam de illis obtinuit. Chodkieuicius pari ratione cum Suecis, bellum in Liuania habens, processit, imparesq; hosti copias habens trans Dunam nocturno tempore concessit, Mansfeldius qui Suecis præerat, Chodkieuicium fugeratus, mox ponte instructo sequi eum statuit: at Chodkieuicius qui longè cum suis à ripa recesserat, ut partem exercitus hostilis fluuium transiisse aduertit, obuensis celeriter equitibus suis, derepente hostem inuasit & oppressit, dum pars illorum altera, in ripa vltiore consistens, ingemisceret solummodò morti suorum, & dentibus frenderet quòd cadentes iuuare non posset.

9. *Si in castris hostilibus militum seditionem facere non poterit: aut mercenarios illorum promisso maiori stipendio abducere, saltem inter Duces ipsos similitates & odia per subordinatos homines ferat.* In bello enim nihil præstare maius fortuna tibi poterit, quam Ducum aduersariorum discordiam, qui communissimè diuersarum nationum esse solent, & de gloria inter se certant. Vnde Vegetius, *Inter hostes discordiarum serere causas, sapientis est Ducis.* Nulla enim quamuis minima natio potest ab aduersarijs deleri, nisi proprijs similitudinibus se ipsa consumpserit. Ita Romani ciuilibus bellis disiuncti perierunt. Ita Græci discordia iugum Turcicum subierunt. Ita succubuerunt Hungari vicini nostri. Nunquam Gallos Angli nisi secum disidentes fregerunt. Fessarumq; Princeps Serifus Fessam urbem ciuili sanguine exhaustam facile subegit. Manifestum enim est, vix vinci posse aliquos, nisi ipsi se perdant æmulatione inter se suscepta. Quod confœderati Belgarum Ordines euitare volentes, perpetuò ad pacem & concordiam ciues suos & Duces exhortantur, etiam publicum æs, hac eadem admonitione superscripta signando. Concordia res parue crescunt, discordia maximæ dilabuntur. Ut, quia nemo sine pecunijs esse potest, quicunque milites

lites ciuesque, essent, id vnum agerent, quomodo vnanimi cōfessione saluam Rempub. seruarent, hostibus, resisterent.

10. *Amicos sibi reddat illius provinciae incolas, in qua bellum gerendum est.* De quo vetusta exempla petere nolo, quia recentia adhuc in oculis & memoria hærent. Gustauus nuper Germaniam bello aggressus, ita sua comitate, fecilitate, ac modestia militis disciplinati, omnium populorum ad se animos traxerat, ut Cæsarianum militem discolum & insolentem peius cane & angue execrarentur, passimque pro viribus contra Imperatorem Dominum suum Suecis opitularentur. Simili modo Poloni propter nimiam licentiam in proprio solo execrabiles sunt paganis: in hostico verò propter rapinas & insolentiam nusquam experti sunt fauorem Moscorum, cum iam totum Imperium illorum possedissent; nusquam fideles habuerunt Valachos Moldauosque; licet toties pro ipsorum incolumitate bella contra barbaros suscepissent. Qui enim licentius in beneficiarios suos agunt, Tyrannorum more in innocuos grassari videntur; ac proinde odio potius quam gratitudine digni esse videntur.

11. *Rem viribus suis imparem non aggrediatur.* Albertus Dux Prussiae, collecto emendicatis suffragiis exercitu, bellum Sigismundo I. auunculo suo intulerat, ut ab eo Prussiam, armis extorqueret, quam deserta Catholica Religione hæreticus amiserat; cæterum profligatus per superuentus, ut ad publicum prælium deuentum esset, omnium egens & inops, supplicare Sigismundo debuit, ut honestam ab illo viuendi rationem obtinere posset, cui regnum ipsum eripere minabatur. Pulchre Liuius de Lucretio. *Id prudenter, ut in temere suscepta re, Romanus fecit, quod circumspectis difficultatibus, ne frustra tempus tereret, celeriter abstinit incepto.* Incerti enim exitus pugnarum inquit Cicero, & Mars communis, qui sepe spoliantem iam & exultantem euertit, & perculit ab abiecto: præsertim cum hostem tempus deteriore indies, & locus alienus facient.

12. *Contra aduersarium suum hostes alios excitet.* Hoc modo Michaël Palæologus à Carolo Cæsare bellū metuens, Sicilia Regem & Venetos ad bellum illi faciendum exciuit: exemplo, inquit Nicephorus Gregorias Artaxerxis, qui Agesilai impetum formidans, Thebanos & Athenienses ad bellum ei inferendum impulit. Et Sigismundus I. bello cū Moschouitis orto, Scythas Tauricanos à parte alia in eos immisit. Et nouissime bellum Mantuanum in Italia, distraxit vocatus à Septentrione Gustauus Rex Sueciæ.

13. *Prouideat ne vna mole bellū ingruat, sed & suis confæderatorum viribus distributis, pluribus locis hostem laceffit.* Ita Romani, maximis suis necessitatibus & extremis, cum ab Hannibale non semel victi essent, dimissis quibus summo pere indigebant exercitibus Ducibusque, denique summa ærarij inopia, & in Italia, & in Hispania, Sicilia, Græcia, vno eodemque tempore cum Carthaginensibus bellum gesserunt. Ita nunc Ludouicus XIII. Imperium Romanum diuersis in locis vnà oppugnat, domumque Austriacam per varios confæderatos ac socios laceffit: per Parmensem & Sabaudum in Italia: per Hollandos in Belgio & in Nouo Orbe; per Suecos in Silesia & Pomerania: per Hassium in Vestphalia; per Vaimariensem in Alsatia, per suos verò exercitus in Flandria, in Burgundia, in Nauarra & in Lotharingia; tum classe in mari Thyrræno, & Oceano Germanicio.

14. *In id omni semper cura incumbat, ne nouis auxilijs hostilis exercitus firmare se possit.* Ita Romani non permiserunt Asdrubalem, ad fratrem Hannibalem venire. Ita Vladislaus IV. obfesso exercitu Moscouitico ad Smolenscum, contra venientia subsidia variè dimisit Duces suos, Martinum Kazanouiū, Paulum Piaseciū, Alexandrum Gonsieuiū, atque alios, vt confligerent cum ipsis, vbicunque eos nacti fuerint. Dum enim omnis auxiliij aliunde obtinendi spes euanescit, facile circumsepti se dedunt.

15. *Curet ne subsidia ad se venientia in itinere opprimantur.*

tur. Ita cum Titus Didius exiguas copias respectu hostium haberet, atque legionem subsidiariam Româ expectaret, ne hostes fortè illam interciperent, sicuti facturos constabat simulauit se postridie prælio decertare velle, inde fuga quibusdam captiuorum non ægrè concessa, quo consilium istud per hos diuulgaretur, id affecutus est, vt hostes de prælio vt opinabantur iam certi, copias suas diuidere dubitarent, & legionis illi curâ omitterent, quàm quidem ea ratione saluū ad se recepit. Chodkieuici verò volens præfidiarios in arce Smolenscensi, quæ circumcirca obsidebatur à Moschis, recenti milite & commeatu prouidere, misit tubicinem ad hostem, ad publicum præliū prouocando. Moschi cum vidissent Chodkieuicium cum tribus tantum millib⁹ hominum venisse, egressi è munitionibus suis circiter millia quadraginta pugnam illi præsentârunt, qui post nonnullas velitationes cœpit paulatim cum suis retrocedere, vbi hosti insidias parauerat, misso ad eos iterum tubicine, quòd nollet cum tanta multitudine temerè congredi, nō enim sperabat Moschum posse tantum exercitum habere, Responderunt hostes se adhuc plures intra munitiones esse, quos videbit mox Chodkieuicius, & numerabit capt⁹ ductusq; ad castra eorum. Atque sic clamore sublato cæperunt retrocedentem sequi, etiā qui ad vallum custodiendum relictī fuerant: quo ille conspecto, eò velociore gradu fugam simulabat, vt tantò remociti⁹ hostē à suis munitionibus reduceret. Interim verò parte ab altera qui cōmeatum deducebant, impetu in eorum munitiones fact⁹, facile paucos resistentes repulerunt, & in urbem annonā inuexerunt. Moschi clamore pugnantium suorum à tergo exaudito, dolū aliquem adesse subodorati, confusis ordinibus retro cedere cæperunt, & Chodkieuicius obuersis suis celeriter extremum agmen aggressus aliquot ex eis millia cecidit.

16. *Hostem domi non expectet, sed in illius provincia sedem belli faciat.* Sic enim & miles tuus ex alieno viuit, & cum ne-

mo resistit, vincendo debiliores ciuitates præda & animo augeatur, hostium verò animi decrescunt, quod victoriæ toties assueti, nunc vinci aliquando sese animaduertant. Ita Carolus Sudermanus, ex Governatore Rex Sueciæ factus, cum probè sciuiisset Sigismundum III. Regnum suum necessario vindicaturum, bellum in Liuoniam intulit, inopinatoq; veniens, omnes vrbes absque præsidio Polonorum, qui minime bellum sibi à Sueco inferri sperabant, in vno instanti expugnauit, atque ita totam prouinciā possedit. Eodem astu filius suus Gustauus vsus, non tantum in Liuoniam, Sed in Prussiam quoque irrupit, nulla belli denuntiatione facta.

17. *Vbi hostis tuam prouinciā ingressus fuerit, ad sua defendenda eum compelle.* M. Curius aduersus Sabinos, qui ingenti exercitu conscripto, relictis finibus suis Romanos occupauerant, occultis itineribus manum misit, quæ desolatos agros eorum, vicosq; per diuersa incendit. Sabini ad arendam domesticā vastitatē recesserunt Curio verò contigit, & vacuos infestare hostium fines, & exercitum sine prælio auertere, sparsumq; cædere. Iagello quoque Poloniæ Rex Bello cum Crucigeris durante, quo Bohemos subsidia illis ferentes distineret, Coributum fratrem, cum non contemnendo exercitu in Bohemiam misit, qui fines eorum ingressus, non tantum bello eos vexauit, sed factionibus quoque in partes scidit, sollicitando animos multorum, ut corona potiri possit. Igitur Crucigeri auxilio Bohemorum destituti, & inauspicati belli cum Polonis pertæsi, legatos de pace ad Regem miserunt. Veneti autem prælio victi à Genuensibus, cum iam hostis vrbi immineret, facto cum Bernabone Vice comite fœdere, Genuenses summa vi domi suæ aggressi sunt. Inde factum, ut quæ suis, qui Fossam Clodiam occupauerant, submittere auxilia parabant Genuenses, domi retinere cogerentur, & Fossa Clodia in potestatem Venetorum rediret. Ut hic taceam Scipionem, qui manente in Italia Hannibale, transmissio in Africam exercitu,

tu, necessitatem Carthaginensibus imposuit reuocandi Hānibalem, sicq; à domesticis finibus hostile transtulit bellum. Et Amurathes Turcarum, Græcis bellum in Asiam molientibus cum reliquis Principibus Christianis, in Europam inopinatò irruit, effecitq; vt exercitus, qui per mare ituri erāt, propria defendere cogerentur.

18. Metum dissoluat in animis suorum militum: & emulationem quandam in eis ad pugnandum excitet. Ita C. Cæsar, aduersus Germanos & Ariouistum pugnaturus, confusis suorum animis (pauidis enim semper in incerto consilia sunt) pro concione dixit, nullius se eo die opera, nisi decimæ legionis, vsurum. Quo consecutus est, vt decimani, tanquam præcipuæ fortitudinis testimonio cogerentur pugnare, & cæteri pudore, ne penes alios gloria virtutis esset, accensi, decimanos fortitudine superare conabantur, hostesq; eò fortius aggrediebantur. Pari exemplo Stephanus Rex in Moscouia bellum gerens, suis Hungaris omnia confecta esse dicebat, quæcunque ex hoste trophæa retulisset. Æmulatione ducti Poloni, cum Meletio, separatim iuerunt, & quā Rex aggredi non audebat munitionem Sokolæ, vna die expugnarunt. Lituani itidem separatim; partim cum Nicolao Radiuillo, Supremo gentis suæ Militiæ Duce; partim cum Philone Kmita, Palatino Smolenscensi: partim cum Francisco Succo, Kosachorum Nisouiensium ductore, exercitus Moscouiticos profligabant, munitissimasq; quasuis eorum arces expugnabant.

19. Persuadeat militibus, hostem esse contemnendum. Sic Gelo Syracusarum Tyrannus, bello aduersus Pænos suscepto, cum multos cepisset, infirmissimum quemque, præcipuè ex auxiliaribus, qui nigerrimi erant, nudatum in conspectu suorum produxit, vt persuaderet contemnendos. Similiter Vitoldus contra Tamerlani Ducem Battium, Borythenis catharactas cum suis Scythis superantem moturus, quos superiore anno barbaros in prælio ceperat, macilen-

ros, tabeque carceris consumptos in medium castrorum produxit, & Polonis nequaquam timendos eiusmodi hostes esse dixit, qui licet infinito ferè modo multitudine eos superarèt, fortitudine attamen bellicosus Sarmatis nusquam essent pares. Scriborius quoque Scriborouicius Polonus, sub Ludouico Rege in Hungaria Transylvaniæ Palatinus, quum nonnullos ex Turcis cepisset, quorum tegumen capitis albū, multum terroris præfert, quoties terga tygridum aut leopardorum pellibus tegunt: nudatos militibus suis, quos è Polonia tyrones scripserat, pro concione ostendit, utque homines sibi similes esse scirent, nec timendos in prælio, suavit: quinimo ut pingua eorum corpora, tanquam bello inepta contemnerent, multis rationibus monstrauit.

20. *Prodigia, & signa aduersa, quibus milites consternantur, in bonam & auspiciatam partem explicet, & interpretetur.* Vti fecit Chabrias Atheniensis classe dimicaturus; excusso namque ante nauem ipsius fulmine, exterritisque militibus, dixit. Nunc potissimum iucunda pugna est, cum Deorum maximus Iupiter adesse numen suum classi nostræ ostendit. Andreas verò Sapieha, in Liuonia cum præfidiarijs à Gregorio Chodkieuicio relictus, contristatis militibus indefensione Vendæ, quod vexillum illius ventus de muro ablatum, in sepulchrum cæsorū ante aliquot Menses Moscouitarū depulisset. Nolite, inquit, milites trepidare, Moscouitis significatur etenim certus interitus, quandoquidem super sepulchra militarium Virorum, vexilla appendi solent ornatus gratia, quos Dei auxilio occidemus. Dixit, & superuenientes Moschos fortiter aggressus, aliquot ex eis millia in acie cecidit.

21. *Promissam sibi à Superis victoriam, aut per somnium, aut per visionem aliquam pronunciet: atque ita militibus suis, siue illud verum sit, siue non, animos ad pugnam religionē accēdat.* Hinc Archidamus Lacedæmonius aduersus Arcadas bellum gerens, arma in castris statuit, & circa ea duci equos noctu

ctu, clam imperavit: quorum vestigia mane (tanquam Castor & Pollux perequitasent) ostendens, adfuturos eosdem ipsis præliantibus persuasit. Casimirus verò Monachus Rex Poloniæ publico prælio cum Lituanis, barbaris tunc, & Iazigibus, decertaturus, dixit se vidisse in somnijs Michaëlem Archangelū, promittentem sibi certam de paganis victoriam. Vnde & templum ei expergefactus vouerat. Atque animatis ita militibus, victoriam ingentem obtinuit, ac de spolijs hostium, votum exoluturus in arce Lublinensi, quod etiamnum durat, delubrum, cœlestis militiæ Duci, in signū gratitudinis extruxit.

22. *Statum belli immutet, ut hostis inopina re percussus animo concidat, & vel recedere à proposito cogatur, vel tali genere prælij tecum decertare, quale nusquam prænderat.* Sic Themistocles aduentante Xerxe (quia neque prælio pedestri, neque finium tutelæ, neque obsidioni credebatur sufficere Athenienses) author fuit eis, liberos & coniuges Træzena, & in alias vrbes emittendi, relictoq; oppido, statum belli ad naturale prælium transferendi. Idem fecit in eadem ciuitate Pericles aduersum Lacedæmonios. Et in Liuonia Chodkieuicius aduersum Suecos, qui cum scirent benè, Polonos pugnæ maritimæ non esse assuetos, negligentius sese gesserunt, & cum nauibus suis ad Dunemundam securè accesserunt, quò copias suas in terram exponere possent. Ille nauibus mercatorum Angliæ, quæ Rigæ negociabantur, precio conductis, militem Polonum eis imposuit, & nil tale cogitantes Suecos aggressus, prælio nauali supra omnium spem & opinionem vicit.

23. *Aliud semper faciat, quam quod se facere simulat aut ostendit.* Sic Agesilaus Lacedæmonius, tenentibus angustias Thebanis, per quas transire habebat, flexit iter quasi Thebas contenderet: exterritis Thebanis digressisq; ad tutanda mœnia, repetitum iter quod destinauerat emensus est, nullo obsistente. Sigismundus III. cum toto quasi bien-
nio

nio Smolenscum obsideret, nec potuisset tam munitam urbem, quam quadraginta hominum millia defendebant, expugnare, iussit conuasatis rebus castra sua incendere, & domuitionem promulgare. Moscouitæ diuturna obsidione fatigati, ut Regem toto cum exercitu abire conspexerunt, conuiuia & cœnas præ lætitia instruxerunt, ultraq; solitum Baccho indulgentes, stationes in muris, statim negligentius agere cæperunt. Rex verò nocte obscura cum omnibus ad oppugnandum requisitis accedens, urbem in coronam inopinatò aggressus, cum omnium admiratione in potestatem redegit. Post cuius obitum, dum tempore Interregni Moschi eam recuperare vellent, accitisq; transmarinis populis, centum triginta millibus eam obsediissent. Vladislaus IV. in solium paternum sublimatus, confestim obsessis subsidio veniens, ut aliquot hostium munitiones expugnauit, reiectumq; à mœnijs Seinum intra suum vallum conclusit, & quò celerius eum expugnare posset, montem castris hostium, qui ab alaudis nomen habet, vicinum occupare instituit, sed quem Moschi facillimè ipsi occupare potuissent, si Regis consilia perspicere valuissent. Qui castris de die motis, recta se in Moscouiam velle ire simulauit, & aliquantulum via ordinaria progressus, sequenti statim die à tergo hostibus comparuit, & montem supra dictum frustra defendentibus illis occupauit, atque demum assiduis prælijs fatigatos, ad deditiōem coegit.

24. *Eum statum belli eligat, quem putat sibi esse utiliore.* ut C. Cæsar bello ciuili fecit, qui cum exercitum veteranum haberet, hostium autem tyronem esse sciret, acie semper, prout & Alexander Magnus, decertare studuit, in qua nusquam illi fuerunt exercitati. Ita quoque & Chodkieuicius in Liuonico bello, postquam pernouiisset Carolum Sudermanum transmarino milite uti, qui magis ad fossas, quam ad aciem apertam assuetus esset. Igitur tribus millibus suorum veteranorum, vna die quatuordecem millia hostium acie

cie aperta deleuit, qui alias ligone poterant in longum tempus bellum protrahere, Hinc Cæsar Augustus dicere solitus erat. *Prælium aut bellum nunquam suscipiendum, nisi cum maior emolumenti spes quàm damni metus ostenderetur.*

25. *Vehementem & audum pugnae hostem, mora & cunctatione vilem faciat.* Sic Fabius maximus aduersus Annibalem successibus præliorum insolentem, recedere ab Ancipiti discrimine, & tueri tantummodò Italiam constituit, Cunctatorisq; nomen, & per hoc Summi Ducis meruit. Sic Consalius Magnus Gallos sua cunctatione viles fecit, & toto Regno Neapolitano eiecit, similiterq; Magni Ducis nomen, patrum nostrum memoria obtinuit. Simili astu Koniecpolscius ante triennium ferè impetum Abazi Bassæ fregit, & pugnandi audum, cum ingenti suo exercitu ad Cameneciam procurrentem, retro cedere inglorium coëgit. Sed & Osmanus ipse ad Chotimiam, cum vna die more suo barbaro, bellum conficere voluisset, vallo castrorum nostrorum & propugnaculis in longum detentus, impetum & vehementiam furem amisit, adeò vt cum ad pugnam publicam prouocaretur animum iam non habuerit, & æstate per cunctationem nostrorum in ocio ferè exacta, vix cum paucis in Turciam redijt, assiduus oppugnationibus quoquo fortissimo amisso.

26. *Nolentem pugnare æquo loco, extrahat è latebris, & pugnandi necessitatem illi imponat, cum ille paratus non est.* Ita Metellus, cum animo aduertisset, nolle æquo loco pugnare Iugurtham, sed per saltuosa tantùm & suspecta proficiscentem exspectare occasionem; vt eum suis succurrere cogeret Famam caput Regni obsedit. Zamoscius, Archiducem Maximilianum, Bicinæ in Silesia subsidia ex Hungaria expectantem, licet parua suorum manu, non dubitanter tamen in eum inuectus, ad prælium decertandum coëgit, priusquam Hungari subsidio venissent. Vnde & victoria potius est. quam nequaquam obtinuisset, si Archidux moenij

sefe vrbis defendens, in aciem non descendisset, & venientes mercenarios paulisper expectasset, qui aliquot milliariibus solummodò inde distabant.

27. *Naturali industria, & prudentia multis experimentis aut lectione comparata, cognoscat hostium astus & fraudes.* prout Æmilius Paulus Cos. bello Hetrusco, apud oppidum Coloniam dimissurus exercitum in planiciem, contemplatus procul auium multitudinem, citatiore volatu è sylua confurrexisse, intellexit illic aliquid insidiarum latere, quòd & turbatae aues, & simul plures euolauerant. Præmissis igitur exploratoribus, comperit decem millia Boiorum excipiendo ibi Romanorum agmini imminere: eaq; alio quam expectabatur latere missis legionibus circumfudit. Simili planè modò Prædislaus Lauckoronius, ex auium crocitu in sylua Podoliæ, vulgo Nigra dicta, Tartaros, qui incurSIONem in Prouincias Regni Poloniæ parabant, latitare cognoscens, sclopetarios pedites à tergo in eos immittens, ipse reuera in insidiantes sibi processit, & fortiter resistentes in primo congressu, reboatu scloporum à tergo eis exploforum continuò turbauit, & disiecit; quanquam longè numero impar illis fuisset. Chmelecus verò, gnarus barbaros per easdem vias, quibus palatum exiuerant, in castra sua cum præda redituros, castra ipsa apud Bialocerquam expugnauit, reuertentesq; post dies aliquot prædatores, habitu, clamore, & armis facilè decepit, atque ita omnes præda excussa trucidauit.

28. *Etiam si hoste superior sit & victoriam facilè speret, in omnem tamen euentum sinistros casus secum animo voluat.* Vnde Pompeius, inquit Dion, quòd multis modis se Cæsare superiorem esse persuasum haberet, nihil omnino præuidit. Neque enim idoneo loco castra posuit; neque refugium sibi, si superaretur, parauit: cumq; rem extrahere, atque ita victoriam sine prælio obtinere posset (nam & singulis diebus copiæ eius augebantur, & rerum necessariorum copia ipsi

ipsi suppetebat) tamē signa cōtulit. Vnde factū est, vt præter opinionē victor, neq; cōsiliū neq; spē fortunæ denuo periclitandæ capere potuerit. Quod sanē ipsū Gustauus præ oculis assiduò habens, nusquam prælio publico nobiscum in Prussia decertauit: & si quando pugnae periculum facere voluit, semper sese intra suas munitiones continuit; nec vsquam à mari, aut fluuio Istula necessit. Et Ioannes Tarnouius Archistrategus Poloniæ, à Ferdinando I. Imperatore consultus, quomodo Solimano in Hungaria tunc bellum secum gerenti, resistere absque damno suorum posset, simile planè responsum tulit. Vt nimirum publicū certamen quàm maxime vitaret: vt nusquam cum suis castris à Danubio recederet: & vt semper in omnem sinistrum euentum, licet suos exercitus superiores esse videret, esset paratus. Quod videlicet equitatu Turcico Germanum militem imparem videret, cum gladios res deueniret: quòd à multitudine barbarorum circumuentus fame exercitum amitteret, si Danubio sibi subueniri non posset: & quòd clade affectus, vt est varia fors belli, absque graui dominiorum suorum damno, resistere haut posset, nisi aliquam fortem munitionem ad tergum haberet, quæ & fugientes reciperet, & molem belli, tamdiu retardatis successibus hostis, sustineret, quamdiu non reficerentur Vires Imperij.

29, *Neque aduersis in rebus omnem spem abijciat, neque in prosperis quicquam de animi constantia remittat; gnarus in bello nullos conatus feliciorum exitum sortiri, quàm de quibus hostis minimè suspicatur.* Ita Demetrius Moscouiæ Princeps, à Georgio Mnifecio, ad recuperandum paternum vti ferebat Principatum, exul copijs Polonicis instructus, in ipso statim ingressu Moscouiæ profligatus, non despondit animum vti suam decebat generositatem, sed relictis qui à prælio manserant, aliquot cohortibus, priusquàm noua subsidia venissent è Polonia, maximo ausu quadraginta milliū exercitū Moscorū inopinato superuentu apud Cromos dis-

ſipauit; poſtea ad Putiuliam Coſachorū Zaporofenſiū ſubſidio auctus, aperto Marte decertare non dubitauit: atq; ita quotidie maiora audendo & vigilādo uſq; ad urbem Metropolim Moſquam pceſſit, atque ad extremum Imperio vniuerſo potitus fuit.

30. *Crebro ſuos monere debet, ut hoſtem aduentātem parti inſtructiq; eius milites in horas exſpectent; nec improuiſa aduerſariorū irruptione turbentur.* Vnde Manſfeldius copiarū Rudolphi II. Præfectus ad Strigonium oppugnandum miſſus, ut ſemper ſuos paratos ad ſuſtinendum impetum hoſtiū haberet, ter quaterq; præmonitos, ipſe nocturno tempore, cum ijs cohortibus quas tacitè caſtris eduxerat, à parte qua Turcæ imminebāt clamore ſublato inuaſit, & quos ignauos inuenit, facta in craſtinum concione publicè caſtigauit. Idē & Georgius Baſta ſuos monebat; & Suarcembergius diligentiſſimè obſeruabat. Et Samuel Corecius ſuos in Moldauia, conſimili irruptione ex improuiſo, ad vigilantiam exercitabat. & multi alij priſci bellatores fecēre.

31. *Exercitum ita diſciplinā imbutum habeat, ut à pugna ad prædam non auertat manus, ut accidit Sigismundi Imperatoris exercitibus apud Columbanum, in Seruia & iterum in Boſnia apud Ciporouiciam, ubi proſtigatis Turcis, etiam Imperatoris Ottomanici capiendi ſpes erat, niſi militum auiditas prædæ præproperas manus admouiſſet.* Et poſtea reſtaurantibus prælium barbaris, vix ipſe Sigismundus vno comitante puero euafit. Idem accidit exercitui Ferdinandi I. apud Peſtum; Rudolphi II. apud Agriam & Sigerum. Sigismundo Batoreo apud Temefuariam; alijsq; noſtri ac veteris ſæculi Ducibus, diuerſis in locis.

32. *Optimo loco caſtra metetur.* Nullis videlicet montium inſidijs, aut amnium iniurijs obnoxio, ubi ſatis lignorum, pabuli, & aquæ ſit: hoſtem verò in loca arida, ſaltuoſa, aut paludoſa compellat.

33. *Si imparem ſe hoſti videt, in loca cum inſidioſa trahat.*
 & ali-

Et aliquomodo circumueniat. Ita Iugurtha, qui summa calliditate modo arma leuiter ostentando, modo pacis ac dedicationis mentionem iniiciendo, tam diu ludificatus fuit Albinum, donec is ob instantia comitia Romam rediens, exercitum fratri Aulo commisit. Sperabat enim se interea temporis Romanos milites, partim pecunia corumpere posse, partim cum improuido Duce in loca insidiosa pellicere, & ad quaslibet conditiones cogere, vel trucidare. Nec spes eum fefellit. Cum enim iam plurimos Romanorum fauere sibi sciret, fugam simulauit, quam cum veram esse falso Aulus credidisset, per saltuosa loca eum temere persequens, victus, sub iugum missus, & infra decem dies vniuersa Numidia exercitum deducere iussus fuit.

34. *Sit dexter in agendo & non morosus, dubius, aut cunctabundus.* Atheniensium etenim res in Sicilia segnis Niciæ cunctatio euertit. Cum enim is aduentu suo ingentem famam, & sui terrorem Siciliae intulisset, Catanæ in hybernis delitescens, in contemptum venit, & hostibus animos resumendi spatium dedit. Idem error in Brasida Spartano notatur à Thucydide, & in Ludouico Andegauensi à Leonardo Aretino, cum in Apulia Ladislaum Regem deuicisset.

35. *Deprahens in angustijs diuersis artibus eludat, aut de deditione tractet: interim verò suspensis tractatione pacis hostibus, ferro sibi viam aperiat, aut iter aliud capiat.* Nicostratus Ætolorum Dux, ita aduersus Epirotas egit; cumq; ei aditus in fines eorum angusti fierent, per alterum locum irrupturum se ostendens, omni illac ad prohibendum occurrente Epirotarum multitudine, reliquit suos paucos, qui speciem remanentis exercitus præberent, & ipse cum cætera manu, qua non exspectabatur aditus intrauit. Quo etiam astu Gustauus in Prussia ad Derfauiam conclusus euasit, & de pace legatis in castra Polonorum missis, nocturno tempore Istulam traiecit, inq; loca securiora exercitum deduxit. Cn. verò Pompeius, cum flumen transire propter oppositum e-

xercitum hostium non posset, alsiduè producere & reducere in castra instituit: deinde in eandem persuasione hoste perducto, ne vllam viam ad progressum Romanorum teneret, repente impetu facto transitum rapuit.

36 *Hostem ex locis eifficilimus inuadat: ipse autem eundem à tergo instantem aduersarium prudenter submoueat, ne in transitu fluuiorum aut saltuum sui milites carpantur.* Ita Pelopidas Thebanus, bello Theffalico transitum quærens, castris ampliorem locum supra ripam complexus, vallum ceruolis, & alio materiæ genere constructum incendit, dumq; ignibus submouerentur hostes, ipse fluuium superauit. Bannarius similiter à Cæsarianis circumuentus ad Torgauam, diuersa materia super vallum congesta, ignem sub primam noctis vigiliam supposuit, ipse verò Albi fluuiio superato in Pomeraniam concessit. Nicolaus autem Melecius, Valachiam paruo cum exercitu in gressus, cum apud Stepanouiciam ingentem barbarorum multitudinem insedissee cognouisset, nolens temere cum tanta colluuiæ manus conferere, facta in speciem velitatione, vada Pruthi scrutari iussit, quasi lassum iter flexurus, cum reuera Chotimiam versus reditum animo cogitaret. Positis igitur iaculatoribus in insidijs, castra versus Tyrum mouit, & cum illi magnis agminibus abeuntem insequerentur, ab insidiatoribus à latere strenuè excepti fuerunt, cum interim Melecius signis conuersis à fronte eos aggrediretur: & vniuersalis pugnae aleam declinans, turmatim in eos incurreret, reliquis interea temporis castra ad ripam fluuiij iam munientibus. Quibus perfectis, hastatos in confertissimum Turcarum globum immisit, & omnia simul tormenta in lateribus locata explosit: cumq; hostes impetum hastatorum suffere nequissent, ille signo receptui dato cum omnibus suis castra intrauit, & velut ex arce munitissima propugnauit. Tandem tractando de pace, leuioribus prælijs rem per dies aliquot protraxit, nocturnoq; tempore impedimentis omnibus & machinis transmis-

sis;

sis: ipse verò die statim albescente quasi vniuersali pugna præliaturus in acie constitit, & tamdiu prouocationibus ad duella, velitationibusq; tempus protraxit, donec in aduersa ripa pro bombardis commodius in hostes librandis, suggestus non exstruerentur. Quibus confectis, globos in acies barbarorum frequentiores explodi iussit, & sese interim in castra sua confestim recepit, incesaq; sub noctem in vallo materia, fluuium cum omnibus copijs securè transgressus est.

37. *Insidias ubicunque poterit in itinere hosti faciat: adq; transitus fluuiorum, ad precipitia montium, ad sylvarum angustias, ad paludum aut viarum difficultates, superuentus nullo sciente disponat; adque iter suum ita temperet, ut aut cibum capientes aduersarios suos, aut dormientes, aut vacantes certè, securos, inermes, discalceatos, distractis equis, nihil suspicantes, ipse paratus innadat, quatenus in huiusmodi certaminibus sui milites fiduciam colligant.* Tali dolo Stephanus Albertū Regem Poloniae in Valachia clade ingenti affecit, perq; fagineam syluā incautè transeuntem, vafer & astutus bellator, inter aspera saxa & montes, ex insidijs vndique aggressus, impulsis quas in hoc iam ante succiderat arboribus, mirum in modum afflixit. Sed & Boij olim in sylua Latina simili astu Romanos exceperant: qua enim transiturus erat Romanus exercitus, succiderant arbores ita, ut ex parte exigua sustentatae starent donec impellerentur; delituerant deinde ad extremas ipsi, ubi ingresso syluam hoste, proximas vltiores impulerunt: eo modo propagata pariter supra Romanos ruina, magnam manum eliserunt. His, & simillimis artibus graues fuere. Micháel Transalpinæ Daciae Regulus, Turcis: Moyse Siculus, Transylvanis: Ostaphæus Dascouicius Cosachorum Zaporosensium author, Tartaris: Alexander Liflouius (à quo Liflouiani Cosachi, leuioris armaturæ equites) Moscouitis: idq; eam ob causam singuli, quod diuersis è nationibus militem collectum haberent, nec in pugna stataria

ria ijs fiderent, nisi post multa experimenta in particularibus certaminibus facta. Quamuis principaliter id intendere Imperator in locandis insidijs debeat, ut vel omnino aduersarium vincat, vel saltem diminuat vires illius: quare alij, quo hostium copiae decrescerent, ditione sua ultro cesserunt, ut dum urbibus occupandis, atque praesidio muniendis hostis occuparetur, copiasque suas hinc inde distributas haberet, ipsum ea ex occasione in aliquas insidias pellicerent, aut debilitatum inuaderent aperte; qua quidem via victoriam consecuti sunt. Alij, dum regionem inuadere in animo haberent, in aliam se arma parare tanta industria simularunt, ut regionem illam de qua minimè dubitabatur occuparent, priusquam illa defendi posset. Nam si hostem in suspensio habeas, an forte eam in partem, quâ fama erat, regressurus sis, cogetur ille tam ibi subsistere, quam alteram partem defendere, unde facile fuerit utramque exercitus partem à te circumueniri. Praesertim, cum dispersi ad praedandum securi oberant hostes, tunc probatos equites vel pedites, cum tyronibus aut inferioribus mittat Imperator, ut ex occasione fuis inimicis, & illis peritia, & reliquis crescat audacia. Nam qui ante longum tempus, aut omnino nunquam videre homines vulnerari vel occidi, cum primum aspexerint perhorrescunt, & pauore confusi, de fuga magis, quàm de conflictu incipiunt cogitare. Hinc veteres Romani gladiatorios ludos instituerant, quod ciues ipsi in persona ad bellum ire obligati fuissent, ne igitur sanguine fuso, aut morte cadentium in acie consternarentur, à puero assuescebant tali inspectioni in ludis exhibitis, cum sese in theatris ante oculos plebis, gladijs serui laniarent aut mactarent. Veteresque Sarmatae nostri in publicis festiuitatibus, aut in augurationibus Principum suorum, hastis inter se concurrebant ut & laudem & praemium consequerentur, utque Regi ipsi monstrarent hoc facto suo, non ad molliciem & delicias, sed ad bella cum barbaris gerenda, eum à se electum esse, qui sciret inde, duris se Sarmatis & fortibus viris impera-

imperare, non affœminatis populis leges præscribere & dominari.

38. Lōgo itinere fatigatos aggrediatur, aut certè insperatus superueniat: eosq; etiā qui lōgè à suis, aut pabuli, aut præda gratia cōmorantur, subito cum delectis occupet. Illa enim ante tentanda sunt, quæ si male cesserint minus noceant: si benè, plurimum profint. Ita Constantinus Ostrogus & Scythas in Russia palantes, & Moschos in Lituaniā incurrentes, sæpissimè, minoribus prælijs attritos primùm, feliciter deuinebat, Ita Sanguiscus Lituaniæ Campiductor. Ita Stanislaus Kiszka, cæteriq; ex eius disciplina clarissimi deinceps in patria nostra Duces.

39. Quibus deficit, monstret se habere in copia; aut usum earum expleat. Sic Carthaginensium, Mafsiliensium, & Rhodiorum Duces instructuri classē, quia sparto deficiebantur, crinibus tonsarum mulierum ad funes efficiendos vfi sunt. Marcus verò Antonius à Mutina profugus, cortices pro scutis militibus suis dedit. Præmissusq; olim Poloniæ Princeps cum hoste congressurus, quòd militum manum exiguam haberet, eamq; nudam, nullis thoracibus, nullis clypeis armatam; egressus è sylua Calui Montis in tractu Sendomiriensii in aciem campi Lagouiensis, vt maiores copias suas opinione aduersariorum monstraret, trucinis arborum tenuioribus galeas ex corticibus factas imposuit; hominesq; agrestes ac fœminas, qui eas arbores huc & illuc mouerent, intermiscuit, quo nimirum sic numerosior, & quasi in syluis tectus, exercitus suus appareret, atque hostes conterreret. Quod & successit.

40. Si fortè fames, pestilentialisue contagio, aut quedam necessitas, vel alij humani casus, hostem tuum ad desperationem adegerint, vt prælij aleam quoquo modo subire cupiat, tum tibi intra munitiones consistendum, & quantum fieri possit, à prælio abstinendum noueris. Hanc rationem Lacedæmonij contra Messenios, & Cæsar contra Afranium, Petreiumq; secuti sunt.

sunt. Et bello Prussico Gustauus contra Sigismundum III. vsus cum passim apud Mariæburgum mercenarij Germani contagione perirent, qui omnino in acie fortiter obire cupiebant. cæterum ille vt rerum militarium gnarus, intra suas sese munitiones continuit, nec vlla ratione in campum, etsi toties prouocatus & lacepsitus prodire voluit: quia certissimam suorum cladem præuidebat. Iam autem difficile vincitur, qui verè potest de suis, & aduersarij copijs iudicare: qualis erat Gustauus, tot iam prælijs & periculis in Liuania ante, Russia alba, & Cimbrica exercitus.

41. *Præcipuè verò curet Imperator, consiliarios, sui aduersarij intimos, & quibus ille grauiores expeditiones peragit, reddere illi suspectos.* Sic Romani cum Antiocho Rege bellum aggressuri, qui apud se Hannibalem, victis iam Carthagensibus habebat, eosiliumq; eius aduersus Romanos instruebat, missis ad eum legatis, per crebra colloquia effecerunt, vt is Regi fieret suspectus, cui gratissimus alioqui erat & utilis propter caliditatem & peritiam bellandi. Pari modo Litvani, Vitoldum ad Crucigeros, Prussia à Rege Vladislao fugientem, apud Magistrum, Ordinis accusarunt, & vtilem ipsis valdè, sibi verò eo in loco grauem ob militiæ ingentem peritiam, in carceres conijci procurarunt. Prout & Ferdinandus I. Hieronymo Lasco fecit, qui apud Ioannem Regem Hungariæ, & autoritare, & consilio, & rei bellicæ scientia multum pollebat. Quapropter faciliè Proceribus Hungariæ persuasit, vt eum tanquam alienigenam apud Regem accusarent, quos ille loco & dignitate, Transylvaniæ Palatinatu cohonestatus, longè superabat. Liberatus tandem carcere lascus, vt natura animosus erat, ad hostem Regis Ioannis Ferdinandum Imp. fraudis iguarus, vindictam solummodò meditans, lubens concessit, ab eoq; in Turciam cum Oratoris titulo ad Solymanum ablegatus, nescitur à quo venenum hausit, atq; morbis per viam diuersis doloribusq; excruciat, vix patrium limen salutauit, & statim Cracouiæ extinctus est.

Deni-

42. Denique usitata & communia stratagemata assiduò reuoluat. Quò enim magis aliqua contemnuntur, eò facilius fallunt. In bellis autem non datur bis peccare, absque notabili aliquo damno. Nec prudens poterit dicere Imperator, *Non putaram.* quia in omnia intentus esse debet.

CAPVT III.

De ijs Stratagematibus, quæ facienda sunt in pugna.

NOtatis ijs præceptis & exemplis, quæ ante cõmissum prælium agenda sunt, deinceps videndum est de ijs, quæ in ipso prælio occurrere solent. Atque in primis.

1. *Dux tempus ad pugnam opportunum eligat.* vt nimirum hostis ieiunum exercitum in aciem pruducat, & inedia, siti, vigilia nocturna, itineris defatigatione, aut mora sub armis lassatum, tota die in acie detineat. Cumq; hostis castra iam repetere cæperit, subito copias educat, & commisso in paucos prælio, aut vincat fortiter, aut terrorem, qui iam castra sua intrauerant periculo cæterorum incutiat. Sic Metellus Pius in Hispania aduersus Herculeium, cum ille oriente protinus die, instructam aciem vallo eius admouisset, feruidissimo tunc tempore anni, intra castra suos continuit, in horam diei sextam, hoc est ipsum meridiem, atque ita fatigatos æstu, facile integris (quibus præceperat, vt quiescerent, & cibum caperent) & recentibus vicit suorum viribus. Iugurta verò memor virtutis Romanorum, semper inclinato die prælium committere solitus erat, vt si sui fugarentur, oportunam noctem haberent ad delitescendum. Quod & Gustauus in bello Prussico obseruabat, nec vnquam cum suis prodij nisi cum aduersperasceret, vt fecit ad Mæuam, ad Neistadium, ad Neringam, & denique ad Dersauiam vbi sclopo percussus, percussos suos tempestiue & opportunè vmbra noctis tectos in castra reduxit.

Nullam occasionem perimendi, aut saltim infestandi hostis negligat. Iphicrates Athenienfis, quia explorauerat, eodē assiduē tempore hostes cibum capere, maturius vesci suos iussit, & eduxit in aciem: aggressusq; hostem ita detinuit, vt ei nec confligendi, nec abeundi daret facultatem. Inclinato deinde iam die reduxit suos, & nihilominus in armis retinuit: fatigati hostes non statione magis quā inedia, statim ad corporis curam & cibum capiendum festinauerunt. Iphicrates rursus eduxit, & incompoti hostis aggressus est castra. Eodem astu Albertus quoque Lascus in Turcas usus est, cum Iacobum Heraclidem agasonem suum, ad capiendum Valachiae Principatum deduceret, Alexandrumq; Vaiuodam barbarorum auxilijs nixum prouincia depelleret. Igitur longē maiores copias illius conspiciens, iussit vt sui summo mane corpora curarent, cibumq; secum prona comestione in aciem progressuri acciperent, quos in alba eductos tota die in acie detinuit, velitationibus prouocationibusq; ad duella tempus terendo; & tandem sole in occasum vergente intra vallum deduxit. Idem fecere & Turci, inedia & solis aestu cum suis equis fatigati: vnde cibum statim capere omnes, pabulaq; equis conquirere sollicitē coeperunt, Lascus verò cohortatus suos iterum eduxit, & confusos inermesq; inopinatō aggressus faciliē vicit, & tota deinceps prouincia expulit.

3. *Locum ad pugnam commodum eligat.* Marcus Curius, quia phalangi Regis Pyrrhi explicitae resisti non posse animaduertebat, dedit operam vt in angustijs confligeret, vbi conferta, sibi ipsi esset impedimento. Stanislaus Lesniovius, quadraginta millia Moscorum ad Neuelliam, mille quingentis hastatis aggressurus, ita inter duo nemora acie suam instruxerat, vt nec circumueniri ab equitatu hostili propter paludes vliginossas vllatenus posset, nec quantum à tergo exercitum haberet videri. Igitur inopinatos aggressus ac perturbatos, clarissimam ex eis victoriam retulit, caesis in

sis in acie octodecem millibus. Sed & Ioannes Sapieha cum iisdem Schismaticis pugnaturus, apud Troiczam, cauas & præruptas vias obiecit à latere; ipsaq; loci natura pro munimentis vsus, in signem eorum Ducem Lobfinium vicit.

4. *Acie optimè disponat.* Ita Scipio Aphricanus aduersus Asdrubalem Ducem Poenorum in Hispania bellum gerens, per continuos dies ordinatum produxit exercitum, ita, vt media acies fortissimis fundaretur. Sed cum hostes quoque eadem ratione assiduè ordinati procederent, Scipio ea die qua statuerat decernere, commutauit instructionibus ordinem, & firmissimos, id est legionarios in cornibus collocauit, ac leuem armaturam in media acie, sed retractatam, posuit. Ita cornibus quibus ipse præualebat, infirmissimas hostium partes lunata acie aggressus, facile fudit. Vladislaus quoque Loëticus, cum Crucigeris Borussicis ad Radzieiouiā præliaturus, aciemq; eorum, quæ robustissimos Germanorum in dextro cornu habebat, fracturus, non nisi ipsis hastatos suos opposuit: infirmissimos autem expeditatu fortissimis hostium obucit, vt ad primam eorum impressionem fuga sibi consulerent præcipiens, & interfugiendum more Scythico (nam omnes Russi erant) sagittis hostes se insequentes ferirent; maximè cum sese in syluestria contrafragaq; loca reciperent, quo grauitè armati Germani, nullo modo sequi cum suis equis poterant. Illi verò in abeuntes iterum obuersi facile pugnarent, aut à lateribus incurrendo ordines ipsorum turbarent. Atque ita frustrato robore exercitus, ipse optima cum parte virium suarum, dextro cornu, totā circuiuit acie hostium, & triginta millia in acie cecidit.

5. *Hostem emittat ex acie, ne clausus prælium ex desperatione redintegret.* C. Cæsar Germanos inclusos, ex desperatione fortius pugnantes, emitti iussit; fugientesq; persecutus est. Similiter L. Martius, Poënos: Camillus, Gallos: Antigonus Macedonum Rex, Aetolos: Agesilaus, Thebanos: Cn. Manlius, Hetruscos: Boleslaus Criuoustus, Borussos: & alios.

6. *Hosti fugiēti pertinaciter nō insistat*, sagittarijs præsertim, quales sunt Scythæ, Parthi, Arabes, alijsq; leuiori armatura vtentes. Apud nos Romanus Ostrogus Princeps, & Io. Strussus, nobilissimi iuuenes, dum acrius fugientes Scythas persequuntur, iēti sagittis occubuere. Marcusq; Liuius fusso Asdrubale hortantibus eum quibusdam, vt hostem ad internecionem persequeretur, respondit. Necesse est vt aliqui supersint qui de victoria nostra hostibus nuncient. Scipio verò Aphricanus dicere solitus erat, hosti non solum dandam esse viam fugiendi, sed etiam muniendam.

7. *Aduersa dissimulet.* Lucius Sylla, cum præfectus citis non exigua equitum manu comitante, commisso iam prælio ad hostes transfugisset pronunciauit iussu suo id factum. Eaq; ratione militum animos, non tantum à confusione retraxit, sed quadam etiam spe utilitatis, quæ id consilium secutura esset consumauit. Datames verò Dux Persarum, aduersus Authofradatem in Capadocia, cum partem equitum suorum transfugere comperisset, cæteros omnes venire secum quantocius iussit; affecutusq; transfugas collaudauit, quòd eum alacriter præcessissent, hortatusq; est eos etiam, vt fortiter hostem adorirentur. Pudor transfugis attulit poenitentiam: & consilium suum (quia non putabant depræhensum) mutauerunt. Ast Romani, secundo bello Punico, valde debilitati, dissimularunt aduersitatem suam, ac si victores essent, & Antiocho Regi ante victoriam condiciones proposuerunt, tam superbas & graues, ac si iam vicissent. quia ita tum mos erat, in aduersis vultum secundæ fortunæ gerere: moderari animos in secundis.

8. *Suis militibus necessitatem pugnandi proponat*; vt aut virtute salutem tenendam, aut moriendum sibi esse intelligant. Desperatio enim & necessitas fortitudinis eos appellatur, & vni quatuor hominum vires confert. Inde Alexander Magnus militibus suis, peruenisse eò dicebat, vnde fugere non possent, tot terrarum spacia emensis, tot amnibus monti-

montibusq; post tergum obiectis; iter in patriam & penates manu esse faciendum. C. Cæsar ancipiti prælio equos dimittebat, & præcipuè suum, quo maior permanendi necessitas esset auxilio fuge erepto. Corcyrei exules, ut fugæ spem omnē suis adimerent, manibus, quæ eos aduexerant, ignem iniecerunt. narrat Thucijdides. Quod idem Ferdinandus Cortesius in Noua Hispania, & Guilielmus Normanus cum in Angliam traiecisset, fecerunt. Et hos, superioribus annis in Belgio Mauricius Nassonius, dimissis nauibus, quibus in hosticum transferat, imitatus videtur. Carolus Martellus, cum innumerabili Saracenorum multitudine pugnaturus, pronunciari in acie iussit, clausas esse Turonū portas, (vrbs ea erat vicina loco vbi pugnabatur) neminem nisi victorem recepturas. Nam qui receptum habent, timidi & ignaui esse solent; quibus verò vnica spes, est, nullam sperare salutem, illis necesse est fortibus viris esse.

9. *Selectas aliquot cohortes ad incertos casus seruet.* Sic Romani vltimis casibus seruabant Triarios; & hodie Genitzaros, seu prætorianos suos Turcæ, quorum fiduciam & robur experti sunt in pugna varnensi, vbi profligatis omnibus Turcis, Amurathes solis cum Genitzaris in acie manens, impetum Vladislai Regis sustinuit, & illo occiso victoriam obtinuit. Et in Belgio ad Neoportum, non aliam ob causam, profligatus fuit Albertus Austriacus, nisi quòd non haberet in subsidijs ad incerta seruatos milites, sicuti Mauritius fecerat, vti captus Mendoza narrabat.

10. *Fingat subsidia sibi inopinato aduenisse.* Non enim veris tantum, sed fictis etiam rebus confirmandi sunt subinde nutantes ob res aduersas milites & ciues. Chodkieuicius prælio cum Suecis ad Kirchouiam commisso, lixas & calones ab vna parte, quasi noua subsidia à Duce Radiuillo, monstrauit in terrorem hostium: septingentos verò equites Germanos opportunè tunc à Duce Curlandiæ venientes in succursum, maiorem longè in numerum auxit, & suis militibus

bus imposuit, ut rem in rei veritate nouam, ita & in multitudine copiarum longè maiorem.

11. *Insidias sepius faciat.* Ita Fabius Consul, cum contra Cimbros militaret, diebus aliquot continuis eorum castra ab equite suo oppugnari voluit, quòd eos è castris erumpere, atq; equites suos inconsultius persequi animaduertisset. Insidijs igitur post eorum castra tandem collocatis, hosteq; iterum oppugnatione prouocato, Cimbrisq; pro more castra negligentibus, ea subito occupauit, ac præda ingenti potitus est. Non infeliciter quibusdam Ducibus, qui castra sua, vicina hostium castris haberent, celsit, militem suum sub signis hostium in propriam ditionem ablegasse, eamq; prædæ exposuisse, atque igni vastasse. Hostes siquidem persuasi, auxilia ipsis in propinquo esse; prædæ cupiditate præterea illecti, ordines suos neglexerunt, atque his se imprudenter miscentes, ad victoriam inimico occasionem præbuerunt. Hanc viam Alexander Epirota, contra Illirios, Leptes; etiam Syracusanus contra Carthaginenses vsi sunt: quæ quidem vtrique feliciter celsit. Alij hostem vicerunt, quòd castra vino, omniq; ciborum genere abundè referta, tanquam metu compulsi desererent, eoq; hosti ad ingurgitandum sese occasionem præberent, quem crapula onustum adgressi oppresserunt. Idq; Tomiris contra Cyrum, atque Tyberius Graechus, contra Hispanos: tum Carolus Chodkieuicius, contra Suecos conati sunt. Alij reneuo annorum, & aquas infecerunt, quo facilius vincerent. Sed hoc mihi non probatur; nec puto Christianum esse.

12. *Semper partem aliquam copiarum hostium tergo circummittat; aut conserto iam praelio à latere turbet, seu terrorem incutiat.* Ita Lissouiani Cosachi, à Sigismundo III. Imperatori Ferdinando II. suppetiatum missi, lixas & calones suos ad Vstopeciam cum Morauis decertaturi, à tergo immiserunt. & re inopinata turbatis tantum terrorem intulerunt, ut iam pene victores fugere debuerint. Tantum persæpè utilitatis

raris adfert, suos & hostes iuxta decipere: (nam Iuanicius Lissouianorum Tribunus, finxerat tunc Calinouium nouis cum cohortibus Cosachorum è Polonia, per aliam viam aduenisse: quo & suorum animos auxerat, & hostium acies vnico prolato verbo turbauerat) illos quidem fausto, istos verò luctuoso mendacio.

13. *Si in dextro suorum cornu Imperator est, exclamet. Milites qui in laeo sunt, dextrum hostium cornu vicisse: si in sinistro sit, dicat superiores esse in dextro: siue id ita verè fiat, siue secus.* Necessarium enim, inquit Onosander, mendacium dici oportet, vbi certamen exstitit ingens. Quia in bellicis rebus, vt ait Liuius, parua sæpè momenta, in spem, metumue, militum impellunt animos.

14. Si longiusculè dissitus sit hostium Dux, aut Rex, proclamet, Ducem hostium occisum esse idq; ita contenta voce, vt hostes quoque exaudire possint. Commilitones enim qui suos virtute præstantiores hostibus esse audiunt, duplo fortioribus ac promptioribus animis roborantur. Contra, hostium vires, strage sui Ducis percepta, metu debilitati concidunt. Quin & aliquando ad huiusmodi rumorem, illico in fugam sese dant. Ita accidit, dum Valerius Leuius aduersus Pyrrhum Regem bellum gereret. Occiso siquidem quodam gregali, tenensq; gladium cruentum, exercitui vtrique persuasit, Pyrrhum interemptum. Quamobrem hostes, destitutos se Ducis morte credentes, consternati à mendacio, se pauidi in castra receperunt aciem deserentes.

15. *Dexieritate ingenij sui aliquid singulare ad perfringendam hostium aciem excogitet.* Quemadmodum Hispani contra Hamilcarem boues vehiculis aduinctes, in prima fronte constituerunt, vehiculaq; rædæ, & sepi, & sulphuris plena, signo pugnæ dato, incenderunt: actis deinde in hostem bobus, consternatam aciem perruperunt. Veneti ad Fossam Clodiam cum classe Genuensium congressi, ollas ci-

nere plenas in hostium naues coniecerunt, & sic visu eorum impedito, lanceis eos interim atque gladijs confoderunt. Mitridates scorpiones ac serpentes in classem Romanorum manus conferturus proiecit. Hispani Peruanos aggressuri canes molossos secum in aciem duxerunt, qui hostem pugnantem suis laniatibus turbarunt. Alij aluearia apum machinis in aciem hostium proiecerunt. Suecus globos ignitos, sed minutioribus globis plumbeis infarcitos in Chodkieuicium proiecit. Visnouiuecius in oppugnantos Tartarospicem, resinam, milliumq; bulliens ex arce proiecit. Et diuersi diuersa impedimenta hosti tam congregienti, quam oppugnant obiecerunt. quarum rerum in Historijs infinita habentur exempla. Sed nos ad ea iam procedamus, quæ obtenant victoria fieri debent.

C A P V T I V.

De ijs, quæ facienda sunt post pugnam.

QVia post pugnam, aut victoria est, aut Clades: idcirco in illa cautè procedas, ne aliquod vulnus per nimiam fiduciam accipias: communissimè enim res secundæ negligentiam creant, quæ deinde modico damno corrumpuntur, & famam partæ victoriæ lacerant. In clade autem prudenter te ac fortiter geras, quia Mars communis est, & victum sæpè erigit, & adfligit victorem. Igitur meliora spera, & robur animi indue. Infirmi enim ingenij est, lapsu aliquo summæ rei diffidere, cum exiguis momentis subitò inclinètur omnia, quæ in bello geruntur.

i. *Dux igitur si res prosperè cesserint, reliquias belli confirmet: si durius, de aduersis emendendis cogitet.* Sic Cladius Nero, victis Pœnis, quos Asdrubale Duce in Italiam ex Hispania traijcientes exceperat, caput Asdrubalis in castra Annibalis eiecit: quo factum est, vt & Annibal luctu (nam frater
occi-

occisus erat) & exercitus desperatione aduentantis præsi dii affligeretur. Bernardus verò Vaimariensis, victis prælio Lutzensi Cæsarianis, etsi Gustauus ipse omnis tumultus Germanici author periisset, reliquias tamen eorum, qui sese cū Picolomineo opposuerant, assiduè oppugnando, cum nox eos obscura circumuensset, tandem assiduè oppugnando irrequietos acie cedere fecit, cum de auxilijs omnino desperassent, & spolia ipse tulit, machinis Cæsareis captis, & cadauere Gustauī inter gregariorum tumulos reperto. E contra Titus Didius in Hispania, cum acerrimo prælio conflixisset, quod nox dirimerat, magno numero vtrunque cæso, complura suorum corpora, atra nocte sepelienda curauit. Hispani postero die ad simile officium progressi, quia plures ex ipsorum numero, quàm ex Romanis Cæforum repereant, victos se esse secundum eam dinumerationem argumentati, ad conditiones, imperatoris deseenderunt.

2. *Dubiorum animos in fide retineat.* P. Valerius Epidauri, timens oppidanorum perfidiam, quia parum præsidij habebat, gymnicos ludos procul ab vrbe apparauit. Quò cum omnis ferè multitudo spectandi causa exisset, clausit portas, nec in eas antea admisit Epidaurios, quàm obsides à principibus acciperet. Gustauus in Prussiam ab Elbingensibus euocatus, non prius eos in tutelam suam recepit, donec valido præsidio urbem munisset, obsidesq; ab ijs acceptos in Sueciam misisset.

3. *Prædam inter milites ex congruo & condigno diuidat.* Vnde M. Salinator Consularis, damnatus est, à populo, quòd prædam non æqualiter militibus diuisisset. Quod Cosachorum Zaporosiensium Duces præ oculis habentes, dum è mari Euxino cum præda reuertuntur, æqualibus inter se portonibus diuidunt, vt & iurgia euitare possint, & alios in similem expeditionem eò facilius allicerent.

4. *Victos leniter tractet, nec spem omnem abscidat hosti.* Nam vbi extrema omnia in oculis, desperatione in audaci-

am accinguntur: & ut Portius Latro in declamatione sua dicit *Grauiissimi sunt morsus irritatæ necessitatis.* Ergo hoc victor caue, & ad spem semper victis aliquid relinque. In ista, terre, sed ubi satis terrueris, parcendo rursus irritamenta pacis ostenta. Hoc mollit & frangit aspectu pignorum, & aspectu opum: quas ipfas ne planè perde. Archidamus prudenter apud Tucydidem. *Nec enim aliud terram hostium censes, quàm velut obsidem; idq; eò magis, quò illa cultior.* Huic parcendum ut plurimum est: nec hostes in amentiam & desperationem redacti, difficiliore expugnatu reddendi. Sic Macedonia Reges acie bellare solitos legimus, ut urbibus parcerent, quantum possent, quo opulentiùs imperium haberent. De Indis Diodorus Siculus. *Hostes in prælijs mutua cæde grassantur, agricolis nulla in re nocent, sed intactos relinquunt, tanquam communis utilitatis ministros. Neque verò hostium agros vrunt, neque cadunt arbores &c.*

5. *Populares specie libertatis aliciat.* Quid enim aliud exitio (dicebat Claudius Imperator) Lacedæmonijs, & Atheniensibus fuit, quanquam armis pollerent, nisi quòd victos pro alienigenis arcebant? At conditor noster Romulus, tantum sapientia valuit, ut plerosq; populos eodem die hostes, de in ciues haberet. Nouorum etenim ciuium cooptatio, aut coloniarum deductio, teste Sallustio, magnum est stabiliendi Imperij adiumentum. Sic etiam creuit Polonia nostra, cum Cazimirus Rusiam & Podoliam; Vladislaus Iagello, Lituaniam & Samogitiam: Cazimirus Iagellonides Prusiam & Pomeraniam: Sigismundus I. quadringentis ferè annis rebellem Masouiam; Sigismundus Augustus eius F. Liuoniam & Curlandiam: Sigismundus III. Seueriam. Vladislaus IV. Czerniechouiam Regno adnectentes, eodem cum Pololonis iure omnes viuere voluerunt. Quod si idem Veneti subiectis sibi prouincijs permittere voluissent, iam pridem totius Italiæ domini, vicinarumq; Insularum fuissent. Annibal post prælium quo ingentem cladem

dem ad Trasimenum Romani acceperunt, cum sex millia hostiū interposita pactione, in potestatem suam redegisset, socios Latini nominis, benignè in ciuitates suas dimisit, dictitans se Italiæ liberandæ causa bellum gerere; eorumq; opera aliquot populos in deditionem accepit. Planè eodem modò Gustauus Germaniam dementauit, Lipsiensi victoria obtenta: quoscunque enim in suam potestatem redegerat, liberos statim dimittebat in sua, dictitans, se liberandæ Germaniæ causa à iugo Austriacorum, è Suecia venisse. Atque ita liberis Imperij ciuitatibus, quæ ferè inexpugnabiles esse videbantur, facile persuasit, vt sua præsidia vbique reciperent. Asdrubal Carthaginensis quoque miræ artis in sollicitandis gentibus fuit, imperioq; iungendis suo. Plura cōsilio, quàm vi gerens, (vti Cyneas Pyrrhi, & Oxeisternius Gustau) auspicij Regulorum, & magis conciliandis per amicitiam principum nouis gentibus, quàm bello, aut armis, rem Carthaginensem auxit. Similis illi fuerat & Annibal, qui etiam Pyrrhum Regem ea ex causa laudabat, inquiens. *Artem quoque conciliandi sibi homines eam habuisse, vt Italiæ gentes Regis externi, quàm Populi Romani, tam diu principis in ea terra, imperium malent.* Non absimilis illi hac in parte, & Augustus Imperator, Tiberiusq; Cæsar fuit. tum etiam Ludouicus XI. Rex Franciæ.

6. *Potentiores prouinciæ illius in qua bellum gerit, in partes suas trahat.* Ita P. Scipio, Masinissam & Sifacem in Africa traxerat in partes Romanorum, eorumq; sumptibus, ingentem exercitum terra mariq; conscripserat. Recentiore verò memoria Ferdinandus Consaluuus, ad obsequia Regis Catholici traxerat Columnnenses in Italia, & Vrsinos ante inimicissimos sibi, quorum auxilio Gallos Italia eiecit, quietumq; reddidit Regi suo Regnum Neapolitanū. Nunc verò Imperatorem Ferd. II. Gustauus Rex Sueciæ in sua Germania aggressurus, primùm sibi amicos reddidit Saxonem & Brandeburgensem Principes Electores, postea ve-

rò reliquos minutiores Dynastas, Pomeranum, Hassium Brunswicensem, Luneburgensem, Vaimariensem, Virtembergensem, quorum opibus & opera Cæsarem impugnavit. & tandem reliquos omnes in partes suas traxit.

7. *Omni bus sese facilem & affabilem exhibeat, tenuioribus præsertim; quibus & beneficentiam omnem demonstret. De semetipso verò nihil omnino arroganter loquatur.* Atque ita ferè de Iugurtha Rege Numidarum Sallustius scribit, quòd plurimum facere, & minimum ipse de se loqui soleret; omnibusq; humanus & comis appareret. Simile quidpiam de Timoleone dicit Probus. *Nihil unquam insolens & gloriosum ex ore eius exijt.* Sicut & de Vespasiano ad Imperium assumpto. *In ipso nihil tumidum, arrogans, aut rebus novis novum fuit.* Ita enim cum debellatis humanitatem & benevolentiam omnem monstrabis, fideiiores eos habebis, quàm si timore & timore in osequium coactos. Deuictæ enim gentes cum ægre pareant, proniores ad rebellionem sunt, periculosiusq; iugum excutiunt, dolore & pertinacia armatæ, si Præfectorum auaritia spolientur, aut militis continua insolentia exagitetur. Exemplo Vesperæ Siculæ sunt. Et Bato certè Dyfidiates Dalmata, ad colloquium de pace cū Tiberio congressus, rogatus, quam ob causam à Romanis defecisset? Vos respondit in culpa estis, qui gregum vestrorum custodiam, non canibus aut pastoribus committitis, sed lupis. Vnde basilicæ herbæ generosi subditi aptissimè comparari possunt, quæ leuiter tacta suauem odorem effundit, contrita verò, procreat scorpiones.

8. *Post obtentam victoriam, militibus in vniuersum gratitudinem aliquam ostendat.* Ita Zamoscius re benè in Liuania confecta, vniuerso exercitui trimestre stipendium donauit, quod hodie dum etiam in consuetudinem transcriptū durat, postq; singulas notabiles victorias Respub: vniuerso exercitui simile donatiuum præbet. Sed & in Senensium annalibus simile gratitudinis exemplum legimus, qui in bel-

lo quod contra Florentinos gesserunt, Germanis à Manfredo Siciliae Rege auxilio missis, donatium præbuerunt quingentas libras, præter sumptus in curam vulneratorum ex publico præstitos. Idem in pugna ad Arabiam læsos vulneratosq; publico ære sanari iusserunt: & cæsis præter illorum temporum consuetudinem, in templis sepulturam permiserunt.

9. *Si qui ex militibus suis fugissent ex acie, seuerè eos puniat.* Verissimum enim Thucydidis effatum est, ubi pugnare & fugere peræque honestum est, & sine pudore flagitij, sine cura Ducum abire, fugere licet, non esse fortitudini locum. Hinc Matthias Rex Hungariæ quingentos milites suos ex acie profugos, muliebri vestitu ornatos ad opprobrium circumduxit per castra. Valsteinius suspendio puniuit. Suarcembergius gladio percussit. Selymus Turca, igni viuos cremauit. Kazigereius Scythia aquis submersit. Alijque diuersi, diuersis pœnis affecerunt: nullus inultos esse fuit.

10. *De deuictis ne triumphet, ne fortè in ultionem concitentur.* Plus enim doloris victo afferunt, trophæa & exultatio hostium, ac triumphalis pompa, quàm ipsa victoria. Hinc toties Romanis triumphatæ gentes rebellarunt Thraeces, Iberi, Macedones, Battaui, Germani, Parthi; aliæque gentes, alijs. Antigonus verò è contra, Macedoniæ Rex, cæsis occisione Spartanis, fortunam tantæ vrbs miseratus, à direptione milites prohibuit, veniamque his qui superfuerant dedit. præfatus, bellum se cum Cleomene Rege illorum, non cū Spartanis habuisse, cuius fuga, omnis ira eius finita sit: nec minori sibi gloriæ fore, si ab eo seruata Lacedæmonia sit, quàm si capta proderetur. Parcere igitur se solo vrbs, ac te. Etis, quoniam homines, quibus parceret, non superfuissent.

11. *Ipse ob res præclare gestas non superbiat.* Præclara hoc in parte, Viriati Hispanorum contra Romanos Ducis, moderatio fuit, qui cum frequenter consulares exercitus vicerit, tantis rebus gestis, non armorum, non vestis cultum,
non

non denique victum mutauit; sed in eo habitu, quò primum bellare cœpit, perseuerauerit, ut quiuis gregarius miles ipso Imperatore etiam opulentior videretur.

12. *Diligenter inquirat, quid contra se denicti populi moliantur.* Sic Venetis Maximilianum I. Veronæ obsidere conantibus, Hispani qui in castris illius erant, cognoscere ciuium animos erga Venetos venientes cupiēs, nocte intempesta per urbem cum magno armorum sonitu incitati cucurrerunt, nomenq; Martium, quod est insigne Reipub. Venetæ, sæpè in cursu conclamauerunt: quo exaudito, à plerisq; illos esse Venetos credentibus, qui se in urbem intulissent, eadem nominis acclamatione est responsum datum, salutatioq; veluti mutua facta. Illi eas domos vnde voces veniebant, atramento signauerunt, posteroq; die repetitis notis omnes ad vnam diripuerunt. Vnde & reliquis Reipub. amicis timor iniectus, & ipsis ad sustentandum, stipendio non persoluto, præda inter amicos obuenit.

13. Quos retinere non poterit, beneficio obstringet, & libertate donabit. Ita Alexander Magnus Indos in sua potestate retinere nequiens Porrum Regem, non earum dumtaxat prouinciarum, quibus prius imperarat, sed & aliarum multarum Satrapam appellauit. Romani quoque Macedoniam prouinciam esse iusserunt, Regemq; sibi eligi permiserunt, quia videbant vires suas nondum eas esse, ut vi tot populos retinere in officio possent, beneficio ergo conati sunt. Et Ludouicus. XII. Galliæ Rex, melius consulisset sibi, si suam potius cupiditatem, ducentis, quæ à Genuensibus offerebantur, aureorum millibus, quam urbem arce frænare maluisset, nam illi Doriæ opera libertatem recuperarunt, & sub Hispani protectionem confugerunt, cum ditione sua vniuersa. Præstat igitur ciuitatem aut populum, qui parere non vult, & cogi non potest, libertate donare; ut cui parere non voluit ut Principi, pareat ut Patrono.

14. *Clade autem affectus Imperator, novos delectus, noua auxilia*

auxilia quarat. Exemplis enim didicimus, Fortes & strenuos contra fortunam insistere spei, ut faciebat Mitridates toties à Romanis profligatus. Et Alphonfus I. Rex Neapolitanus à Genuensibus cæsus: Timidos autem & ignavos ad desperationem formidine properare, qualiter fecit Alphonfus II. Rex Neapolis, qui à Gallis cæsus Regnum statim reliquit, ipseque in Siciliam abiit Similiter & Sigismundus Batoreus Transylvaniæ Princeps, qui toties à Michaële Moldaviæ Palatino, atque Moyse Siculo acie pulsus, ad extremum Principatum deseruit, primumque in Poloniam apud Magnum Zamoscium delituit, postea ad Rudolphum Imperatorem concessit. & vitam ferè voluntario exilio miserrimè finiuit.

15. *Opida & castella aduersus moras obsidionis annuis copijs firmet.* ut hostis tempus consumat, priusquam tu vires repares. Nam fortuna vitrea est, tunc cum splendet, frangitur: poterit etenim ille assaltibus & oppugnationibus locorum sibi necessariorum, copias suas deperdere; tu verò novis conscriptis militibus poteris eum à tergo inuadere, aut commeatu prohibere, aut ad deditionem cogere, vel saltem conditiones pacis. Habet enim has vices conditio mortalium, ut aduersa ex secundis, secunda ex aduersis nascuntur. Cuius rei exemplo sunt bella præsentia Germanica Belgica, Gallica, Italicaque inter domum Austriacam, & suos æmulos. quæ pridem iam finita fuissent, nisi expugnationibus munitissimorum locorum prolongarentur. Proinde quomodo ea subruenda aut defendenda sint, libro sequenti considerabimus.





SIMONIS STAROVOLSCI INSTITVTORVM

Rei Militaris

LIBER SEPTIMVS
De Oppugnatione & Defensione vrbum.

CAPVT PRIMVM

De Exstruendis Munitionibus.



Optentissimæ nationes, ac Principes bellicosissimi, nullam maiorem gloriâ putauerunt, quàm aut fundare nouas ciuitates, vel ab alijs conditas in nomen suum, sub quadam amplificatione transferre, & ad conseruandum in perpetuitates, mœnibus, turribus, fossis, aggere ac propugnaculis munire. Ita Alexander Magnus Alexandriam, Constantinus, Constantinopolim, Cracus Cracouiam, Vissimirus Vismariam; cæteriq; Principes, alias præstantiores vrbes condiderunt.

Iam autem sciendum est, vrbes & castella, aut natura, aut arte muniri, aut vtroque simul, quod firmitus dicitur. *Natura munita dicuntur*, quæ loco edito, vel abrupto, aut circumfuso mari, siue paludibus, vel fluminibus cinguntur: sicuti Mantuam, Ferrariam, Mirandulam in Italia: Visliciam, Caunam,

Caunam, Pincum, Breste Lituanicum, in Polonia sitas esse cernim: vel quæ rupibus in ædificatæ sunt, vt Græciū in styria, Herbipolis in Franconia, Camenecū in Podolia Trembouliaq; & alia infinita loca, non in Europa tantum, sed in omnibus dumtaxat partibus Orbis. Manu verò seu arte munita dicuntur, quæ aut fossis, stipitibus, muris; aut stagnis, fluminibusq; à longè deductis circumdatæ sunt sufficienter ad propugnandum hostem. Quæ verò loca & manu & natura simul munita sunt, illa inexpugnabilia censentur esse, eò quòd difficilem ad se accessum præbeant, nec vinci aliter possunt, nisi fame ac diuturna obsidione. Communissimè autem videmus, antiquissimas ciuitates, ita in campis patentibus constitutas esse, vt deficiente auxilio locorum, arte tantum & opere redderentur inuictæ, vt est Hamburgum, Norimberga, Francofurtum ad Mœnum, Augusta Vindelicorum aliæq; infinitæ, diuersis in Regionibus vrbes, & arces. Nam quemadmodum homines natura, aliquos seruituti, libertati alios, nonnullos imperio destinasse videtur: ita & regiones, ciuitatesq; alias mercaturæ exercendæ, alias bellis gerendis aptas fecit: quarum aliquæ in id tantum incumbunt, vt se tueantur, aliquæ verò etiam alijs imperare, aut pati imperium student. Proinde genium loci accuratè primò nosse, quàm munitionem excitare, & per eam quasi compedes terrigenis iniicere, magni est momenti: quia exempla, etiam huius ætatis nos docent, regiones multas tempore belli munitionibus fuisse retentas; pacis verò tempore eas fere non potuisse, & vt demolirentur quantocius ciuilia bella excitasse.

In excitandis itaque munitionibus, præter oportunitatem loci de qua iam diximus, situs ipse, atque figura consideranda est, ne videlicet sumptus in vanum expendamus, & postea tempore bellicum maximo nostro damno furori succumbamus. Et quantum ad situm primò, obseruandum est diligenter, vt munitiones à nobis exercitatæ, principali-

ter prouinciā totam defendant; postea transitum fluij, angustiarumue, in aliquem districtum nostrum prohibeant, denique urbem cui imminet, in officio contineant; aut ab aduersario occupare eam volente, securam faciant. Proinde cum Albanus arcem Antuerpiensem, Paciotti machinatoris ingenio extruxisset, non omnibus probatur situs ipsius, quod videlicet sit posita ad Scaldis ripam quæ Brabantiam respicit & accedentes ab Hollandia hostes, urbemq; inuadentes minimè arcere possit. Arcuisset autem, si illam in opposita urbis parte, versus ostium Scaldis, contra Hollandiam statuisset: quo in loco necessario nunc noua munitio ob urbis securitatem exstrui debuit, & veteri cognomine Dama vocatur. Excusant id tamen aliqui, affirmantes in exstruenda mole habitam tunc Albano rationem, qua sibi potius ab vrbe, quàm vrbi ab hoste præcaueret. Adduntq; præterea, sapienter eo fabricatam loco, quo in arcem inferre subsidium ex subiectis circa prouincijs promptum esse Hispano. Quæ sanè cura fundatoribus artium prima censetur. Huiusmodi autem opportunitate caruissent, si Hollandiam versus munitionem excitassent. Interim obseruari quoque oportet, ne ad excitanda munimenta, terra adhibeatur friabilis: illa enim ad primos tormentorum ictus dissilit, quod male cecit Calato in Hispani potestatem redacto, cum propugnacula continuato ad meridiem tormentorū impetu corruissent.

Requiritur etiam ab ijs, qui vrbes arcesue muniendas suscipiunt, ne vicinus ager, vel arboribus, vel ædificijs confectatur: sed quarta miliaris pars circumcirca omni aggere, arbore, ædificioq; vacet; ne prospectus nimirum impediatur, aut hosti quidquam suppeditetur, quod in commodum suum transferre queat. Et sic omnes ferè munitas vrbes, tam in Italia, quàm in Belgio, absque suburbijis esse videmus: quod etiā aliæ nationes nunc æmulantur, & obseruant maxime bello præsentī Germanico edoctæ.

Quantum ad figuram, semper, considerandum est, ut
munitio

munitio non sit circularis, quali utebantur communissimè veteres; sed angularis, quæ retardet inimicum assalientem, & à longè repellat; quæ inuicem sese ab vno cornu ad aliud defendat, & damnum inferat inimico: quæ ad excurrendū & retrocedendum sit quam aptissima, & forum habeat commodissimum ab omnibus lateribus tectum, ita, vt ab aduersario lædi & videri non possis, sed ipsum ab omnibus partibus videas & ferias, nec permittas vllatenus ad fossam accedere. Vnde pentagonus videtur ea in re esse perfectissimus, si modò angulos habeat obtusos & benè fortificatos, vias copertas seu rectas, & portas ad excurrendum aptas, oblique fabricatas; fossas profundas & largas; propugnacula in iusta dispositione crecta; & vallum ipsum secundum proportionem Geometricam altum & crassum. Et si fieri poterit duplicatum, & aquis cinctum.

Muri igitur, vti diximus, non recta linea, aut circulari, sed per ambeiges & anfractus ducuntur, præsertim cum vrbs vetus, & irregulariter sita, vult denouo munitionibus cingi; siue illa in monte, siue in plano posita fuerit. Siquidem ex hac ratione hostis difficilimo opere eam adgreditur, quòd non tantum à fronte, sed potissimum à latere peti possit. Et quia copioso milite, facile ab hostibus fossæ pro muro factæ explentur; proinde commodissimum fuerit intra muros alteram fossam dare: siquidem tam tormentis, quàm scalis obfistit: tum hosti impedimento est, ne fossas explere possit; modo promineant ad imum fossæ propugnacula, ex quibus tormenta emitti possint in eos qui fossam occupare intenderent. Fossas autem putarem fieri siccas, quia maiore opere implentur: aquis verò repletæ hyberno tempore, in partibus Borealibus, per glaciem concretam accessum hosti faciunt, vt accidit in Australi etiam plaga, Mirandulæ à Papa Iulio expugnata. Ac propterea fossæ ante vrbes & propugnacula, altissimæ latissimæq; faciendæ sunt, vt nec facile possint coæquari, repletiq; ab obsidentibus: & cum aquis cape-

rint inundari, ab aduersario cuniculum continuari minimè pariantur.

Multum etiam prodest in fabricandis munitionibus portas benè munire, atque vallum ad eas ita obliquare, ne exeuntibus via recta pateat: tum etiam intra vallum istud portamq; , fossam ac pontem interesse; sed qui in medio fossæ parastidis innixus pendeat. Addantur & pensiles cataraetæ, quæ demissæ hostem insistentem excludant, tuos verò fugientes recipiant. Quemadmodum accidit in Moscouia, cum Melecius Sokolam expugnaret, vbi interclusus Germanus miles cataraetis in porta, vix non erat ad interuersionem deletus, ni properè cum securibus Poloni accurissent, & effractis cataraetis eos fortiter iuuissent.

Caueatur præterea, ne portæ subiectis ignibus eiiciantur pyrio puluere, vt fecit Suarcembergius in capienda Raba in Hungaria; & Chodkieuicius in recuperanda Pernauia in Lituonia. Proinde prudenter inuenit antiquitas, vt ante portam addatur propugnaculum, arcens accessum ad pontem & ianuam portæ: nam cataraetæ facile nunc excogitatis instrumentis effranguntur, & aduersario occunpandi pontem occasionem præbent: præsertim vbi præsidium non est sufficiens, aut excubiæ sunt negligentes.

C A P V T I I.

De Præsidij collocandis.

Quia non minor est virtus, quàm quærere, parta tueri, vt inquit Poëta: proinde Imperator, firmatis locis necessarijs, & propria tuebitur, & subactas prouincias præsidij collocatis firmiter tenebit, memor illius doctrinæ Flori. *Plus est prouinciam tenere, quàm facere.* Multi enim regiones vi aut deditione subactas, turpiter iterum perdidere, cum victoria vt i nescirent, aut gentes deuictas in officio continere non possent.

possent, Sic præsentī iam sæculo Moscouiam quā possidebamus, Valachiam Moldauiam, Liunioniam Regnumq; Sueciæ amissimus: superioribus verò, Regnum Bohemiæ, Hungariæ, Transylvaniæ Principatum, Siculos, Morauos, Silesitas, Lufatios Pomeranos Marchiam Brandeburgensem & Ducatum Prusiæ, quæ maiores nostri vt multo sanguine suo comparauerant, ita supina negligentia perdiderunt, vt ne vestigia quidem Polonici dominatus in illis locis inuenias. Sed ista est conditio mortalitatis. Longeq; maiora Græcorum, Romanorum, Carthagenensium, cæterorumq; florentissimorum populorum Imperia penitus sublata sunt. Et Chineses, qui se omnibus in mundo prudentiores esse demonstrant, vix propria iam amissis tot adiacentibus sibi regnis, multo cum sudore tuentur. Inter cognitās verò nobis Monarchias, Romani qui pleraq; bella non fortiter tantū sed & prudenter gesserunt, cum in maximo semper negotio haberent efficere, ne superati populi iugum excuterent, ferociam eorum voluptatibus, hystrionibus, ludis, spectaculis, comædijs, & vitiorum delinimentis fregerunt. Opes, ne quid moliri possent, tributis exhauserunt. Potentiam, colonijs deductis oppresserunt. Virtutem, præfidijs vbique in vrbibus collocatis, perfregerunt. Fidem denique, imperatis obsidibus arctissimè obligarunt. Et si his domari non poterant, ipsos habitatores, de vno loco in aliū, cum vxoribus & liberis transferebant: iuuentutem verò eorum ad militiam assumebant.

Fuerunt autem Coloniae à Romanis locatæ, numero quadraginta quatuor diuersis in prouincijs. Prouincias quoque quibus imperabant habuerunt similiter quadraginta quatuor (sed non in singulis coloniæ fuerunt) quæ continebant in se præfidiarios milites, vltra ducenta millia peditum; præter equites & classes; quarum vna stabat Rauennæ, altera in portu Miseno. Cæterum cum ne sic quidem rebellionem inter subditos comprimere possent, cæperunt, quod

quod nunc Turcæ etiam faciunt, populos de vno loco in alium transferre. Nouissimèq; Aurelianus Imp. domare nequiens Dacos, vbi nunc Valachia, Moldauia, & Siculi montani sunt, transtulit ipsos in Dalmatiam & Croatiam, ibi verò Coloniam Romanorum posuit & Siculorum. Vnde hodie lingua Latina, etsi valdè corrupta, omnes vtuntur. LS Similiter Carolus Magnus continuis rebellionibus Saxonū permotus, decem millia familiarum ex eis transtulit in inferiorem Germaniam, quæ tunc Gallia Belgica vocabatur. Quamobrem tam Belgæ, quam Battaui nunc lingua Germanica vtuntur comunissimè, quamuis corruptiore illa, qua Superiores Germani vtuntur.

Exemplo igitur veterum Romanorum omnes ferè Principes nunc præfidijs sua imperia firmant, præsertim remotiora. Et Veneti sanè tredecim ferè millia in præfidijs assidue habent, quibus statum suum tam in Insulis, quam in continenti, conseruant. Domus Austriaca, in confinijs Turcarum circiter decem hominū millia habent in præfidijs, respectu hæreditariarum tantum modò prouinciarum excepto Regno Hungariæ. Turca verò ipse ultra centum viginti millia equitum habet, partim in Asia, partim in Europa, sub ducentis præfectis (Sandiacos vocant) varijs in locis dispositos, qui attendunt, ne aliquis motus in prouincialibus fiat ad rebellandum; & si quid oritur, statim opprimunt. Quod ipsum facit & Rex Hispaniarum, qui per omnia sua regna & dominia, præsidia disposita habet, ne subditi Regem à se remotum habens subleuationem faciant in suos Præfectos; quemadmodum aliquoties fecerunt Neapolitani, qui vna vice cum præsidio Hispanico, per quindecim dies pugnarunt, & tamen eiicere illos haud potuerunt.

Reliqui Principes, qui præfidijs confinia sua munire, aut nesciunt, aut non possunt ob imperij latitudinem, solent vastitatem & deserta inter terminos vicinorum suorum facere, ne hostis facilè ad ipsum accedat. Sic Tammars Rex Persarum à confi-

à confinijs Turcæ, quinque dierum itineris loca omnia deferta fecerat. Sic Mauritania à Ghinea, Numidia à Nubia, & Nubia ipsa ab Ægijpto desertis diuiditur: Circassijq; à Scythijs, Trapezuntini à Medis & Armenis, Magnusq; Dux Moscouiæ à tartaris & Polonis per magnos tractus terræ syluas crescere permittunt, imò seminans eas, & reflexos ramos iterum terræ inferunt, quo difficilius penetrari possint. Chinenfis murū centum viginti milliarium à Magno Chano Tartarorum suas ditiones discriminantem, cum turribus & propugnaculis extruxit; quem centum etiam & viginti millia præfidiariorum custodiunt. Prout olim quoque Angli à Scotis iussu Romanorum, muro sese per totam Insulam diuiserant: & similiter Constantinopolitani Cæsares à Bulgaris, per multa milliaria muro extenso, perpetuisq; præfidijs collocatis.

Quia igitur sæpe sæpius inquieta ingenia locorum opportunitas ad res nouas inuitat, ideo prudens Imperator in locis munitis, quæ in acquisita bello prouincia reperientur, præfidia collocet: sed non faciat Præfectos indigenas, verum ex militibus suis selectos, quos virtus & doctrina, & fidelitas, nullis in eo loco opibus, nullaq; affinitate subnixos Regi, & Reipub. approbavit. Militaris enim præfectura, & locus sic munitus, vt ex eo quis facile expelli non possit, acres ad defectionem stimuli sunt, qui & modestos sæpe animos agitant, & ab instituto vitæ tenore cogunt deflectere. Post aciem autem, melius est plura seruare præfidia, quam deferere omnino prouinciam, aut latius militem spargere, ac facere munitiones in quibus milles collocetur, & teneat à fræno populas ciuitates, nec villanos permittat cōuenticula facere. Sic enim & rebellionem subditorum oppriment, & aduenientem ab extra hostem retinebunt, donec maiores copias conscribas. Quinimò & pacis tempore, vel induciarum, custodias Imperator prouidus minime esse negligendas sciat: & vrbes hostili agro adiacentes, quam munitissi-

mo præsidio firmet. Quamuis enim eum minimè deceat pacta atque foedera violare, sed pietatem ac fidem sacrosancte colere, mores tamen hostium nosse, & à subdolis eorum fraudibus discauere maximè oportet. Constantinus Magnus pace toto imperio constituta, ratus omnia in tuto esse, milites præfidiarios urbibus dimiserat, quæ paulò post in acerbam sui hostis redactæ fuerunt seruitutem. Quod probè nostra ætate Albertus Austriacus considerans, pactis cum Battauis inducijs, munitissimo præsidio vrbes Hollædiæ adiacentes firmauerat, ne cum videlicet aliquando crudelitatis poeniteret: quapropter & necessaria ad defensionem, si quidpiam interuenisset, tempestiuè providebat.

C A P V T I I I.

De providendo necessaria ad defensionem.

DVopotissimum in defensione urbis spectanda sunt *Primum*, ut tibi maturè de rebus necessarijs prospicias. *Alterum*, ut hostem iisdem frustres. Eam ob rem ea quæ in tutum recipere nequeas, ut pote stramenta, frumentum, ligna, pecora, & his similia, vel igne, vel alio modo corrumpenda sunt. Urbi autem quam defendendam aliquis suscipit, inprimis de annona & aquatione secura provideat, tum de machinis atque armis ad defensionem pertinentibus. Inter commeatum, provideat sollicitè de frumento, molis, sale, lardo, lignis, aceto, butyro, caseo, pultibus, carnibusque fumatis. Et aquæ sufficienti puræ & sanæ habens, si propter infirmos poterit habere vinum, hydromel, aquauitam, aut ceruisiâ tum facilius ægrotos vulneratosque iuuabit. Inter arma verò bombardas æneas, sclopos, colubrinas, contos, lanceas, gladios, globos, puluerem nitratum, canabim, funes, trabes, asseres, timpana, tubas, tum medicos, hirurgos, pharmocopolas; fossiores, ligones, ferramenta, machinatores & tacticos. Tum arma diuer.

uerſa, & armorum artifices; adq; , arma facienda aut repa-
randa, ferrum vtriuſq; temperaturæ & carbones. lignaq;
tàm ad focum faciendum, quam ad instrumenta fabricanda.
Quia obſeſſi & muris incluſi, omnes ſpecies prouiſionis pro
deſenſione murorum, tempeſtiuè procurare tenentur, ſi ho-
ſtem ludificare & virtute ac conſtantia ſua repellere cupi-
unt. Ideò exurimenta in primis, bitumen, ſulphur, picem
liquidam, oleum quod incendiarium vocant, ignemq; Græ-
canicum, ad exurendas hoſtium machinas conuenit præpa-
rari. Tum trunci, Cylindri, ſeu trabes læuigatæ, & ſaxa
rotunda in propugnaculis ſunt collocanda, vt demiffa per
præceps, non ſolùm hoſtes obruant ſubeuntes, ſed etiam
machinamenta confringant aduerſariorum: qua in re maxi-
mè prouidi ſunt Moſcouitæ, & in propugnando etiam ad
obſtinationem ſtrenui, vt nulla gens in Orbe libentius peri-
cula pro conſeruatione munitionum ſuarum ſubeat, fa-
memq; ac frigus cum aſſidua vigilantia perpetiatur.

Itidem trabes crudæ & tabulata, ac diuerſæ magnitudi-
nis clauos ferreos eſſe oportet in promptu; præcipuè cum
ſubitis operibus addenda ſit muris vel propugnaculis altitu-
do aut craſſicies, ne globi tormentorum tranſeant parietem
aut offendant propugnatores. Vel ſi vallum diruerit hoſtis,
vt extemporaneo labore, nouum excites, & vel ſaltim à ſclo-
petorum grandine tuos protegas, vti fecerat in deſenſione
Smolenſci contra Seinium, ſtrenuus ille vir Voieuoſki,
cum Germanus miles vrbiſ munitionem violenta impugna-
tione occupaffet, quem hac arte facillimè deiecit & fortiter
proſtigauit

Quod ſi vrbs, vel arx in colle ſita fuerit, habeant deſenſo-
res pondera ad deuoluendum in aduerſarios, ſi aſſaltum fa-
cere voluerint, lapides videlicet rotundos (quales in arce
Cracouienſi conſpiciuntur, antiquitus facti) columnas, ro-
tas, verticulos, quibus rebus dextrè vt untur Bulgari. Item
currus quatuor rotarum ponderibus oneratos, vaſa textilia,

ſeu dolia calculis aut terra madefacta plena, qualia deuoluebant in Germanos Turcæ, cum ſub Rudolpho Imp. Suerembergius Budam in Hungaria oppugnaret.

Illud quoque uſus inuenit, ut acerrimos ac ſagaciſſimos canes in turribus nutriant, qui aduentum hoſtium odore præſentiant, latratuq; teſtentur. Frequenter enim obſidentes, cum in ciuitate negligentiam vident, aſtu ſe à prælio & ab obſidione ſubtrahunt, ut aduerſariorum negligentia licentiam tribuant. Quæ ipſa impunitate cum creuerit, repente admotis machinis, vel appoſitis ſcalis occupant ciuitatem. Et ideo in muris, uti præmonuimus, ſaxa cæteraq; tormenta ponuntur in promptu, ſiue arx in colle ſita ſit ſiue in plano, ut cognitis inſidijs occurrentes ad manus habeant, quod ſupra capita hoſtium euoluant, atque iaculentur.

Similiter reparatio murorum, tormentorumq; omnium ante curanda eſt, quam hoſtis obſederit, qui ſi ſemel præuenit occupatos, metu vniuerſa occupantur: & quæ ex alijs vrbibus petenda ſunt, intercluſis itineribus denegantur, ut accidit Smolenſco à Moſchis obſeſſo, poſt obitum Regis Sigismundi III. & ni maturè Rex Vladislaus IV. ſubueniſſet, actum omnino de tam inſigni vrbe fuiſſet, ob rerum omnium penuriam.

Magna quoque vrbis vtilitas eſt, cum perennes fontes murus includit, ut habet munitio Mediolanenſis, & arx Buczacia in Podolia. Quod ſi natura non præſtat, cuiuſlibet altitudinis effodiendi ſunt putei, aquarumq; hauſtus funibus extrahendi, ut habet arx Græcenſis in Styria; Olſtinenſis, Raſtinenſisq; in Polonia, in rupibus altiſſimis ſitæ. Præterea in omnibus publicis ædificijs, multisq; priuatis, cifternae ſunt diligentiffimè ſubſtituendæ, ut receptacula aquis pluuijalibus, quæ de tectis effluunt præſtent, uti habent Hiſpani in arce Neapolitana.

Auxilia maturè introducantur, ne vrbs ob defectum deſenſorum facilè ab hoſte capiatur, cum ciues ipſi non ſuffe-

fece.

fecerint ad propugnandum: aliter enim difficulter, aut magno astu miles introduci poterit, prout bello ciuili feliciter euenit, cum Ategua vrbs in Hispania, Pompeianarum partium obsideretur. Igitur Maurus interrex, tanquam Cæsarianus Tribuni cornicularius, vigiles quosdam excitauit, è quibus aliquos euitans, constantia fallaciæ suæ, per medias Cæsaris copias præsidium Pompei transduxit, & urbem periclitantem adiuuit. Bello autem Prussico cum Crucigeris, Iacobus Sécigniouijs, non tam astu, quam animi fortitudine munitus, periclitanti Helsbergæ auxilio adfuit, & hostem repulit. Cum enim Albertus Marchio magnam muri partem tormentis noctu deiecisset, & assaltum moliens suos in turmas disposuisset, ille inopinatus prima luce cū mille equitibus Polonis è vicina sylua comparuit, & medias Crucigerorum acies à tergo perrumpens, in columis cum suis in oppidum penetrauit, recta pergens vbi mœnia vasto hiatu strata vidit. Dispositisq; mox per ruinam propugnatoribus & tormentis, misit caduceatorem ad Magistrum, inuitando eum ad assaltum & certamen pro mœnijs. Cæterum Magister considerato suorum periculo, rem tentare noluit, obsidionemq; continuò soluit. In qua si dies aliquot perseuerasset, procul dubio ob annonæ defectum urbem deditiue accepisset. Licet enim ea ante Sécigniouiij aduentum parcissimè dispensabatur, tamen in longum durare nō poterat, tanto præsidio in opinatè cum equis introducto. Iam autem sero parsimonia adhibetur in fundo, cum deficient omnia.

Igitur commeatus ante omnia præparetur, & deficientibus opportunè suggeratur. quia fame tot iam inexpugnabiles munitiones & arces sunt ad deditionem adactæ; quin & nostra ætate celebris illa in Gallia Rupella, non aliam ob causam in manus Christianissimi Regis Ludouici XIII. deuenit, nisi quod famem amplius ferre non potuerit. Nam ea quæ casu aliquo obsessis submituntur, non possunt in tan-

ta quantitate eſſe vt omnium inedia exſatiare valeant. Ita Annibale obſidente Caſilinum, Romani farinam dolijs, ſecunda aqua Vulturi fluminis demittebant, vt ab obſeſſis exciperetur, quibus cum obiecta per medium amnem catena Annibal obſtitifſet, nuces ſparſere, quæ cum aqua ferente oppidum deſluerent; cæterum tali comœatu ſociorum neceſſitatem non diu ſuſtentaſerunt. Ioannes quoque Demetrius Viſniouecius, à Tartaris in arce ſua obſeſſus cum omnia coria ephippiorum & curruum comedifſet, tandem in manus barbarorum peruenit, dum incenſo caſtello, ad reſiſtendum potentiæ eorum, cum famelicis ſuis impar fuiſſet.

Præparent nihilominus ſibi obſeſſi Pharmacum Epimenideum tempeſtiue, quo in defectu annonæ veſcantur more veterū Græcorum aut Romanorum. Eſt enim Epimenideum quoddam medicamentum valde nutriens ſitimq; prohibens, quo antiquitus veſcebantur cū ij, qui ciuitates obſidebant, tum ij qui in ciuitatibus obſidebantur, ſumendo vnum bolum mane, & alterum veſperi: atque ita abſque omni alia comœſtione poterant per longum tempus famem commodiſſime tolerare. Pollicebatur ſe facturum, ingenioſiſſimus vir Iurgicuicius Lituanus, Sigifmundo III. in expeditionem Moſcouiticum pergenti; cæterum neſcio qua de cauſa ab aulicis ſpretus, & Sigifmundi milites cum in vrbe Metropoli Moſcouia extremam famem pertuliſſent, & mures, feles, coria, calceos, & quæquæ obſcena ac mortuorum cadauera deuoraſſent, tandem ad extremum deditiōem facere fuerunt coacti. Non igitur ſunt contemnenda ingenia quæ veterum artes valde vtilis nobis excitare poſſunt. Sed iam ipſam obſidionem diligenter conſideramus.

CAPVT IV.

De Facienda obsidione.

Qui ciuitates expugnaturi sunt, aut obsessuri, prius earum situs, ambitus, mœnium altitudines, fossarum latitudines ac profunditates, tam ex relatione peritorum atque prudentum hominum, quam secundum Geodæsiæ præcepta ac regulas ex tabulis Geographicis, tum ipsimet Dioptricæ cognoscere debent; ut machinas, & terrea castra, iuxta recentiorum usum, ad earum expugnationem proportionally, commensurabiliterq; præstruere possint.

Deinde considerandum, utrum talis obsidio perfici & continuari possit, ne videlicet temere suscipiatur, & cum pudore deinde atque damno ingenti relinquatur, ut plurimis accidit, præsertim in septentrionalibus partibus, ubi hyemis rigorem miles sæpius ferre non poterat. Ideò Scipio Romanus apud Suidam, hoc consilium dabat. *Aut tentare non oportet, aut sic tentare, ut omnibus viribus quod instituisti, coneris perficere: nam bis ad eundem lapidem offendere, simul periculosum est & contemptui obnoxium.* Quo sanè consilio Stephanus Poloniæ Rex permotus, obsessa Polotia sub tempus autumnus, cum propter imbres continuos, qui vias laxauerant, & fluuios auxerant: & assiduas Moscorum circumquaque excursiones, annonæ penuria in castris præmeretur, nullo modo obsidionem deserere voluit, sed potius honeste mori. Atque ita facta corona oppugnationem generalem instituit, & maximo labore tandem expugnauit, inuentoq; in vrbe comineatu infinito pene, exercitum suum refecit.

Sciendum itaque *obsidendi duas esse species. Unam cum aduersarius opportunis locis præsidijs ordinatis, continuis insultibus impugnat obsessos. Alteram cum vel aqua prohibet inclusos; vel deditionem sperat à fame, quando omnes*
prohi.

prohibuerit commeatus. Hoc enim consilio, ipse ociosus ac tutus fatigat inimicum. Nam quando violenta impugnatio castellis vel ciuitatibus præparatur, tum mutuo fit vtrunque periculo: interdum autem, vel vt verius dicam sæpius, maiore oppugnantium sanguine exercentur luctuosa certamina. Illi enim qui muros inuadere cupiunt, terrifico apparatu expositis copijs, in spem deditiois formidinem geminant, tubarum strepitu hominumq; permixto. Tunc, quia timor magis frangit insuetos, primo impetu stupentibus oppidanis, si discriminum experimenta non norunt, dum in coronâ inuaditur ciuitas, resistere debent omni virtute. Quod si à fidentibus siue militaribus viris repellatur prima congressio, statim clausis crescit audacia, & iam non terrore, sed viribus & arte confligitur; subeuntesq; mœnia grauius iam leduntur tanquam nudi, quam inclusi qui suis munitionibus teguntur, vt videre erat in oppugnatione Constantiæ, cum ab Gustavo Horno de die & de nocte assaliretur, licet haberet exercitatisimū militem, & apparatus ferè stupendum, à ciuibz attamen bello non assuetis, paucorum nobilium, cum ingenti clade suorum fuit repulsus. Et hanc planè ob causam Cæsar dicere solebat, *idem esse sibi consilium aduersus hostem, quod plerisq; Medicis contra vitia corporum; fame potius quam ferro superandi.* Eapropter qui obsidet, constanter in obsidione permaneat, vt Marchio Spinola ad Bredam fecit, & Ludouicus XIII. ad Rupellam, nuperrimeq; Hispani ad Vercellam. Sed & omnes alij veteres Duces fecere. Cumq; Federicus Ducis Albani F. obsideret Harlemum in Hollandia, nec quidquam per octo menses ob hostium fortitudinem & pertinaciam proficeret: & iam desperato successu adornaret in Brabantiam reditum, Albanus increpita filij inconstantia, ita per literas eum monuit. *Si locum deserere ei in animo esset, se quamuis lecto decumbentem in castra venturum: aut (si morbo in horas ingrauescente impediretur) accersiturum denique ab Hispania eius matrem, qua bello imposita,*
filij

flij partes abeuntis expleret. Simili constantia & Zamoscius fuit, quem cum monerent amici, vt ab obsidione Pleſcouiæ diſcederet & ipſe, Rege ad celebranda comitia in Poloniam redeunte, ſciens ſires ſecus ceſſiſſet, magna cum inuidia eius, ſuperiorum rerum gloriam omnem corrupturam eſſe. Respondit. *Bonum Imperatorem, eundemq; bonum ciuem, non ſua, ſed publicæ dignitati ſtudere debere. Si re infecta ab obſidione abſcedendum ſit, è renata commodius futurum ad ſe peccati eius opinionem recidere, quàm ad regem, aut Remp. vniuerſam.*

Perſæpè etiam vrbes celeritate expugnantur, (præter aſſaltum præmeditatum, & longam obſidionem, quæ fame obſeſſos domat) ſi eas ſubitò præterq; expectationem adgrediariſ, vt Suarcembergius occupauit in Hungaria Ratham. Chodkieuicius in Liuonia Pernauiam, Hluſcius in Moſcouia Aſtrachanum. Et hoc quidem facilè fieri poteſt, ſi exercitu tuo tam longè abſis, vt eas vel nolle, vel non poſſe obſidere, antequam fama eò perueniat, credariſ. Quod ſi ergo celeriter atque ſubito eiufmodi vrbes obſidione cingas, vix non ſemper victoriam inde reportabiſ. Ita Cæſar Borgia in Italia, cùm Nuceriæ exercitum ſuum haberet, in Camerinas ſe mouere ſimulauit, at in itinere ad Ducatum Urbinateſ deflexit, illumq; vnica die in poteſtatem redegit, quod quidem alijs niſi magna cum temporis rei q; iactura vix licuiſſet. Similiter Nicolaus III. Radiuillus Lituanicarum Copiarum Imperator, fingens ſe in Polocenſem agrum excurrere velle, inopinatò per ſyluas & paludes eluctatus ad Vlam apparuit, aggreſſuſq; ſubitò caſtra Moſcorum, triginta milia in eis hoſtium occidit, & fugientibus in arcem immixtus, ipſam munitionem occupauit, quam obſidione cingere, nequaquam alias tentaffet.

Vrbem igitur inuaſurus Imperator, hæc præcipuè præcepta obſeruet.

1. *Præmittat equites lenioris armaturæ, qui obuioſ quosque intercipient, ne quiſ ſe ad urbem curſu proripiat, hoſteſq; ad-*

uentare significet, sed incautis improuisus immineat exercitus, et si non per prodicionem victoriam surrepturus. Nam repentini impetus, quique præter opinionem subito ingruunt, aduersariorum copias etiam præstantiores potioresq; percellunt. Sæpiusq; accidit, ut sic vrbes absque vlla obsidione intercipientur, aut perterritæ in ditionē accipiantur, uti accidit in Pomerania compluribus in locis, Gustauo Sueciæ Rege inopinato ad mœnia urbium comparent, sed præcipuè Stetinij, quæ est caput Prouinciæ, & vbi princeps cum suo præsidio inclusus fuerat; non quidem ut Cæsari faueret, sed ut in neutralitate manere potuisset. Perterritus autem inopinatò Gustauo aduentu, maluit portas urbis aperire, quam vim, cum trepidantibus suis experiri.

2. Aditus hostilibus auxilijs obstruat, ne in subsidium venire possint, aut per aquam, aut per terram, vel si quid fuerit ingressum, ne egredi inde valeat. Ita Spinola cepit Ostendam, Farnesius Antuerpiam, Nassouius Traiectum & Syluam ducis, alijq; alia infinita loca.

3. Quæ hostibus vsui esse possint, inutilia reddat, aut corrumpat seu perdat, siue ea sint esculenta, siue potulenta, aut fruges fructusue qui in agris reperiuntur. Ita Machometes II. oppugnando Albam Regalem in Hungaria, Segetes circum circa longissimo tractu vastauerat, hortos suburbanos, vnde obsessi olera habebant, restagnatione aquarum corruptit, aggerem per quem in obsidentes excurebant, perfodit, lignorum strues qui in locis paludosis in vltum defensorum propè mœnibus asseruabantur, oleo ignito succendit; & ita obsessos vndique afflixerat, ut nisi precib; Diui Capistrani opem è cœlo obtinuissent, humano consilio & viribus prorsus interissent.

4. Non minus sua consilia occultare sciat, quàm qui obsidione urgentur: nam aliter aut cladem subibit, aut ab obsidione infecta recedere debet. Sic in Prussia Rege Iagellone Mariæburgum obsidente, postquam inclusi Crucigeri intellexis-

lexissent, nobilitatem Polonam à Rege missionem petere, nec vlllo modo in castris velle brumam pati, qui iam arcem dedere fuerant parati, mutato consilio, constantiam induerunt, & Rege ob seditionem nobilitatis ab obsidione recedente, qui iam omnino extincturi erant, crudelissimum Polonis bellum, iterum æstate appetente, appararunt.

5. *Quos obsidet, quantum potest fallat.* Ita Annibal in Italia multas vrbes cepit, cum Romanorum habitu, quosdam suorum, ex longo belli vsu Latine quoque loquentes præmitteret. Sed & Mauricius Nassouius simili astu vsus, miserat qui Atuerpiam interciperent, cum Spinola Bredam obsideret, sed ea fato suo seruata est, cum iam hostis vallum castelli nocte intempesta conscendisset.

6. *Ad prodicionem sollicitet.* Marcellus cum Syracusanum quendam Sosistratum ad prodicionem sollicitasset, ex eo cognouit remissiores custodias fore die festo, quo Epicides præbiturus esset vini epularumq; copiam. Insidiatus igitur hilaritati, & quæ eam sequebatur socordiæ, munimenta conscendit, vigilibusq; cæsis, aperuit exercitui Romano urbem, nobilibus victorijs claram. Simili ferè modo Dembinus in Liuonia Volmariam occupauit, cum Moschi vino adusto, quod persubordinatas personas ipsemet ad prodinandum submiserat, de more festo die sancti Nicolai inebriati, negligentius vigilias agerent.

7. *Astu excogitato ipse ad mœnia impetu repentino aduolet.* Ita Philippus oppido Samiorum exclussus, Apollo-nide præfecto eorum, ad prodicionem corrupto persuasit, vt plaustrum lapide quadrato oneratum, in ipso aditu portæ poneret: confestim deinde signo dato insequutus oppidanos, circa impedita portæ claustra oppressit trepidantes. Nicolaus verò Firlei, bellum in Prussia cum Crucigeris gerens, currum fœno plenum in oppidum immisit, quasi pabulum obseisis subministraret. Qui autem currum gerebat cum in porta stetisset, rotam vnâ consulto ante succissam cum

axe fregit: & dum vigiles curru subducto portam serare niterentur, equites leuioris armaturæ quos vulgò Cofachos nuncupamus, cum Secigniouiō viro strenuissimō aduolauerunt, quo tempore etiā armati de illo fœno profilierunt, & sic portam occuparunt, & oppidum Mariæuedra dictum cæperunt.

8. *Transfugas qui deciperent, aut opprimerent submittat.* Ita Lyfimachus Rex Macedonum, cum Ephesios oppugnaret, & illi in auxilio haberent Mandronem Archipiratam, qui plerumque oneratas præda naues Ephesium appellebat, corrupto ei ad prodicionem iunxit fortissimos Macedonum, quos ille restrictis manibus pro captiuis Ephesium introduceret, qui postea raptis ex arce armis, urbem Lyfimacho tradiderunt.

9. *Hostes ad inopiam omnium rerum redigat.* vt Fabius Maximus fecit, qui vastatis Campanorum agris, ne quid eis ad fiduciam obsidionis superesset, recessit sementis tempore, vt frumentum quod reliquum habebant, in sationes conferrent: reuersus deinde renata protriuit, & ad famam redactis potitus est. Idem fecit aduersus Athenienses, Antigonus. Aduersus Morauos, Boleslaus Criuoustus; aduersus Pomeranos & Brandeburgenses Seciechus Palatinus Cracouiensis.

10. *Obsidionem diuturnam fore persuadeat.* Vnde Tyberius Gracchus Lusitanis dicentibus, in decem annos cibaria se habere, & ideo obsidionem non expauescere. Vndecimo, inquit, anno vos capiam. Qua voce perterriti Lusitani, quāquam instructi commeatibus, statim se tradiderunt. Similiter Cedanenses cum septennium se habere sufficientem provisionem iactarent, Rex Stephanus etiā septuaginta annis se velle obsidere eos respondit. Igitur supplices, certa summa pecuniæ exsoluta ad bellum Moscouiticum properantem, haud leuiter adiuerunt. Hisce quoque annis auxilia Gustauo in Prussiam venientia, cum ad oppidum Amerstinum

stinum diuertissent, Koniecpolscius die eadem ad deditio-
nem coegit, simulans se velle eos diuturna obsidione doma-
re; qui tunc nullum penes se peditem, nullasq; ad obsiden-
dum machinas habebat.

11. *Præsidia destruat obsessorum.* P. Cornelius Scipio,
intellecta difficultate expugnandi Delminum, quia omni-
um concursu defendebatur, aggredi alia oppida cæpit, & e-
uacatis ad sua defendenda singulis, vacuatum auxilijs Del-
minum cepit. Nicolaus Firlei itidem munitissimam tunc
Prusiæ ciuitatem Bronsbergam, in suam potestatem redi-
gere volens, vicina oppida petere cæpit: consecutusq; est, vt
Crucigeri fiducia velut satis munitæ vrbis eius, ad tutelam a-
liorum oppidorum dilabarentur. Quo facto ipse rursus re-
uocatis omnibus suis, vacuam eam ferè defensoribus cepit.

12. *Seditionem intestinam apud obsessos faciat, admotoq;
exercitu potiatur ciuitate.* Vti fecerat Vespasianus Iudæis,
Hierosolyma circumuallata, vbi tot millia bello intestino
in templo Salomonis occisa fuerunt.

13. *Fluminum deriuatione, & vitiatione aquarum, ad de-
ditionem cogat.* Ita Publius Seruilius Isauram oppidum flu-
mine (ex quo hostes aquabantur) auerso, ad deditio-
nem siti compulit. Sed & C. Cæsar in Gallia Caduceorum ciui-
tatem amne cinctam, & fontibus abundantem, ad inopiam
aquæ redegit, cum fontes cuniculis auertisset, & fluminis v-
sum per sagittarios arcuisset.

14. *Aquarum inundatione obruat.* Ita Iustinianus Im-
perator ciuitates Mesopotamiæ ad Tygrim sitas, aquarum
impetu in eas conuerso, absque machinis diruit. Ita L. Me-
tellus in Hispania citeriore, castra hostiū in humili loco po-
sita, licet benè munita inundauit, fluuiο ex superiore parte
immisso: subitaq; inundatione turbatos, per dispositos in
hoc ipsum insidiatores cecidit. Idem tentarunt Hungari a-
pud Cassouiam in Turcas. Idem Antuerpienses in Alexan-
drum Farnesium, etsi parum prospero successu: barbarunt

attamen & non nihil pauoris de nocte intulerunt.

15. *Pauorem obsessis inijciat.* Philippus cum Triuassum castellum nulla vi capere posset, terram ante ipsos muros ag-
 gefsit, simulauitq; agi cuniculum: oppidani, quia subritos
 se existimarant, dediderunt. Hoc astu sæpius nunc Gusta-
 uus in Germania, eiusq; Duces vsi, complures ciuitates ad de-
 ditionem coegerunt.

16. *Obsessos per insidias eliciat.* Cato in conspectu Lace-
 tanorum quos obsidebat, reliquis suorum submotis, Sueffa-
 nos quosdam ex auxiliariis, maximè imbelles, aggredi
 mœnia iussit: hos cum facta eruptione Lacetani faciliè auer-
 tissent, & fugientes auide insecuti essent, illis quas occulta-
 uerat cohortibus oppidum cepit. Comes de Donna Silesius,
 cum iussu Imperatoris Ferdinandi II. Closcum in Silesia ob-
 fidione cingeret, sæpiusq; ab erumpentibus suos profligari
 cerneret, locatis in sylua vicina, qui recenter è Polonia ve-
 nerant Cosachis, leuioris equitatus; cum suis Germanis gra-
 uiter armatis, solito more elicere cupiens suburbia intrauit,
 & ignem domibus iniecit, quod Comes Turnius qui inclu-
 sus fuerat, è turri conspicatus, mox in Vastantes cum fortif-
 simis quibusuis, tum peditibus, tum equitibus erupit, fugi-
 entesq; consulto Cæsarianos, paulò longius insecutus. Cum
 interim Cosachi pernicitate equorum suorum vsi, parte ab
 alia, eadem suburbia occuparunt, & restinguentes ignem
 oppidanos, præfidiariosq; cum Turnio erumpentes à tergo
 aggressi omnes ferè deleuerunt, ita vt vix Turnius ipsemet
 euaderet. qui deinceps ad deditionem coactus fuerat.

17. *Regressum simulet.* Alcibiades aduersus Bizantios,
 qui se mœnibus continebant, insidias disposuit, & simulato
 regressu, incautos eos oppressit. Eadem arte Sigisf. III. Smo-
 lenscum expugnauit. & Stroinouius Cosachorum in Ger-
 mania ductor, Vorniaciam deuastauit, præmissis qui peco-
 ra ciuium abigerent, in hos cum tota vrbs cum præfidiarijs
 erupisset, ille ex infidijs prorumpens ad vrbs portas cucur-
 rit,

rit, & sic omnibus reditum interclusit, & ad vnum cecidit. Idem fecit & apud Francketalum.

18. *Opera ad oppugnandum præparet, licet parum proficua interdum.* Ita Alexander Farnesius Limburgum in edita rupe situm, & prærupta circum valle inaccessum, ad deductionem coegit, per saxa & cotes aggerem ad urbem producendo, muniendoq; viam crebris virgultorum ac ramalium fascibus, ac cespite aliunde comportato, contra pilarum iactus è mœnibus. Cum dein urbem ingressus animadrtisset novas munitiones ferè inexpugnabiles, defensionumq; receptacula, & tumulos veluti castella ex herbido itidem cespite, & sudibus firmatos ab ingenioso loci machinatore fabricata: apparatusq; belli atque annonæ immensum, quod in longum tempus obsidionem protraxisset, & sine ingenti militum iactura fieri non potuisset, Mirabatur magnopere cur operas suas extimuisent, quæ ijs nihil nocitura fuerant.

19. *Cum urbem aliquam obsidet aut arcem, videat ne obsideatur ipse à superuenientibus à tergo copijs* Proinde exercitum suum fossa, vallo, propugnaculis custodijsq; muniat, ne ab obsidione repellatur. Ita Spinola vndique castra sua, cum Brædam obsideret, munitionibus cinxerat, vt superuenienti Mauritio numerosissimo cum exercitu, nequaquam turbaretur aut loco cederet. Eodem quoque modo Henricus Nasouijs ad eandem Bredam nuperrime fecerat, prout & ante paulò ad Syluam Ducis & Traiectum, vbi à duplici exercitu inuasus, reijci ab obsidione haud poterat.

20. *Habeat vias securas ad conducendum commeatum:* quod maximè prouidebat Zamoscius, cum Plescouiam, Lucos, Vsiatam aliasq; vrbes in Moscouia obsideret, quas numerosissimo exercitu huc atque illuc transuolante Moschus defendebat, maximè curans ne annonam nostri in castra subducere possent. Nam qui in hoc est negligens, inglorius ab obsidione necessario recedet. Et Carolus V. cum Metenses

tenfes obsideret, fame magis, quam hostium, qui vias omnes infederant, vi repulsus fuit. Carolumq; Audacem cum Nanceium cinxisset non tam hostilis gladius, quam com-
meatum defectus superauit.

21. *Vrbem quam minimè obsidere vult, velle se obsidere simulet, vt quam obsidere desiderat, præsidio aut necessarijs nudat am obtineat facilius.* Albertus, vt Hulstum munitum Flandriæ oppidum occupare posset, vniuersum exercitum in vltiorem Brabantiam iussit proficisci, quasi ibi aliquid tentaturus: vt euocatis passim præsidijs, vicina, vt existimabant, periculo loca firmarent ordines, neglectis ijs quæ peti non credebant. Restabat interim in Wasia legio, qua ob non præsentata stipendia tumultuari falsa vt apparuit fama spargebat, illa enim vacuum penè militibus Hulstum prima circuallauit, & occupatis vbique accessibus, ne subueniri illi posset, effecit. Vnde ne tunc quidem securis esse licet, cum omnem obsidendi voluntatem deposuisse videtur hostis. Nā eadem iterum arte Spinola obsederat Bredam, & fame domauerat.

14
— 22. *Eruptiones prohibeat, fossis ante portas factis, & tormentis dispositis.* Ita Machometes II. ad Albam Regalem in Hungaria fecerat, omnemq; Christianis excurrendi viam præcluserat. Ita Zamoscius cum in Liuania Bialokamieniū obsideret. Et sane prudenter. quia obsidentium militum molitiones ab hostibus è mutuo facile conspici poterunt; obsessi verò obiectis mœnibus tecto improuisa sæpenumere eruptione per portas effusi, vel machinis ignem subijcient, vel militum strages edent, vel denique quidquid tumultus suadebit, audebunt. Quapropter diligentissimè cauendum est, ne ab oppidanis patiare detrimentum, vti assolebat fieri Moscouitis Smolenscum obsidentibus, quos Voieudocius assiduis excursionibus ita fatigabat, vt siue cibo, siue somno fuerunt occupati, siue ocio, aut aliqua necessitate dispersi, semper eos perimeret, & intra mœnia secum abduceret.

Curet.

Curet itaque Imperator ut quam maximè eruptiones prohibeat; sitq; in omnibus cautus, insidijs obsidentes & obsessi subiacent, cum negligentia interuenerit. Ideo imitetur veteres, ac præcipuè Romanos, inter quos Iulium Cæsarem nemo vnquam in obsidionibus faciendis, prudentia, solertia, perseuerantia, atque diligentia superauit. Qui, in obsidione Alessiæ Vercingentorigem Ducem Gallorum ita intercluserat cum octuaginta millibus armatorum lectissimorum ex omnibus Galliarum prouincijs, ut cum venirent ducenta quadraginta millia in succursum ei, non potuerint Romanos loco pellere, aut fame domare, qui obsessi obsidebant Vercingentorigem, & pulsus illis, qui ad succurrendum ei venerant, ad deditionem adegerunt, totamq; simul Galliam potestati suæ subiecerunt. Vnde Velleius Paterculus dicit. *Circa Alexiam tantæ res gesta, quantas audere vix hominis, perficere penè nullius, nisi Dei fuerit.* Ex recentioribus verò ad obsidendas vrbes, nemo aptior fuisse legitur, quàm Marchio Pescaræ, & Castruccius Castracanis, qui dicitur renouasse disciplinam militarem in Italia, cum obsideret Pistoiam, exemplo Iulij Cæsaris, qui vno vallo cinxerat Pistoienfes, altero sese defendebat à Philippo Sanguinetto, qui triginta cum millibus ad succurrendum venerat, nec recessit ab vrbe, donec eam in suam potestatem redigeret. Quod nunc iam aliquoties factitatum vidimus in Germania vtrâq; Gallijs & Italia. præsertim apud Casale Vercellas & Verucam.

CAPVT V.

De Machinis ad oppugnationem.

VRbium oppugnationis, obsidioq; Imperatoriâ virtutem prudentiamq; vnâ cum machinarum apparatu desiderat, nam aliter expugnari haud poterunt. Et quia machinæ

Bbb

pro

pro diuersitate temporum ac ingeniorum, diuersæ in vsu habentur, aut excogitantur, modernæq; longilsimè differunt ab antiquis; ideo non inconueniens esse putarem, si prudens Imperator, & illas adhibere vellet, pro varijs bellorum casibus immutatas, aut accomodatas ad modernum vsum, præsertim Helopoles, Sambucas, Catapultas, Turres ambulatorias, Testudines aggestitias, Pontes penfiles, aliaq; veterum instrumenta ad transfiliendas fossas, & conscendendos aut subruendos muros excogitata, quæ magis ad fabrorum mechanicorum industriam solertiamq; pertinent. Ad Imperatoriam verò prudentiam solummodò id spectat, vt eas pro opibus & facultatibus paratas habeat, sciatq; seligere loci partem vbi illis commodè vti milites possint.

Machinarum autem quibus veteres ad defendendas vrbes utebantur, varia erant genera, inter quæ numerantur Balistæ, Angones, Monangones, Onagri, Scorpiones, Arcubalistæ, Fundæ, cæteraq; missilia & conti, præter supra nominatas catapultas. Nec oppugnantibus suæ deerant, vtpote, Arietes, Lubdarei, Turres, Murices ignem ferentes, Musculi, Plutei, vineæ, Falces, Testudines, & alia: quorum omnium vicem hoc sæculo tormenta præstant, & tam offensionibus, quàm defensionibus adhibentur, adeò vt non aliter milites nunc, quàm solis sclopetis armentur.

De obsidionalibus verò machinis, scripsit ad Adrianum Imperatorem, Apollodorus Philosophus, & construxerat eas, quas longè ante eum fecerant, Philon Atheniensis, Philon Byzantinus, Ascreus Ctesibius, Hieron Alexandrinus, & alij. Nam & Alexander Magnus habuit in militia secum duos mechanicos longè celeberrimos Diadem, & Chariā, Polyidis Thetali discipulos, qui primi adinuenerunt Terrebras, Scalas nauticas, & Turres ligneas, quæ rotis feruntur. Athenæus quoque ad Marcellum ex Angisistrati, & aliorum sapientum compositionibus ad obsidionem pertinentes machinas commentarijs exposuit: tum denique à Bitone ad

Attalum, de constructione bellicorum instrumentorum, collecta fuerunt præcepta. Vltimus ex omnibus antiquioribus mechanicis fuit Hiero, qui de Machinis bellicis, deq; Geodæsia scripsit. Ex Neotericis autem infiniti planè de Architectura militari, & Geometria, scripserunt, quos inter postremus, at non postremo loco habendus Adamus Fretagus Borussus, patricius Torunensis.

Priusquam igitur ad obsidendam urbem Imperator processerit, præparet machinas & instrumenta belli, ne & tempus inaniter & sumptum in militem exspendat; habeatq; penes se viros ingenio & sagacitate præstantes quorû opera finem propositum, facilius assequatur. Ita Albanus cum Belgium administraret, semper habebat secum in castris Bartholomæum Campium Pisauensem Italum, operum bellicorum præsentissimum machinatorem, cuius ingenium, cum alias sæpè, tum præcipuè in expugnatione Rhotomagi experta est Gallia. Rexq; Stephanus expeditione Moscovitica proclamata, nō prius cū exercitu Vilna mouit, quàm quæ vsui bellico essent necessaria ipse præparasset, tormentaq; bellica ad modum quendam, quem ipse vsu atque experientia accomodatissimum cognouerat, fundi iussisset, conquisiuissetq; viros ad instrumenta bellica conficienda, peritissimos.

Sed iam nunc Asiatici, Americaniq; hac in arte plurimum valent, & Calecutenses postquam à Portugallis didicerunt sclopos & machinas æneas conficere ex metallo, ita conficiunt in perfectione, vt secundum relationem eorum, qui in partibus illis fuerunt & arma tractarunt, nullibi terrarum perfectius fabricari videantur: puluisq; pyropius in summa bonitate ab illis præparatur, vt similis in Europa nondum fuerit visus.

Et quia machinis ad motis muros vndique cingere non facile est; præsertim cum vrbs ampla aliqua obsidetur, ideo Imperator exercitum in corona ponat, & machinas in circu-

itum multifariam diuidat, quia sic obsessos ad consiliorum inopiam desperationemq; citius rediget. Qui si cæteris murorum partibus derelictis ad machinarum impetus obtundendos omnes concurrent, vbi minimè periculū timebunt, ibi facilè nemine aut paucis prohibentibus murus capi poterit, vel per scalas, vel per aliquem alium modum. Aut si in varios tributi ordines, opem operamq; singuli separatim ferre velint, qui machinarum viribus resistere conabuntur, à vehementiore illorum impetu discutientur, pugnamq; sustinere non poterunt, vt accidit Magdeburgensibus à Tyllio expugnatis. Imperator igitur strenuū se athletam præbeat, seseq; in species varias conformet, huc illucq; aduersarios distrahendo fallendoq;: vnum interea præcipuè moliatur, vt totum vrbs corpus valida vi compræhensum, euertere tandem ac supplantare possit. Quod præstitit Ludouicus XIII. in euersione Rupellæ, & portu maris occluso, & suppetijs Anglicanis profligatis, & mœnibus dirutis, & obsessis per famem, perq; continuas explosiones tormentorum ita diminutis, vt amplitudinem propugnaculorum, iam amplius defendere non valerent.

C A P V T

VI.

De Faciendis cuniculis.

EST etiam certum quoddam genus oppugnationis subterraneum atque secretum, quod Cuniculū vocant. Adhibita enim multitudine, ad speciem metallorum, in quibus auri argentiq; veras befforum rimatur industria, magno labore terra defoditur, cauatoq; specu in exitium ciuitatis, inferna quæritur via. Quæ fraus duplicibus opératur insidijs. Aut enim penetrant urbem, & noctu non sentientibus oppidanis egrediuntur per cuniculum, reſeratisq; portis suorum agmen inducunt, hostesq; in ipsis domibus perimunt igno-
ran-

rantes: vti fecit Attila cum Aquileiam subuertisset, exciasq; tam opulenta vrbe, viam sibi in Italiam aperuisset. Aut certè cum ad murorū fundamenta peruenerint, suffodiunt eorum aliquam partem, suppositoq; puluere pyrio, benè occludūt foramen, quo maiori cum impetu, murus in altum eijciatur, & irruptioni aditus referetur. Hinc inualuit hodie militare prouerbiū, *LIGONEM PALAMQ;* esse quæ arces exstruant, destruantq;. Et quidem veteres frequentissimo in vsu hunc oppugnationis modum habebant, cum nondum bōbardæ excogitatae fuissent, nunc non item iam, sed prius alij modi cum machinarum violentia adhibentur, qui vbi nō procefferint facilè, tum demum ad fodendum & subruēdos muros proceditur, Ioannesq; Austriacus ad gubernandum Belgium missus, videns tot vrbes mœnibus per quam altis, terraq; ad eludendas pilarum emissiones, latè oppletis, ac prælargis circumfossis communitas, omīssa oppugnatione alia, solitus erat hostem adoriri ligone muris admoto, Hannoniorumq; urbem Philippopolim hoc telo expugnauit, immisis fossoribus in vrbis fossam, qui ligonibus atque dolabris murorum ima subruerunt, tecti de super oblongis crassisq; tabulis, int estudinis modum conformatis, crudo corio contra ignes copertis. Vineas olim ac porticus Romani vocabant, de quo vide Cæsarem, Liuium, Polybium, maximè autem *Lipsium*, qui & *iconibus* adhibitis omnia veterū bellica instrumenta ac machinas expressit; quas nec hodie deberent omittere prudentes bellorum Duces. Et cuniculis quidem, veluti vetere ac fido expugnandis arcibus tormento, etiamnum vtuntur vineis adhibitis, certissimamque mœnibus ruinam parare solent, sed iam alio diuersoq; à veteribus modo, non semper sub terra, sed sæpius sub dio fossas apertas faciendo, quas in dextrum ac sinistrum obliquando, ac quasi contorquendo, perueniunt tecti terra egesta vsque ad ipsa murorum propugnacula in fossas. Quo sanè modo quasuis fortissimas vrbes nunc Henricus Nas-

soui in Brabantia, & Guſtauius in Germania expugnarunt.

Contraminas deinde faciunt obſeſſi, ſed ſub terra occulti, vt fallant aſtum obſidentium; aut etiam ſuppoſito puluere Ducem eorum interimant, vt tentarunt Moſcouitæ cum Sigifmundus III. Smolenſcum obſideret; ſed depræhenſi à noſtris, cautionem Regi obſidenti dederunt, vt ſæpius deinceps locum ſtationis ſuæ mutaret.

Fuerunt olim qui ex humida materia igne ſuccenſo, fumo obſeſſos in cuniculis laborantes ſuffocabant. Alij qui veſpis atque apibus in cuniculum immiſſis, magno ibi hoſtes incommodo affecerunt: atque varij varijs modis ſuos aduerſarios repulerunt, vti & Aquileigenſes contra Attilam tentarunt, factaꝫ contramina, in ipſum eggreſſi inciderunt, ſed vultus ipſius maiestate perterriti, diffugerunt retro, Deo ſic caſtigare ſuos volente, Tyranusꝫ conatu obſeſſorum perſpecto, cautior in poſterum fuit.

C A P V T V I I.

De Faciendo aſſaltu.

Qui præter cuniculos urbem obſeſſam etiam aſſaltu euertere conantur, inprimis hoc faciant, vti ſupra in obſidione monuimus, diſpoſiti in coronam; quia ſic diſtracti defenſores minus potentes erunt ad reſiſtendum, præſertim cum munitio eſt ampla & vaſta. Nimia etenim urbium magnitudo, vt obſidendi aſſaliendiꝫ in coronam difficultatem generat, ſic etiam defendendi. Ideo ſicut in quocunque exercitu non nimis, ſed ſatis multos milites deſidero, ita in urbibus non nimiam, ſed quæ ſufficiat magnitudinem exopto. Si enim nimis illæ exiguæ ſint, operibus ac munitiõibus excitandis, quæ, ſi mœnia fortasſe aut priora munita vi deiſciantur, hoſtem arceant, locus eſſe non poteſt. At ſi æquo ſint maiores, maiori egent præſidio, cui alendo
vix

vix multa sufficiunt; nec tam facilè sibi inuicem succurrere possunt milites, tam dissitas sortiti stationes, ut est Patauium, Mediolanum, Verona, aliæq; ciuitates vastæ in Italia: Norimberga, Francofurtum, Moguntia, Colonia, atq; Hamburgum in Germania: Nouogardia, Plescouia, Moscouia metropolis in Russia; Louanium in Brabantia, Regiomontum in Prussia, aliæq; infinitæ ciuitates in Europa munitio- nibus ad præscriptum modernum factæ. Frequenter siqui- dem legimus alteram vrbs partem ab aduersarijs occupatâ fuisse, nescientibus & ideo quietis præfidiarijs acciui- bus, qui agebant in alia, ut accidit Neapolitanæ vrbi, cum eam cepisset Alfonsus Magnus; & Bizantio, cum esset à Latinis occupata. Euenitq; id olim nobilissimæ Ægypti vrbi Memphi, quam hodie Cayrum appellant: illam enim à Selymo expugnatam esse, post tres demum dies incolæ omnes sciuerunt.

Præterea oppugnationem Imperator de nocte faciat, exemplo, Gustau Hornani, qui Constantiam urbem per aliquot dies & noctes sine intermissione assaliebat; inutiliter quidem, ob preces deuotas piorum qui intus fuere, sed reuera ex arte militari, & maximo cum discrimine obsessorum; qui ea quæ ab hostibus parantur, in tenebris cernere nequeunt, ideoq; grauiora & periculosiora esse, quàm reipsa sint, existimant. Vnde & tumultus excitantur, quum nemo quid in ijs rebus prudentis consilij det, habeat. Et damnum infectum, iam factum esse plerique putant, nec scire possunt, quomodo hostis vrgeat, aut vbi machinis, scalisq; admotis instet. Quare & seditiones passim clamoresq; ac trepidationes cum panicis terroribus excitantur, uti fuit Famagustæ in Cypro cū à Turcis caperetur, & Smolensci in Moscouia, cū itidem de nocte expugnaretur à Polonis, quos ferè quadruplo præfidiarij Moschorum, numero superabant, sed tenebris & eiulatu foeminarum consternati, resistere prorsus non audebant.

Oppu.

Oppugnationem itaque aggressurus Imperator, ne milites suos vires deficiant, & hostis quietem ab oppugnatione non habeat, diuidat in tres aut quatuor partes exercitum suum, & sic alijs per vices quiescentibus, continuo dedie & de noctu oppugnet absque vlla intermissione, vti fecerunt Croatæ & Poloni ad Louanium, cum Gallorum exercitum in suis castris, vt fame domarent, detinere voluerunt. Nam obsessi etsi simili modo per vices, muros, aut vallum castræ se defendent, quiescere tamen & somno vti haud poterunt ob metum in quo versantur, cogenturq; vigilare continuo mentis cogitatione anxij: atque ita curis & vigilijs attriti, res suas præ infirmitate defendere non poterunt, adigenturq; facile ad deditiorem. Ita Appium Claudium fecisse in obsidione Vciorum, Liuius laudat, qui dicere ad milites suos solebat. *Per intermissiones & intervalla, lentiores spes nostras facimus:* quod notatum in illa memorabili obsidione Ostendæ, vbi, cum Iberorum exercitus tædio ac torpore officeretur, Hollandi ad sustinendam obsidionem lenitudine nimia obfirmabantur. Idem accidit & ad Strigonium, & ad Sinderouiam deinde, cum Archidux Matthias, lentè in oppugnatione cum suis Germanis procederet, Turcæ autem interim totam prouinciam occuparunt. Prudenter itaque Romani, circumspectis difficultatibus vrbs obsessæ potius dæ, ne frustra tempus tererent, celeriter obsistebant incepto, aut omnino non oppugnabant.

Quod si ciuitas in alto colle posita est, qui eam vi expugnare cupiunt, habeant Labdareos ligneos paratos, ne in succedentes deuoluantur lapides rotundi, trabes seu columnæ, dolia, verticuli, rotæ, aut currus ponderibus onerati, sicuti communissimè faciunt Moscouitæ, & omnes Slauones. Vel fossas laterales ab ipso montis pede, vsque in iugum montis ducant, vt & pondera proiecta in eas deuoluantur: & aggredientes assaltum à sclopetorum ictu, atque machinarum tonitru, commodè protegantur. Non absurdum

dum quoque fuisset, ad euitandum grandinem globorum sclopetis eiaculatorum, vt ascendentes habeant Parmas, vel testudines rostratas, quibus veteres Romani in oppugnationibus utebantur: quia multum profectò conducerent tam in plano, quàm in ascensu montis abrupti. - Item habeant murices ignem artificiosum ferentes, quo vel manu proiecti inhæreant perietibus, vel tectis, ignemq; concipiant; vel iaculati de longè, quicquid attigerint comburant.

Magnopere quoque profuerit, si tubicines vna cum militibus, qui primi murum ascenderint attrahantur. Hostili enim tuba noctu de mœnibus exaudita, obsessorum animi infanum percelluntur, quasi iam vi penitus expugnata sit ciuitas: & sæpè portas ac propugnacula deferentes diffugiunt, vti accidit in capto Smolensco, vbi dum Regis Sigismundi III. labarum Moscouitæ conspexere ad ignem, sonitumq; tubarum in mœnibus à quatuor partibus exaudiuere, statim cæperunt à prælio diffugere: inq; Monasterium quoddam, loco editiore in media vrbe situm, cum liberis & vxoribus concurrere, vbi puluere pyrio supposito, ne hostibus in ludibriū venirent, igni supposito, omnes simul perierunt.

Etiam curet, qui oppugnat urbem, per inuia, & paucis cognita loca, eam occupare. Ita obsessam à Mauritio Grolam, Spinola liberauit, cum per paludem, quam pertransiri non posse omnes persuasum haberent, cum exercitu penetrasset. Et nouissimè Lansbergam, munitum & magni momenti in Pomeraniū oppidum, facile cepit Gustauus, per notas paucis vias, militem suum & tormenta deducens. Apud Sallustiū quoque Marius montem saxeam, arduum omnino & accessu difficilem, imò, vt fama erat, nullo humano ingenio aut viribus superandum, Liguris vnus, gregarij militis, opera & ductu, per neglectum à vigilibus, ob asperitatem, locum, inuasit simul & occupauit.

Facta denique in urbem irruptione, portas vrbs obsessis ad liberio rem fugam aperiat, tum proclamari iubeat in-

ermibus veniam impetratam; at armatis nullam superesse: quibus quidem modis permultæ vrbes æquiorē victoriā hosti præbuere: præcipuè nuper Francofurtum ad Oderam, Gustauo; cum obuij in assaltu, deditionem facerent, remotiores, per auersam portam effugerent. Alias multoties occidisse compertum est istius modi copias, iam victoriā in manibus habentes, aut repressas aut extinctas esse. præsertim vbi, vel præsidia veteranorum sunt, vel vrbis Gubernator gnarus rerum bellicarum, virq; fortis habetur.

C A P V T VIII.

De Propugnatione seu Defensione inclusorum.

Qui ciuitates defendunt. In primis caueant ne propugnacula extra urbem, quæ mœnia non contingunt extruant; semper enim ea expugnari continget, quòd loca nimirum capacitate iusta destituta, si tormentorum vim experiri necesse habeant, tueri defendiq; nequeant: interim amissa initium & præsagium exitij tui fuerint. Ita Genuenses per vicinos colles quædam propugnacula disposuerant, cum à Ludouico Gallix Rege defecissent, quæ postmodum expugnata, vrbi ipsæ exitiosæ fuerunt. Similiter cum Syluaducis ab Hollandis obsideretur, primo propugnaculum Isabellæ nomine celebre, quod procul à mœnibus esset, expugnatum fuerat; ex quo deinde tormenta, in ipsam urbem librabantur, adeò prospere successu, vt ad deditionem vel hanc ob causam maximè, ciues fuerint adaçti. Pari quoque ratione Magdeburgum à Tyllio fuerat expugnatum, cum circumiacentia propugnacula, quæ mœnijs coniuncta nō erant, ab ipso prius expugnata, pro munitione ei aduersus obsessos essent. Idem accidit & Vercellis nuperrimè, cum Hispani occupatis munitionibus à mœnijs vrbis remotis, Gallos deinde cum ipsa vrbe ad deditionem cōégissent.

Item

2. *Item arcium propugnatoribus hæc sit regula, ne intra muros aliud propugnaculum habeant, quod veteres communissimè in usu habebant: nam prima propugnacula deserunt defensores spe ad salutem in interioribus propugnaculis posita, ut passim in Hungaria atque Moscouia factitatum, & vidimus & legimus. Iam autem amissa prima propugnacula semper arcem ipsam pessundant, cum in ijs propter loci angustiam, nulla omnino propugnacula, tempore necessitatis, extrui valeant; neq; commodus sanè excursioni locus datur, aut propugnationi cum in coronam fit assaltus ab hoste.*

3. *Et quia frequenter dolum excogitant obsidentes, ac simulata desperatione longius abeunt. Sed ubi post metum, murorū vigilijs derelictis, requieverit incauta securitas, tenebrarum ac noctis occasione captata, cum scalis clanculum veniunt, murosq; conscendunt. Ita Moscouitis Smolenscum defendentibus Rex Sigismundus III. fecit, cumq; per biennium, ferè variè oppugnando, nihil proficeret, notata vna sentina, per quam feces vrbs in Borysthenem defluebant, simulauit desperationem, & castris conuasatis versus Lituaniam processit: nocte autem illum & obscura, à quatuor partibus vrbs exercitum admouit, puluere in illa sentina accenso, qui murum adeò aperuerat, ut integræ cohortes penetrauerint per ruinam. Quapropter maior semper adhibenda est custodia, cum hostis abcesserit, quam cum versatur ad muros: & in ipsis muris ac turribus tuguriola locanda, in quibus vigiles, hybernis mensibus, ab imbribus & niue, æstiuus, defendantur à sole.*

4. *Non plures in vrbe presidarios habeant, quam ad eam protegendam sunt necessarij: citius enim ob multitudinem commeatus consumitur. Nunquam itaque Vercingentorigem laudabo, qui in Galliæ vrbe Alexia, cum octoginta millibus obsideri se à Cæsare passus fuit. Nec probabo Moscouitarum factum, qui cum quinquaginta & septem millibus, præter vrbicam plebem, incluserant sese Plesecouix, à Za-*

moscio obsessi. Iidem præter ciues, quadraginta millia præfidiariorum habuerunt Smolensci: & tandem in longum obsidione protracta, decem hominum millia simul expulerunt, inedia confectos, ad hostem. Quos Rex Sigismundus III. benignè refocillatos postquam in sua dimisisset, magno commodo deinceps obsidentibus fuerunt, partim annonam comportando, partim monstrando insidias, partim sollicitando reliquos ad deditionem. Cauenda igitur multitudo in munitione nam ubi in longum tempus trahitur obsidio, multa deesse solent obsessis, si præsertim militum numero sunt nimium grauati.

5. *Caveant obsessi, ne primo mane portæ inconsideranter aperiantur, verum aliquanto seriùs; quia facile luce creperant ex insidijs solent accurrere hostes & urbem intercipere,* — uti fecerat in Moscouia Chodkieuicius, qui per dies aliquot in proxima sylua delitescens obseruabat portas vrbs minimissimo loco sitæ, Pieczaria dictæ, quo non erat aditus nisi per vnicum aggerè ad ingressum à ciuibus extructum, cum vrbs esset sita in sula ingentis lacus. Cum itaque aliquot cohortes mane ex vrbe fuissent egressæ quæ Chodkieuicij castra speculatum ibant, ut paulò longius recesserunt, ille ex insidijs consurgens, luce adhuc dubia ad portam accessit, lingua Moscouitica clamitans ut aperiretur, quod non audentes quasi resistere multitudini Polonorum, reuerterentur confestim, ne ab aggere aliquo modo excluderentur. Vigiles non potentes discernere habitum, qui simulatus fuit, iusserunt expectare mandatum Præfecti vrbs. Interim Chodkieuicius appositis instrumentis & puluere, portam effregit & urbem cum suis intrauit.

6. *Nemo prius emittatur, nisi exploratis locis circa urbem.* Hac enim via communissimè Hungari intercipiunt oppidi Turcarum, insidijs de nocte loco commodo positis: vnde porta bene orto sole aperta, solent Turcæ equis conscensis prius urbem circumire, notantes vestigia hominum,

licet

licet remoti sint à confinijs Hungarorum. quod si aliqua de-
præhenderint, cautè scrutantur insidiatores, vrbe tunc benè
obserata.

7. *Vt is, qui vrbi præest, portarum custodes constituat, qui
omnia, quæ in urbem inferuntur curiosè inspiciant. ne vasis ar-
mati includantur, aut fœno, aut annonæ, quod sæpius acci-
dit; & nunc cum pisces ac olera in munitionem Treuiris im-
portarentur, milites occultati subtus introducti fuerunt, &
vrbs ab Hispanis atque Princeps, Elector hoc stratagemma-
te captus est. Et Breda olim ab Hollandis, & Ambranium ab
Hispanis intercepta fuere.*

8. Imprimis autem vitetur negligentia vigilum; quia
sic maximè capiuntur vrbes, cum per aliquod stratagema
vigiles ad socordiam fuerint deducti. Ideo Iphicrates Dux
Atheniunsum cum præsidio Corinthum teneret, & sub ad-
uentum hostium ipse vigilias circumiret, vigilem quem dor-
mientè viderat transfixit cuspide: quod factum quibusdam
tanquam sæuum increpantibus. Qualem inueni, inquit,
talem reliqui. Idem fecisse dicitur & Epaminundas The-
banus. Domitius verò Caluinus, urbem quam obsidione
cinxerat, indies cum aliqua exercitus parte ambire consue-
uerat: obsessi igitur persuasi id exercitij causa fieri, vigilijs
neglectis, præter expectationem inuasi atque expugnati
fuere.

9. *Vt non semper iidem milites vigilent: aut iisdem duci-
bus vigiles vtantur, sed vt quàm frequentissimè, rationes vniuer-
sæ, quæ ad vrbis custodiam pertinent, mutantur. Hoc namque
pacto, minimè poterit aliquis, urbem exteris prodens, aut
significare eis aliquid, aut ab illis quidquam accipere, qui
quidem nescient, in qua murorum parte, nec quibuscum ea
nocte proditores erunt. Hac ratione Ingolstandium à Sue-
cis seruatum, qui illud acerrimè in spem proditiōis oppu-
gnabant. Hac quoque ratione Rupella à Christianissimo
Rege Ludouico XIII. expugnata: cum nemo è castris, eius*

confilia obsessis prodere potuisset, ob assiduam mutationem vigilum, quamuis plurimi fauissent inclusis.

10. *Nemo vigilum norit, neque ubi stationem habebit, neque in qua urbis parte vigilabit.* Sic Antuerpienses faciunt; perq; sortes à Præatore missas, stationes in propugnaculis mutant.

11. *Quam plurimos per noctem vigiles collocent, ubi aliquot imminet periculum.* habeantq; paratas cohortes ante urbis Præfecti domum, ut si quid accideret perturbationis, statim in subsidium submitti possint. Hoc perpetuò iidem Antuerpienses faciunt, licet periculum belli sit longius ab ipsis, & ante Curiam urbis stationes ciues ipsi quam diligentissimè peragunt.

12. *In singulis specularum locis tres minimum stationem agant,* sed non quos casus fortuitus obtulerit, verùm ciues benè possessionati, & rerum bellicarum benè peritis qui eminentiori aliquo loco positi speculentur, & è longinquo intervallo igne vel panno aliquo nuncium deferant in urbem sic custoditur perpetuò quasi, tota ferè Italia, ab incurfionibus pyratarum turribus ad littora maris in circuitum dispositis, in quibus tres ordinarie homines vigilant, & dum adnantes littus barbaros vident, signum de nocte igne accenso, de die verò hædera exporrecta, dant vniuersis, ut hostem aduenire sciant, & vel ad munitiora sese loca recipiant, vel armis correptis ad littus accurrant, & excessionem prohibeant. Multò magis faciendum id est in urbibus obsessis, & quemlibet eminentiorem locum tres probatæ fidei viri custodiant, perq; vocem aut signa, omnibus inclusi imminens aliquod periculum denuncient.

13. *Maximè verò ad portas delectus custodū habeatur;* ut viri prudentes, solertes, benè de re domestica constituti, quiq; liberos domi habeant, huic curæ præficiantur: ij non admittendi, qui ob inopiam nomina militiæ dederunt, aut propter aleam, aliudue intemperentiæ genus, æs alienum

contraxerunt, quia parum fidei tales habent, & præmijs facile corrumpuntur: aliterius præsertim nationis, religionis, atquæ linguæ.

14. *In primis autem illud inquiratur, an sit inter ciues concordia:* quoniam obsidij tempore, summum id est bonū, honesto quodam prætextu emittere velut ad legationem obeundam, aut alia ciuitatis negocia gerenda, qui discordias miscet.

15. *Curare quoque debet periclitantis loci gubernator, ne ob causam quamcunque ullus in iussu suo, ex assignata sibi statione decedat.* Cumq; obsessa esset à Rossenio Antuerpia, edicto consulari aliquot designati fuerunt, qui ad extinguenda, si quæ fortè orirentur incendia excubarent: cæteri omnes prohibiti ex loco quem defendendum susceperant, se mouere. Et proculdubio actum fuisset de vrbe, si ciues excitatū à Gallis incendium, restinguere ante maluissent, quàm assalientes mœnia milites repellere.

16. *Loca illa curiosius custodienda sciant obsessi, quæ minus occupari posse arbitrantur:* Siquidem multæ vrbes pericre, quod ea parte expugnarentur, quæ extra fortunam posita videbatur. Ita Alexander Magnus rupem occupauit ab ea parte, quæ præcipicio suo impossibilis ad ascendendū videbatur. Scipio etiam in expugnanda Hispanica Carthagine, Gubernatoris negligentia vsus fuit pro occasione; dum is qua stagnum urbem alluebat, nihil inde sibi metuens, nullas excubias, nullos disposuerat defensores.

17. *Præterea curet is cui vrbs tuenda venit, ne quidquam tumultuariè aut præter institutum fiat, sed cuique in omnibus actionibus functio sua certo constet.* Ergo foeminæ, senes, ætate minores, debiliores, infirmi, domi sese contineant, atque robustioribus locum cedant, quorum pars in muros, pars ad portas, pars denique ad locos vrbis præcipuos armata ideo distribuatur, vt si quid præter expectationem intra mœnia occurrat, harum opera ad id præsto sit. Pars etiam nulli loco ad.

co adstricta ad opem omnibus ferendam, paratam sese exhibeat, quibus hunc ad modum constitutis, tumultibus atque perturbationibus vix locus esse queat.

18. Vt ij apud quos pauioris, nocturno præsertim tempore, initium fuerit exortum, quieti in loco se contineant, ne cæteri metu panico consternati totum iam exercitum hostilem, urbem inuasisse existiment: urbemq; & murorum propugnacula deferentes, aufugiant.

19. *Nullos transfugas è castris hostilibus recipiant:* Nā vel noua solent adferre, quibus obsessi consternantur, cum hostem vel insigni aliqua victoria, vel nouis auxilijs auctum esse audiunt. Vel tesseram excubiarum, modumq; inuigilandi inuestigant, & per signa aliqua ad suos deferunt: vel militem præsidarium, aut Duces eorum corrumpunt, vel deditiōem suadent: vel aliqua opera ciuitatem occupant. de quibus rebus infinita exempla in historijs: sed & in bellis præsentibus, cum obsidione præmeretur Hanouia, Brisgoia, Benfedlia, Arx confluentiarum, & reliquæ vrbes munitæ, varix artes ad occupandum ab obsessis fuerunt adhibitæ.

[+ Lu

20. *Vt omnes urbis porta, sint classa, una duntaxat aperta, qua difficillimè urbs aditur; & unde videri è spacio quā longissimo poterunt, qui appropinquauerint.* In hac porta, esto portula secretitia, vt corpora duntaxat hominum & quidem singula per eam ingrediantur, atque egrediantur. Nam hoc pacto, (adsit modo custos prudens) minimè faller aliquis, siue transfuga exeat, siue explorator introeat. Totam verò portam aperiri iumentorum & plaustrorum causa, atque eorum quæ fœnum afferunt, periculosum.

21. *Fraudem omnem caueant, nec egrediantur extra mœnia.* Ita enim Cimon Atheniensis, nocte concubia in fanū quoddam extra mœnia ignem immisit, & cum ciues ad incendium restinguendum urbem negligerent, eam subito occupauit. Alij præsidarijs, qui frumentatum exierant circumuentis, suoq; milite horum vestibis operto, præsidarios mentiti, arcibus potiti sunt.

22. *Err.*

22. *Eruptiones cautè faciant.* Romani qui in præsidio Panormitanorum erant, veniente ad obsidionem Hasdrubale, raros ex industria in muris posuerunt defensores; quorum paucitate contempta, cum incautus muris succederet Hasdrubal, eruptione facta ceciderunt eum. E contra Turcæ à Germanis Budæ in Hungaria obsessi, cum incautus in Germanos de nocte erupissent, à Polonis leuioris armaturæ in id consultò excubantibus, omnes ferè interclusi & cæsi, vix postea mœnia tutati sunt.

23. *Auxilia ad succurrendum submissa, caute recipiant.* Multi enim Ducum auxilia obsessis appropinquare compertum habentes, militem suum e mentita auxiliorum facie, & signis eorum in locum submiserunt, ijsq; ex errore intra mœnia receptis vrbe potiti sunt. Ita olim Chiouiensium Dux Vlodimirus, Dreulanos occupauerat in Alba Russia. Et nuper in Italia, Mantuam, Colaltus Comes, quæ vrbs ferè inexpugnabilis videbatur: e mentito itaque Venetorum auxiliorum nomine, cum tesseram eorum proclamassent, noctu in urbem fuerunt intromissi Cæsarei milites, qui eam statim occuparunt.

24. *Præsidia sua in subsidium alijs non dimittant, licet hostis abcesserit à mœnibus.* Ita enim Pyrrus urbem quandam populosissimam in Dalmatia occupauerat: simulauerat etenim se de expugnanda ea desperasse, & conuersus fuerat ad alia loca occupanda; id autem eo animo fecerat, vt oppidani his auxilia submitterent, atque ea ratione distractis hinc inde præfidiarijs ipsi occuparentur. Idem fecit & Scipio cum in Hispanias exercitum duceret, & quasdam arces præfidijs Carthaginensium nudare cuperet. Simulauit itaque aliquoties se illas oppugnatas quidem velle, sed metu non saltem ab obsidione abstinere, sed etiam propterea exercitum inde se abducere. Hannibal ergo illum verè metuere arbitratus, quo maioribus cum copijs inlequeretur, præsidia illa ad se euocauit: qua re cognita Scipio per Masinif-

fam, arces illas haud difficulter occupauit.

25. *(autè emittant & recipiant nuncios: ne vel nunciorum nomine decipiantur, vel hostis cognoscere possit quid vterius cogitent obsessi.* Jagello Rex Poloniæ, obuenta de crucigeris victoria Gruneualdensi, cum Mariæburgum lenta obsidione teneret, dedit licentiam seni cuidam sacrificulo ab obsessis discedere ob infirmitatis causam. At hic inter suppellectilem suam, sexaginta millia aureorum exportauit, militem in subsidia conscripsit, & frumentatum euntibus Polonis, valde molestus fuit, vt pæniteret eos aliquando sacerdotio aut senili ætati honorem habuisse. Nonnulli, vt cautè litteras suas transmitterent, siquidem eis homines emittere non liceret, per columbas epistolas suas, vti supra scripsimus, emittebant. Hirciusq; Consul Romanus, dum Brutum de omnibus certiores redderet, assuetis certis in locis cibo columbis, epistola seta ad collum religabat, easq; à propinquo in quantum poterat mœnibus loco emittebat, illæ lucis cibiq; auidæ (nam eas inclusas ante tenebris & fame affecerat) altissima ædificiorum perentes excipiebantur à Bruto.

26. *Constrent se abundare ijs rebus, quæ eis desunt.* Romani cum à Gallis Capitolium obsideretur, in extremam fame panem in hostē iactauerunt: consecutiq; vt abundare comeatibus viderentur, obsidionem donec Camillus subueniret tolerauerunt. Idem fecisse dicuntur Pomerani aduersus Polonos, in obsidione Naclensi, lardum in subeuntes proijciendo & caseos. Hi verò qui Casilini ab Annibale obsidebantur, ad extremam famem peruenisse crediti, cum etiam herbas alimentis eorum Annibal sæpè arato loco, qui erat inter castra ipsius & mœnia, præriperet, semina in præparatum locum iecerunt: consecuti vt habere viderentur, quo victum sustentarent, vsque ad satorum prouentum. Eodem deinceps stratagemate, à diuersis vndique Regibus obsessi Gandenses, salutem & pacem obtinuisse feruntur.

27. *Obsidionem constanter ferant.* vti fecerunt Romani, qui pacis mentionem, quantumuis fortuna iniquissima sæpius pugnassent, nunquam admiserunt; imò agrum in quo castra Annibal habebat, defuncto fortè domino, venalem ad id precium licendo perduxerunt, quo is ager ante bellum vænierat. Atque adeo obstinato vbiuis animo conspiciebantur, vt ad defendendam urbem suam, ne illum quidem militem, quem in agro Campano habebant, auocari paterentur. Nam eodem tempore, quo Roma ab Annibale premebatur, Romani Capuanos obsidebant. Eodemq; tempore supplementum exercitibus quos in Hispania habebant, diuersa porta miserunt ex vrbe, ostentandæ fiduciæ gratia, cum Annibal mœnibus assideret. Non minore obstinatione & Hollandi vrbes suas defendebant patrum nostrum memoria: cumq; Hispani Harlemum & strictissimè obsiderent & pertinacissimè oppugnarent, Kennaua maris animi fœmina quinquagenaria, mulierum propugnantium manipulum ipsa collegit & regebat, & cum ijs ausa pro mœnibus munia militum obire, interq; sclopetarios castra Hispanorum lacessere, quamuis supremis duobus mensibus adeo fame premerentur, vt mures, feles, coria, calceos, & quæuis obscena deuorare fuerint coacti, nullo tamen modo ferociam deponere voluerunt, certi in confertos hostes irruere, pugnantescq; mori potius, quàm tradita in vrbe pecorum more iugulari. Eodem obstinatio & ferocia fuit Sancerranæ ciuitatis in Biturigibus, & eodem ferè tempore, vbi triennis puella, vt testatur Thuanus, paulò ante mortua atque humata, à parentibus ipsis, detestabili exemplo, refossa deuorataq; fuit. Iugdunenses verò Bataui, condicionibus ad deditionem ab Hispanis prouocati, priusquam fame domarentur, responderunt. Alimenta sibi non defutura, donec læuum brachium restaret: hoc efuros, dextro ad libertatem reseruato.

28. *Cauendum quoque ne litteris fictis nomine sui Principis decipiantur ab hoste:* vti accidit Georgio Fronsbergio, Bredam

dam pro Hispano defendenti, qui dum gliscente indies, ob stipendia nō exsoluta, militum in vrbe dissidio, fidum hominem ad Ioannem Austriacum Belgij gubernatorem misisset. Festinaret opem: suos implacabili seditione discordes, obsidionem nō vltra laturos. Fæderatorum duces capto nuncio cum literis, eius loco submiserunt alium, excusato prioris nuncij morbo, responsum quasi Austriaca manu compositum ferentem: dederet honestis conditionibus urbem, quòd subsidia expedire & nummos in præsentia promptum non esset. Fides literis adhibita, & Fronsbergius contra fidem captus, à proprijs militibus, in potestatem hostium traditus fuit.

29. Porro & hoc defensorem vrbis scire velim, *nihil hosti animū ad occupandā urbem tantopere addere, quam si nouerit, obsessos bello non assuetos, animoq; inde alieno esse.* Nihil ergo intermittat, quod ad terrorem istiusmodi hominibus incutendum facere possit. Contra obsessi, ijs partibus quæ ab hoste oppugnantur, fortissimum quemque præficient, quorum animus non terriculamentis, sed vi armisq; expugnari queat. Nam si primus hostium conatus irritus fuerit, inde non parum animi obsessis accedet, quos postmodum, tam virtute, quàm existimatione superare necessum erit. Quod si verò primo assaltu repulsus hostis obsidionem statim soluit, attentissimi obsessi sint in omnia, de nocte præsertim, ne reuerso illo fortè ob negligentiam vigilum intercipientur, vt accidit Moscouitis Starodubū defendentibus, quos cum Tarnouius primo assaltu expugnare non potuisset, simulauit se statim à mœnibus eorum recedere. Moscouitæ, vt gens est in ebrietatem prona, pulsatis tota die ob lætitiā campanis, tandem Baccho indulgerunt, Tarnouius verò qui Poloniam versus retrocesserat, de nocte cum toto exercitu reuersus. Urbem vi magna oppugnauit, ignem iniecit, atque intra horas aliquot expugnauit.

CAPVT IX.

De Defensione oppidanorum cum hostis irruperit ciuitatem.

Quid facere debeant opidani, si hostis irruperit ciuitatem, multi rerum bellicarum periti, disquirunt, cum omnium tunc metu perturbentur animi, nec est qui consilium dare, aut capere possit. Innumerabilibus attamen declaratur exemplis, sæpè cæsos ad internecionem hostes, qui inuaserant ciuitatem. Quod sine dubio euenit, si opidani muros ac turres obtinuerint, vel altiora loca occupauerint. Tunc enim de fenestris ac tectis omnis ætas ac sexus irrum-pentes obruunt faxis, alijsque generibus telorum. Quod ne sustineant, obsidentes portas ciuitatis aperire consueuerunt, vt resistere desinant, fugiendi potestate concessa. Necessitas enim quædam virtutis est, desperatio in hoc casu. Senenses, ciuilibus olim discordijs inglorij, tot turres priuatis in ædibus ædificabant, vt inuales desuper faxis deuolutis, atque balistis emissis obruere potuissent. Moscouitæ, quod casas ligneas inhabitent, solent plateas vrbs, cum hostis eas occupare cæperit, domibus transuersim positis subito occludere, hostemque sic inclusum de fenestris varijs missilibus interficere. Atque ita Chodkieuicium Pieczarijs intercluserant, cum inopinato superuentu, paucis cum cohortibus occupasset: vnde, pluribus amissis, vix ipse eluctatus est. Germani autem catenis ferreis, quas in id semper paratas habent, occludunt vicos omnes, fossasque extemporaneas faciunt, aut trabi-bus in id paratis ante, vias obsæpiunt, quod est omnium vtilissimum. Arabes & Mauri propter hoc solùm, vt quam facillimè ferari possint, vias in suis ciuitatibus strictissimas faciunt. vt si hostis urbem caperet, statim eum missilibus & contis è fenestris opprimere queant. Expertus hoc malum Alphonfus Magnus in Africa, cum Gerbim expugnasset &

Ioannes Tarnouius Polonus, cum à Rege Lusitano Emanuele, contra barbaros in Africam missus Arzila cepisset Ægyptij verò absque tectis domus habent (eo quòd nullæ ibi pluuiæ decidant) sed tabulatis ita insternunt, vt per domorum cacumina, tanquam per vias patentes incedere possint. Quapropter faxis & trabibus desuper hostem plateas vrbis occupantem opprimunt, Turcasq; cum Cairum cæpissent per duas septimanas ita assidue interimebant, vt Selimus ex vno vico in alium die noctuq; bellum promouendo, vix non fuerit eiectus de quadrigentis millibus suorum militum parte longè maiore amissa. Et paulò ante in eadem Ægipto in ciuitate Mastura, sexcenti Galli fuerunt occisi faxis de tectis, qui ad liberandam terram Sanctam ducebantur à Roberto, fratre S. Ludouici Regis. Paucosq; ante annos idem infortunium expertus est Sabaudia Dux, Genuæ: cuius milites licet vrbis iam bona parte potiti essent, sic tamen ab opidanis, & præsertim rusticanis, qui ciuica in domo excubabant, oppugnati fuere, vt quotquot scalis in vrbe penetrarant, ad interuencionem vsque fuerint deliti. Adeò verum est, quod Dionysius Halicarnasseus scribit. *Vehemens res est necessitas, & extremum periculum satis est ad induendam audaciam, si cui non est innata.*

Proinde, licet hostem moenia aliquando superare contingat, nondum tamen obsessis omnis ad salutem via, modò ne ipsi sibi desint, interclusa est: siquidem multoties accidisse compertum est, istiusmodi copias, iam victoriam in manibus habentes, aut repressas, aut extinctas fuisse. Cui quidem rei non parum confert, vt obsessi altiora petant, vti supra innuimus, atque è turribus & domibus strenuè pugnent, prout ante paucos annos fecerunt Poloni, Smolensci à Moscouitis obsessi, è quorum castris cum Galli ac Germani turrim vnā occupauissent, vallumq; deinceps ac muros expansis ad terrorem obsessorum, vexillis suis conscendissent omnes ad deditionem voluntariam inuitando, alias armatis

u-
et
la
lo-
of-
as
il-
us
ix
m
to
e-
o-
m
us
ab
u-
e-
n
est
a-
n-
lo
f-
a-
i-
r-
t,
o-
ni
s
f-
r-
matis & resistere conantibus nullam superesse salutem; ita ab obsessis excepti fuerunt, ut non tantum de muris eos destruerint, verum turrim etiam, quam occupauerant, explosis in eam omnibus tormentis, in vno instanti cum hostibus prostrauerint: factaque excursionem per portas, quingentos ferme captiuos secum in urbem abduxerint. Sed quia non semper vi vrbes capiuntur, verum prodicione quoque interdum; ideo de proditoribus etiam aliquid adscribamus, qui in rem tuam fideliter agunt, & ad victoriam conferunt.

C A P V T X.

De Proditoribus Urbium

PRODITORIBUS fides & promissa ab Imperatore seruanda sunt: quia leuissimi atque inconstantis, imò perfidi hominis est, facto non implere, quod iam ante pronunciaſti. Non sunt imitandi Turcæ, quorum Tyrannus Solimanus I. cum Rhodum capere nequiuisset, filiam suam proditori in uxorem, & certas in Asia prouincias, in dotem, promiserat: eumque opera cuiusdam, maximo cum damno totius Christianitatis, vrbe potitus esset, & ille præmium promissum audentius poposceret, respondit, se libentissime præstiturum, sed cum lege, quod filia sua Machometana, & ille Christianus esset, irritum per leges Machometi matrimonium foret; sed si ea vult potiri, exuat primò cutem baptizatam; postea succrescente noua, circumcidat sese ritu Machometano, tum demum nuptias paraget: Atque sic infelicem hominē, & tot animarum proditorem, excoriari iussit. Reliquos verò omnes proditores, quorum opera in Hungaria vrbes interceptiebant Turcæ, interimerunt, tametsi sui incolumitatem pepigissent.

Tu autem Imperator Catholice, qui tua sponsione, eiusmodi farinæ hominibus aligatus es, proditori fidem serua, &
quæ

quæ promifisti præmia exsolue: sic enim plures habebis, & faciliori negotio per eos, vrbes ac prouincias lucraberis, vti nuperrimè faciebat Gustauus. Postquam etenim sibi hostium partes amplectentibus, gratiam haberi perspexerint animos ad ea beneficia conuertent suos; conterraneisq; suis persuadebunt, vt in tuam potestatem sese vltro dedant. Vnde quisquis proditori dat, munus accipit potiùs, quàm confert, & prompta hac sua liberalitate, ciuitates emit atque ciues. Et hinc ferunt Hispanos, plura in stipendia, quibus proditores in omnibus penè statibus alunt, quàm in milites impendere. Lucrum enim se existimant facere, si securitatem suam, quocumque tandem modo obtineant, ab ijs. qui sunt sibi infesti: & quibus vel patria minus est cordi, vel naturalis ingenij torpor intentionem ipsorum & artes penetrare non finit. Non igitur ij præmia soluunt, quòd dignos existiment, sed vt aliorum animos hoc lenocynio seducant. Proditionem amant, non proditores, quos cum amplius eorum opera non egeant, communissimè contemnunt.

Quod si verò tu, in exercitu tuo, quendam consilia tua hostibus prode noueris, operaprecium feceris, si ea, quæ facere minimè cogites, tanquam facturus ipsi concedideris, quod quidem hostem ad ea tentanda pelliciet, quæ tibi ad victoriam multum confere possint. Caueant ergo sibi obsessi, ab hominibus, quorum fides inter suos suspecta sit; quos quidem tam præmijs, quàm pæna in officio continere solemus. Sic Marcellus, Lucium Baucium Nolanum, Hannibalis partibus fauentem, tam liberaliter ac comiter habuit, vt eum ex inimico sibi amicissimum redderet. Hannibal è contra, quo castrum quondam Romanorum occuparet, hac ratione rem adgressus est: solebat quidam præfidiariorum venationibus vacare, hunc itaque subornauit, vt metu hostium simulato noctu potiùs, à venatione, quàm interdum reuerti vellet; atque sic milites suos secum introduceret, qui interfectis excubijs, portam occuparent.

Vt igitur

Vt igitur concludam, Solemne est vbique, proditorem amare, odisse proditores ob exemplum. Sic eos qui Lusitaniam prodiderunt, nullo, quamuis promisso præmio, dignatus est Hispanus, sic alij alios: Melius tamen facies, si eis fidem seruabis, quia plura lucraberis, pluresq; eorum opera ad te trahes.

C A P V T X I.

De Cinitatibus subactis.

SVbactæ prouinciæ, aut vrbes, ne fidem fallant, dent obfides victori. Ita faciebant Græci; ita & Romani, qui Frisijs, Gattis, Parthis, innumerisq; alijs populis obfides iniunxere. Sciebant quippe non facile quempiam aliquid contra eos ausurum, in quorum potestate charissima sua, & Patriæ pignora sunt. Nec deuictis tantum Regibus, aut gentibus, necessitatem illam imposuerunt Cæsaros, sed etiam amicis, quorum opera seruiente iam Repb. in bello, aut alibi ijs erat vtendum. Intellexerat hoc bene Gustauus, & bellum contra Polonos exorsus, cum metropolim Liunioniæ Rigam in parres traxisset, ab Elbingensibusq; deinceps in Prussiam euocatus fuisset, ab vtrisque, obfides sexus vtriusque, liberos ciuium, in Sueciam misit, & sic fideliori opera harum duarum urbium toto bello vsus erat. Sciebat enim ex Historijs, quod vsitata veterum Principum hæc praxis esset, non belli tempore tantum, sed & pacis. Et in Macedonia adulti Procerum liberi, Regi tradebantur, ad munia, haud multum seruilibus ministerijs differentia: quo instituto Alexander domita Thracia Asiam petens, ne fortassis occasione absentiae suæ, deuicti nuper Principes ad ingeium redirent, & procul se agente rebellionem res ibi turbarent, omnes conspectioris ingenij, quos animus vel auctoritas suspectos fecerant, vel occidit, vel per speciem honoris ad commilitum

cum secum traxit: segniores, à quibus periculum non time-
 bat, ad tutelam Regni reliquit, relictisq; plebeijs præfecit.
 Ita in Germania quoque idem Rex Gustauus fecit, Saxoné,
 Luneburgensem, Vaimariensem, Hafsium, aliosq; conspe-
 ctiores Principes, ne facti eos poeniteret, per speciem hono-
 ris ad commilitium secum traxit: segniores, foedere impli-
 cavit, & loca munitiora ab eis pignoris loco extorsit, Steti-
 num, Berlinum, Torgauiam, & reliqua. Ciuitatibus verò
 liberis, quasi defendere sese, aut parum scirent, aut omnino
 non potuissent, valida præsidia imposuit; & in non nullis ca-
 stella ad coërcendam insolentiam plebis, firmissima erexit:
 futurus dominus omnium ad libitum, nisi Fato suo prære-
 ptus fuisset. Idem & Gallia fecit; & legationis specie è ci-
 uibus nonnullos reliquit, nonnullos militiæ munere extra
 patriam detinuit; quosdam simpliciter exulare iussit, quos-
 dam perduellionis causa punitos pronunciauit; reliquos a-
 micitiæ specie, & cōmunis periculi respectu, in bellum tra-
 xit, firmioraq; vicinorum loca suis præsidijs muniuit, Su-
 sam, Pinarolam, Casaliam, Mantuam, ac reliqua. Hoc i-
 plū fecere & alij Principes, faciuntq; perpetuò Hispani, quo
 melius res suas stabilire valeant. Et ex eis Federicus Albani
 Ducis filius, seueritatem patris imitatus, cum Harlemum in
 Hollandia fame domitam cepisset, omnes qui supererant
 præsidiarios, cum opidanis, qui fame nondum perierant,
 continuato multorū dierum ferali spectaculo, aut ferro, aut
 laqueo, aut demum aquis enecabat, vt subactam ciuitatem
 eò facilius ac securius retineret. Sed pessimo exemplo. Me-
 lius Zamoscius, qui post expugnationem Vielikolukorum,
 habebat inter alios captiuos, matronas quoque Moscorum
 aliquas honestas, quas capta Neuelia deditiis donauit,
 vt eas secum in Moscouiam abducerent; quòd pudicitia
 earum in tanta itineris longinquitate, ac militum multitudi-
 ne, magna custodia & sumptu indigeret. Mirabantur Mo-
 sci,

Lu

sci, ac vltro fatebantur, se eius ætatis atque formæ matronas nostris reddituros non fuisse. Quod autem hoc Zamoscius fecerit, honore ipsarum & pudicitia in integro conseruata, non mutari sese, quod etiam fortunam ybique prosperā haberet. Idem Derpato in Liuania recepto, cum in arcem regiam diuertisset, & interea puluis in aula Episcopali suppositus à Moschis, qui eum recta eò diuertere, putarunt, ignē concepisset, hostibus vrbe decedentibus fidem seruauit nec fraudem in se commissam vllō modò Vlisci voluit.

Si quæ ciuitates igitur Imperatori sese dediderint, comiter ac ciuiler regēdæ sunt. Sic enim & aliæ fortassis ad deditiōē adducentur, vt scribit de Alexandro Magno Curtius. *Sacca*, inquit, *misere legatos, qui policerentur gentem mandata facturam. Mouerat eos Regis non virtus magis, quàm clementia in deuictos Scythas: quippe captiuos omnes sine pretio remiserat, vt fidem faceret sibi cum ferocissimis gentium de fortitudine, nō de ira fuisse certamen.* Qui verò cum primum vrbe aliqua potitus est, sese illi acerbum ac molestum exhibet, aut ciuium facultates diripiendo, aut ciues ipsos interficiendo, pulsandoue, aliarum quoque ciuitatum animos ita abalienat, vt & bellum perdifficile, & victoriæ spem desperandā præparent. Ita dum Machometes II. Albam Regalem in Hungaria expugnasset, ciuesq; omnes crudeliter necare iussisset, omnes postea ciuitates & arces Hungarorum in subsequentibus bellis, ad extremum vsq; spiritum sese defendebant, nec amplius volebant sese clementiæ Tyranni committere. Nihil enim magis generosas mentes erigit ad fortiter se suaq; defendendum, quàm malorum impendentium metus, & similis alienæ miseriæ perferenda calamitas. Semperq; malorum post deditiōem expectatio, obstinatum ac perpugnacem in periculis animum efficere solet.

Et quia toties ciues effusos per urbem hostes exegerunt, aut in arcem munitissimam sese receperunt, rursusq; novos labores, ac nouam oppugnationem facere, victorem exer-

citum coegerunt. Idcirco Imperator curet, ſi urbem aliquam florentem ceperit, per præconem edici. Non occiſum iri inermes. Et ſic plurimi arma deponent, qui ſoſpites eſſe volent, & ſupplices obuiam ultro procedent, clementia prouocati.

Quod ſi tibi in ciuitatibus aut prouincijs ſubactis, fides quorundam ſuſpecta ſit, quos in officio continere velis, nihil ſalubrius erit, ſi ſunt potentes quàm apud ipſos conſilia tua, ſed à mente tua quàm alieniſſima deponere, atque auxilia eorum tanquam longè aliud acturus, petere: omiſſa enim deſenſionis ſuæ cura, quòd nimirum de tuo in ipſos animo nihil videant, quod ſuſpicentur, facilè tibi viam aperient, qua deſiderio tuo ſatiſfacere poteris. Et dum paratiores ex ipſis ad reſiſtendum abibunt, tu aut arcem extrues in vrbe ipſorum, aut præſidium tuum collocabis, quod vel inuitos deinceps in officio continebis. Similiter ſi velis, vt muros demoliantur, aut maior ipſorum numerus exulet, curandum eſt, vt ij à te primùm circumueniuntur, qui reſiſtere poſſent, & ita, ne perſentiſcant detrimentum iſtud ad ſingulos pertinere; quia ſic concitarent totam plebem, quæ in deſperationem verſa, potiùs mortem oppetere vellet, quam patriam ſuam, vel deformari, vel ſpoliari viris illuſtribus. Vnde Guſtauus frænum vrbi Francofortenſi, quam commodiſſimum eſſe putabat, ad retinendum Imperium, iniicere cupiens, arcem in illa aperte extruere non audens, ne vel plebs pro libertate tumultum faceret, vel aliæ Imperij liberæ ciuitates, hoc exemplo territæ, eum intra muros ſuos recipere recuſarent, petijt locum ſibi aſſignari ad extruendum palatium Reginae, quam fidei ſuæ pignus apud illos manere perpetuò vellet. Poſtmodum palatium illud inſtar caſtelli Antuerpienſis communiri intendebat, vt vrbi dominaretur, ſed præmaturus ſuus obitus, omnia infecta reliquit.

Quapropter, ſi id quod exequi cupias, vno eodemq; momento conficiendum ſingulis imperetur, multo melius ſuccedet,

cedet, quodum singuli arbitrantur pœnam istam adipfos solos pertingere, spe auxiliorum abiecta, promptius imperio obtemperent, atque adeò absque seditione voluntati tuæ pareant. Turcæ hac in re despoticè procedunt, ex subactis ciuitatib⁹ & prouincijs alio ciues transferunt; mercatores præsertim & Principes insigniores. Idem faciunt & Moschi: nisi quod Turcæ nobilitatē totam penitus extirpant, ne ad rebellionem alios concitent, Moscouitæ verò pauperiores in suis agris relinquunt, ditiores verò in meditullium transferunt. Tu aliter qui verè Christianus es, benigne omnes excipe, & promptiores ad subleuationem comiter in alia loca, Europæorum Principum more, transfer: vel sub prætextu officij & administrationis alicuius, vel sub prætextu militiæ, & dignitatis eminentioris, remotius à suis patriotis colloca. Ita Alexander Magnus fecit, & præstantissimos Thracum Græcorumq; secum militatum ire in Asiam præmijs adduxit, homines verò nullius pretij, reliquis præposuit: atque ea ratione, tum principum animos muneribus deuicit, quàm plebem in officio continuit, utpote cui Duces secessionis deessent. Publius verò Valerius fidem Epidamnensium intutam arbitratus, publicam omnium præteritorum veniam ad certum extra mœnia sanum edixit: populo itaque eò vndique confluente, ille portis obsessis, neminem eorum, nisi cuius integritatem perlustrasset, in urbem deinceps admisit. Sed hoc cum iniuria deditiorum. Tu fac omnia clementer. & omnes fideles tibi habebis. Sed iam dubia principaliora in re bellica examinemus.






SIMONIS STAROVOLSCI
INSTITVTORVM
Rēi Militaris

LIBER OCTAVVS
De Dubijs circa rem Militarem.

QVÆSTIO PRIMA.

Vtrum expediat ipsum Principem ire ad Bellum?



INTERESSE Principes pugnae, an seponi melius foret, multi dubitauere: quia periculum illinc, hinc verò infamia & contemptus nascitur. Quodq; non debeat ire in persona sua, præcipuæ rationes sunt.

Prima. Quia raro in Principibus reperiuntur qualitates optimi Ducis: vnde: potius turbabit Præfectos copiarum præsentia sua, quàm iuuabit, in resolutione præsertim pugnae, aut executione operum; quæ, ne appareat imbellis, & contemptibilis fiat, pro libitu suo disponere volebit, non pro occasione, aut necessitate. Ideo Iustinianus Imp. omnia bella commiserat Ducibus suis, Narseti videlicet, atque Belissario, ne ipse impedire videretur progressum tantorum virorum

rorum, per quos liberauerat Italiam à Gottis, Africam à Vá-
dalis, Orientem vniuersum à Persis. Scythasq; ac Parthos
tenuit semper à fræno, ipse Constantinopoli perpetuò ma-
nens. Similiter Carolus Sapiens, vel ob id ipsum ita cogno-
minatus, quòd continuò Brugis residens, per Duces suos to-
ta Gallia Anglos eiecerit, cursumq; rerum suarum, temerita-
te & inscitia rerum militarium non impediuerit. Idem fecit
Philippus Maria Insubrium Dux, qui domi suæ assidue se-
dens, & Genuensium Rempub. florentissimam tunc, suo
imperio subiecerat, & Alfonso Magnnm gloriosissimum
ea tempestate bellatorem in Europa, captiuum cum quatu-
or eius fratribus habebat, & totius quasi Italiæ arbitrer, non
modò vicinis suis, sed transalpinis etiam populis terrore fuit.
Quid de Ferdinando II. dicam? qui Viennæ continuò ma-
nens, omnes suos aduersarios deuicit. Suecum, Anglum,
Danum, Saxonem, Brandenburgicum, Transylvanum, Gal-
lum, Mantuanum, Venetos, reliquosq; omnes, qui arma cõ-
tra se iniuste sumpserant, aut facta rebellionē sanctissimum
Imperiij sui iugum excusserant. Quod ipsum & Sarmatæ
nostri considerantes, duos in Regno supremos bellorum
Duces crearunt, duos verò Campestris, seu eorum legatos;
vt vterque potestate æquali in castris præesset, in Polonia al-
ter, & alter in Lituania, Rege ipso in Regni medietate resi-
dente, & bellorum necessaria tempestiue in partes omnes il-
lis subministrante.

Secunda. Quia Principis id officium requirit, require-
batq; à prima sua institutione, vt in vrbe metropoli residens,
ad omnes partes inuigilaret, omnia prouideret, omnibus iu-
stitiam administraret; præsertim si regnum ei latius obueni-
ret, aut cingeretur ab inquietis vndique vicinis. Quod ob-
seruabant veteres Romanorum Imperatores, qui perpetuò
in vrbe manendo, per Duces suos bella administrabant, sup-
peditando eis per omnia loca maturè necessaria ad victori-
am. Idem faciunt nunc Moscorum Magni Duces. Idem
Chi-

Chinenſes Reges, atque Magn^o Chan Tartarorū. qui nuſquā reſidentias ſuas, vel grauiffimis bellis derepentē turbati, deferere ſolent, niſi recreandi animi cauſa ſedibus ſuis egreſſi.

Tertia. Quia maiestatem ſic ac venerationem apud omnes ſibi conciliat, dum non turbatur motibus bellorum, nec terrore vllō excitatur ad ſuſcipiendam expeditionem. Subditisq; ſuis ſic immotus permanens animos addit, & mōſtrat ſe inuincibilem cunctis. Ita Ioannes Presbyter. Ita Rex Monomotapa, qui omnia cum vicinis bella per Duces ſuos gerunt, ipſi verò pro maiestate in loco ſolitæ reſidentiae ſuæ perpetuò manent, cum opinione inuincibilis.

Quarta. Quia tutius videtur, vt Princeps dubijs præliorum exemptus, ſummæ rerum & imperij ſeipſum reſeruet: nam in milite vnus ſors eſt, in Principe, Regni vniuerſi periculum eſt. Periculum itaque vitare debet, ne morte ſua totum deinde imperium in confuſionem det, vti acciderat duobus florentiffimis Regnis ſimul, Poloniae atque Hungariae, Vladiflao Iagellonide à Turcis, ad Varnam, in Thracia occiſo: præſertim quòd vtrumque Regnum iam tunc electiuum Regem haberet, & vicinos populos ſibi inſenſos haberet. Iam autem quanta confuſio, quanta animorum diſſenſio interregni tempore ſoleat eſſe, nimirum hoſte potentiſſimo cum victore exercitu imminente, nemo tam imprudens eſt qui non videat; & quem in ſimili caſu, non perturbet interitus prædictorum Hungarorum, qui paucis poſt annis Rege Ludouico ad Mohatzium amiſſo, partim ab Aſtriacis, partim à Turcis oppreſſi fuerunt; nec in hodiernum caput attollere poſſunt.

Incontrarium dicunt, qui maſculum animum gerunt, & maſculos Principes habere volunt: duces populorum, non Sardanapolos, aut foeminas delicatiſſimas.

Primo. Quia illo præſente diligentius omnia à Ducibus ſuis exequuntur: *Inſpirant enim* inquit Hiſtoricus, *Præſentia ſua robur & vires militi.* Vnde tritum illud. *Urget præſentia*

sentia Turni. Et Antigonus olim trepidanti gubernat ori (in nauali prælio contra Ptolomæi Duces) & multitudinem hostilium nauium causanti. *Me verò ipsum,* inquit, *præsentem cū quot comparas?* Et sic ipsimet nunc vidimus sub Ferdinando. II. bella contra Suecos diligenter quidem geri à Ducibus, felicius tamen, à Filio Ferdinando. II. cum à patre missus ad Norlingam conflixisset, peragi notauimus: quia multa in absentes & dici, & statui solent, quæ in præsentem nemo auderet. Auctoritas enim illa, quæ homines coram tuetur & commendat, si eos contingat abesse, minimo etiam aduersariorum conatu plerumque subuertitur, maxime si recens adhuc sit, & nondum satis confirmata. Ferdinandus autem III. cum Serenis. Infante Carolo Cardinale coniunctus, non robur modo Ducibus suis & animum, sed vires etiam & audaciam militibus præsentia sua inspirauit, obtinuitq; victoriam de aduersarijs inopinatò, qui in Gustauo Hornio, ipsum Gustauum Regem Sueciæ, excitaturi videbantur. Ideo plerique Galbæ Romanorum Imperatori suadebant, vt auctoritate sua, & præsentia, deficientes ad Othonem milites ad officium reuocaret. Et ob hanc potissimum causam Ottomanidæ sedem Imperij Constantinopolim transtulere, vt nuper acquisitæ Græciæ præsentem securitatem inducerent, & pacifice ea potirentur. Potentissimusq; Chinæ Rex, ob vicinos Tartaros Zagataienses, quorum vires maximè suspectas habet, vt plurimum in proxima prouincia Nanquiensi agit, vt difficultatibus, si quæ fortè exoriantur, facilius occurrat.

Secundo. Quia ad bella procedens, maiorem apud externos reputationem, apud subditos verò auctoritatem habet, cum omnes vident eum, non Sardanapalim esse, sed virum fortem, & strenuum bellatorem. Qualis habitus fuit Stephanus Rex Poloniæ, qui desuetam quasi, longa quiete sub Augusto nobilitatem à bello, Moscouiticis expeditionib; ita exercitauerat, vt nominis Poloni fama ab eo tempore, longè

lateq; propagari cæperit. Quod ipsum considerans, post diuturnam pacem Augusti Imperatoris, nobilissimus ille Romanorū, Germanicus, in omnibus suis expeditionibus, id quod arduum in bellis esset, sibi desumebat cum suis legionibus Romanis, cætera auxiliaribus copijs, atque legatis permittebat, ut gloriæ possessio directè ad ipsum, & cines Romanos spectaret.

Tertio. Quia minore sumptu bella peragit. Subditi enim proprijs eum sumptibus sequuntur, ut eius gratiam sibi eo magis aucupentur: exq; suis possessionibus com meatum militibus suppeditant. Illo inspectante, alacrius pugnant: & per omnia diligentius procedendo, bellum citius conficiunt, quod longo tempore protractum, ingentem consumeret pecuniam per administratos. Ita dum in Polonia Rex ipse in persona ad bellum procedit, medietatem exercitus communissimè è cohortibus Procerūm habet, qui proprijs sumptibus. vel ipsemet Regem in castris comitantur, ut gloriam quærant; vel filios suos mittunt, ut meritum habeant. Quos æmulantur ciuitates, & ditiores mercatores, ut nobilitatem assequantur, & prærogatiuas equestres. Atque ita dum omnes in commune consulunt, & Principis personæ securitatem faciunt, & vniuersæ Reipub. commodant, dum tempore breuissimo, hostibus repulsis, bellum conficiunt.

Quarto. Quia sic subditos suos ad gloriam excitat: Ita enim natura comparatum est, ut quo in populo, multi præclari, virtuteq; & rerum gestarum gloria insignes Reges flourerint, ibi exemplo concitati & subditi eorum vestigia, simili in materia, cupidissimè prosequantur. Cum Principum siquidem moribus atque institutis, priuatorum hominum sensus & studia congruere, manifestissimum est: qui si bellicosi, & gloriæ cupidi sunt; subditi quoque haut imbelles & stupidi erunt; sed ad famam & immortalitatem Regum suorum exemplo, quàm maximè contendunt. Re ipsa declararunt hoc Galli, sub Francisco I. Aragones sub Alfonso Ma-

so Magno. Germani sub Carolo V. Persæ sub Ismaele Sophio. alijq; diuersi populi, sub Regib9 suis, à quib9 velut à perenni quodam fonte, bonorum malorumq; omnium torrens, in vniuersos subditos promanat; vnde vel felices, vel miseri omnium fiunt.

Pro decisione igitur dubitationis præsentis dico, per distinctionem, communissimam Politicorum opinionem sequendo. *Cum ea sit conditio Principis, vt præcipua rerum ad famam dirigere debeat, æquum est, non nisi tuta, & cum certa gloria coniuncta sibi sumere: ardua, periculosa, ancipitia, legatis permittere: vt si cæpta non successerint, non Principis infelicitas, sed ministri imprudentia videatur.* Quod per conclusiones sic deduco.

Prima. Princeps ad bellum ipse eat, sed ad illud, quod de lege & consuetudine patriæ, requirit præsentiam illius. Quemadmodum fit in Polonia, vt dum potentiæ aduersarij non sufficiunt copiæ stipendiariæ, vniuersalis, pro defensione Regni, toti nobilitati indicitur expeditio, quæ omnino requirit præsentiam Regis: quia aliter nobilitas non tenetur ire in castra, quamuis agatur de salute totius imperij, sed stipendiario milite repellitur periculum per Duces belli, aut Palatinos illius Dynastiæ, in qua motus oboritur, vtrò ad defensionem accurrente præcipua nobilitate, vt accidit in Prussia, Gustauo per mare adueniente: & in Alba Russia, Moscouita Smolenscum intercipere volente.

Secunda. Princeps ipse ad bellum eat, si bellum graue est, & agitur de salute totius Imperij. Sic contra Crucigeros Vladislaus Iagello, ad Gruneualdum ipse in acie stetit. Et contra eosdem ad Choiniciam filius ipsius Cazimirus. Alterq; filius eius Vladislaus, pro defensione Regni Hungarici, in Bulgaria ad montem Emum. Alij; bellicosi Reges alibi, pro regnorum suorum tuitione. Nam vbi minus periculi est, ibi per Duces, suos omnes ferè Principes bel-
la peragunt.

Tertia. Si Rex qualitatibus boni Ducis præditus est, nec amisit vigorem illum per ætatem, quem in iuuenta habebat, poterit ipse ad quamvis expeditionem ire, licet minus indigeat persona sua, sed ut gloriam quærat. quam à teneris concupiuit. Ita Xabbas paucos ante annos defunctus Rex Persarum, quamvis octogenarius iam esset, ipse tamen omnes expeditiones bellicas in persona sua obibat, omnesque castrenses exercitationes, ad exemplum suis militibus peragebat. Et extrema iam ferè ætate Orinufum Hispanis, Turcis Babyloniam ademit: cum antea Scythis Cataienfibus, & Magno Mogori, vicinis suis, diu armis grauis fuisset, & totam ferè ætatem in castris consumpsisset. *Ibi*, inquit Tacitus de Germanis loquens, *cum ventum in aciem, turpe Principi virtute vinci: turpe comitatui virtutem Principis non adæquare. Jam verò infamem in omnem vitam ac probrosum superstitem Principi suo ex acie recessisse; illum defendere, tueri, sua quoque fortia facta gloriæ eius assignare, præcipuum sacramentum est. Principes pro victoria pugnant, comites pro Principe.*

Quarta. Non est tamen necessarium, ut Rex ipse prælio intersit: sufficit ut acies dispositas videat, & in loco munitiore consistens, subsidia laborantibus submittat. Ita faciunt Turcarum Tyranni. ita omnes reliqui Principes, præter temerarios non nullos, qui vltro & volentes in prima acie ceciderunt: quemadmodum Sebastianus Rex Portugalliæ: Seriphus II. Rex Fessæ: & nuper Gustauus Rex Sueciæ. Quod si verò status imperij, aut salus totius exercitus in discrimine vertatur, debet Princeps sese aciebus pugnantium immiscere, vel cum periculo etiam suo, & animos laborantibus suis addere. Ita Franciscus I. Rex Galliæ ad Ticinum in Italia, vbi & capi ab hostibus maluit, quàm turpiter fugiendo suos deferere. Ita Alfonsus Magnus in pugna nauali cum Genuensibus, apud Capuam, vbi subueniendo suis, ipse captus fuit. Ita Vladislaus Iagiellonides in prælio cum Turcis apud Varnam, vbi subuenire laborantibus cupiens, ipse

in acie spiritum effudit. Cæterum minora suorum pericula, ut & minora bella, minoribus Ducibus delegenda censeo; præsertim ubi bellum longè extra Regni fines geritur.

Quinta. Rex non debet relinquere Regnum suum, ut aliud cum periculo acquirat: ne fortè illo absente, aut alius à tergo regnum inuadat, aut subditi ab aduersario corrupti aduersus eum tumultuentur, aut denique seditiosi bellum inter se ciuile excitent. Quid si relictus Regni gubernator solium ipse inuadat? aut redire cupienti, hostis iter præcludat? maximè in mari. Quod Ottomanī considerantes, nusquam per maria nauigant, Galliarumq; Reges, tot malis exercitiis, extra Regni sui fines nunc non progrediuntur, sed per Duces suos bella maritima gerunt. Et veteres Persæ, ut scribit Herodotus, Reges suos ad bellum ire non permittebant, nisi constituto vicario, cum titulo Regis.

Verumenimvero non continuò tamen ab expeditionibus Principem abesse volo, præsertim si bellum geritur in confinio, vel in metropoli suæ ditionis: si verò in longinquis oris, tum videndum est, an eo profligato locus esse possit, quò vel se recipere, vel exercitum instaurare possit. Si enim eiusmodi careat loco, satius est aliquem summæ rerum præficere, ipso interea domi manente: maximè si successore aliquo & hærede, qui suis & publicis rebus superesse possit, careat. Alias eat ipse in expeditionem belli; sed cum maior emolumentum spes, quàm damni metus ostenditur, ut Cæsar Augustus inquebat. Nam quamuis laudem meretur Imperator, qui fortunæ se non subtrahit, nisi planè afflictæ, nec se fugientium ducem, sed pugnantium esse demonstrat. Tamen aliud aliquando à Principe, aut eo, in cuius salute salus Reipub. sita est, aut esse putatur, agi debere existimo. Vti enim illum à pugnæ discrimine, si sacra ancora soluenda, & ad incitas spes reliqua redacta sit, nolo abesse: sic si isto forte prælio victus, non frangendus sit omnino, sed nouis se iterum viribus instruere possit, suadeo ut nece sitati pareat, &

iniquitatem fortunæ declinare malit, quā prouocare: quod cum non fecisset Ludouicus Hungariæ ad Mohatzium, ideo cum ipso Regnum Hungariæ periit.

Q V Æ S T I O I I.

Vtrum expediat ipsum Ducem belli immiscere sese pugna?

NEmini sanè dubium est, exercitum quamuis instructissimum, si Duce careat, excœcato ab Vlisse Polyphemo, similem esse omnibus penè omnium iniurijs obnoxium. Proinde non immeritò militares doctores dubitāt, debeatne exercitus Imperator fortunæ sese committere, atque ipse manus cum aduersario conferere, militibusq; suis exemplo fortitudinis præire. Qui negant, his maximè rationibus inuituntur.

Prima. Quia ex casu illius toti exercitui periculum imminet: ut enim sublato gubernatore, nauis vniuersa cum ipsis vectoribus in hostium potestatem venit; sic occiso, aut capto, aut demum incluso in aliquo loco hostilium copiarū Duce non raro vniuersum etiam exercitum in tuam redigis potestatem. Ita Ioannes Foxius obtenta de Hispania apud Rauennam insigni victoria, dum fugientes nonnullos insequendo, à peditibus interceptus occubuisse, omnia quæ possederat pro Rege suo in Italia, simul cum spiritu amisit. Nam Iberi duce occiso ita statim animos resumpserant, ut afflictis variè Gallis, tota illos Romania atque Æmilia, vix vno mense exacto eijcerent. Ludouicusq; Nassouius in Mochensi pugna, dum fugam circumspectantibus suis, selecto cum agmine aduolat, & prælium redintegrat, interceptus ab Hispanis occubuit, totumq; morte sua exercitum perdidit.

Secunda. Quia id minus & officium suum recusat: Ipsum nomen Imperatoris, aut Quintilianus, satis significat non exigere ma-

re manum ipsius. imperare enim debet & præcipere. Quod probè considerans Dux Albanus, nusquam se imiscuit pugnae, sed à longè eminentiori è loco prospiciens, submittebat cohortes, ubi periclitari suos videbat. Nam licet præstabilem fortitudinis operam nauare posset, præliando ipse Imperator, non tamen tantum suis pugnando proderit, quantum occumbendo, aut negligendo munus suum oberit. Quemadmodum etenim nauem in periculo esse contingit, cum gubernator relicto gubernaculo, nauticis remigum operis sese immiscet: ita & in exercitu, rem vniuersam in maximum adducit discrimen Imperator, cum consilia suis & subsidia in periculis dare negligens, ad militaria munera se transfert; cum eius præcipuum munus sit, ordines singulos obequitare, adesse periclitantibus, gnauos strenuosq; laudare, ignauos ac pauidos increpare, cunctantes excitare, imminentis ordinibus milites alios substituere; quosdam etiam si opus sit, traducere; suppetias ferre laborantibus, ac opportunitates, momenta, euentus, obseruare. Igitur non qui manus in prælio conserit, sed qui multa consulto prudenterque imperat, satis illustrem rebus benè gestis adipiscetur a-doream.

Tertia. Quia perpetuò inglorius esset, si non attendendo ad munus suum, & exercitum perderet morte sua, & patriam, quam nihilominus, iniqua etiam fortuna pressus, potuisset iuuare iterum & consilio, & opera. Thœbanorum Respub. propterea periit, quòd Epaminondas Dux ipsorū, temere sese pugnantibus immiscuisset, & cecidisset in acies; qui licet exercitum tunc perdidisset, si tamen superuixisset ipse, facilè potuisset restaurare Rempublicam. Etenim Duce illeso, inquit Polybius, ac saluo, etiamsi aliquando reliqua cuncta cadant, multas tamen occasiones fortuna subministrat, quibus detrimenta ex calamitosis euentibus accepta resarciri possint: si ille verò, perinde ac in naui gubernator ceciderit, etiamsi reliqua multitudini fortuna victoriam aduersus hostes largiatur,

tur, nihil tamen inde commodi prouenit, propterea quòd omnis omnium spes à Ducibus pendet.

Quod autem debeat ipse manus cum hoste conferere, rationes sunt *Prima.* Omnium cordatorum Imperatorum consuetudo, Alexandri Magni, Iulij Cæsaris, Hannibalis, Scipionis, Alfonsi Magni. Et apud nos, Boleslai Chrobrij Criuousti, audacis: atque ex recentioribus Ostrogij, Tarnouij, Chodkieuicij, Koniecpolscij, Potocij.

Secunda. Immortalis gloria apud posteros: nam qui prudenti ratione administrarunt bella, fuerunt penè infinitis qui autem per se auderent subire pericula, & cum alijs militibus æqualiter in aciem descendere, omnino paucissimi. Hinc Cicero dicit. *A viro virtus appellata est: viri autem propria maximè est fortitudo, cuius munera duo maxima sunt, mortis, dolorisq; contemptus.* Mortem autem quotusquisque est, qui non exstimeat? etiam si sibi honores, laudes, famam & gloriam nescio qualem in mundo, animo proponat?

Tertia. Exemplum militibus datum: Animosiores enim efficiuntur in pugna, cum Ducem ipsum præire vident: & ut ipsum conseruare possint, mortem subeunt alacrius, & in quæque pericula ruunt. Hinc Chodkieuicius ætate nostra, periculosissima quæque solus aggrediebatur: & ubi confertissimos hostes acerrime pugnare conspexisset, eò se audacissimè immergebat, periculaq; sua esse, non militum volebat. Quinimo primus, ad Chotimiam cum Turcis ipse ante cohortem suam in prælium descendit, cum totis viribus castra nostra oppugnarent, & ita exemplo suo omnes accendit, ut non expectato iussu ipsius vltro in barbaros ruerent, & volentes pro eo ipsi in acie caderent. Ioannes quoque Austriacæ olim, dū subrueret muros vrbis Philippopolis in Hannonia, & vrbis defensores excursionem in subruentes acerrimam fecissent, ipse in fossam descendens, nullam aut Ducis aut militis partem omisit, tam in pugnando, quam in opere faciendo. Item Alexander Farnesius, uti sub Duce
Austri

Austriaco militans, immiscere sese pugnae assueuerat, (nam & in nauali praelio primus Triremim Turcicam, cum gladio ancipiti ascendit, & ferociter pugnavit, & in praelio Gemblacensi primus ipse cum hoste manum conseruit, & cum sua cohorte inuectus erat) ita supremus Belgij Gubernator constitutus, nusquam cum hoste congressus est, ut non & ipse quoque rem manu cum eo ageret, aut ad oppugnandas vrbes primus procederet, licet prohibitus toties à suis militibus: atque ita semper, & ductu, & exemplo suo, vbique victorias acquirebat.

Conclusio omnium opinione determinata, Imperatorem non debere ipsum manus cum hoste in praelio conserere, nisi exercitus planè periclitetur, & res suas Imperator in periculum venire viderit: tum enim adesse debet periclitantibus, & nullum constantis Ducis, aut fortissimi militis officium omittere. Aliter periculum sequeretur ingens vniuerso exercitui, quia uti sublato gubernatore naus plerumque vnà cum vectoribus in hostium potestatem incidit: ita summi Ducis cædes, vel fuga, vel omissum officium, vniuersum sæpè exercitum calamitati exponit. Exemplorum plenæ sunt Historiæ. Sed vnicum hîc addam. Pugnante cum Persis ad Arbella Alexandro, non pugna, inquit Curtius, sed cædes erat, cum Darius currum suum in fugam vertisset, & Masæus feliciter ante cum Parmenione, qui læuum Macedonum cornu tuebatur, confligens, statim eo nuncio accepto animum abiecit, & percussis iam Macedonibus languidius cæpit instare, donec dato fugæ spacio ipse se quoque eriperet. Ita cadente quoque Duce, aut non prouidente subsidia, aut denique non attendente quid vbique & in omnibus locis agatur, etiam fortissimè pugnantes diffugiunt, cum diligentiam Imperatoris non vident. Ideo Castriotus, quem Scanderbegum Turcæ vocabant, in quocumque conflictu partis aduersæ Imperatorem maximè petebat, affirmare solitus, non dubitare se, quin, si caput tolleretur, cæ-

tera etiam membra sua sponte corruerent, & in vno facile possent milites vniuerfi.

Q V Æ S T I O III.

Utrum expediat Ducem esse perpetuum?

DIu olim continuata imperia, diu mandata vni muneribus ac publicas dignitates fuisse tradit Aristoteles, sed id olim. Post, & ab illo repræhensum, & à multis emendatum id fuit. Nunc quid sentiendum sit, quærunt politici: præsertim in potestate belli, cum eo prorsus ingenio homines esse videant, ut postquam multum temporis in potestate transegerint, patrijs moribus haud quaquam sibi viuendum ducant. Proinde qui perpetuos Duces esse volunt, has potissimum rationes adferunt.

Prima. Quod electus semel ad imperium castrense, sciens se cito de gradu dignitatis deijci posse, turbas moueret ne posset deijci: quia qui semel imperandi dulcedinem degustarunt, priuatam vitam paullò magis plerunque quam animæ à corpore separationem horrent, & priuatæ domus angustias, ut crudele patibulum abominantur. Ita Iulius Cæsar semel Dictator appellatus, nusquam iam imperium voluit. Et Cosmus Medices patriæ suæ gubernator constitutus, Principatum fecit, & suis successoribus in hæreditatem dedit. Melius itaque est, ut sint securi potestatis suæ, & nullas turbas in patria, nullas seditiones in exercitibus faciant, sed suo muneri intenti viuant.

Secundam. Quòd perpetuò regimine authoritatem sibi apud omnes comparabit, nec facile militem inolescere finet, qui parui temporis præfecturam contemnere assuevit, & tam diu tumultuari in castris, donec nouus præficeretur Imperator. Si itaque bellica præfectura parui temporis fieret, non illis coalesceret inueterata vis, nec milites breuif-

breuissimo defuncturos imperio præter fas amarent, aut timerent quos tantopere suscipiunt dum æternos esse credunt; tam læto animo pericula subeunt, dū præmia ab ipsis & promotiones in dignitatibus bellicis sperant, & securi gratiæ ac fauoris, promptius omnia iussa exequuntur.

Tertiam. Quòd assiduo vsu bellandi, maiorem rerum militarium peritiam assequantur, varijsq; casibus exerciti, diuinam quandam prudentiam obtineant, qua deinde & hostibus sint terribiles & Reipub. perquam utiles. Quales hoc sæculo fuerunt Nassouij apud Hollandos, & Marchio Spinola apud Hispanos; qui si Ducem Albanum non amouissent à gubernatione Belgij, quis scit si non ille sopisset tumultus istos qui hodie dum etiam durant?

Quartam. demum rationem addunt, quòd nimirum apparatus bellicos & instrumenta militaria diuturno regimine affatim sibi comparasset: quod facere nequit, qui breuem militiæ Præfecturam habet; nec enim sumptus illi sufficere poterunt, ob exiguitatem stipendij: nec ille in res eiusmodi expendere volet, quas breui deserturum se credit. Et sic dum omnes eodem honore potiri student, nullus ea curat, quæ illo assecuto, ad vsus bellicos sunt necessaria. Quid si duo simulerunt electi? & ad vnum bellum, quamuis diuersis in prouincijs deputati? vti frequentissimè in Polonia accidit, vbi & summus militiæ præfectus creatur à Rege, & legatus illius, Dux Campestris vulgò appellatus. Similiter alij duo in Lituania, qui ad vnum bellum Moscouiticum simul conuersi licet diuersis à partibus missi, cum necessitate cogente in vnum conueniunt, & odia inter se exercent communissime, & nullus eorum procurat belli necessaria, cum quisque suum honorem exaugere studet, & commodum priuatū quærit. Libuit hîc inserere, quod Aristoteles scripsit apud Spartanos olim duos Reges fuisse, quo pacto summa quidem penes vtrumque, minor penes singulos potestas fuit, sed perpetua vtrique, & ideo secura illis, ac salutaris Reip.

Quod si quis fortè in ciuilibus negotijs non repræhendat; in bello certè omnino damnandum est. Nec in Polonia semper Campestris Duces, etsi vicarij summorum Præfectorum, vsquequaque obedientes ipsis fuere, præsertim opibus & claritudine generis illustriores, aut rebus per se gestis Principi ac populo gratiores. Adeo enim eiusmodi viris nobilium stirpes apud nos accedunt, spe, conuictu, mansuetudine, comitate atque liberalitate captæ, vt deinde vel in Regem promissam fidem exercean, non modo in summum militiæ Imperatorem. Hinc apud Liuium lego *Tres Tribuni potestate consulari documento fuere, quam plurimum imperium bello inutile esset; tendendo ad sua quique consilia, cum alij aliud videretur, aperuerunt ad occasionem locum hosti.* Et apud eundem. *Agrippa aduersus Equos cum Quintio missus, illi omne imperium concessit, nihil in administratione magnarum rerum salubrius esse affirmans; quam summam imperij esse penes unum.* Sed vtrum iste debeat esse perpetuus, iam affirmantium rationes audiuius; nunc negantium attendamus.

Primâ. Quod vel ab vxore vel ab affinib; in longa administratione seduci poterit, vt opum aggregandarum, non militiæ curam habeat, ditandorumq; suorum liberorum causa, vel cum hoste etiam amicitiam ineat; vel quod sæpius accidisse legimus, cum ciuibus seditiones faciat, & Rempub. atque Principem opprimat. Exempla in vtroque, tam Romano, quàm Græcanico Imperio. Sed & Mediolanensibus idem à Francisco Sfortia accidit, qui diuturno regimine, ciuibus non nullis in partes suas tractis, Principem se Insubriæ, ex Præfecto militiæ fecit. Frequenterq; optimè de statu aliquo meriti, malè mereri assuescunt, ab vxoribus aut consanguineis seducti. Hinc ciuilis sæpè & militaris gloria, quæ in cælibe viguit, languet in marito, cum liberorum iam, non verò bellorum curam agat: & igneus ille pro patria ardor, quasi cum vxore quartana grauatus, aut friget, aut fauet inimico, cum ab auaritia internè exagitur. Pluresq; hoc sæculo nostro,

nostro, coniugum blanditijs & amicorum persuasionebus, ut rem suam domesticam curent, expugnati, minus hosti nocuerunt, quam poterant, ut sese ditarent; vel apertè transferunt in partes, ut desideratum honorem adipisci, commodumq; maius assequi possent. Vnde grauitè Romani peccarunt, quod Cæsari de Gallijs triumphanti in quinquennium imperium prorogarunt, qui legionibus Reipub. non contentus, priuato sumptu alias addidit, & pleno passu de S. P. Q. R. vecordia triumphans, ad exoptatam diu Monarchiam contendit. Quapropter in nobilissima illa oratione, quam apud Dionem legimus, suadet Augusto Mæcenæ, ut magistratus non minus triennio, (nisi delinquant) nec ultra quinquennium munere fungi permittat, ne citò amoti specimen eius quod didicerunt, reddere non possint; diutius verò retenti, res nouas moliantur. Ob hanc causam Epidaurij quoque arcis suæ præfectos diuturnos esse noluere, ut rerum nouarum auidos, imperij breuitas in officio contineret. Venetorum magistratus sedecim mensium sunt Cenuensium Dux, tribus annis. Lucensium vno mense: ne de libertate periclitentur. Et Florentiæ aliquando cautum fuit, ne Reipub. Vexillifer in perpetuum crearetur, sed annua esset illa dignitas. Regnum Assyrium ad mille annos stetit inconcussum, non aliam ob causam, quam quòd militiæ Præfecti quotannis mutarentur. Nec aliam ob rationem in Imperio Græcanico, tot bella ciuilia inter ipsos Proceres, totq; Ducum conspirationes contra Imperatores exortæ sunt, quam quòd iidem iisdem exercitibus, Romanorum Imperatorum exemplo, perpetuò præfecti essent. Quod conspicientes maiores nostri Sarmatæ, nusquam bellorum Duces perpetuos habuerunt, Poloniæq; coronati iam Reges, ad tempus Duces exercitibus præficiebant. Primus Ioannes Tarnouius, à Sigismundo I. perpetuus exercituum Dux creatus fuit, in Lituania verò à Jagellone Rege statim. Radiuillus Nicolaus I. perpetua militiæ præfectura donatus erat. a-

lias omnes reliqui ante istos, ad tempus bellis præficiebantur. Et si verè rationem ponimus, non aliam magis rem libertatem Romanorum euertisse inueniemus, quàm imperij, vti dixi, prorogationem. Quid enim aliud Sullas fecit & Marios, quàm tot mandata bella, totq; Consulatus exiguo interuallo? quid Decemuirorum insaniam aluit, quàm perpetua contra mores patrios prorogata potestas, Quid Cæsarem tyrannum, & patriæ libertatis inuasorem fecit, quàm perpetua contra leges Dictatura, Hinc facilè inducatur ratio.

Secunda. Quòd perpetua belli Præfectura potens effectus tenuiores, ciues opprimeret, & tyrannidem in eos exerceret, si alias totam publicam rem occupare non poterit; præsertim si eius ambitioni in assequendis alijs in Repub. honoribus. non fauebunt, aut postulatis in conuentibus suis provincialibus non parebunt, vti in Polonia sæpius euenire asolet. Hinc Romani habentes Pompeij potentiam suspecta ob diuturnum Imperium, quòd rebus vbique prospere gestis, Reges ac gentes varijs sibi priuilegijs obligasset, ne priuata forte non contentus altiora spiraret, eorumq; fauore, & clientum auxilio, quos beneficijs sibi deuinxerat Rempub. inuaderet, noluit Senatus illius acta confirmare: iussitq; priuatum è castris in urbem redire: vt cum beneficio frustratos, & potentiam exercituum à Pompeio abalienasset, ipse intra Optimatum conditionem, & priuatæ vitæ spatia, nitentis ad alta animi cursum & vires cohiberet. Eorum exemplo nunc Veneti, cum Archithalassum classi suæ præficiunt, ad tempus tantùm modò, & quamdiu Senatui visum fuerit, authoritatem illi concedunt. Cum autem displicuerit, vnica solùm triremi redire in urbem iubent, sub pæna capitis, & confiscationis bonorum, in tergiuersantes. Præclare itaque apud Senecam latro pronunciat. *Nihil tam utile, quàm breuem potestatem esse, quæ magna sit. non enim tam facile nocere possunt, qui paruo tempore regunt, quàm qui magno.* Iam verò ho-

rò hominum ea conditio est, ut raro sua forte contenti sint: multiq; ideo nihil noui audent, quia viribus destituti aliquid se obtinere posse desperant. Vires autem, & sequaces, dat diuturnum imperium.

Tertia. Quòd vno supremum belli regimen possidente, reliqui in desperationem versi, militare exercitium negligent, & castra deserent: qui alias spe concepta, se quoque aliquando in simili dignitate futuros, arma & instrumenta bellica maturè sibi pararent, clientes conquirerent, militem instruerent, seseq; ipsos rebus in omnibus quàm diligentissimè informarent.

Quarta. Quòd perpetuum magistratum gerens amoueri non poterit, si aut negligens, aut imperitus, aut denique infortunatus erit; quare illius causa tota Respub. periclitabitur, quæ Duce mutato, posset & fortunam suam mutare, prout tot exempla Carthagenensium, Græcorum, Romanorum, nos docent. Breuis autem Præfectura poterit facilè omnium excitare industriam, corrigere ignauiam, aut detegere inertiam; qui aut naturæ vitio minus subtiles, & loco quem sustinebant impares, aut ad fastum tantum & turpissimam sui ostentationem facti, vel nihil in rebus bellicis intelligere poterant, vel Principis temeritate prouecti impositū sibi impar onus, recusare non audebant.

Quinta. Quòd ætate & curis confectus, lecto potius adhærebit, quàm bellis ac periculis inuigilabit; interim verò patria militem indisciplinatum habebit, & per legatos illius parum rerum militarium gnaros cladem patietur & amissionem urbium, aut prouinciæ alicuius, uti nobis Sarmatis ante annos aliquot accidit. Quia in viris etiam bellicosissimis spiritus cū senio extinguuntur, & viuacitas illa ignita, emoritur in heroibus cum ætate, quod fidem facit in Lucullo, Pompeio. C. Mario, alijsq; infinitis Ducibus antea gloriosis, in quibus vigor ille animi & vehementia, qua in iuuenili ætate florebat, euanuerat cum progressu temporis. Iam
autem

autem qui caret animositate, bella gerere cum efficacia non poterit, quia impossibile est, ut duce ceruo, milites fiant, leones.

Vltima est omnium ferè verissima. Quod securus potentiae suae ad vitam, licet nescio quo sacramento obstrictus, & Principis mandatis circumscriptus, leges patrias contemnet, militem scribet, bella vicinis inferet, hyberna distribuet, annonam imperabit; quibus irascetur, per eorum possessiones castra mouebit, & cunctis obmurmurantibus metuendum se faciet. Quid si vulpinam pellem leoninae affuet? tum ciuibus & Repub. inconsulta militi donatiua distribuet: cum quibus nobis pax aut foedus, per emissarios suos ad arma laceffendo prouocabit: causandoq; pericula ab hoste, huc atque illuc exercitum mouebit, militum animos sibi conciliando, atque hoc ipsum in primis curando, ut ciues dissensionibus ob assiduas contributiones in militem, occupati, seruitutem suam nunquam planè videant, aut seriò perniciosam eius ambitionem penetrent, ac despoticum regimen cognoscant. Exempla in promptu, sed quæ fileo.

Conclusio. Quamuis hoc sit verum, quod manu strenuus ille Marchio Sauoranus aiebat, periculum adire Principes, cum crebro Duces mutarent: cum inter traditionem Imperij nouitatemq; successoris, qui noscendis priusquam agendis rebus imbuendus est, sæpè benè rei gerendæ occasio interciderat. Quo consilio apud Romanos, Scipioni in Hispania & Africa: T. Flaminio in Macedonia: C. Mario in Cimbrica: Iulio Cæsari, in Gallia: alijsq; alibi, prorogatum imperium fuerat. Et patrum memoria, ex Gallis Annas Memorantius Regni Comestabilis: ex Hispanis Ferdinandus Toletanus Albæ Dux, vterque à pueritia, ad vltimam vsque senectutem, continenti militia gloriam extendentes floruerunt. Ille quidem sub quatuor Galliae Regibus, summo cum imperio exercitibus præfuit. Hic verò Imperatoris Caroli V. eiusq; filij Philippi II. auspicijs in Germania, Hungaria

ria, Africa, Italia, Belgio, Lusitania, maximis exercitibus præfuit. Tum Mauritius Nassouius apud Hollandos. Et omnes ferè copiarum Præfecti in Regno Poloniæ, ad extremum vitæ suo munere fungantur. Quos inter Zamofcius sexagenarius ferè Liuonicam expeditionem feliciter peregit, & cæterorum Heroum exemplo, ad mortem vsque viuaciter & strenuè in administrandis copijs Regni Poloniæ, munere suo functus est. Nihilominus tamen prorogandum imperium Ducis; cum felix & necessarius est, quàm perpetuo dandum putarem: quia sæpissimè solet continuum in eisdem homines imperium, eam animorum coniunctionem parturire, quæ facilè in damnum Principis, aut Reipub. euadere queat. Exempla vetera & recentia infinita in Historijs ac memoria hominum, quæ nolo hic refricare, sufficit pro omnibus solum Imperium Romanorum, quod felix stetit sub Consulibus, quorum alter vrbi, alter exercitui annua administratione præerat. Regimine autem ad Imperatores deuoluto, tot bella intestina inter ipsos exercituû Duces, totq; conspirationes ab ipsis Ducibus, in suos Imperatores exortæ fuerunt, nō aliam ob causam, quàm quòd capita ista perpetuò ijsdem militibus præessent.

Q V Æ S T I O IV.

Vtrum externum, an terrigenam Ducem creare oporteat.

TYrannos peregrinorum maxime opera potestem suam tueri, alio loco notauimus: ideoq; ingratum passim est, summas dignitates exteris committere.

Primo. Quia Ciues negligi se credunt, & ægre ferunt Rempub. ijs committi, qui tam arctè Principi non obligantur. Ea propter etiam hodie Exteros à Magistratibus arcent multæ nationes, sed Polonia præcipuè, quæ cum Viris idoneis satis instructa sit, nō nisi tales, ac status præsentis stu-

Hhh

diosos

diosos ſecundum leges antiquas, ad clauum Patriæ vocat. Nemo enim libenter contemnitur & ſi vlla occaſio ſeſe contempto offerat, ad vindictam ſtatim eſt procliuiſ. *Multiq;* inquit Tacitus, *in iuncta Imperij munera, impigrè obeunt, ſi in iuriæ abſint: haſ agre tolerant: iam domiti vt pareant, nondum vt ſeruiant.*

Secundo. Quia externi curant ex ſeruis fieri Domini: Franciſcus Sfortia ex milite Melidiolanenſium, Dux factus, ipſorum libertatem atque vna urbem occupauit. Actiolinus Dux exercitus Treuiſanorum, ſe fecit Tyrannum ipſorum, aliarumq; plurimarum Ciuitatum Italiæ. Similiter Marſilius Carrara, à Patauiniſ ad bellum accerſitus, ſe fecerat Dominum vrbiſ illius. Bracciuſ occupauerat Peruſium, cum in militiam eſſet vocatus. Caſtruciſ Caſtracaniſ, Lucam & Piſas cum eſſet Imperator illarum Rerumpub. creatuſ. Et infiniti alij.

Tertio. Quia ad proditionem facile declinabit; vel etiam tempore neceſſitatis relinquet cauſam tuam, & officiũ ſuum: ſicuti fecit Malateſta Baglioniuſ Florentinorum Imperator cum Clemens VII. & Caroluſ V. Alexandrum Mediceſ liberæ vrbi Principem imponerent.

Cæterum vti Imperator parum finè exercitu valet, ita nihil exercituſ finè Imperatore: ideo tam diligenter allaborandum eſt vt iſ eligatur idoneuſ ne ſi muneri ſuo impar ſit, ſuaſ ipſe partes affligat. Hæc ratio vt quocunq; tandem modo optimoſ quærant, inducit nunc Venetoſ Batauoſ, Hiſpanoſ, & Imperatoreſ. Garthaginenſeſq; olim, cum nullum inter ſe idoneum haberent Xantippum Ducem Lacedæmoniorum militiæ peritiſſimum contra Romanos euocarunt. Et hinc pro extraneo Duce rationeſ ſunt.

Prima. Quia meliuſ habere extraneum peritum bellicarum rerum quàm indigenam idiotam. Et hanc ob cauſam Gedanenſeſ ſub tempuſ inaugurationiſ Stephani Regiſ, armis contra Polonoſ ſumptiſ, quia idoneum inter ſe nullum

nullum Ducem habebant, Ioannem Colonienſem mercede euocauerant. Conſilio meliori, quàm Gandauenſes, licet exitu pari, qui rebellionē contra Carolum V. ſuſcepta, potius voluerat vnum è medio ſui Chyrurgum Ducem belli cōſtituere, quàm principem aliquem militiæ peritum mercede euocare, qui ſaluaffet Publicam rem ipſorum.

Secunda. Quia fidelior ſemper indigena putatur eſſe, & militibus acceptior, tum quia alienigenam Dominum nemo patitur lubens, tum quia iucundius eſt ſuis parere. Quid ſi electus externus aut tardus nimis, aut minus obſequioſus ſit? quid ſi non ſatis fidelis? Veneti vtrumq; in Vaudimontio, Carmignola, & alijs compluribus plus fraudium quàm felicitatis in rebus agendis ſæpius iam experti ſunt. Proſperitate autem externus inuidiam ſibi comparat, indigena verò amicorum & affinium numero ac opera repellere ſubinde & vitare poteſt. Magis autem infortunio externus oditur: nam ſi res egregiè geſtæ, & præclara facinora inuidiam & calumnias gignere conſueuerunt, quid minus proſperè ſuccedentes?

Tertia. Quia ciuis militaribus copijs inſtructus plus audet, & plus poteſt, quàm conditio æqualitatis patitur. Ab extero autem minus libertati diſcrimen imminet, cum non habeat amicos qui eum iuuent.

Quarta. Quia multis ſæpè in locis obſeruatum eſt alienigenas maiori fide & induſtria tractaſſe Rempub. quàm aliquos ciues: nec tam facilè auaritiâ corruptos, peculatores factos eſſe, aut proditores. Cretenſes externos non humaniter tantum excepiſſe, ſed ad ſummos ſæpè honores proueniſſe auctor eſt Heracleſes. Ceſſit benè Romanis pleroſque populos eodem die hoſtes & ciues habere, in quos & aduenæ regnauerunt, qui amore in Rempub. indigenis non conſeſcere. Hinc Iulius Principatum adeptus, quosdam è Semi-barbaris Gallorum recepit in curiam, atque illis in pace, illis in bello fideliter vſus. Et apud Chinenſes modò nemo vrbi

in qua natus est præficitur, ne consanguineorum aliorumq; quos familiarius nouere, aliquid fauori concedant. Et Imperator Romanus contra rebelles Bohemos Dampierium, Bucquoium, Coloredum, Sauelium Gonzagam, Gallassium, atque Picolomineum. Hispanus verò contra Batauos Alexandrum Farnesium. Ambrosium Spinolam, atq; nunc Principem Thomam Sabaudiaë castrorū Præfectum habet.

Conclusio Nisi fortè periculosa inter Proceres æmulationes timeantur, malo indigenam Imperatorem designari, quam peti aliunde: Ipse enim est fidelior eum operam Patriæ nauaturum, seu Principi militibusq; ac ciuibus fore acceptiorem, cum nihil prætendat, præter gloriam. Iam verò illos ego ciues esse statuo, qui summâ fide Prouinciæ in qua agunt emolumentis student: cæteros qui aliud moluntur, vbicumq; nati sunt, barbaros esse & peregrinos existimos Bernardus Prætificius è Silesia veniens, in Podolia vixit, omnesq; optimi ciuis & Ducis, cum barbaris assidua bella gerens expleuit. Michael contra Glinfcus in Lituania natus, & honoribus auctus, ad Moscum defecit bellum contra Patriam gessit, & quas inter ciues, victoria de Tartaris obtenta. laudes promeruerat, transitione ad hostes facta, penitus deleuerat. Iulius verò Cæsar, quia optime sciebat, summo se in odio esse, & multos sibi insidiari qui ad ereptæ libertatis restitutionem, quotidianis votis & consilijs anhelabant; ideo peregrinis non ciuibus salutem suam credere debebat: cum nunquam tutum sit reconciliato inimico nimium fidere: quippe vt gratiæ in odium deflexus facilis, ita odij ad gratiam difficilis esse transitus consueuit: raroq; animus quem semel grauiter fastidiuit synceræ fidei stipendijs excolit: aut cum quo vehementes primum inimicitias gessit affectuose postmodum in gratiam redit.

QVÆSTIO V.

Vtrum melius sit, seuerum Ducem esse, an comem?

Benignum ac mitem, an verò seuerum belli Ducem multi hac ætate dubitauere, cum Valstenius in Germania, Choſkieuius in Polonia exercitibꝫ præessent: quamuis antea sæpius hæc quæstio exagitata fuerit. Et qui benignum affabilem, facilem, & comem Ducem exercitus habere volunt, Gustauum præcipuè nunc Spinolam Mauritium atque Piccolomineum in exemplum addunt, & dicunt.

Ld

Primo. Quia tales omnes libentes sequuntur: vnde facile exercitus conscribit, & mature hosti obuiat: atq; ita Syllam cum in castra mari venisset, ob eius benignitatem, olim omnes obseruare cæperunt, & quocunq; ducere vellet, statim comitabantur. Sciebat enim, vt inquit Sallustius, *milites benignè appellare: multis rogantibus alijs per se ipse dare beneficia inuitus accipere, sed ea properantiùs quàm & mutuum reddere, ipse ab nullo repetere: magis id laborare vt illi quàm plurimi deberent loca atq; seria cum humillimis agere: in operibus in agmine, atq; ad vigilias multus adesse: neq; interim quod ambitio praua solet consulis aut cuiusqam boni famam ledere, tantummodo neq; consilio neq; manu, priorem alium pati, plerosq; anteuenire.*

Secundo. Quia pro ipso omnia pericula subeunt: vt faciebant milites Alexandri, quod vidissent eum semel militem Gregarium algore propè mortuum & torpentem in sede sua ad ignem collocasse. Eademq; humanitas in Troiano Imperatore annodata. Qui milites in prælio vulneratos tanta diligentia curabat, vt dum fascia, inquit Dio Cassius, vt volumina deficerent, nec sua quidem vesti pepercit, sed eam totam in ligamenta & fomenta discidit. Idem & de Tiberio Velleius scribit, & semetipsum quoq; inter alios expertum esse in bello Pannonico eius bonitatem dicit.

Hhh 3

Tertio.

Tertio. Quia feuerum Ducem odio milites habent, benignis autem & clementibus in omnibus sunt obedientes. Expertus hoc Ioannes Zamoscius, cuius humanitas tantum apud milites valuit, ut quotidie mane & vespere, inquit Reinaldus Heldestreinius, circa suum versarentur tabernaculum, Sciscitantes, quid dicendum, faciendumue esset. Quapropter male plerumque sibi consulunt, qui non acceptos militibus exercitui præficiunt Duces: quod in bello vngarico, non sine damno suo, expertus est Rudolphus II. Et Dux Albanus, quia feuerus erat, totum Belgium contra se concitauerat, peperitque Regi suo bellum, quod hodiè dum adhuc durat.

Contra qui feuerum Ducem belli habere volunt, hisce rationibus nituntur.

Prima. Quia sub fevero Duce melius disciplina militaris conseruatur. Oportet autem ut quemadmodum in ciuitate, ita & in castris benemeritis sua sint præmia: & delinquentes poenam non euadant. Hinc Bellisairo exercitum ducente, ne poma quidem ex obuijs arboribus decerpere audebant milites: eo quod cum semellac pauperculæ fæminæ vnus ex militibus comedisset, toti decuriæ, cum factum negarent, ventres scindere iussisset, ut inueniret in stomacho quicquid illud comedisset. Mauritius Nassouius, Nobilem, quamuis sua sponte sine stipendio militantem, ob ereptum mulierculæ butyri pondo, patibulo addixit. Occupatam à Selymo Damascum nullus miles intrauit, nullus delicias quæ ad urbem loca sunt violauit; notam Imperatoris sui feueritatem extimescens. Non commemorabo hic Gregorium, atque Carolum Chotkieuicios Lithuanicarum copiarum Præfectos: neque Georgium Bastam Rudolphi II. Imperatoris in Hungaria copiarum Præfectum: neque Albertum Valsteinium, notæ feueritatis Duces. Quapropter non malè apud Valerium exercitus sui auribus inculcat Lacedæmoniorum Dux Clearchus, à militibus Imperatorem, potius quam hostem metui debere.

Secun-

Secunda. Quia Seuerus Dux non tantum apud suos verum etiam apud hostes maioris æstimatur. Vegetij monitum prudens, *Dux auctoritatem maximam, seueritate sumat, omnes culpas militares legibus vindicet, nulli errantium credatur ignoscere.* Nam faciles profectò isti & mites vilescunt. Bene olim Scipio, *Ducum austeros & rigidos, suis: at faciles & largitores hostibus esse utiles.*

Tertia. Quia facilius militi stipendia & annonam prouidet: imparata enim tributa, & Commeatum Prouinciales celerius conferunt metu incitati: uti sub Imperio Valseinij videre erat, quem uti amabant ob conseruationem disciplinæ, ita timebant ob seueritatem.

Conclusio. Imperator bonus, benignus, affabilis, ac placidus sit, sed non ita tamen simplex aut mitis ut despiciatur, neque adeo tetricus & austerus, ut in odium veniat: ne scilicet gratiosa nimis dissimulatione, militum animi soluantur atque lasciuiant: ne uè item nimio bellicæ disciplinæ terrore abalienentur. *Absit ergo superbia, inquit Plinius, absit asperitas, nec timueris contemptum. An contemnitur qui Imperium, qui fasces habet? nisi qui humilis, qui sordidus, & qui se primus contemnit. Malè vim suam potestas aliorum contumelijs experitur, longèq; valentior amor ad obtinendum quod velis, quàm timor.* Et si Iulius Cæsar non adeo retinens rigidæ & priscae disciplinæ fuerit, ut sit iactare solitus, *milites suos etiam vnguentatos bene pugnare posse, attamen quomodo indulgentia sit in castris perniciofa, ipse confessus est, cum dicit, indulgentia & largitio speciosum reddunt, præsentem exercitus amorem, paulatim tamen & occultè militarem disciplinam, seueritatemq; minuunt.* Vnde armati semper asperè sunt habendi. Et Doctor Militaris, ita ingerit. *Milites pœna & timor in sedibus corrigunt: in expeditionibus, spes & præmia faciunt meliores.* Ergo nostro iudicio seueritas temperetur aliqua comitate, ne in odium veniat, cum non simus pares priscae disciplinæ: siquidem fauorem militum, ut Tacitus inquit, largiti-

one & ambitu malè acquiras: ita is per bonas artes haud spernendus, vti sunt, exercitatio corporis inter ipsos, cultus habitusque paulum à priuato differens: item vt quis inops aut laucius, vestem & fomenta dilargiri. Alijsq; vel ingenij dotibus, vel animi artibus, vt paritet carus ac venerandus sis efficere.

Q V Æ S T I O VI.

Vtrum Dux locuples, an pauper sit eligendus?

STetit olim res Romana, cum aratores Consules, cum inopes (sed generosos) Dictatores, antiquus ille rigor eligeret. Sarmatæq; nostri vicinis suis metuendi fuere, cum ex aurifice Princeps Præmissus; ex fabro lignario Rex Piaftus, cum ex alijs opificibus Lescones illi fortes, bellicosiq; Boleslai prognati imperarent: verum cum ambitus forum & campum occupauit, traxit secum seruitutem, quæ exiguo post tempore, apud Romanos libertatem inuasit, apud nos tristes prærogatiuas & licentiam induxit. Hinc dubitari cæptum, an stantibus sic rebus modo, melius sit diuitem, an verò pauperem, militaribus copijs præficere. Et qui moderni temporis rationes & momenta perpendunt, dicunt quod locuples præstet inopi.

Primo. Quia milites citius ad diuitem accurrunt, spe stipendiorum & præmiorum; à paupere verò nihil sibi lucrì pollicentur. Iam verò sæpius & historijs discimus, milites ob non repræsentata stipendia seditiones fecisse; à Ducibus suis diffugisse; & interdum vinci maluisse, quàm pugnare; quòd paulò superiore sæculo Ioachimo Marchioni, Brandenburgensi, Ludouico Nassouio, & alijs euenit, vt hic Romanos, Carthaginenses, Græcos, veteresq; Gallos omittam.

Secundo. Quia semper diuites magistratibus præpositi, maiorem authoritatem, quàm pauperes habent, licet isti sint virtuosì, & ignaui illi. Sic cum Felicem Panicium, genero-

nerosi animi virum, ex ordine Equestri, copijs suis Rex Iagello, ad Nisauiam, contra Crucigeros, præfecisset, imminente iam prælij hora, quidam Maioris Poloniæ Palatini, indignati cum suis cohortibus domos abierunt. ne priuati antea nobilis, & præterea inopis imperio subijcerentur. Eadē ex causa, apud Gruneualdum, Magnates contra eundem Regem murmurabant, quod Ducibus veteranis, & Palatinis Dynastiæ viris potentissimis omisis, totius belli regimen Zindramo Mascouio, pauperi nobili tradidisset, ipseque illius imperio tempore pugnæ pareret. Idem obseruabat & filius eius Casimirus Iagellonides, qui ad Choiniciam Procerum consilijs, & diuitum Ducum infelici regimine, prælio amisso, nusquam postea nisi pauperi, sed strenuo alicui viro militare imperium committebat, puta Iansenio, Dembinio, Zauissæ, alijsq; fortissimis Equitibus. Tum & Sigismundus I. Lesniouio, Boratinio, Tuorouio, Zebrido- uio, strenuis militibus, quos non præfectura modò militari, sed & opibus deinceps ornauerat, ob egregiam illorum virtutem.

Tertio. Quia publico ære deficiente, sumptus ad retinendos milites in castris suppeditare poterit, atque ita patriam in necessitate liberali animo suo iuuabit, vt fecit Zamoscius tempore Liuonici belli, & Christophorus Radiuillus, atque Leo Sapieha nostra iam tempestate, Gustauo Sueciæ in eandem Liuoniam irrumpente, cum bello Turcico exhausti essemus.

Quarto. Quia diues tentabit Rempub. à vicinis strictè circumfessam dilatare, & gloriam gentis suæ propagare; quo scilicet & suum nomen posteris tradere possit; quod nequaquam præstare poterit pauper. Quinimo dicunt eum ob domesticam necessitatem facilius corrumpi posse ab aduersario: & non raro plus sibi, quam patriæ aut bonæ famæ studere.

E contra Aristoteles affirmare audet, diuitum cupidita-

tes Rempublicam magis perdere, quàm pauperum.

Primo. Quia opibꝫ abundans, deſiderabit quoq; honorẽ habere præ alijs, atq; ita curabit patriã ſibi ſubiugare. Exemplo inter alios Hanno Dux Carthaginenſiũ, qui cum opibus ſuis vires Reipub. ſuperaret, ad occupandam dominationem omnes animi ſui vires intenderat, cũ exercitibus patriæ præpoſitus fuiſſet; & perfeciſſet quod deſiderabat, niſi à populo furente, cum tota progenie, & cognatione ſua, in crucem actus fuiſſet: ne quiſquam aut ad imitandum ſcelus, aut ad mortem vlciscendam ex tam nefaria domo ſupereſſet. Non deterriti attamen tam crudeli pœna, à ſimili audentia atque ambitu, poſterioris ſæculi hominum animi, Iulijq; Cæſaris exemplo in ſola Italia complures fuere, qui in Imperatores belli electi, dominatum auide in patria appetuere: atque ita Pandulphus Petruccius Senas; Scaliger Veronam; Caſtrucius Lucam: Stortia Mediolanum: Polentanus Rauennam: Coſmus Medices, Florentiam occupauit. Et hunc quidem vltimũ ob nimias opes, & prudentiam, omnibus acceptum, eiecerant ciues ſui, tanquam nouum Alcibiadem, primò, tandem poſtea inſanis quorundam ſtudijs reuocatum, contra libertatem, animarunt. Nam qui multa poſſunt, & quorum in poteſtate ſunt arma, ex horum arbitrio ſalua eſt Reſpub. aut perit. Et *tantum quiſque poſſe poſtulat*, inquit Cice-
ro, quantum habet virium: non ratio, non modus, non lex, non mos, non officium valet. Pauper autem facilè coercetur, cum inſoleſcit: & vltro obedit, cum innotefcere orbi cupit. Quapropter non eſt improbandus, cum ſit virtute glorioſus; et ſi nec origine generoſus, vt moris eſt apud Heluetios, Batauos, & Coſachos noſtros Zaporolenſes.

Secundo. Quia vt plurimum inopes ingenio ac virtutibus nituntur, vt inclareſcere poſſint: diuites verò ignaui atque imbelles fiunt, voluptatibus aſſueti à puero & adulati-
oni, quæ duæ res maximè exercitus perdunt; cum nec frugalitatem atque modeſtiam miles ab Imperatore ſuo diſcat,
nec

nec consiliarij belli, honesta atque vtilia patriæ suadere ei possint. Antonius præ omnibus sit exemplo, atque Darius, quorum vterque delicijs assuetus, plus suæ voluptati, quàm exercituum suorum incolumitati studebat.

Tertio. Quia diuites communissimè quæstuarias artes exercent, ac propterea demisso abiectoque animo esse solent; potius ut lucrentur & rem domesticam exaugeant, quàm ut vincant & habeantur gloriosi, intendentes.

Quarto. Quia omnium Orientalium Principum consuetudo est, pauperes & virtuosos militiæ præficere, diuites verò tributis & exactionibus præponere: ut cum vel pecuniæ deficerent, vel tributa tardè à provincialibus exigentur, priuatis eorum opibus, pro libitu vterentur & imperio. Hinc Turcarum Persarumque Purpurati, atque Chinenfium Satrapæ, ad militaria munia hodie dum, ex virtute, non ex opibus promouentur. Et quamuis olim apud Calchedonenses, pauperes à muneribus, tam bellicis, quàm politicis arcebantur, nihilominus tota ferè Græcia, inopes potiùs bellorum tempore, rebus suis præficiebat, quam opibus nimium affluentes.

Conclusio. Etsi diuitiarum insolentior aliquando sit factus, liceat tamen æquè diuitem quàm pauperem eligere, modò sint bello gerendo apti. Quia idem discrimen à nimia paupertate timendum est, quod à nimijs opibus, cum insolescere voluerint. Hæ enim ambitione, & innata diuitibus superbia, qua regere & non subesse exoptant, eos ad res nouas incendunt. Illæ animos desperatione armatos excitant, ut turbent ac permisceant omnia Hinc Sallustius. *Semper in ciuitate quibus opes nulle sunt, bonis inuident, vetera odere, noua expetunt, odio suarum rerum mutari omnia student. Quibus, quies in seditionibus, in pace turba sunt.* Nec tam periculosa Romæ fuit Manlij opulentia, quàm extrema Catilinæ paupertas. Galba occiso, imperium inuasit Otho, cum magnitudine æris alieni oppressus, sciret nisi Principem, se

stare non posse. Inopia enim seditionum & iniuriarum mater esse consuevit. Diues autem virtutibus Imperatorijs præditus tantum ab generoso paupere differt, quantum argentea aureaq; arma, ab æreis ferreisq; disparata sunt: illa enim ornamento abundè exsuperant; hæc sola vilitate ac necessitate cum illis certant. Sed videamus etiam, an ad opes & diuitias conferat aliquid in præfectura militari claritudo maiorum, & nobilitas familiæ.

Q V Æ S T I O VII.

Vtrum Dux Belli, ex Illustri semper, an verò obscura aliqua familia esse debeat?

SOlet communissimè quæri, an Nobiles in magistratibus & imperijs bellicis præferendi sint plebeijs? quòd nimirum ea veræ virtutis natura sit, vt & primæ, quam exuit, conditionis nunquam obliuiscatur; & eam, quam induit nō negligat: sed habita loci ac temporis ratione, nec deprimat se nimium, nec extollat. Qui tamen claros genere belli Duces habere volunt, dicunt.

Primo. Quòd humili orti genere, solent vt plurimum esse ignaui & meticulosi, vtpote rerum inexpertes, & insueti alloquio, conuersationiq; magnorum virorum, cum quibus potissimum tractandum est in bellis. Ita Ioannes Colouien- sis rebelisantium Stephano Regi Dantiscanorum Strateguss; vt vidit, duo non ex toto millia Polonorum, cum Ioanne Zborouio, viro & genere & rebus præclare gestis in Patria nostra illustri, audacter contra se venire, quamuis fatis numero- sum & benè instructum exercitum habuerit, conscius ignauitæ suæ, & ortus obscuri, statim trepidare cœpit; & vix primū congressum videre passus, confestim ex acie fugit, & tot millia suorum, ferè in vna hora amisit.

Secundo. Quod ignobiles nullam habeant apud milites
aucto.

authoritatem, ob generis sui obscuritatem, quæ illis passim in omnibus conatibus generosioribus, à nobilibus exprobratur: præsertim cum inceperint superbire. Ludouicus Sfortia callidissimus alioqui Princeps, in eo tamen turpiter lapsus est, quòd Galeacio Sanseuerino, perito utique equorum domitori, sed inexperto Duci, exercitus & bella contra Galliæ Regem curam commisit. Quasi idem sit, generosum tractare equum, aut in ludicris certaminibus hastam frangere, & exercitibus præesse. Qui error etiam in Eugenio Papa notatur, quòd Balthasaris Ofidani operas in maximis pace belloque negotiis vteretur: hominis, nulla, neque prudentiæ, neque virtutis laude insignis quàm quòd quo tempore Eugenius vrbe profugerat, ipse Hadriani molem custodiuiisset. Nec Gandauenses multum facessiuerunt negotij Carolo V. ad occupandam vrbe[m] suam cum ei rebelassent, præposito exercitibus suis, è medio ciuium suorum quodam chirurgo. qui ad conspectum statim aquilæ Imperatoriæ trepidare cæpit, & tandem confusis suorum ordinibus fugit. Brutus, verò ex illustri Romanorum familia oriundus, ne genio quidem malo, mortem sibi & cladem vniuerso exercitui, prædicenti cedere voluit, sed magno animo congressus, usque ad extremum in acie dimicauit. Quapropter ignobilis Ducis imperium miles ægrè ferre solet, sicut & populus dominatum ignobilis Principis & vix aliquis diues, aut in honore Reipub. positus est, qui eius imperio in castris subiici velit. Vnde apud Dionem Agrippa. *Si parui precij hominibus Rempub. committas, mox nobilium iram, propter contemptam eorum fidem in te prouocabis, & maximis in rebus clades patieris.* Quid enim præclari homo ignauus aut ignobilis gerat? quis eum non despiciet hostis? quis ei socius obtemperet? quis militum non dedignetur sub signis eius esse? Exemplum passim in Historijs, & ferè omnium gentium, quæ nolo commemorare: cum etiam Democraticæ, popularesque Respub. ut plurimum suis exercitibus Duces nobili ge-

nere ortos quærant, & nostri Zaporofenses Cofachi, & si omnes rustici sint & nobilium subditi glebæ adscriptitij, quos maximo odio persequuntur communissimè tamen nobili prognatos familia Duces inter se eligere solent; quamuis mutato eius cognomine; & ex albo nobilitatis iam ob scelus aliquod perpetratum eraso. perpetuaq; infamia notato.

Tertio. Quòd obscuro genere nati, ut plurimum solent esse superbi, ut primum deuenerint ad aliquas dignitates. Qui ad militiæ Præfecturam? ubi securi potentiæ suæ, & in contemptores imperatorum parati, & valentes vlciisci, etiam in alloquendo sunt nimium difficiles. Hinc Poëta. Asperius nihil humili cum surgit in altum. Et Valssteinius nobili quamuis genere ortus, ut primum Ducis titulum & officium promeruit, nolebat aliter nisi Serenissimus appellari; reliquosq; omnes antiquissimarum familiarum Principes, se inferiores dici.

Quarto. Quot ignobilis natura seruiet avaritiæ, ut familiam suam illustret atque ditet. Iam autem ægerrimè ferunt viri egregij & illustres, si aut indignis, aut ob generis obscuritatem suspectis, conferantur honores, seu quæstuosa commendentur officia, quibus nobiles familiæ rem suam priuatam iuuant, & splendorem dignitatis alunt. Nec quisquam, eam ob rem, ex plebe, à condita Sarmatia, Præfecturam Militarem in Polonia gessit, sed Equestris Ordinis tantum, & præcipuarum familiarum semper, virtute attamen & experientia rei militaris potius quam sanguine vetusto, aut opibus inter ciues conspicui. Nam ut animalia, quorum strenua opera est, generosa dicimus esse; sic & homines ipsos generosos esse putamus ex sua propria, non verò aliena, aut adscititia virtute. Quapropter illos illustres esse dicimus, qui ad Nobilitatem maiorum suorum, etiam proprias animi dotes addidèrunt. Alias amentis est, quid præclare à maioribus gestum sit inspicere, nec quid ipsimet eligendi præstare poterunt, expendere: quasi vero qui olim ante nos

vix-

vixerunt, Rempub. nobis seruire valeant incolumem? Ut igitur ij quibus pauperrimæ tenuesq; sunt reculæ, parandis, augendisq; vitæ præfidijs, ac fortunæ damnis sarcieendis promptiores diuitibus esse solent; ita qui nullos hæreditarios honores cernere possunt, peculiari propriaq; virtute gloriam, laudemq; magnopere sibi adserere ac vindicare conantur. Et ne à militaribus quoque præfecturis arceantur, rationes in promptu sunt.

Prima. Quòd humili familia ortus, ut domum suam illustret, promptius ad virtutem tendit, & proprijs meritis gloriam assequi conatur. Ita Ioannes Huniadus. ex agasone Princeps Transylvaniæ, & exercituum Hungariæ præfectus, strenuissimus fuit contra Turcas bellator, ut virtutis eius respectu. Proceres Hungariæ filium quoque ipsius Marthiam in Regem sibi assumpserint. Franciscus I. Sfortia ex opilione miles gregarius, ac deinceps Dux militum creatus, propria virtute supremos in regno Neapolitano honores adeptus, posteris suis tantam claritudinem reliquit, ut etiam Regio eos sanguini immisceret. Ita etiam Lotrechius Dux Veneræ militiæ & Bartolomæus Bergomas & apud nos Ostaphæus Dascouicius Cosachorum Zaporosensiū author: & alij infiniti.

Secunda. Quòd humili ortus genere, humilia de se omnia sentiat, frugalitatemq; in castris & modestiam, tam in victu, quàm in amictu seruet; nec corrumpat luxu milites. Et ob id à Turcarum Tyranno præficiuntur copijs, non qui nobilitate generis alios superant, sed qui fortitudine, & experientia belli, maximè autem frugalitate præstant: cumq; sint ad supremā dignitatem euecti, non immutant rationem viuendi, nec cibis alijs quàm suctis & ordinarijs vtuntur; puta ariza, bubula & veruecina. Sed & Heluetij, Argentinensesq; neminem nobilem, tam domi, quàm in bello ad summos magistratus admittunt, sed eum tantum, qui se opificem esse probauit.

Tertia.

Tertia. Quòd obscuro loco natus, sit Reipub. aut Principi obediens, gratusq; beneficij collati, ac proinde expeditus ad iussa & promptus ad pericula, æquus, benignus, affabilis, facilis, comis, ac placidus; & qui prorsus tumore calcato, æquè hilarem vultum omnibus exhibet. vt omnes sibi conciliet, omnium fauores adipiscatur. Ex illustri vero familia electus, omnes sibi obligatos esse putat, omnes inferioris conditionis spernit: & subnixus clientum atque amicorum potentia ad dominatum ipse aspirat. Ita apud Neapolitanos olim Braccius, apud Gallos nuper Momorantius; quorum altereiecta Regina Ioanna Regnum ipse occupare conabatur, & nisi maturè profligatus atque ad Aquileam extinctus fuisset, id ex voto ipsi cessisset. Alter fratri Regis fauens, arma in Regem ipsum Ludouicum XIII. sumpsit, à quo tot beneficijs ornatus fuit. Igitur captus in prælio, Tolossæ supplicium subiit, & illustrem familiam suam perduellionis nota commaculatam, in se ipso extinxit.

Quarta. Quòd ex illustri familia Duces electi, tardi sint ad expeditiones ob delicias suas, & minus alacres ad pugna: nec enim semper verum est, fortes fortibus creari; etiam degeneres aliquando filios Heroes habent, & viri sapientes, progeniem stultam. Exempla infinita; sed quæ etiam inter infimæ sortis homines reperiuntur, loquendo in suo genere, & qualitatibus vniuscuiusque. Neque enim Horutius atque Hadrucius Iudæi fratres, apud Solimanum Architalassi, quorum alter Sinum Persicum, alter verò Mediterraneum mare infestabat, similis sibi liberos progenerarunt, sed ad scenerandum, & aggregandas vsuras, more Hebræo aptos. Igitur fit.

Conclusio. Vbi nobilibus & plebeis via ad dignitates promiscuè patet, illi mihi meritò præferri debere videntur; etiam in militaribus Præfecturis, qui Reipub. maximè possunt & volunt prodesse. In cuiuscunque enim animo virtus inest, ei plurimum est tribuendum. Ita nobilitas nostra Polona,

lona, plebeis alias nusquam obedire assueta, Liuonici belli tempore, cum iuris dictione suprema Tribunum militiæ sibi elegerat Stanislaum Kendzierfcium, Bresiniæ textore patre natum, sed doctrina & militaris rei peritia inter omnes cōspicuum; Ioannemq; Maluscium, tempore confœderationis è Moscouia reuertentis exercitus, infer alios pari dignitate Tribunum, Mstouiæ patre sutore progenitum, sed varijs bellis, sub Stephano Rege & Sigismundo III. in Hungaria, Turcia, Moscouia atq; Scythia exercitum. Quod si verò plures virtute & experientia pares sint, illos commendo, quibus honestius est genus. Debetur id enim maiorum illorum in Rempub. meritis, quorum etiam domestico exemplo ad benè agendum hi magis excitabuntur. Et libentius plerumq; à nobilioribus reguntur homines, quàm ab ijs, quos pares sibi paulò ante fuisse meminerunt, non virtuti eorum dignitatem adscribentes, sed fauori & fortunæ.

Cæterum illustrem, natalibus, opibus, & militiæ peritia, sine virtute & bonitate innata, tutius est facere Imperatorē, in vno Regno amplissimo, quàm in Repub. nam si quidpiam contra patriam molietur, Rex sese illi cum nobilitate facile opponet. Quod si verò Rempub. aggredi voluerit, vbi multa sunt capita, & nullus talis potentiæ, vt Reges solent esse, difficulter ipsi resistere poterunt. Exemplo Iulius Cæsar & Octavianus Imperatores. Cosmus Medices apud Florentinos & Franciscus II. Sfortia apud Mèdiolanenses, alijq; alibi, non opibus tantum & familiæ claritudine conspicui, verum etiam ætate viribus, & proceritate corporis, formæque florentes.

Q V Æ S T I O VIII.

Utrum Iuuenis Imperator sit eligendus, an verò Senex?

AN ætas in consiliarijs aut magistratibus designandis, præcipuè bellicis, consideranda sit, diu disputatum fu-

Kkk

it, &

it, & adhuc sub iudice lis est: maximè cum ad electionem summi exercituum Ducis descenditur. Quia iuuenis Imperator fide minus idoneus esse videtur, senis verò vires ad tantum onus parum sunt firmæ; ac propterea neuter securitatem præstare potest. Qui tamen virtutem non ætatem spectandam esse volunt, dicunt.

Primo. Quod infinitos iuuenes Imperatores rem feliciter gessisse in Historijs legimus, sed præcipuè Scipionem & Pompeium apud Romanos: Bolestaum Criuoustum & Lescum Album, apud Polonos, quorum vterque vix decennium egteffus, & tamen victoriosissima bella gesserunt. Sed & Honorium certè puerum adhuc Consulem à principe creatum fuisse discimus ex Iure. Et Rufinus puer, Quæstor & Proconsul Africam rexit. Multiq; alij in diuersis mundi partibus Principes, & Duces bellorum in ætate iuuenili res gloriosè gesserunt, quod senes præstare nequaquam poterant.

Secundo. Quòd defectæ ætatis senex, naturali infirmitatis vitio delinquet. Hinc Sallustius. *In sene umbra nomenq; hominis relictum est, vires corporis effeta, sensus oculorum atque aurium hebetes, memoria labat, vigor animi obtusus: denique senio confectus, parum animo valet, quo pollet iuuenis.* Idèò Homericus ille Nestor, *in consilijs præcipuus, bello inutilis.* Et adagium. *Facta iuuenum, consilia mediocrium, vota senum.* Non minorem quoque seni Imperatori infamiam adfert timiditas, ad tentandam fortunam, audendumq; casus incerti facinus tarda segnisq;. Dum enim ancipites rerum casus anxia secum cogitatione versat, suisq; atque aliorum docta periculis, dubiam fortunæ aleam extimescit, ad aggredendum magnæ rei negotium cunctanter accedit, mauultque secuta tuto in otio acquiescere, quàm pro magna gloria, commodoq; Reipub. magnum discrimen subire. Cautam diuturno fortunæ vsu experientiam frigidus corporis confecti sanguis amplius refrœnat, generosi pectoris calore, qui facem

facem subdere virtuti solet, consopito. Fabij consulta cunctatio rem Romanam fractam contulamq; Punicis armis, restituit. At senilis eiusdem timiditas, cohibito Scipionis impetu, redeuntem felicitatem penè à patriæ luminibus arcuerat. Parmenionis clara erat atque exercitata Philippi armis virtus. At illius in senecta religiosa supra modum circumspectio, suasa cum Dario pace, Perfici regni sceptrum & inclytas de barbaris victorias Alexandro ferè præripuerat. Idem notabant in Zolkieui Poloni, qui bellis diuersis exercitus, ingens virtutis nomen habebat; at in senium vergens, cum toties Scythis in Rusiæ prouincias incurrentibus, aciem opponere recusaret, inconsultæ temeritatis impetum in alijs damnans, maleuolorum in se linguas prouocauerat, quibus deinde retundendis par non erat, donec in acie Cæcoriensis gloriôsè occumbens sanguinem pro patria effunderet, atque ita inuidiam faceret.

Tertio. Quòd communissimè senes fortuna deserit, quæ iunioribus fauit. Hinc Carolus V. tot victorijs & triumphis in iuueniliori ætate illustris, sub extremum senium cum Methim à Gallis captam, exercitu centum hominum millium ad urbem admoto, frustra recuperare tentasset; & in Germania indecorâ sanè fugâ à Mauritio Saxonum Duce consulere sibi coactus fuisset, felicemq; Imperatoris hactenus inuicti genium, in Henricum Galliæ Regem (vt refert Famianus Strada) immigrasse animaduertisset, non dissimulanter dixisse fertur, *Fortunam esse iuuenum amicam.* quòd ea fastidio quodam ac satietate iam capta ab ipso recedere incepisset. Quare vltro Imperio sese abdicauit, & regna omnia hæreditaria filio Philippo resignauit.

Contra: quàm sæpè illa senum Imperatorum prouidentia publicis priuatisq; rebus saluti fuit? Quoties cladem impendentem præcauit? Quoties positam in extremo discrimine Remp. seruauit? nemo est qui dubitet. Neque enim viribus, impetu, audacia, aut celeritate roboreq; corporum,

res magnæ geruntur, : Sed consilio, authoritate, sententia: quæ per senilem debilitatem inualescunt, animo corporis vinculis minus obligato. Quapropter præstat senem Imperatorem habere.

Primo. Quia consilium senile salubre semper in bellis; & Dux varijs fortunæ casibus edoctus, patriæ salutaria suggerit. Idem enim sunt consilia senum, quod hastæ iuuenum. Hi manu, cursu, velocitate, dexteritate: illi ratione, consilio, mente, prudentia aduersus hostes progredi & contendere solent. Et hanc solam ob causam præfert senes Aristoteles. & Solon iuuenes etiam prudentissimos arcet. Baldi quoque dictum celebre est. *Plus valet umbra senis, quam gladius iuuenis.*

Secundo. Quia iuuenis temerario & feroci impetu rem deperdet, vt fecit Ienlisius in Gallia in Hannoniam missus, vt Ludouico Nassouio ab Hispanis in vrbe Montium obsessio suppetiaretur, qui iuuenta sua ferox non expectato exercitu Orangij apud Sanctum Gisleonium cum Federico Albani Ducis filio congressus, & magna suorum strage profligatus est. Proinde Philippus II. moturus arma in Lusitanos, anceps quem tanto exercitui præficeret, posthabitis multis in eam spem erectis, elegit Albanum octuagenarium euocatum ab exilio, & irritatum diuturno exilio in insula Vzeda, ita vt ipse Albanus gloriabundus respondisse fertur ei, qui ab exilio illum euocabat. *Admirari se, quod ad regnum subigendum, opus Regi fuerit catenato Duce:* qui deinde totum bellum feliciter administravit. Et An'as Momerantius septagenario maior, maximis apud Carolum. IX. Regem Galliæ expeditionibus præfuit.

Tertio. Quia iuuenis muliercularum amore captus, rem bellicam negliget. Vt fecit Valdesius, qui ad extremum perducta obsidione Lugdunensi, cum nutante ciuitate discordia, aggressionem in crastinum indixisset, amore captus illustris cuiusdam feminæ Hagæ Comitissæ, in eius gratiam oppu-

oppugnationem dimisit; & biduo postea superuenientibus Hollandis, qui cataractas aquarum aperuerant, non sine clade suorum recedere ab obsidione debuit; & castra sua, a quibus superuenientibus, atque omnes belli machinas amisit, serò demum damnans omissam potiundæ urbis opportunitatem.

Conclusio. Dux igitur belli, cuius fidei atque virtuti, possessorum fortunæ, tutelæ urbium, salus militum, Reique publicæ creditur gloria, temperatæ ac intermediæ ætatis eligatur: quia & robur inerit seni iuniori, & prudentia iuueni seniori. Optimumque foret, si is pater filiorum esset: quoniam, si paruuli erunt, eos veluti potentissimas amoris illecebras. idoneos animi sui obsides Reipub. relinquet. Vti nunc fecit Princeps Sabaudia Thomas, qui in Belgium à Rege Hispaniarum militatum euocatus, uxorem cum liberis in Insubribus obsides reliquit. Si verò iam adultæ ætatis filios habebit; consultores, ducesque, ac fidissimi secretarum cogitationum arbitri fient; Reique pub. statum obfirmabunt, uti in Radiuillis obseruauimus, è quorum familia septimum iam nunc copiarum Ducem, nomine Christophorum, Magnus Ducatus Lituaniæ habet, quorum singuli, digna sua claritudine sobole Florentes, in eam quam hodie videmus magnitudinem excreuerunt, utiles Reipub. ciues. Addo. senex qui nusquam in castris mansit, & nusquam arma tractauit, etiamsi vegetissimus & in togata prudentia versatissimus sit, non eligatur in Imperatorem; nisi ille qui à puero militauit. Obseruabant hoc perpetuo Romani, apud quos nemo honestiorum ad Rempub. accedere, aut magistratus capere poterat, nisi decem annos militasset. Quid Imperium in exercitus? Cumque semel mortuo ad Rhegium Iubellio Imperatore, exercitus Senatu inscio in locum eius scribam, alias virum prudentissimum in rebus politicis, elegisset; sed quia rerum militarium ignarum, nec à puero armis assuetum, tam acerbè Senatus postquam rescierat id tulit, ut milites in urbem reuocatos capitis damnauerit, & quotidie

quinguenos verberibus cæsos securi percusserit, tum etiam sepeliri ac mortem lugeri vetuerit, vt Valerius Maximus testatur.

Q V Æ S T I O IX.

Vtrum Dux dicendi peritus, an verò eloquentia ignarus eligi debeat?

Multorum opinio est, tantas naturalis ingenij vires esse, vt id studijs emendari non debeat. Vnde & in Duce existimant naturalem eloquentiam in gubernando exercitu, aut gerendo bello sufficere, artisq; Rhetorices subsidio non egere. Quorum ego errorem vt refellam, hanc quæstionem consulto inserui, negantiumq; primò rationes ponendas esse censui, quæ potius suspicione, quàm demonstratione aut aliqua probabilitate nituntur.

Prima. Quia ad seditionem militem & prouinciales cōcitant, & in Principem suum freti eorum potentia & fauore consurgunt, vti fecit Aurasiarum Princeps Gulielmus, qui omni ope & pecunia destitutus, sola orationis vi, Hollandiæ, vicinarumq; prouinciarum populos, in Regem hæreditarium armauit.

Secunda. Quia immani loquendi libidine inflammati, nec tacendi tempora distinguere, nec loquendi sciunt obseruare: atque ita vbique morbo non virtute facundi, ipsimet secreta sua reuelant, & vniuerso exercitui perniciem parant.

Tertia. Quòd loquaces isti, qui nec benè loqui vllibi possunt, nec tacere, tàm ab aduersarijs facilè contemnuntur, quàm à militibus proprijs, cum tamen valdè intersit Imperatorem habere quam maximam apud vtrosque auctoritatem.

In contrarium est Pyrrhi Epyrotarum olim Regis eloquentia, eiusq; Cancellarij Cineæ, vt Italicæ gentes Regis exter-

externi, quàm populi Romani tam diu in ea terra imperium mallent. Quod nuper etiam in Germania fecerat Rex Sueciæ Gustauus cum suo Cancellario Axelio Oxensternio, ut faciles ad credendum sectariorum animi potius vellent ab ultimo septemtrione venienti Regi parere, quàm inclytæ domui Austriacæ, supremum Romani Imperij apicem, tot sæculis iam tenenti. Etsi igitur eloquentia quosdam impetus à natura sumit, tamen ut sit prudens & efficax perfici ab arte debet; quia & quos in exemplum adduximus non nisi à doctrina tam potentes in sermone fuerunt, & linguas externas, quas callebant non nisi maximo cum sudore didicerunt. Quare optandum omnino foret, ut qui in spem tam militarium honorum, quàm aliorum magistratuum politicorum educantur, ijs ante studijs assuescerent, quæ ad munia obeunda maximè solent & possunt conferre.

Primo. Quia licet aliquis sit ingenio igneo, acri, & omnium capace, at nulla sagacitate in eloquendo prædito, poterit quidem omnibus bellicis negotijs par esse, sed quid cum seditio in castris orietur? cum de pace conditiones tractandæ erunt? cum ad prælium miles procedere noluerit? Ergo dulci suada & prudenti opus est, ut furentes seditione animi conquiescant ad præsentiam & sermonem Ducis sui; ut excitati eloquentia metum deponant, & ardua quæque atque formidolosa despiciant, ut decertent fortiter contra numerosam multitudinem, & potius velint honeste mori, quàm turpiter fugere. Ita Chodkieuicius contra quatuordecem Suecorum millia, cum tribus Polonorum millibus progressus apud Kircholimiam, ita suos prudenti exhortatione animavit, ut cum mori pro gloria gentis ad Ducis sui persuasionem omnes destinassent, vix septem perierint & ultra centum vulnerati essent, aduersarios verò ad internecionem penè cum suis Ducibus deleuerint; paucissimis exceptis quos à furore Martis fuga saluauerat.

Secundo. Quia vehementi Imperatoris concione erecti,
non

non tantum ad praelium animose procedunt, aut difficilem aliquam vrbs oppugnationem, sed acie iam pulsi, & in turpissimam fugam coniecti, efficaci Ducis sui exclamatione perstricti, iterum ad praelium reuertuntur; & tacito quodam consensu in propositam, dulci eloquio Ducis, laudem victoriamque acriter decertando conspirant, ac amissam recuperant aciem. Ita fugatis omnibus apud Lutzam Valsteinij copijs, solus Picolominæus suos in acie retinuit, monendo, hortando, & incitando ad laudem; gestibus, signis, voce. Quia non ita auribus percepti tubarum clangores animos ad pugnam acuunt aut irritant, vt hortatrix ad virtutem & gloriam oratio, intrepidas expeditæ aciei mentes ad opposita pericula erigit stabilitque imo & metu conterritos, penèque iacentes sæpè constanti roborat allocutione, vt fecit Zolkieuius in pugna Czechoriensis cum Turcis, panico timore quodam nostros post primam decertationem nocturno tempore occupante, cum de septem millibus suorum, complures desiderari viderent, Turcis verò sexaginta Scytharum millia suppetiatum venisse tempore praelij conspicerent. Nam quemadmodum latentium morborum sanatio difficilior, conspicuorum facilior: sic etiam longè maioris prudentiæ est, cæca perniciè deficientes, fugientesque animos ab interitu reuocare, & efficaci oratione, defessos consternatosque milites ad pristinum robur & virtutem animare. Testatum hoc fecit Iulius Cæsar, cum verbis memoratu dignis milites suos in Thessalia fusos à Pompeianis castigasset. *Hac, inquit lib. 3. Ciuil. habita oratione, exercitui omni tantus incessit ex incommodo dolor, tantumque studium infamiæ sarcienda, vt nemo aut Tribuni, aut Centurionis imperium desideraret, & sibi quisque etiam pœna loco, grauiore imponeret labores, simulque omnes arderent cupiditate regnandi.*

Tertio. Quia eloquentia instructus, ipse aduersariorum legatos expedit, conditiones pacis statuit, foedera præscribit; & tam hostes, quàm amicos in sui admirationem rapit,
conci-

conciliatq; sibi apud omnes maximam authoritatem. vt in Ioanne Zamoscio obseruauimus, à cuius ore tanquam à Periclis alterius aurea catena procedebat, qua, non milites tantum, sed omnes ciues Regni deuinciebat, omnes ducebat in amorem sui, & admirationem. Hinc manifesta sequitur.

Conclusio. Nullus Princeps, nullaq; Respub. aut exercitum sine Imperatore, aut Imperatorem absque eloquentia ad bellum mittat, si illud ex voto perfici cupit. Siquidem in omni conuentu, nihil prorsus obtinet prudens aliquis, qui sanio rem sententiam dicit, nisi persuadeat. In militia verò siue pugnandum, siue bellum trahendum, siue obsidionis difficultates tolerandæ, aut castra mouenda sint, quid mutus aut barbarus aget Imperator? Quis vnquam vtiliter Legatum misit quem eloquentia non commendarat? quis commissarios ad tractandam pacem cum hoste elingues deputauit? Carolus V. Cæsar, grauius se Guilielmi Bellai Langæi eloquentia, cum is apud exteros pro Gallorum Rege Legati munere fungeretur, debilitatum fuisse fatebatur, quam multorum robore, & animi magnitudine. Et Franciscus I. cum Matthæi Cardinalis Sedunensis meminisset, asseuerare solebat, aliquanto plus sibi sumptus atque periculi Sedunensis facundiæ indomitam vim, quam tot legionum eius gentis cuspides attulisse. Et Iacobus Zadzik Cancellarius tunc Poloniæ, cum bellum cum Moscouitis ad Smolenscum gereretur, quid in tractatione pacis non effecit, ab ipsismet hostibus arbiter in plurimis conditionibus electus. Quid non præstitit Iacobus Sobiescius cum barbaris iisdem nomine Regis sui Sigismundi III. atque deinceps cum Turcis, Suecis, rebellibusq; Cosachis paciscendo? Quid Georgius Osoloni- us ad Vrbanum VIII. primo, deinde ad Comitiam Imperij Ratisbonam missus, Hæc ars seditiosos ad meliora & saniora consilia reuocat, mucrones ciuilibus profundendi sanguinis, cupiditate furentes inhihet, pacem stabilit, & quamcunque denique vitæ actionem ornat, commendat, & perficit. Qua-

re non iniuria author dialogi de Oratoribus ait, *persuasum fuisse priscis, neminem sine eloquentia aut assequi posse in ciuitate, aut tueri conspicuum & eminentem locum, cum scirent viri prudentissimi, tutius & facilius vulgus duci, quàm trahi, & in regimine lauream linguæ plerumque concedere.*

Q V Æ S T I O X.

Vtrum ex agris, an verò ex vrbibus miles sit legendus

Q Vi militiam in vrbibus legunt, veterum Græcorum, atque Romanorū exemplo, à quibus omnis militaris disciplina profecta est, his potissimum rationibus nituntur.

Primo. Quia in vrbibus citius colliguntur; & in vna vrbe non modo integræ cohortes scribuntur, verum etiam complures legiones vna die emittuntur, quod vix mensibus aliquot in agris colligas. Lacedæmonij quatuordecim phalanges ex sola vrbe sua ad pugnam educebant. Quid Thebani? Athenienses, Corinthij, Carthaginenses, Antiocheni, Quid Roma ipsa? quæ tres & viginti legiones è suis ciuibus in castra mittebat. Præsentem autem temporis statum considerando, si in agris militem scribere voles, nullum vagabundum reperies, aut aptum ad tractanda arma; sed vnusquisque intentus est operi suo, & stiuæ potius assuetus quàm gladio aut lanceæ. In vrbibus autem tot sunt, qui vel tædio artis suæ mutare conditionem volunt; vel nullam artem omnino callentes, oblatam honestè viuendi occasionem statim libentes arripiunt.

Secundo. Quia urbani facilius atque citius exercentur: ingeniosiores enim homines sunt in oppidis, quàm in pagis, ob assiduam conuersationem inter se, quæ rara inter agrestes, idq; sui similes tantùm; in ciuitatibus verò vt gentium diuersarum ita & linguarum atque morum homines reperiuntur, qui vt literis tractandis sunt aptiores, ita quoque & armis

armis. Hinc ciuilitas morum profecta inter ingenuos, hinc vrbalitas inter nobiles, quod frequenti studio, & assidua conuersatione inter se expoliantur.

Tertio. Quia vrbani animosiores fiunt in prælijs, tanquam in libertate educati, & suo ingenio atque exercitio fidentes. Quare vt in moribus, ita & in armis æmulationem cum nobilitate præcipua ducunt, fortibusq; factis contendunt transcribi in Album Nobilium; optimè scientes nobilitatem ortum habere ex militia, hoc est, gentilitiam claritudinem publico præmio comprobata, publicisq; honorum insignijs cohonestata. Hinc apud Romanos tot coronarum genera, ciuilium, muralium, obsidionalium, naualium. Tot militaria dona, armillæ, hastæ, phaleræ, torques, annuli, statuæ, imagines, vt plebem accenderent ad virtutem & fortia facta. Apud Carthaginenses verò, tot donabantur annulis, quot interfuissent prælijs. Iberi tot circa defuncti sepulchrū erigebant obeliscos, quot ille interemisset ex hostibus. Apud Scythas veteres, in celebri conuiuio, ijs tantum circumlatam pateram accipere licitum erat, qui hostem occidissent. Apud Macedonas lex erat, qui nullum hostem interemissent, capistro cingi in opprobriū ignobilitatis. Apud Germanos, nemini vxorem ducere licebat, qui non prius caput hostis occisi ad Regem detulisset. Omnia hæc in vrbibus excogitata ad excitandam virtutem; quibus omnibus agrestes carent, & nullum virtuti in pagis præmium propositum habent.

Quarto. Quia vtiliores sunt in castris, tanquam ingeniosiores, & qui diuersas artes callent, sciuntq; ipsi & arma conficere aut reficere pessundata, & oppugnationes vrbium aut defensiones sua persæpè industria iuuare. Ijdem munera à Ducibus iniuncta, exactius villanis & agrestibus perficiunt.

Quinto. Quia ad subeunda pericula oppidani sunt alacriores: quia laude ducuntur tanquam politiores ingenio, & adhortationibus Ducum permouentur, tanquam capaci-

ores spei, præmiorumq; sibi promissorum, si fortiter ac strenuè sese gesserint.

Contra, qui è pagis militem legere suadent, has rationes adferunt.

Prima. Quia non sunt delicijs assueti, quæ in ciuitatibus reperiuntur, ac proinde robustiores, assuetiq; laboribus, fami, algori, & sudori. Vnde Cato dicebat. *Ex agricolis & viri fortissimi, & milites strenuissimi gignuntur.* Nam *vernacula illa multitudo*, inquit Tacitus, *lasciua sueta, laborum intolerans, & Mercurio addicta, qui effæminat*: semperq; homines quanto pecunia dites, & voluptatibus opulenti, tanto magis imbelles. Ex agris ergo omnium prudentum Imperatorum iudicio supplendum robur præcipuè videtur exercitus, vt faciunt Narsingani, quorum Nairi, seu nobilitas in pagis manet; & in Calecutò è pagis fortissimi leguntur. Persarumq; nobilitas, Polonorum, Gallorum, Hungarorum, cæterorumq; bellicosorum populorum nobiles, & milites equestri ordinis in villis vitam ducunt. Sed & usu ipso constat, aptiorem armis rusticam plebem, quæ sub diuo & in laboribus enutritur. Hinc Cosachos Zaporosenses, & peditatum Polonicum, quos vulgò Haiducos appellamus, videmus in castris hyemem æquè ac æstatem in Moscouia etiam durare, vbi maximus cæli rigor; Germanos verò & quosuis transmarinos populos eo adductos passim emori, quòd non assueuerint humi cubare, & inopiam iuxta ac laborem, cæliq; iniurias pati, assueti tectis, & lautiori modo viuendi. Propterea Iustiniani Constitutione, negotiatores, quæstuarij, mercatoresq; omnes à militia arcebantur, recepti priuabantur L. Vn. C. Negot: ne milit.

Secunda. Quia magis mortem contemnunt assueti miserijs, in ciuitatibus verò nati eam subterfugiunt, partim commoditatibus vitæ prouocantibus ad voluptatem, partim è literario studio vitæ priuationem abhorrentes, & considerantes æternitatem, Hinc barbari omnes execrantur literas, fed

sed præcipuè Machometani, quibus in sola militia fama bona atque immortalitas proposita est.

Tertia. Quia rustica plebs minori sumptu conscribitur quàm vrbica; qui enim aliquam artem mœchanicam exercent, nolunt deferere quæstus suos, nisi maius lucrum ex stipendijs militaribus, quàm ex labore manuum suarum quotidiano perspiciant. Vnde & inter officiales statim non inter gregarios scribi volunt. Quòd si non succedat ad mentem, vili præmio illiciti ad hostem transfugiunt, & vrbes occupandi, vel castra tua, ingentibus promissis onerati, modos ostendunt, & operam pollicentur.

Quarta. Quia frugaliiores sunt, & exiguo commeatu, eoq; simplicissimo contenti fiunt: vrbica verò plebs innutrita delicijs, etiam in castris cupedias quærit. Quas dum non habet, vel eas rapit vi à mercatoribus & propolis; vel vastat villas excurrendo clanculum è castris: vel denique emoritur cū suetæ cupiditati nō potest satis facere aut sufferre egestatem. Hinc in acie passim in prædam ruunt prælio omisso, & cæptam victoriam ob leue habendi desiderium perdunt vna cum vita.

Quinta. Quia sunt obedientiores, natura ad parendum nati: in ciuitatibus verò nati, contumaces communissimè fiant, vel diffugiunt, tanquam libertati assueti. Hinc seditiones frequentes in castris, conspirationes in præsidijs contra suos Duces, deditiones vrbiū & transitiones ad hostem, assiduè esflagitationes stipendiorum, confœderationes in Principem, degradationes denique aut mortes violentæ Imperatorum. Omnino igitur melior ad arma est rustica plebs, quàm vrbana: & secundum hoc concludo sic.

Conclusio. Æque ex agris, quàm ex vrbibus colligendus est miles, sed ita in disciplina habendus, vt & laborem non refugiat, & armorum exercitationem assidua meditatione optimè addiscat: supra omnia autem Duccem suum timeat, eiq; sit obediens. Melius tamen foret, si plures ex agris de-

lecti essent, quàm ex urbibus, & ex oppidis paruis, quàm ex opulentis ciuitatibus; quia non ita delicijs, & quæstui sunt assueti. Vnde & in rapinam non ita proni, & incommoditates omnes, tam famis, quàm aëris supportare meliores: præsertim si è montibus collecti; nam & agiliores ijs qui in planiciebus sunt nati, & ferociores natura, inter vastas solitudines, saltus, syluas, atque aspera saxa enutriti. Tum exiguo victui, eoq; insipido ob rerum in opiam assueti, quia in montibus non proueniunt fruges ita, vt in agris pinguibus, & planicie læta. Ac propterea inter peditatum nostrum, qui è Carpatibus montibus scribitur, & eum qui è Prussia venit, magnam differentiam videmus: quòd isti è solo pingui tardiores sunt, & cœli iniurijs rerumq; inopia facile franguntur; illi verò & audaciores in pericula, & manu promptiores in pugna; & quod maximum est, nullis incommoditatibus franguntur. Urbani verò vbique terrarum proni in motus, præsertim si plures in vno loco: nam ab armis ferociorem & magis exultantem populum fieri non est negandum, quæ si opidanis passim adtribuis, vereor ne locis & manibus freti rebellionem fortasse cœptent vt solent homines odio præsentium, & cupidine mutationis. Qui metus longe à paganis, tum quia natura obedientes, tum quia variè collecti, & variè deinde diducti aut sparsi, non temere consentiant & coeant in vnum.

Q V Æ S T I O XI.

Vtrum extraneus miles sit mercede conducendus, an verò ex subditis & naturalibus tantum delegendus?

AN melius sit subditos suos instruere in armis ad bella tam offensiuam quàm verò defensiuam gerenda, diu, & non vno tempore, nec in vno loco dubitatum: idq; propter diuersas populorum consuetudines, diuersasq; rationes: quibus

bus ducti, alij Principes communiter vtuntur extraneis solum militibus; vt faciebant Solcani Ægyptij qui ex seruis, è Circassia atque Migrelia, seu cæteris maris Euxini accolis, faciebant vnam certam militiam, quæ omnes gradus & honores Reipub. possidebat; & hos vocabant Mamaluchos. Dum autem numerosiore[m] volebant habere exercitum, Arabes mercede conducebant & Nigritas: subditos verò nusquam arma sumere permittebant. Alij mercenarijs vtuntur, sed & subditos non excludunt, vt ferè omnes Europæi Reges, ac Principes minutiores. Alij verò subditos tantum, vt Turcarum Tyranni, Persarum Reges, Cosincini Dynastæ, & Chinorum Monarchæ, qui nusquam alterius gentis aut sectæ, milites in castris suis habere volunt, aut à vicinis Principibus mercede euocant, sed quos tantummodo sibi subiectos, & aliquo beneficio protectionis obligatos habent. Alij denique subditos & naturales tantum, sed non promiscuè omnes, verum aut nobiles solummodo vt Narsingani, Iaponij, Calecutenses, Poloni, aut plebem solam, oppressa & extincta nobilitate vt Heluetij, Tlascalenses, Brami, & nonnulli Europæorum, qui obediens suos habere volunt. Et nostri quidem Sarmatæ olim, nusquam mercenarios milites, præsertim alterius gentis & linguæ, patiebantur inter se, prout & Scythæ, Moscouitæ, Circassij, atque Hungari: sed nunc vetere disciplina deperdita, omnes ferè iam extraneis ad bella vtuntur, imò & naturales iam non nisi stipendijs scribunt; qui nusquam olim mercedem à suis Principibus efflagitabant, sed ex agris, quos possidebant, obligati erant Principem ad omnia bella suis sumptibus sequi. Vnde qui naturalibus neglectis mercenarios euocant, has pro sua parte rationes adferunt.

Prima Quia naturales armis instructi semper contra Principes suos moliuntur, vt Cosachi Zaporosenses apud nos, qui omnino sui iuris esse cupiunt; & toties iam arma in Rempub. ea intentione sumpserunt, vt extincta nobilitate,
toti

Lu

toti Russiæ ipsi dominarentur, nec Regem Poloniæ agnoscere pro supremo domino.

Secunda. Quia subditi arma in manibus habentes, sæpissimè factiones exercent inter se, & pro potentia quisque sua, corpus Regni in plura membra diuidunt. Sic Regnum Malabari in Asia potentissimum in partes iuit, sæculo paulò superiore, Nairorum & Amochorum, hoc est nobilium & Purpuratorum factionibus distractum, in Calecutense, Tanorense, Cocinense, & Trauancorense Regnum. Sic in Africa amplissima Marochij Monarchia, ante centum ferè annos, discordijs Maurorum qui arma in manibus habebāt, scissa est in Regnum Fessanum, Arzilanum, Conganum, Tunesanum & Algeriense. Sic in Europa, potentissima Monarchia Principum Kiouiensium temeritate Roxolanicæ nobilitatis, in tredecem Dynastias, quarum duæ notabiliores fuere, Regnum nimirum Haliciense, & Magnus Ducatus Moscouiticus. Poloniæq; Regnum potentissimum, licentia nobilitatis armatæ, in quinque Tetrarchias dispartitum fuerat, puta Silesiticam, Masouiticam, Pomeranicam, Minoris Poloniæ, atque Maioris Poloniæ. Et hæc deinde singulæ, in tot minores Ducatus, Principum sobole hæreditatem inter se, æquis portionibus diuidente.

Tertia. Quia naturales armis potentes, pro libitu Reges suos deponunt, & mutant statum Reipub. licet eam in partes aut plura dominia non diuidant, gentis suæ potentiam & gloriam conseruare volentes: Nihilominus tamen nouitatibus student, & formam Imperij permutant, vt faciebant olim Romani, qui nunc Reges eiecerant, & Consules instituerant: nunc Consulibus abrogatis ad Decemuiros Rempub. restituerant: iterumq; his eiectis aut occisis, Tribunos Consulibus opposuerant: & tandem ciuilibus discordijs fatigati, ad Imperatores summam rei detulerant.

Quarta. Quia indifferenter ad arma admissi, mœchanicas artes negligunt, mercaturam spernunt, agriculturam deserunt,

ferunt, (sine quibus Respub. stare nequit) latrocinia exercent, vicinos infestant, (vt Scythæ Tauricani & Valachi) continuoq; bella cupiunt, & pacem oderunt semper.

Quinta. Quia armis instructi naturales, inobedientes sunt legibus, spernuntq; sæpius mandata sui Regis; nouas religiones amplectuntur, quarum deinde prætextu multa extorquent à magistratibus, multa ab agricolis, multa à Principibus ipsis. Exemplo Francia, Germania, Belgium; generalisq; expeditio Polonorum sub Sigismundo I. ad Leopolum. Vnde sæpius qui arcere debebant hostem, & prohibere populationes prouinciarum, ipsi terræ suæ populatores fuerunt; quod etiam & bello Prussico persensimus, aliquot ante annos. Igitur meliores mercenarij in disciplina conseruati. Quos tamen politici reijciunt, has ob causas.

Prima. Quia mercenarij proprium commodum quærunt, non tuum; & propterea tum relinquunt bellum, cum maxime opus: idq; vel ob annonæ penuriam, vel ob defectû stipendiorum, vel denique ob vlcionem alicuius iniuriæ. Atque ita, Polybius scribit, Carthaginenses mercenariorû suorum rebellione in extremum perdendi status periculum venisse, cum illis pecunias non suppeditarent. Quemadmodum etiam paulò superiore sæculo Grifones, irati Iacobo Mediceo, discesserunt à seruitio Regis Galliæ Francisci I. in maxima ipsius necessitate. Et Heluetij apud Nauarram tradiderunt Ludouicum Sfortiam, Gallis, nulla necessitate coacti, nisi quod ad præstitâ diem stipendia eis non exsoluisset.

Secunda. Quia transeunt ad hostem lucrandi maioris stipendij causa. Ita Celtiberi corrupti à Romanis deseruerant ad Carthaginenses. Et bello Prussico Germani passim discedebant è castris Polonicis ad Suecos, & à Suecis deinde ad Polonos.

Tertia. Quia mercenarij sunt refractarij, amantq; non iuberi, non regi, sed cuncta ferè ex libidine agere, vbi vires suas vident esse potentiores. Ita Cosachi nostri, Lissouiani

vulgò dicti, quoties in ſeruitio Imperatoris Ferdinandi II. fuère, non vbi à Ducibus hyberna deputabantur immorari volebant, ſed vbi temeritate ſua proteruè occupabant: nec tum in hoſtem excuſiones faciebant, cum iuberentur, ſed cum placeret iſſis. Idem ferè faciebant apud nos in Pruſſia Germani.

Quarta. Quia infidi ſæpè exteri, & maiore ex diuerſo mercede, ius faſq; exuunt; non fide, non affectu tenentur. Et ſi potentiores ſunt, quàm naturales, occupant imperium proſe. Vti fecerunt Angli, vocati à Britannis in auxilium contra Scotos & Pictones. Crucigeri Teutonici à Polonis contra Pruthenos, iterumq; à Præfecto Gedanenſi, contra Marchionem Brandeburgenſem; & Turcæ ab Imperatore Byzantino Calloiano contra rebebelles Peloponeſi Principes & vrbes; qui duce Amurathe primò, deinde Machomete II. vniuerſam Græciam occuparunt.

Quinta. Quia plus conſtat habere mercenarios, quàm erudire ſubditos: graues enim ſunt incolis illi, ſoliti omnia tanquam externa vrere, vaſtare, rapere. Experti ſumus bello Pruſſico, cum Sigismundus III. contra Suecos, è Germania mercenarios euocaſſet. Et Conſtantinopolitani Cæſares, cum non eſſent ſoluendo Gottis, coacti fuerant iſſis proprias prouincias conſignare. Prout & Galliæ Reges, auxiliariis Normannis adiacentia Oceano loca. Vnde prudenter Vegetius dixit. *Vilius conſtat erudire armis ſuos, quàm alienos mercedè conducere.* Quia & Romanum Imperium non per aliam cauſam corruit, quàm per mercenarium militem, cum Adrianus vocaſſet in militiã Alanos Alexander Oſdroenos, Probus Baſtarnos, Hiſpanos, Gallos: Valerianus Gottos & alios: atque ita de auxiliarijs effecti ſunt Tyranni, cum vires Romanorū perſpexiſſent, præcipuiq; Duces barbarorum, Stilicon, Vldinus, Sarus, Ruffinus, Caſtinus, Bonifacius atque Ætius, facti fuerant Principes Italiæ, qui occupauerant Romam, & fecerant Regnum Italiæ. Eodem modo

Fran-

Franci occupauerant Galliam: Burgundiones subiungaue-
rant Sequanos: Vandali Aquitanos, Hispanos & Afros: Sue-
ui & Alani Britanniam: Ostrogotti Macedoniam & Thraci-
am: Sclauones Dalmatiam: Saraceni Asiam, Africam, &
Hispaniam: atque reliqui barbarorum Duces, Radagassus,
Alaricus, Attila, Gensericus, Biorgus, Theodoricus, vnus
post alium deprædati sunt Italiam. Hinc Carolus VII. Rex
Franciæ, nolens extraneum militem introducere in regnum
suum, cepit exercitare pedites ex subditis delectos, quinque
millia tantum Franciscus vero I. quinquaginta. Sed & Ro-
mulus ciuibus suis, nullam aliam artem permiserat, nisi agri-
culturam & militiam, qua illi deinde orbem occupauerant;
sicut & Alexander M. Macedonibus suis; & Hiero Rex Sir-
acusarum: & Turcæ, & Mauri, & Saraceni, qui non indigent
auxilijs cæterorum Regum, sed proprijs militibus omnia
bella peragunt.

Conclusio. Necesario Principes debent subditos suos e-
xercere in armis, si securi in bellis volunt esse; & propterea
robur exercitus si è subditis, auxilia è mercenarijs. Vnde
Liuius. *Id quidem cauendum semper Romanis Ducibus erit,*
exemplaq; hæc verè pro documentis habenda, ne ita externis cre-
dant auxilijs, vt non plus sui roboris, suarumq; propriè virium
in castris habebant. In domestico igitur & proprio milite, me-
lior mitiorq; res est, qui non fortitudinem magis, quàm fi-
dem colit, vbi dilectum & disciplinam adhibueris, sola pro-
bæ germanæq; militiæ vel fundamenta, vel firmamenta.
Præterea obsequium & patientia imperij longè præstantior,
quàm exteris, vt sæpius experti sumus in milite nostro Polo-
no: non item verò in Germanico, Hungarico, Gallico, Va-
lachico, quos conquirere consueuimus. Præterea genitus
in patria miles acer in acie, fortis in pugna, *in prima fronte*
concurrens, vt inquit Seneca, *q̃ aduersa vulneribus pectora fe-*
rens, ne Imperatoris sui signa vertantur. Est enim natura ple-
risque populis vrbibusq; consensus quidam protegendî a-
M mm 2 mandî.

mandiq; Reges. Et quod maximum censeas, non ascitus semper est medestior, & amantior patriæ suæ, cui & incolumitatem & gloriam naturali inclinatione optat. Hancq; ob causâ Stephanus Rex Poloniæ suâsu Ioannis Zamolcij cum Hungaros suos ad bellum eduxisset, adiunxerat illi Polonos quoque ex agris delictos, vt discerent obire munia militaria, quibus non erant assueti.

Nec tamen mercenarios seu externos planè spernendos censeo, vtique si maior vis aut necessitas ingruat; & illi sint conducti è pugnaci aliqua gente. Sed profectò in Europa ex quavis gente viri possunt esse, qui omni armorum disciplina vel arte bellandi, veteres illos milites, qui orbem terræ subegerunt faciliè cœquabunt; si modo exercitati & prudentes Duces delectui præponantur & instructio adhibeatur atque disciplina. Nam extraneus semper proprium lucrum quærit: & Germani bello Neapolitano in Italiam introducti, duce quodam Laudo tota Italia vagabantur incendijs, cæde, præda, cuncta miscentes; à quibus incolumitatem suam Senenses, & Pontifex Innocentius VI. multo auro redimere coacti sunt. Ex horum successu annis sequentibus licentiam aliæ quoque prædonum manus sibi sumpserunt, & alij Capelletos, alij Albos, alij Stellatos, alij Sanctos se vocabūt. Omitto vetera, vt Seleucienses à Parthis; Cari à Cyro: Rhegini & Messanenenses à Romanis: Carthaginenses à Gallis, Hispanis, Liguribus, Balearibus atque Græcis: Græci à Philippo Macedone; Britanni ab Anglo Saxonibus: Hierosolymitani à Saladino: Hyberni ab Anglis: Apuli à Normannis: Itali à Gallis & Hispanis: Græci Imp. à Turcis oppressi; quòd mercede conducti, primò loca & situs Regnorum perspexissent, & bonitate glebæ inuitati ad possidendum essent. Taceo Gotthos à Zenone Augusto in Italiam contra Herulos missos. Taceo Longobardos à Narsete accitos; aut Anglos à Pontificibus Romanis mercede euocatos, contra Romanæ ditionis occupatores: siquidem omni-

mnibus notum est, quomodo singuli isti in auxilium vocati, pro se multis sæculis Italiam possidebant.

Q V Æ S T I O XII.

Vtrum pedites, an verò equites magis sint necessarij?

Quia duplices milites terrestri bello sunt necessarij, equites, peditesq; ideo quæritur inter rei militaris peritos, utrorum maior est usus, cum utrisq; sanè opus sit. Et Polybius quidem (peritus hercules in omni re bellica & civili scriptor) equites attollere videtur, & vim præcipuam, ascribere ad vincendum, dum dicit. *Melius est ad belli usus dimidiam partem peditum habere, & prævalere numero equitum, quam omnia paria hostibus nactum, in aciem descendere.* Ita Parthi, Persæ, Scythæq; omnes solo equitatu bella uniuersa peragunt. Ita ferè & Turcæ: qui vix decimam partem exercitus peditum habere solent, & non pugnam modò non detrectant, sed & uniuersum bellum non exhorrent. Et ratio est.

Prima. Quia præter pugnam statariam maximè sunt necessarij atque utilissimi, explorationibus, excursionibus, vastationibus. Tum etiam ad infestandum atq; laceßendum exercitum inimicum, eumq; continuis velitationibus defatigandũ: tũ & comeatũ interuertendũ, & ad hostẽ persequendum ex insidijs, quod pedites nullo modo præstare possunt.

Secunda. Quia communi omnium opinione, ille in pugna aperta victor esse putatur, qui superior est equitatu. Exempla nostra Europæa penè infinita. In Africa autem atque Asia communissima: nam ut supra attigi, Parthos in bellis, nullo alio milite, quàm equite pugnasse, ex historijs notamus; nihilominus tamen orbem terrarum cum Romanis diuississe legimus. Saracenos verò atque Mauros, solo equitatu suo, vix Romanum Imperium non euertisse, occupasse.

que totam quicquid in Asia aut Africa possidebant: insuper & in Europam transiisse, Siciliamq; , Sardiniam, Maioricam, Minoricam, Corsicam, Hispaniam & maiorem Italiæ partem occupauisse. Pretera Scythas, Moschos, Arabes, Hunnos, solo equitatu pollentes, prout & Gotthos, Vandalos, atque Dacos, vicinis suis; imò & remotioribus, semper terribiles fuisse.

Tertia. Quia celeriores semper sunt copix equestres, possuntq; præuenire aduersarium, vti faciebant olim Ægyptiorum Mamaluchi, nun verò faciunt Tartari Tauricani. Vnde Tacitus: *Equestrium sanè virium id proprium, cito parare victoriam, cito cedere.* Et Ioannes Astriacus olim, solo equitatu ad Gemblacum obtinuit victoriam, fusoq; Confœderatorum Belgarum toto equitatu sesquihoræ spatio, decem peditum millia, partim cepit, partim cecidit, octo autem millia profligauit; machinasq; campestres, currus, atque omnia impedimenta, cum Duce ipso Goignio, in potestatem suam recepit, priusquã ipsius peditatus superuenisset.

Quarta. Quia pedestres copix sine equitibus, nil quidquam notabile in bellis efficere possunt. Equites autem absque peditatu omnem hostilem aciem, non tantum aggredi sed & rumpere possunt, etiamsi nescio quam exercitato peditatu constet; præsertim si equites vtuntur hastis more antiquo. Atque ita Poloni ad Kircholniam in Liuania, ad Clusfiniam in Moscouia, atque alijs compluribus locis Germanicum Helueticumq; peditatum, vnà cum equitatu Gallico atque Moscouitico, vno quasi impetu fregerunt, oblongasq; eorum lanceas sepibus & vallo extemporaneo applicatas, ita cito disruperunt, vt secunda vice sclopetarij eorum sclopos suos globis onerare nequiuerint. Omitto quod hi hostibus com meatum præcludunt, superuentibus eos fatigant, prouincias depopulantur, terrorem prouincialibus inferunt, & vbi minimè sperantur fore, iam in opinatò ad sunt, comburunt, occidunt, capiunt. Experimento in castris Cæsareis

nunc

nunc Croatæ atque Cosachi Poloni, sine quibus, nil quidquam imperiales grauiori armatura sua efficere possunt, aut toto isto bello Germanico potuerunt.

Quinta. Quia equis dimissis totum id præstare poterunt equites, quæ præstant exercitatisimi etiam pedites, ut nostra ætate diuersis in bellis factitatum à Polonis vidimus, ad Chotiniam in Valachia contra Turcas; ad Bialokamienium in Liuania contra Suecos; ad urbem Metropolim Moscouiæ contra Russos; apud Pereflauiam contra Casachos rebelles Zaporosenses, & pluribus alijs in locis, in quibus tam leuioris, quàm grauioris armaturæ equites, quos Hussaros appellamus, equis descensis munia peditum obibant, & ad oppugnationem murorum procedebant. Sed & superiori sæculo Comes Carmignuolus, Philippi Mariæ Vicecomitis Mediolanensis Copiarum Præfectus, contra Heluetios, qui maxime peditatu pollent missus, inspecta ipsorum acie, cataphractos suos ex equis desilire iussit, eoq; modo cum hoste congressus, omnes ad internecionem deleuit.

E contra ex Historijs cuique obuium, Romanum peditē, infinitum numerum equitum sæpius vicisse, non in Asia modo aut Africa, vbi ferè nudi barbarorum equites fuerunt, sed in Europa etiam quosuis potentissimos Reges, cum eorum equitatu deuicerunt. Similiter & Macedonum phalanges ex peditibus compositæ, Asiæ partem maiorem occupaerant; & nunc Germaniæ populi peditatu inuincibiles censentur esse. Igitur videntur esse magis necessarij pedites.

Primo. Quia vbique possunt prodesse, tam in terra, quàm in mari: tam in pugna stataria, quam in insidijs locandis & superuentibus faciendis. Exemplo Cosachi Zaporosenses, qui & in plano & in montibus inuincibiles habentur: & tam pugna tērestri, quàm nauali, barbaris sunt formidolosi.

Secundo. Quia citius colliguntur: sumptu minore scribuntur: & pauciori annona nutriuntur. Equitibus autem multiplex requiritur comeatus & pabulum, duploq; maior

ior expensa, quæ nō facilè vbique habetur: & semper subuectionē postulat. Exemplo militia nostra Polonica grauior, quæ ad sustinendum centū hastatos, ad min⁹ quinquaginta quadrigas requirit, & tot calones, lixas, propolas, propinatores, & nescio quod procurantes pabula & victum; vt vbi cohors centenaria Hussarorum numeratur, ibi sexcentæ ad minus animæ, inter pecudes & animalia, ordinariè dicantur esse.

Tertio. Quia ad labores castrenses, expugnandasq; munitiones non tantū promptiores, sed omnino necessarij; quia nullas fere fossas, pontes, vallos, aut propugnacula equites exstruere consueuerunt, aut possunt, nisi soli pedites, qui nec armis ita vt illi onerati sunt, nec vllam pecudum ac equorum curam habent; sed ad omnia expeditiores, secum vbique fodendæ terræ, cedendorumq; lignorum instrumenta ferunt.

Quarto. Quia omnes ferè pugnæ in lacubus, fluuiis, locis paludosis, aut montosis, solo tantum peditatu peraguntur: & in patentibus campis non minor vsus peditū, quàm equitum habetur, nec prælium vllum (sine peditatu) grandius exstitit nostra & prisca ætate. Vnde Tacitus de Cattis Germaniæ populis. *Omne in peditatu robur, & alios ad prælium ire videas, Catts ad bellum.* In Polonia quoque olim Iazyges fuerunt, vbi nunc Podlachiæ Dynastia censetur esse, qui nusquā aliter cum maioribus nostris præliari solebant, nisi pedes, & tamen multo tempore facesserunt negotium Poloniæ. Idem nunc faciunt Heluetij, & cum omnibus suis vicinis non nisi pedestri prælio decertant. Marchio quoque Pescara, omnes suas victorias, omniaq; bella in Regno Neapolitano, solo peditatu cōfecit. Qui tardius vincit fortasse, sed certius omnino: nam equestriū viriū proprium, cito parare, cito cedere victoriā; vt in pugna Varnensi videre est. vbi, fusis à Vladislao Rege omnibus equitibus barbarorum, penes solos Ianitzaros victoria stetit. Impetum siquidem & procel-

cellam equestrem, facile excipit peditatus, si idoneus illi ordo & arma, ut testantur tam vetera Romanorum cum Asiaticis populis praelia, quam recentia Germanorum sub Ferdinando II. & eius filio Ferdinando III.

Quinto. Quia facilius armantur, facilius exercentur, & facilius in praelio disponuntur per acies, aut mutantur; ubi si ordines ex necessitate variandi sunt, equites tardius dicto obediunt, & facile aciem turbant ipsi suam. Et siue progredientibus retrocedendum, siue regressis conuertendum, aut stantibus mouendum sit, nihil sane dubij est, quin hoc equitibus minus dextre, quam peditibus effectum dari possit. Quod si quoque equites impressione quadam ordines laxauerint, hos absque difficultate restituere nequeunt, licet impressio illa remittat, quod peditibus raro accidere solet. Hisce accidit saepius virum fortissimum equo deside, timidum vero feroce mereri, ex qua inaequalitate itidem barbari necessum est: quia equus quoque cum sit sensibus praeditus, pericula animaduertit, atque aegre se in illa praecipitat, & dum hastas sibi a peditibus oppositas videt, sponte impetum remittit, & calcaria contemnit. Ideo Caesar in Gallijs contra Heluetios pugnaturus, tam ipse se in pedes recepit, quam equos omnes ablegari imperauit, utpote quos fugae quam pugnae aptiores iudicaret.

Conclusio. Vbicunque bona & composita militia est, ibi plus penes peditem roboris puto, quia & in mari, & in propugnatione oppidorum magis utiles, & magis formidandi propter machinas maiores, quas equites secum ducere nequeunt. Equites autem non nisi in pugna terrestri, idque in locis commodis & planis. Iam vero si hostis peditatu abundans collibus insidebit, ab impressionibus & impetu equitum omnino securus erit. In planicie autem, aut syluam, aut fossam aliquam, aut saepem, aut vineta adminiculi loco habebit, & sic impetum equitum reprimet. Vel si in pura & aperta planicie consistet, hastas & sarissas complicatas, aut

trabes transuerfas in eam rem paratas habebit & obijciat: fr̄ quidem minimum quoduis impedimentum impetū equorum frangere solet, vt bello Prussico Poloni experti sumus, qui equitatu potentes, Gustauum in locis syluestribus, montosis, & palustribus acies suas disponentem, nullo modò aggredi potuimus; præsertim hastati, quos Hussaros dicimus, & in quibus omne robur militiæ nostræ cōsistere putamus.

Q V Æ S T I O XIII.

Vtrum vires maritimæ, præstent copijs terrestribus?

X Enophon lib. de Athe. Rep. affirmat naualis scientiæ & militiæ vsum maiorem & cōmoditatem esse, quàm terrestris: suadetq; in bello Peloponesiaco, teste Thucydide, Pericles, vt agros potius suos hostili insolentiæ Athenienses permitterent, quàm maris imperio finerent se priuari: quos post exustam à Persis ciuitatem, classis beneficio victoriam obtinuisse, & sese in integrum restituisse legimus. Eadem mens & Venetis semper erat, cum à Pipino primū Caroli Magni filio, deinde à Friderico Barbarossa Imperatore, postmodum à Genuensibus, atque deinceps à Maximiliano I. bello premerentur. Eademq; ex causa, vtile hoc cōsiliū Philippus II. Hispaniæ Rex moriturus filio dedit, vt si liberet, cum omnibus gereret bellum, cum Insulis tantū studiosè pacem coleret. Sciebat enim prudentissimus Princeps, non sine periculo & difficultate illos tentari, qui mari imperant. Lubecensis ciuitas ne mari priuetur, duobus cū Regibus & fœdera colit, & bella sæpissimè pertentat, cum Dano videlicet & Sueco, quorum vterque in Balthico mari multum potest. Idem curat Magnus Dux Heturriæ, Genuenses, & Galliæ Rex in mari Tyrreno. Veneti in finu Adriatico, Turcæ in mari Rubro, Arabes in Oceano Australi. Sed & Confoederati Belgij potentia, non alia sane re nititur, nisi

nisi maris imperio, quo si semel deiiciatur, de continente etiam atque adeo de libertate ipsorum conclamatum. Vnde Albanum prudentiores repræhendunt, quod dum mediterraneas Belgij vrbes præfidijs muniuisset, maritimas neglexit, quarum Beneficio Bataui ad tantam potentiam deuenire, vt etiam Orientales Infidias, ipsamq; Americam infestare nunc audeant; cum in hac diligentissimè hæctenus potentiam suam maritimam Castilienses, in illis verò Portugallenses, firmarent. Quapropter vires maritimas præstare terrestribus copijs, has ob causas dicunt.

Indias

Prima. Quia miles cogitur in tempore, & bruma statim disparente, mittitur eò, quò intendis: vnde magnum prouenit expeditionibus bellicis pondus, quod tempestiue occipias, & æstiuo tempore omnia agas, absque vllò impedimento frigoris: quod terrestres copix præstare non poterunt, quia difficulter brumæ tempore scribuntur, præsertim equites, cum non tantum tegumenta & vestes requirant, sed & tecta cum magno discommodo prouincialium, & pabula proiumentis, quæ tempore æstiuo vbibue habent, & ipsi in castris sub disciplina manent. Hi dum primo verè scribuntur, vix media æstate in campum prodire poterunt, vt videmus domi in Polonia; semperq; sub autumnum in castra venimus, cum & pluuiæ nos impediunt, & tempus rebus gerendis, ob imminentiam hyemis valdè abbreviatur. Vnde fit, quòd & Turca, contra Persas aut Polonos eundo ac redeundo maiorem partem æstatis consumit, multosq; milites & iumenta in itinere perdit: Hispanus autem Orientem & Occidentem nauibus tenet. Hinc sequitur ratio.

Secunda. Quia vires maritimæ sunt agiliores: In paucis enim diebus, collectos hyeme milites tuos, expones eo in loco, quò vix cum copijs terrestribus medio, aut integro anno potuisses peruenire. Quo enim maius in terra imperium habes, eo minus commodè exercitus tuos ducere poteris, ob impedimenta montium, lacuum, sylvarum, fluuiorum, pa-

ludum: quod per hæc talia, nec victualia ita aptè curribus, quàm nauibus in vnum locum conducantur; nec machinæ grauioreſ, aliaue inſtrumenta belli, in tempore aduehantur; nec milites ipſi pro tuo libitu ad præſtitum diem congregentur: partim infirmitatibus diuerſis, ex mutatione àeris debilitati: partim curribus & impedimentis varijs bellicis impediti: partim demum equorum ac iumentorum inopia, vel reſpectu, ne fetigentur ante bellum, remorati; vt toties Poloni, in expeditionibus Moſcouiticis ferè omnibus perſenſimus. Claiſis autem iſta omnia breuiſſimo tempore quò volueris tranſfert, & ſimul cum milite adfert, inopinantem-que aduerſarium opprimit. vt in Guſtauo videre erat, cum Liuoniam primò, deinde Pruſſiam atque Pomeraniam, non ſperatus inuaſiſſet.

Tertia. Quia terreſtris exercitus multo maiores requirit ſumptus, tam in ſubuectione rerum neceſſarium, quàm in comparatione annonæ, & ſolutione ſtipendiorum, ac præparatione inſtrumentorum bellicorum. Conſiderando enim equos, iumenta, & conductores, quæ omnia per inopiam & labores fatiſcunt; conſiderando victualia quæ conſumuntur priuſquam ad locum deſtinatum peruenerint; conſiderando & ſtipendia quæ dantur militi, priuſquam venerit in caſtra: animaduertemus tantam pecuniam à Principibus elargiri in copias terreſtres, quanta maritimæ vires maiorem expeditionis partem peregiſſent; interdum verò & totum bellum confeceſſent, in Inſulis præſertim, vbi minor reſiſtentia aduerſariorum.

Quarta. Quia maritimæ vires pluribus in locis ſimul aggrediuntur aduerſarium, vti faciebat nuper Guſtauus, qui modo in Pruſſia ad Pilauiam, modo in Pomerania ad Stetinũ, ad Stralfundã, ad Roſtochiũ, adq; Lubecã cum ſuis copijs comparebat, quoq; minime ſperabatur venire, vrbes & munitiones oppugnabat, aut laborantibus ſuis recentia ſubſidia ſubmittebat. Quod conſiderans olim Cæſar Ger-

mani-

manicus, voluit transferre militiam terrestrem in mare, iussitq; mille naues extruere, vtilius putans numerosum exercitum, tempestiuè, & totum simul, in longinquas terras deportari, quàm cum maximis difficultatibus per terram conducere. Hinc Tacitus dicit. *bellum maturius incipi, legionesq; & commeatus pariter vehi: integrum equitem equosq; per ora, & alueos fluminum media in Germania fore.* Conducendo autem militem per terram, hasce incommoditates enumerat. *Militem haud perinde vulneribus quàm spatijs itinerum damno armorum affici. Fessas Gallias ministrandis equis, longum impedimentorum agmen oportunum ad insidias, defensionibus iniquum.*

Quinta. Quia maritimi exercitus, terras ignotas aperunt, inueniunt atq; occupant Insulas, quæ pedibus adiri non possunt. Exemplo Castiliani & Portugallenses, tum Arabes quoque & Iaponenses. Iam verò quæ ignota marium litora, quasue desinentis mundi oras scrutata non est Belgarum nautica? aut Batauorum exercitus maritimi? aut Anglorum pyratice? Nimirum quanto illos intra fines terræ contractiores inclusit natura, tanto ampliores ipsi sibi aperuere Oceani campos.

Contra, qui terrestres copias præferunt maritimis, has rationes adducunt.

Prima. Quia terrestres copiae non indigent, mari, maritimæ verò copiae non possunt esse sine terra, quæ & annonam, & arma, & homines subministrat.

Secunda. Quia milites exercitati militare in terra, sunt quoque optimi & in mari: assueti autem classi, & bellis maritimis, nihil valent in terra. Atque hinc experientia videmus, quòd nullus Rex habitans in Insula potuit propagare suum Imperium in continenti, vt Reges Cypri, Tyri, Siciliae, Angliæ, Hyberniae, Sardiniae, Maioricæ, Socotoræ, Calcuti, Goæ. Sed neque Cretenses olim, aut Polycrates Sami Rex, qui mille naues armatas habuisse dicitur, aut Rho-

dij, aut Phoenices, aut denique, Veneti Genuenses, Pisani, Britanni, Bataui, quamuis mari potentissimi aut fuerint, aut adhuc sint, in terra continenti vnquam latè protulerunt imperium. Nam & Romani Carthagenenses, & Saraceni Græcos Imperatores, & Augustus Sextum Pompeium terrestri militia potius deuicerunt, & maris dominio penè nullo negotio pepulerunt, quàm maritimis copijs aut prælijs. Sed & Lidij, Pelasgi, Ægyptij, atque Milesij mari olim potentes fuerunt, prout & Iaponenses in Asia; semper tamen intra limites suos steterunt; qui verò in terra habuerunt magna sua imperia, dominabantur mari, vt Romani, Græci, Vandali, Saraceni, Chinenses, & nunc Hispani atque Turcæ, qui licet longè nati sunt à mari & nauigationis ignari, sed cum copijs terrestribus occupauissent portus celebres, & ciuitates maritimas, facile postea occuparunt & maria, Insulasq; in mari mediterraneo, ac Euxino: classisq; eorum liberè vagatur per Sinum Persicum & Mare Rubrum.

Tertia. Quia copix terrestres sunt semper securæ, maritimæ autem subiacent ventis & tempestatibus; sæpiusq; hoste non viso pereunt omnes; vt accidit classi venetæ, in Cyprum nauiganti, cum Nicosiæ atque Famagustæ ciuitatib; à Turca obsessis subuenire properarent. Vel si nō pereunt, tū iactatæ tempestatib; tardè ad portū exoptatū perueniunt; aut quassatæ fluctib; dissipantur per diuersa littora & prouincias, vt euenit Sigismundo III. è Polonia in Sueciā secunda expeditione nauiganti, qui dum labentes Sueciæ res fulcire cupit, soluta classe è portu Dantiscano, vna solummodò cū naui Colmariā appulit; cæteræ verò naues per diuersos Germaniæ portus disiectæ fuerunt. Quare rebus omnino infectis, in Poloniam redire coactus fuit.

Quarta. Quia non omni tempore vires maritimæ in usu esse poterunt, prout copix terrestres, quæ rigidissima etiam bruma à bellis coeptis non cessant; classis verò, in Septentrionalibus præsertim partibus, toto hyberno tempore, quiescere cogitur.

Quin-

Quinta. Quia non vbique potest perueniri nauibus, quo copiae terrestres pertingunt: nec vbique classis fabricari potest, etiamsi maria patentia habet partim ob inopiā materiæ; partim ob incommoditatem littorum; & partim ob penuriam artificum aut nautarum; qui nonnisi sumptu ingenti aliunde euocari possunt; quo sanè sumptu bona pars exercitus terrestris ali potuisset. Ex his, atque alijs quæ ad ferri possunt, rationibus sequitur.

Conclusio. Potentia maritima fundatur super potentiam terrestrem: Nec in mari quisquam potest esse potens, nisi primò sit potens in terra, ex qua debet habere & nautas, & milites, & com meatum, & arma. Præterea, materiam fabricandarum nauium, ligna, ferrum, canabim, lintea, picem, metalla fundendis tormentis apta, cæteraq; ad armandā classem necessaria. Quæ, licet proueniant quoque in insulis, ita tamen proueniunt, vt vel nō omnia vno in loco reperiantur, vel si reperiātur, nō sunt in sufficientia ad fabricandā vnā potentem classem. Hinc multa licet acquisuerint Iberi in Asia, Africa, atq; America, viribus maritimis, semper tamen classem suā armarunt in illis prouincijs, quas possident in continenti, non verò in Insulis, & vbi dominium à mari in mediterranea habent protensum. Prudenter itaque Cosmus Medices dicere solebat, eum Principem non debere vocari potentem, qui viribus terrestribus non adiungit potentiam maritimam: aut in mari late extendens suum dominium, non habet potentiam in continenti. Nam Alphonsus Albuquerque, inter vicereges Indiarum, apud Hispaniarum Reges celeberrimus, qui Ormusium, Malacas & Malabares insulas occupauerat, etsi compluribus vicinis Regibus formidabilis fuerat: ipsiq; Enmanueli Regi suo fortasse nimium grauis, quòd nō semper mandatis suis pereret, sed pro libitu suo vsque ad mortem in illis partibus, contra expressam Regis sui voluntatem imperaret, nec vllò modo successoribus ex Hispania missis magistratu cedere vellet. Tamen non e-

rat

rat metuendus Hispanis valdè, quia ſubſiſtere illarū Inſularum potentia non poterat, ſed omnia ad firmandam claſſem ſuam ex Europa requirebat: prouit & ſucceſſor ipſius deinde, Franciſcus Almeida.

Q V Æ S T I O X I V.

Vtrum præſtantius ſit Marte aperto decertare, an verò ciuitates munitas expugnare?

A Iunt receptum eſſe inter belli peritos, eum, qui copiis præualet, & agrum hoſtilem in ſua poteſtate habet, ſuperiorem bello videri; & victoriam ſequi deditionem oppidorum. Nullumq; eſſe tam valdè munitum locum, qui intercluſſis auxilijs & comineatum ſubuectione, expugnari nequeat. Alexandri M. vox celebris eſt: *bello vicimus, ſi prælio vicerimus*. Et Germanici orantis: *inſiſterent cadibus; nil opus captiuis, ſolam internecionem gentis finem bello fore*. Eadem Franciſci Sfortiæ bellicoſiſſimi Imperatoris ſententia fuit: deuicto hoſtili exercitu debellatum eſſe: at expugnatis vrbibus & caſtellis, ſæpè bellum longè maius ſuperſuiſſe. Ferdinandus II. cum prælio ad Pragam Fridericum Palatinum viciſſet, totam Bohemiam ſtatim recuperauit. Proinde, qui præſtantius in bellis eſſe putant, Marte aperto pugnare & vincere, his potiſſimum rationibus nituntur.

Prima. Quia bellum fortitudine militum conficitur, hæc autem monſtrari non poteſt, niſi in acie, vbi pars vtraque offenſiuo modo agit: in oppugnationibus verò vrbium, quia propugnatores deſenſiue procedunt, mœnibus & propugnaculis tecti, robur militum & vera fortitudo monſtrari nequit.

Secunda. Quia in oppugnationibus plus habet Dux temporis ad conſultandum, & exequendum id, quo poſſet hoſtem ſubijcere ſuæ poteſtati: habetq; tempus arte & ingenio agen-

agendi. In campo vero omnia quasi ex improviso veniunt, milleq; casus inter praeliandum non sperati accidunt, quibus occurrere maius requirit ingenium, & maiorem audaciam.

Tertia. Quia oppugnationes, ut plurimum, cum sunt difficiles, tempore ipso perficiuntur, & ligone atque fame edomantur: in praelijs verò animi vigore, robore corporis opus ad evitandum pericula, quæ possunt fieri in instanti.

Quarta. Quia oppugnatio semel reiecta, iterum instaurari potest; acie verò semel profligata, victor statim, omnia devicti instrumenta & apparatus capit; fit dominus & urbi-um & provinciarum. Nec permittit fugatum, nisi ægrè valde, vires recolligere. ut accidit Carolo VIII. Regi Galliarum in Regno Neapolitano profligato. & Francisco I. ab iisdem Hispanis in Insubribus devicto.

Quinta. Quia maior opera est Marte aperto vincere quam urbem expugnare. Moenia enim tantum machinis quassantur, & ignibus suppositis aut iniectis diruuntur: in acie verò res cominus gladijs geritur, ad quod viris opus est fortibus; oppugnatio autem etiam ab ignavis tempore ipso perficitur, dum inclusi diuersis incommoditatibus fracti, puta fame, vigilijs, aeris infectione, anxietate animi vulneribus, defectuq; missilium ad deditionem coguntur, aut morte in propugnantes assidue grassante, ob paucitatem defensorum, a superueniente multitudine opprimuntur.

Sexta. Quia obsidione urbium vires suas Principes debilitant inaniter, & parum lucrantur de hoste, cum autem acie vincunt, fiunt domini & urbium & Regnorum. Quapropter non placet ille mos, quo crebrò, omissis aciebus, moram facimus in obsidione oppidorum castellorumq; quo tempore potuissimus totam provinciam debellare. Notatur error Bardanis apud Tacitum, qui dum in Seleucienses ira accensus obsidioni urbis validæ, & munimentis obiecti annis, muroq; & com meatibus firmatæ implicatur, hosti restaurandi belli occasionem præbuit. Ludovicus XII. Galliarum Rex

ab Henrico VIII. Angliæ Rege in tantas anguſtias coniectus erat, vt desperatis rebus ſuis in Britones Armoricos fugam meditaretur. Sed ſalutem ipſi hoſtium negligentia attulit, qui obſidione Terracanæ vrbis quinquaginta dies occupati, animæ reſumendo tempus dederunt, cum ille aſſiduus oppugnationibus vires ſuas attriuiſſet. Sed & Franciſci I. vires Perpiniani oppugnatione debilitatæ fuerunt. Caroliq; V. potentia Sandefiriana obſidione, ita labefactata erat, vt nec ille in Hiſpaniam, nec hic in Galliã vltra progredi potuerit.

Septima. Quia maior eſt gloria & fama acie vincere quàm vrbes expugnare. Alexander M. exemplo, qui quod Darium acie vicifſet immortalẽ apud poſteros nomen aſſectus eſt. Similiter Tamerlanes, Baiazete II. Turcarum Imperatore vno prælio deuictõ, multorum ſæculorum gloriam adeptus eſt. prout & Sapoꝛes Rex Perſarum, capto in acie Valeriano Romanorum Imperatore. Sed & multò ante in ore omnium Scipio Africanus fuit, qui in Hiſpania acie proſtigauit Aſdrubalem, Mandonium & Indibilem: in Africa verò Hannonem, iterumq; Aſdrubalem, Siſacem & Annibalem. nullam autem obſidionem fecit, nullamq; munitam ciuitatem expugnauit, præter Carthaginem, quæ exercitu in prælio campeſtri amiſſo, ſtatim & animum perdiderat. Apud nos in Polonia ex præcipuis bellatoribus cenſentur, Boleslaus Criuouſtus quadragies ſepties acie victor, & Conſtantiuus Oſtrogius, ter & trices triumphator. quorum vterque nullam urbem expugnauerat.

Cæterum quia nunc bellum tranſlatum eſt, è campis ad muros, & à gladio ad ligonem, ideo difficilius eſſe videtur ciuitates expugnare, atque perconſequens glorioſius quàm acie vincere.

Primo. Quia in acie victoria ſæpius fortuna ſit, quàm militum robore, vrbes autem non niſi ingenio, viribus, ſumptu, auſuq; ingenti capiuntur. Vnde egregiam laudem merentur, qui cunctationem afflictiſ rebus ſalutarem temeritati

ritati fortunæ prætulērunt, potiusq; bellum cum tempore gerendum instituerunt, quàm vnico iactu de summa rerum decertare voluerunt.

Secundo. Quia maior audacia est aggredi muris cinctū, quàm thorace munitum, maiorq; fortitudo expugnare eum qui vallo sæptus est, quàm qui in campo aperto stat. Et hinc nascitur illa longitudo temporis in obsidendo, & difficultas in oppugnando, quod hostis mœnibus inclusus securior est oppugnante, & melius armatus assiliente.

Tertio. Quia in oppugnatione urbium, non solum cum hominibus pugnatur, sicut in acie, sed etiam cum situ loci, cum asperitate cœli, cum insalubritate aëris, & cum ipsa denique natura, partim supra terram, & partim sub terra aggrediendo hostem; euitandoq; periculum, tam ab obsessis, quàm ab illis qui veniunt in succursum. Quod fortissimò animo Consalius Magnus sustinendo licet aperto Marte nusquam decertauerit, expugnando tamen continuè vrbes, Magni nomen promeruit; quia sic è regno Neapolitano (postquam expugnasset Tarentum, Caietam, Neapolim, atque Rubiam) Gallos eiecit: è Cefalonica Turcas: & pro Rege Catholico acquisiuit Regnum Granatæ.

Quarto. Quia defensores, qui sunt tecti muris, non solum vtuntur tormentis æneis, sclopetis, & gladijs; sed etiam igne artificiato, calce viua, pice, oleo feruenti, lapidibus, omniq; alia re, quæ offendere potest: quibus rebus, nudati suis propugnaculis assilientes, non possunt vti omnino, raroq; defensoribus suis artibus inferunt damnum, vt experientia docemur. Quia mille inclusi munitioni alicui forti, possunt triginta millibus oppugnantorum, non raro per annum integrum resistere, vt nuper factū fuerat à nostris, qui à centum triginta millibus Moscorum, transmarinorumq; militum obsessi, vix duo millia defensorū tolerarunt, plus quàm per integrum annum resistendo: qui tamen vix septingentos de suis toto oppugnationis tempore amiserunt. Pluribus

enim armis vtuntur defensores, & efficacius multò, quàm oppugnatores, qui & laborem maiorem subeunt in diruendo, & sumptum collocant in comparando instrumenta expugnationis, & retinendo totum exercitum in castris anno integro aut duobus, qui bellum Marte aperto conficere poterat & finire mensibus duobus, vti cum Osmano Turcarum Tyranno ad Chotiniam in Valachia confecimus. Hinc Duces assueti vincere in campo, aut euitant obsidiones magnarum ciuitatum; aut si eas obsident parum proficere solent. Iam autem rarò illi stabilis est victoria, qui post eam præcipua regionis loca statim non inuadit, & illam imprimis urbem, vnde in omnia regimen. Annibal tot victorijs clarus, dum ipsam Romam non petit, inglorius tandem abiit, & qui vincere poterat, dum victoria vti nescit, didicit vinci. Ioannes Andeganensis, superato ad Sarnum Ferdinando Regnum obtinere potuisset, si inuasisset Neapolim, vti ante eum fecerat Alfonsus Magnus. Gustauus superato Tyllio ad Lipsiam, si recta Viennam contendisset, in magnum periculum Cæsarem Ferdinandum II. coniecisset, reliquasq; Germaniæ ciuitates & prouincias Austria debellata facillimè debellauisset. Vladislauus IV. Rex noster, repulsis à Smolensco numerosissimis Moschorum exercitibus si recta Metropolim Imperij eorum contendisset, oppressisset Russos omnino, tributariamq; sibi Moscouiam procul dubio fecisset. Vrbe enim illa non domita, quæ ob opes, munitiones, annonam, commoditatem situs, imperij sedem, aliaq; similia, potentia & vigore reliqua animat & sustentat; inclinataq; restituere & potest & valet, frustra triumphum canit aduersarius: victoriam enim alibi degustare potest, hic tantum obtinere.

Quinto. Quia ad famam magis conducibile. nam in acie fortuna sola & virtus militum victoriam præstant: in expugnationibus verò urbium, & ingenium, & labor, & ingentis sumptus expensio, Imperatoribus reddunt apud exteros

teros illustre nomen, & Principis declarant potentiam; cum nihil ei imperuium, nihil inexpugnabile sit.

Sexto. Quia ad terrorem hostibus iniiciendum multum conducit: quia ille qui acie vincitur, potest adhuc in suis munitionibus sese defendere & protrahere bellum: sed qui primariam urbem, quæ illi in ipso ingressu opponitur expugnat, nihil sibi durum & difficilè monstrat; atq; ita hostem ad desperationem, & perconsequens ad deditionem, aut petitionem pacis cogit.

Septimo. Quia sic monstratur ingens potentia Regis, & fortitudo Ducis, ipsius; quia is qui urbem aliquam munitam obsidet, monstrat thesauros suos quasi inexhaustos esse, ut pote qui possit, & in campo exercitum habere, & in expugnationes sumptus facere. Præterea animum suum inuincibilem monstrat, quia cum duplici exercitu se rem acturum proponit; cum obsessis nimirum, & cum illis, qui subsidio sunt obsessis venturi. Quibus dum resistit, & victoria potitur, rem multo maiorem præstat, quàm si in acie aperta conflixisset: quia hic ab utrinque aggressus, dum & obsidet, & obsidetur, duplo fortiores suorum vires esse monstrat, & excurrentibus ex urbe, & oppugnantibus à tergo, una & simul resistendo; uti fecit Iulius Cæsar ad Alexiam in Gallia, & paucos ante annos Spinola apud Bredam.

Conclusio. Quia expugnatio urbium difficilior est certamen verò campestre periculosius, ideo qui in utroque valet, ille maximam gloriam in re militari habet, ut Alexander Magnus, qui & Tyrum, aliasq; infinitas vrbes munitissimas expugnauit, & numerosissimos Darij atque Porhi Regis exercitus deuicit. Similiter Iulius Cæsar, Narsetes, Belissarius, Alphonsus Magnus, Ismaël Sofius, Solimanus I. & apud nos Stephanus Rex, Io. Tarnouius, Zamoscius, Chodkieuius, alijq; plurimi. Neque enim minor censetur esse gloria Farnesij, qui Antuerpiam expugnauit, quàm Zolkieuij qui ad Clussum Moscum acie vicit: aut Tyllij minor fuit

labor expugnare Magdeburgum, quàm Bucquoij profligare Fridericum apud Pragam: quia hodie Principes magis contendunt munire ciuitates, quàm educere fortes in aciem milites. Vnde spe omiſſa vincendi in prælio, in eo ſolo elaborant, vt poſſint conſumere aduerſarij vires, vt videre eſt in bello Belgico inter Batauos & Hiſpanum, & in bello Germanico inter Regem Galliaë, & Imperatorem. Non eſt igitur quod pugnare feſtinet, cui clades nocitura plus eſt, quàm victoria profutura. Ita enim Franciſcus I. nimio pugnandi deſiderio abreptus, non Mediolanenſi ſolùm Ducatu exitus, ſed etiam captus ipſe, ius quod in varia ante loca Gallis erat, coactus fuit eiurare. Quid enim infan-
 ius, quam nudare quæ ſufficerent præſidijs vrbes? iuuentutem, educere? & patriæ ſalutem, incerto vnus prælij euentui, committere? Romani olim, ſine fato ſuo, ſine ſecunda quæ diu ipſiſ fauerat fortuna ebrij, Gallorum arma contemnentes, ad Alliâm flumen proſtigati, adq; Cremeram cæſi fuerunt, quod vnico prælio decertare maluerint, quàm defendere ſeſe in vrbe mænibus; quam illi nudam præſidio inuenientes, igne, ferro, manibus, ſolo exæquarunt. Trahendum erat bellum, (vti fecerat Chodkieuicius ad Chotiniam cum Turcis vallo cinctus in caſtris) nec ſtatim cum tam ferocibus hoſtibus tentanda pugnaë alea, donec inuiſta illa rabies, & impetus, quem pro virtute barbari habent, conſeſceret.

Quemadmodum igitur, viris & viribus ſuffulti eſt inſtare, premere, vrgere, otium non pati, non deſidere; ſed agere, terre res hoſtiũ, omnia denique tentare, vt ad manus deueniatur. Ita imbecillioris partes ſunt, fruſtrari impetus, moras neſtere, illudere vim hoſtium, trahere tempus, opperiri dum aliqua neceſſitas pecuniæ, aut commeatum, aut defectus ſupplementorum, dum denique tædium & longa dies hoſtem conficiat. Munitasq; vrbes, hoſtilis annonæ conditoria, armorum fabricas, exercituum refugia: veteri-

am minora loca, ex quibus nostris commeatum subuectio, pabulatione infesta reddi possit, post terga intacta relinquere nulla ratio persuadere potest, cum attriti sua mole hostes fuerint, armis occupare.

Q V Æ S T I O X V.

Utum superuentibus & insidijs, an publico Marte configi præstet?

NOtum veteres statariâ pugnâ tam obstinatè pugnavisse, ut paucis prælijs, atque adeò interdum vno debellaretur. Quæ sententia multis olim placebat; nunc solis ferè Orientalibus, reliqui ferè omnes Europæorum pessima consuetudine, bellum potiùs cauponari, quàm gerere videntur: passimq; videmus modernorum Ducum more duccendo bellum, exhauriri ærarium, colonos agris auferri, oppida, vrbes, prouincias, regna incolis spoliari, & ad miserandam vastitatem redigi, nec nisi lassata vtrunque crudelitate, de pace cogitari. & ut Tacitus loquitur, *vbi solitudinem fecerint, pacem appellari*. Hinc aiunt Romanos magnis viribus bella gessisse, quò, breuiori temporis spatio cõficerentur: hosti obuiam profectos statim dimicasse; victis leges tulisse. Qui igitur eorum imitatione & documento, publico Marte confligendum putant, aiunt.

Primo. Quia per tædia & moras frangitur militis animus, vigorq; ingeneratus vel ab exercitio, vel à natura, cum tempore etranescit, præsertim, si vel cœli inclementia, vel rerum inopia accedat; qui alias primo impetu omnem aduersarij potentiam frangere potuissent. Ideo Carolus Borbonius, cum in partes Cæsaris transisset, quamuis numero præualeret, studium & alacritatem pugnandi in Gallico exercitu notans, belli aleam tentare non voluit, donec & cõmeatum inopia, & ingruentis hyemis molestijs, primus
ille

ille impetus (quem pro virtute Gallos habere etiam veteres notauerunt) confenesceret. Sciebat prudentissimus Imperator, & cui res Galliæ longo vsu perspectæ erant, facilius & tutius ferocissimos hostes mora & difficultatibus expugnari, quàm ferro.

Secundo. Quia miles in vnum congregatus, si detineatur diu, morbis & contagione perit, qui congressus cum hoste non inultus cecidisset in acie, & forsan victoriam audaci suo conatu obtinuisset. Quod notatum in Valsteinio, qui cum quadraginta millibus in Hungariam progressus contra Gabrielem Betlehemium, Transyluanix Principem, cum otiosus in castris sederet, totum exercitum contagione amisit.

Tertio. Quia è diuersis gentibus conscriptus miles, si statim ad prælium non procedit, dissipatur mora; auxiliaq; ab amicis submissa, aut diffugiunt, aut emeritis stipendijs cū indignatione abeunt domum. Et hac ex causa Guilelmus Orangius Brabantiam ingressus, toties Hispanis offerebat pugnam, sed Albanus quòd animo prouideret exercitum Orangij ex fœderatis Principibus Germaniæ conflatum, hyeme ingrauescente diu durare non posse. ob defectum stipendiorum præsertim, ac com meatuum inopiam, nullis rumoribus suorum adduci poterat, vt aperto Marte confligeret, malleus potius seram, sed securam, quàm recentem, sed dubiam & cruentam victoriam habere. Nec cum fefellit opinio, discordia inter milites ob non soluta stipendia oborta; vbi & ipse Orangius periculum subierat, & ductores ordinum pluri: & tandem ab Albano victi, & tota Brabantia eiectione. Vnde Paulus Æmilius dicebat. *Perrarò nimis, bonum Imperatorem, signis collatis decertare, nisi summa necessitudo, aut summa ei occasio data esset.* Certa enim illa alea, igitur alià magis viâ debellandus hostis est: præsertim qui in hostili est terrâ, inter omnia inimica infestaq; , & quem nullæ vrbes accipiunt, nulla mœnia tegunt.

Quarto. Quia differendo pugnam consumuntur victualia

alia, exhauritur ærarium, vastantur prouinciæ, metusq; inicitur militibus, si vel leuiter in superuentibus faciendis fortuna tibi aduersata fuerit. Quapropter stultum putatur, sedendo ac votis debellari credere posse. *Et in tardando*, inquit Xenophon, *sæpè Ducibus etiam optimi apparatus pars aliqua perit*; inò totus, vt in supradicti Valseinij mora inutili connotauimus, qui ad Stralsundam frustra cum numerosissimo exercitu consedebat; contraq; Arnhemium progressus, totam æstatem simili ocio consumpsit.

Quapropter, qui publicum certamen euitare cupiunt, has in contrarium rationes adducunt.

Prima. Quia nimium periculosum, Conflictus etenim publicus duarum, vel trium horarum tantum certamine diffinitur, sed quo peracto, partis eius quæ superata fuerit, spes omnis intercidit. Ideo omnia antè cogitanda sunt, antè tentanda, antè facienda, quàm ad vltimum veniatur abruptum. Sempronius in prælium cum Annibale ruens, magnas temeritatis suæ pænas dedit; cum dispersis enim aliquot ægrè Placentiam fuga euasit. Et Flaminius ad Trasimenum lacum ab eodem Annibale deuictus & occisus fuit, non aliam sanè ob causam, nisi quòd aduentum collegæ non expectasset, & moræ impatiens in aciem descendisset. Cæterum & nunc pleræquæ gentes moræ impatientes sunt, primosq; impetus habent validiores, ac propterea vnico prælio confici bellum volunt: sed falluntur nimium. sicut & Obignius nobilissimus Gallici exercitus Imperator, in Calabria Regni Neapolitani prouincia, qui cum monenti Ludouico Regi, vt bellum traheret, nec vllò modo rem in discrimen mitteret, non auscultasset, in eodem loco, in quo paucis ante annis, memorabili prælio Ferdinandum Regem, & Consaluum Magnum, summa cum laude superarat, turpiter victus & captus fuit. Nec Franciscus I. Hispanicum carcerem euitare potuit, quòd festinanter ad prælium descendit. Nimius illi ardor, vt magni plerumq; ingenij index est, ita, nisi ra-

tionipareat, sæpè infelicitis. Vnde cum Augusto, nihil minus in perfectis Ducibus, quàm festinationem temeritatēq; conuenire arbitror. Nos ad Chotimiam non alia re Turcā comminuimus, nisi mora & superuentibus assiduis præsertim nocturnis, quòd in omnibus actionibus suis, ira eum magis & impetu, quàm consilio regi cognouissemus. Aliter cum tam numeroso exercitu illius Marte aperto configere non erat certe securum nobis, qui vix sextam exercitus illius partem, nostrorum militum numero exæquabamus. Præstat igitur, vt agentem bella ratio ducat, quàm fortuna; quia multa bella impetu valida, per tædia ac moras euanuere. Temerariorum autem Ducum manibus, ceciderat bellicosissima Numantia, ornatissima Corinthus, superba Thebæ, docta Athenæ, sancta Hierusalem, ipsaq; Romani Imperij æmula Carthago, tandem etiam potentissima Roma, eiusque vel filia, vel soror Constantinopolis.

Secunda. Quia superuentibus atque insidijs frangendo hostem, milites tui animantur, accendunturque ad generale præliū & victoriam, tyrones præsertim & qui nunc primum militiæ nomina dederunt. Eapropter interest valde, vt consideret Dux, vtum tyrones an veteres milites habeat: vtum ante breue tempus in expeditionibus fuerint, an annos aliquot in pace durarint: quia pro tyronibus habendi sunt, qui pugnare longo tempore desierunt. Dux igitur priusquam decertare velit, tales milites ad omnia genera exercere debet armorum, & diligenter obseruare quid artis possint habere, quid virium, quemadmodum sibi ipsi consentiant; vtum ad tubarum monita, ad signorum indicia, ad præcepta vel nutum suum promptè & benè obtemperent. Et postquam in omnibus ad plenum fuerint eruditi, ne sic quidem temere occasione captata ad publicam ducendi sunt pugnam, sed ante minoribus prælijs imbuendi, præsertim si aduersarium intelligis potiozem. Quòd si verò adhibito consilio Dux prudens, multis rebus superior hoste suo inuenitur, oportu-
num

num sibi non differat inire conflictum, ut fecit Zolkieuius ad Clussum, insperateq; superueniens è syluis, quatuor milibus Polonorum, octuaginta millia Moscouitarum miraculose planè profligauit; sexq; transmarinorum militum millia, cum Duce eorum Comite de Pontibus, in deditionem accepit. Cauendum autem est, ne Imperator dubitantem, aut formidantem exercitum ad pugnam publicam aliquando producat, ut fecerat Dux Mansfeldius in Liuania, contra Chodkieuicium in aciem prodiens trepidus; ubi turbatis primis aciebus, reliqui suppetias suis nullo modo ferre uoluerunt, qui in subsidijs collocati fuerant.

Tertia. Quia superuentibus consumitur hostilis exercitus, ad ærarium eius exhauritur, præsertim cum numerosum exercitum habet. Quod probare Q. Sertorius volens, qui experimento didicerat se imparem uniuerso Romanorum exercitui, ut barbaros quoque inconsultè pugnam deposcentes doceret, adductis in conspectum duobus equis, eorum præualido alteri, alteri admodum exili, duos admo- uit iuuenes similiter electos, robustum & gracilem. Robustiori imperauit equi exilis uniuersam caudam abrumpere, gracili autem valentioris per singulos pilos vellere: cumq; gracili successisset quod imperatum erat, validissimus cum infirmi equi cauda sine effectum luctaretur. *Naturam*, inquit Sertorius *Romanorum virium per hoc vobis exemplum ostendi, milites, insuperabiles sunt uniuersos aggredienti, eos lacera- bit & carpet, qui per partes attentauerit.* Igitur superuentibus frangendus est hostis, quod etiam Alexander Macedo facere solebat. Cum enim in Bactriana hostis in saltu editiore castra communiuisset, ille seducta parte copiarum, præcepit his quos relinquebat, ut ex more ignes excitarent, speciem- que præberent totius exercitus: ipse per auias regiones circūducta manu, hostem superiore aggressus loco depulit, ac dissipauit. Quod nostra quoque ætate fecerat in Moscouia ad Troiczam Ioannes Sapielha; multiplicatisq; ignibus per

calones, cum hoſtes eum in caſtris eſſe putarent, circumdu-
cto exercitu à tergo eos in vaſit & proſtigauit.

Quarta. Quia ſic communiter omnes boni Duces faci-
unt, cumque potenti & feroce aduerſario, non aperto Mar-
te prælium, in quo eſt commune periculum, ſed ex occulto
ſemper attentant, vt integris ſuis quantum poſſint hoſtes
interimant, certè vel terreant. Cuius rei memor Guſtauis,
nuſquam in Pruſſia Marte aperto pugnavit, ſed ex inſidijs
tantum, & ſuperuentibus varijs. In hoc tamen peccauit,
quod ipſe ſeſe prælio immiſceret, vnde bis quoque vulnera-
tus ſclopo à Polonis fuerat: & tandem in Germania ad Lut-
zam occiſus. Dux autem etiam in ſuperuentibus ex vete-
ri doctrina prælio non ſe immiſceat, vti faciebat Alexander,
militis functus officio, non Ducis: ſed in loco tali verſetur, vt
omnibus ſubſidia dare poſſit, qualiter faciebat Iulius Cæſar
cui non de erat quoque animus manu cum hoſte congregi,
cū neceſſitas ingruere aut premeret, vti fecit in pugna cum
Nerijs, & cum filijs Pompeij. Sed Ducis fungens officio,
prouidebat ne ſuis deeſſet & conſilio, & auxilio, vbi pericu-
lum foret. Hinc primus Antonius dicebat. *Diuiſa ſunt inter
exercitum Ducesq; munia: militibus cupidinem pugnandi conue-
nire: Duces prouidendo, conſultando, cunctatione ſæpius, quàm
temeritate prodeſſe.* Et Scipio laudatur in oppugnatione Car-
thaginis, quòd non iret temere ad oppugnandam urbem
ipſe, nec adſcenderet murum, vti Alexander Magnus, vt
vulneraretur, (de quo Curtius. *Quoties illum fortuna à mor-
te reuocauit? quoties temere in pericula vectum, perpetua feli-
citate protexit?*) ſed ita milites autoritate, & ſubſidijs benè
diſpoſitis ad præliandum accendebat, vt Liuius de illo ſcri-
ptum reliquerit. *Quod plurimum ad accendendos militum ani-
mos intererat, teſtis ſpectatorq; virtutis atque ignauie cuiuſque
aderat.* Ergo cum ex inſidijs & ſuperuentibus pugnat Dux
ipſe loco ſecuro ſtet, & non ſe immiſceat prælio. Prælium
autem qualiter committere debeat, ſit.

Conclu-

Conclusio. Pugnandum, cum bonis Dijs, aperto Marte, si in arcto restuæ sunt, dum non com meatum, non supplementum, non pecuniam habeas: vel cum pestis castra tua inuasit: ne igitur miles contagio pereat, melius est rem in discrimen mitti: idq; pro re, & temporibus. *In rebus autem asperis,* inquit scriptor rerum Romanarum, *& tenax spe, fortissima quæque consilia tutissima sunt.* Aut si meritò præsumis victoriam, & tuam partem palam potiore esse videas: de quo tamen seriò, & nihil tibi blandiens, cognosce. Prudenter Doctor militaris. *Dux vigilans, sobrius, prudens, tanquam de civili causa inter partes indicaturus, adhibito consilio, de suis & aduersarij copijs iudicet. Et si multis rebus superior inuenitur, opportunum sibi ne differat conflictum.* Alias noxiâ semper pugna, præsertim quando nulla te cogat res, committere se fortunæ. Et isti qui magis animis quàm viribus freti, ad certamen descendunt, festinatum temerè prælium, pari formidine deserunt. Priusquam itaque pugnam ineas, vtile est videre, quando hostis imprudentia ruat, & (quod loco sapientiæ est) quando opportunum se præbet. Vnde Thucydides. *Quicumque peccata aduersariorum optimè videt, & simul pro sua copia eos aggreditur, non tamen ex aperto, & quasi acie palam instructa, quam ex vso præsentis, plerumque huic res succedet.* Tempora igitur observa; quia si in occasionis momento, cuius præteruolat opportunitas, cunctatus paullum fueris, nec quicquam mox omisam querare: sed imparatis, cibum capientibus, dormientibus, in itinere lassis, equos suos pascentibus, ac nihil tale suspicantibus, superuenias. *Necessitas etenim ante rationem est,* inquit Curtius, *maximè in bello, quod rarò permittit tempora legere. Tu inuigila.*



QVÆSTIO XVI.

Virum liceat uti Stratagematis?

EQuidem multis simulationum inuolucris tegere, & quasi velis obtendere homines sciunt adgenitæ prauitatis indolem: lingua aliud sæpè loquitur, aliud tacitò clausum pectore reconditur. Vnde vix est, vt prouidere sibi aliquis diligenter satis possit, quò minus fallatur: & quò sunt potentiores Principes, eò maior est insidijs, & improbitati locus. Qua sanè improbitate & fraude, quam honesto vocabulo Stratagema, seu callidum consilium viri militares vocant, liceatne contra hostes patriæ in bellis uti, vel non? iuremeritò disquiritur, quia, vt Cicero inquit. *Tacita magis & occulta mimicitia timenda sunt, quàm indicta & aperta.* Et qui negant, dicunt.

Primo. Quia, veri militis est, inquit Tacitus, non fraude, neque occultis, sed palam & armatum, hostes suos ulcisci. Vnde Euripides.

*Vir nemo mentis alta clanculum velit
Occidere hostem.*

Quapropter Achæi, ab illâ ipsâ fallace Græcia, narrante & laudante Polybio, intantum abhorrebant à machinationibus istis & struendis dolis, vt nec hostes suos vellent per fraudem vincere, Cretenses; neque splendidam, neque firmam vllam victoriam, nisi quis palam & ex condigno depugnans, animos quoque deiecisset aduersariorum. Et ex Romanis quoque, medicum venale Pyrrhi caput offerentem, ad eum remisit Curius, quia communis exempli interesse iudicabat, ne tale quid admitteretur. Tiberius quoque Adgandestrio Cattorum Principi, Armenij mortem si venenum mitteretur, promittenti respondit. *Non fraude, neque occultis, sed palam & armatum populum Romanum hostes suos*
ulci-

ulcisci, Tacitus refert. Alexander Magnus, latrunculorum & furum solertiam esse dicebat, noctu & ex insidijs hostem adoriri. Sed & Moscus viciniore ætate, Stephano Regi, post expugnatam Socolam, per epistolam exprobrabat, quòd globis ignitis, more ante incognito, ad comburendas munitiones ipsius ex lignis factas vteretur; artificioq; quodam contra se, non virtute atque acie niteretur.

Secundo. Quia stratagemata parum efficacia sunt ad plenam victoriam: & qui dolo succubuerunt, facilè iterum insurgunt, non virtute, sed occasione & arte Ducis victos se rati. Iam verò.

nulla est victoria maior.

Quàm quæ confessos animo quoque subingat hostes.

Tertio. Quia sunt contra fidem: vnde Florus. *Eam vir sanctus & sapiens sciet verum esse victoriam, quæ salua fide, & integrâ dignitate parabitur.* Et hanc ob causam Sigismundus III. offerenti cuidam ex Pomeranis operam suam, quod viuum sisteret ei Gustauum Varsouiæ quem domi tunc suæ esse aiebat, si præmij loco tres arces perpetuò haberet, cum suis territorijs, Sluchouiam, Rogosnam, atque Puckam; responsum nullum dedit, quod tanta fraude pollui, contra suam dignitatem putaret. Quare & alterum meritò reiecit, nec aspectu suo dignatus est, qui eundem Gustauum sua manu occisurum pollicebatur, si sceleris precium liberis ipsius certa prouisio fieret. Pulchrè igitur Thucidydes. Fraus cum in omnibus foeda est, tum verò in his qui maiore sunt dignitate præditi foedior est, quàm aperta violentia.

Cæterum, quia magni viri, id vitio ducunt, si quid amittant, non si quid astu doloue obtineant, propterea hæc vafra fragmenta licitè fieri putant.

Primo. Quia nihil turpe est, quòd inimico detrimentum afferat: summamq; publicæ rei, quibuscunque modis saluam præstare licet; modò sanctum illud Fidei numen nullo scelere violetur. *Landanda*, inquit Brasidas, & vir, & Dux bonus

bonus, eiufmodi decipula, per quæ hoſtes maximè decipiuntur, & animi plurimum iuuantur. Nam teſte D. Auguſtino, quæſt: 10. in Ioſue. cum bellum iuſtum ſuſcipitur, vt apertè quis pugnet, aut ex inſidijs, nihil ad Iuſtitiam intereſt.

Secundo. Quia non naturæ tantùm, ſed & gentium iure licet hoſtem omni modo, omni via. & vbiuis locorum lædere. Vnde tritum illud Póetæ.

dolus an virtus quis in hoſte requirat.

Qua ratione ductus, Pipinus Caroli Magni pater, traiecto Rheno aduerſarium in cubiculo depræhenſum interfe- cit. Mutiusq; Scæuola olim Porſenam Regem Hetruſco- rum per inſidias in caſtris ipſius aggreſſus fuerat, ſed non agnitum, loco Regis purpuratum ictu confecerat. Et The- odotus Aetolus idem in Ptolomæum Ægypti Regem tenta- uit, ſed turpi certè animo. Qui enim talibus vitur impia bella gerit, & ad internecionem perſequendus eſt, non vt iuſtus hoſtis, ſed vt percuffor veneficus. Quamuis non de- ſint nonnulli, qui putant licitè immitti poſſe percuffores in hoſtem, ſed non ſubditos illius, aut milites, aut eos, qui vt ſupplices, aut aduenæ, aut transfugæ ſunt recepti. Meo attamen iudicio, id minimè probandum putem. Sit inſidijs & ſtratagematibus locus, ſed abſit perfidia, quam & in man- dante turpem ac illicitam eſſe puto, & in exſequentem.

Tertio. Quia mos ab antiquo ſic inoleuit; nec ſcio gen- tem quæ in bellis aliquo dolo non vtatur in hoſtem. Vnde Spartani Græcorum omnium pugnaciſſimi digniorem ma- gisq; conuenientem homini cenſebant actionem, ratione & mente inſtitutam, quàm illam per vim aut robur. Idem ſen- tiebant & Romani publicæ fidei tenaciſſimi cuſtodes, qui ſtratagemata quendam bonum dolum dicebant, & pro ſo- lertia hoc nomen accipiebant: maximè ſi aduerſus hoſtem latronémue quis machinaretur.

Concluſio. Si iuſta ſit belli cauſa, iuſti etiam ſunt hi doli, quos vulgò ſtratagemata vocamus: ſi iniuſta, etiam has
technas

technas improbas pronuncio. Pulchrè ac prudenter Agesilaus. *Fœderatum iniuste fallere, impium; at hostes: non solum iustum, sed etiam suave & fructuosum est.* Quandoquidem strategemata sit quoddam genus insidiarum in hostem publicū, quē perdere mos fasque sit omni modo & via; cum & Christiana sanctio id non vetet. Quod autem Xenophon Ducē militum insidiatorem esse debere ait, & suæ mentis occultatorem, & fraudulentum, & furem, & veteratorem & raptorem: id sano sensu accipiendum est, ne quid scilicet in datam fidem peccetur, & dignitas conseruetur in integro. Hoc est, ne clam immitatur percussor, aut ematur insidiator qui veneno tollat; tum ne quis contra fœdera aut pacta fraudem prober aut struat, vti fecisse legimus Q. Fabium Labeonem, quem ferunt, cum à Rege Antiocho, quem bello superauerat, ex fœdere icto dimidiam partem, nauium accipere deberet, medias omnes secuisse, vt eum tota classe priuaret. Non placet eiusmodi vaframentum. Nam quemadmodum mulieres, quæ fuco faciem illinunt, quum ad solem accesserunt, earum deformitas sit ita conspicua, vt cogantur se occultare: sic deceptores isti propter suas simulationes, magna sunt apud homines vonos in existimatione & admiratione, ab omniq; vitio & culpa alieni esse videtur, cū aduersariū annihilāt. Sed tādē illorū hypocrisin deridet Deus, spernuntq; prudentes, ita vt omni illa specie & forma, ac veluti larua externa nudentur, & illorū fraudulentia, & simulatio in verbis planè deficiat. A laude itaq; potius dolus militaris abesse videtur, quàm à culpa, quia re ipsa nihil vtilius in bello dolis.

Q V Æ S T I O X V I I .

*Vtrum consultius sit domi hostem expectare,
an verò ei occurrere.*

Vtile quidem est, aliquid semper in hostes moliri ac tentare, inquiunt Politici, sed ab illis quoque cauere pla-

ne necessarium est. Nec solum Imperator inuadendis hostium finibus auide imminere debet, sed prouide suos etiam, ne vsurpantur, occludere; quod non curatur apud nos Polonos & vicinos nostros Turcas atque Scythas. Iure meritò igitur quærimus, vtrum in tali vicinia debeamus expectare barbaros vim nobis toties solitos inferre, an verò occurrere eis, & præuenire illos bello. Et qui hoc postremum suadent, dicunt.

Primo. Quia occurrēdo subditi tui domi quiete fruētur: tu autē in eis agro bellū gerēdo, vastas & spoliās hostem, adq; inopiā redigis aduersariū tuū. Tartarorū incursiones nos docent, nā illi Rursiæ prouincias ingressi, nostro commeatu viuunt, villas incēdunt, agros vastāt; quos deinde nos insequēdo, quod residuum ab illorum populatione manet, nostro milite consumim⁹. Et sic in nihilum ipsimet prouincias nostras redigimus. Quod si vel semel cū exercitu disciplinato Oczakouiam versus aut Bialogrodum progredieremur, metum ipsis, vastitatem & inopiam intulissemus; nostros verò miseros Roxolanos conseruaremus in integro.

Secundo. Quia dum in agro hostili tributa conferent vberiora, dum alta pace domi fruuntur, nusquam serere aut arare impediti, vel à tuis militibus, vel ab hoste. Sic modo bello in Germania tot annis durante Imperator cauet, ne prouinciæ illius hæreditariæ, puta Styria, Carinthia, Tyrolis, Caruiola, Croatia & Austria, vel ab hostibus, vel à milite ipsius interturbentur, vnde certas collectas & in bellum, & ad mensam suam habere solet.

Tertio. Quia miles dū ex præda viuit, frugalior in castris esse solet, sciens in hostico non semper frumenta posse inueniri: quæ in patria parari sibi scit vel à Ducibus belli, vel vi à prouincialibus posse extorqueri, Ita nostri dum in Moscouia bella gerunt, quæ secum curribus portant parcissimè in familiam, calones & lixas suos dispensant: dum verò in patria præliantur, quæque obuiant, rapiunt, auferunt, consumunt.

munt. experimento bellum Prussicum, Liuonicum, & Seruile cum Zaporosensibus, vbi tam fertiles prouinciæ, quæ multos transmarinos populos suo frumento alunt, vnico exercitui nostro alimenta suppeditare nullo modo potuerant.

Quarto. Quia magis pertinet ad famam occurrere hosti, quam expectare eum domi. Semperq; Princeps aut eius copiarum Dux maiorem acquireret gloriam, hostem inuadendo, oppugnando, fugandoue in eius prouincia, quam defendendo oppida sua & agrum. Ideo Chodkieuicius adueniente Osmano Turcarum Imperatore, non expectandum ratus eum in Polonia, sed obuiam progressus in eius prouincia Valachia posuit castra, ne vilis aut meticulosus appareret.

Quinto. Quia fortiores esse videntur, qui prouocare non dubitant: quia *plus animi est*, vt inquit Thucidides, *inferenti periculum, quam propulsanti*. Sæpeq; obseruatum est, hostes qui dum alios aggrediuntur, maximè terribiles sunt; si domi oppugnentur, viles plerumque esse solent. Agathocles Syracusis obsessus, cum se neque viribus parem, neque ad obsequionem ferendam instructum videret, *gnarus*, inquit Iustinus, *aliter domi, aliter foris bella tractari: Domi ea sola auxilia esse, quæ patria vires subministrent; foris hostem etiam suis viribus vinci deficientibus socijs, & odio diuturni imperij externa auxilia circumspicientibus*; Feliciter bella, quæ domi fere non poterat, ad hostes transtulit, & in ipsa Africa Carthaginenses inuasit. Romanos quoque alibi feroces, in Italia imbecilles esse Annibal & experimento ipse didicerat, & apud Antiochum iudicauit.

At in contrarium, maior Ducum cordatiorum pars hostium impressionem potius expectat, quam quod ipsi cum impetu in hostem excurrant: siquidem furor ille non difficulter ab hominibus cordatis & ad omnia paratis sustinetur; vbi verò semel illum sustinueris, faciliè in timiditatem abit. Sic Fabius cum Samnitibus atque Gallis egit, victo-

riaq; potitus est, cum Decius ipsius collega occubisset. Et qui huius opinionis sunt, pro fundamento has rationes habent.

Prima. Quia securius est expectare, præsertim si hostis aduenit potentior, qui vnâ oppugnando ciuitatem, totam consumet suam potentiam; transeundoq; montes, sylvas, paludes ac fluuios magnos, amittet magnam partem militum, pecudum, commeatus, & impedimentorum, cū prohibebitur vbique à tuis. *Quod si Hungari fecissent Turca ad ipsos toties veniente, inquit Bonfinius, haud dubie pristinae existimationis iacturam non fecissent, neque hosti ad occupandas ceteriores prouincias viam aperuissent, nec quod maximum est, in tam acerbam seruitutis conditionem ipsi iam incidissent.*

Secunda. Quia primum Politicorum præceptum est, sua seruare atque ideo Imperatorem prudentem, non tam de nouis oppidis occupandis, quàm de occupatis firmandis ac retinendis sollicitum esse oportere, iuxta illud Flori. *Plus est prouinciam retinere. quàm facere.* Si igitur prouinciæ tuæ aditus diffiçiles sint; aut ipsa, vel arte, vel natura satis munita, hostem plerumq; tutius expectabis. Crassus in Parthiæ deserta irrumpens, sit penè confectus antequam victus fuit. Nec Dario Histaspis filio, aut Lysimacho Pergami Regi benè celsit in Scythiam expeditio. Prout nec Turcæ in Moscuiam per campos desertos tudenti, quos Taranouius Augusti Regis Poloniæ legatus sua persuasione eo auerterat, & exercitum ipsorum deduxerat, vt patriam suam in pace cōseruaret. Præstat igitur hosti fortissimam naturam, quàm imbecilles homines obijcere: maximè si ab vno prælio rerū tuarum summa & salus dependeat. Domi enim pugnam detrectare potes, foris vix potes. Alfonsus Ferdinandi Regis Neapolitani filius, dum supremum patris morituri consilium negligens, Carolum Franciæ Regem non expectat, sed extra imperij sui limites spes suas omnes vni conflictui committit, & exercitu fuit priuatus, & Regno.

Tertia.

Tertia. Quia si exercitus tuus morbo aut prælio minuatur, facile eum domi, alio militæ & comœatu instrui poteris, foris verò iam non item. Quid si à tergo præclusus fueris? quid si in limite tuo nullas munitiones habueris? aut subditos tuos nouitatibus studere videbis? tua verò rabies obsidionum tædio interim ac impetus fatigabitur & confestim nesciet.

Quarta. Quia numerofo hostium exercitui, vel etiam victorijs insolenti, secundum situm loci, paucas tantum cohortes tuas, & sæpè nouas poteris opponere. vt faciunt Heluetij, Hollandiq; hoste in suas prouincias incurrente.

Quinta. Quia vastatis omnibus locis è quibus comœatum sperare potest inimicus, fame eum debellabis, tuis autem sufficientem comœatum præparabis, vt fecerat Stephanus Daciæ Regulus Baiazete II. in prouinciam ipsius numerofo cū exercitu veniente, quem fame deinceps & assiduis Moldauorum infestationibus amiserat, ingloriusq; Constantinopolim protinus redierat.

Conclusio. Si hostis potentia præualet, satius est bellum gerere defensuum; maximè si quis auxilio omni externo destituatur. Quod si vires sunt æquales, offensuum gerere præstat, & venienti occurrere. Si verò tua prouincia nec arte, nec natura munita est, aut tempestiuè muniri potest, honesta pace certissimum exitium moneo præueniendum. Verùm si satis tibi virium sit, & hosti domesticis discordijs diuiso ægrè pareant subditi, vel is alibi fortè occupetur, aut ad vim repellendam sit imparatus, teq; non suspicetur inuasurum, audacter inuade. Sæpè enim aliquos terrore magis expugnamus, quàm armis. Ita Augustus Rex Liuonienses Crucigeros & discordes & imparatos inuasit, Albertus Lascus, Valachos, Solimanus Rhodios, Amurathes II. Melitenses, Batazeret Peleponesios, alijq; alios.

Hoc etiam obseruet, qui prouinciam aliquam inuadit, vt nihil à tergo relinquat hostile aut impacatum. Metuen-

dum enim ne sic intercludatur, ut si velit, redire non liceat, aut saltem frumento commeatuq; prohibeatur, sine quo exercitus retineri non potest: ut acciderat Gulielmo Auria-
co, cum Mosam traicienti, omnem commeatum interce-
pisset Dux Albanus. Et nuper ad Lauanium, gallis comme-
atum omnem prohibuere Croatæ atque Poloni, priusquam
reliqui exercitus Cæsarei cum Iacobe Picolominæo super-
uenissent.

QVÆSTIO XVIII.

Utum munitiones extruere sit necesse?

NUm præstet soli virtuti bellicæ inniti, an & præterea
ciuitates munitas habere, quæritur, eò quòd nullum
tam magnum aut potens imperium est, quod vel subdito-
rum rebellionem, vel vicinorum suspicionem non extime-
at. Ideò munitiones fabricare necessum suadent istæ ra-
tiones.

Prima. Quia indomitos subditos a fræno tenent. Sic
Hispanus Antuerpiam, Mediolanum & Neapolim, ut alias
veteris & Noui orbis eius possessiones omittam, munitio-
num firmitate retinent, quod iam pridem perdidisset, toties
subditis etiam in arces & munitiones illius impetum facien-
tibus, præcipuè in orbe Neapolitana, ubi quindecim diebus
pugna durauit inter Hispanos & naturales, qui tamen regia
præsidia ob firmitatem munitionum nullo modo eicere
potuerunt.

Secunda. Quia vicinos Principes à bello faciendo deter-
rent: Ita ex Insubria Iberi venetos aggredi non audent, quod
Vrti, Crema, Brixia, Pescara, aliæq; fortes munitiones co-
natus ipsorum impediunt. Similiter & Turca Adriaticum
finem occupare nequit, quòd inexpugnabiles eorundem
Venetorum terra & mari munitiones habeant, Corcyram,
Zacin-

Zacyntum, Rhetimo, Candiam, Caneam, Caput Istriæ Pal-
mam, aliasq; inexpugnabiles arces ac ciuitates in Dalmatia.

Tertia. Quia hostem intrare in meditullium Regni non
permittunt: quia primùm politicorum præceptum est, ne à
tergò Duces hostem munitasq; vrbes relinquant.

Quarta. Quia consumant vires aduersarij: priusquam
enim vnum locum munitum expugnabit, & comneatum
multum, & pecuniam multam, & militem consumet.

Quinta. Quia securè conseruant res à bello à te compa-
ratas. Ita Hispanus; Ita Bataui, Ita omnes nunc & olimbel-
latores.

Sexta. Quia subditi tui exercentur in armis custodien-
do munitiones; rarò enim aliquis arces fortes & firmas cõ-
mittit extraneis custodiendas; præter tyrannos qui subditis
suis non fidunt.

Septima. Quia paucissimis militibus potentissimos ad-
uersarios debilitabis. Exemplo Ostenda quam quingenti
Bataui propugnabant, quadraginta verò millia ad minus to-
to triennio oppugnabant.

Octaua. Quia pauperioribus è subditis tuis, non dabitur
occafio latrocinandi, cum locum militiæ honestum inter
præfidiarios habere poterunt.

Nona. Quia affecurabis transitus omnes viarum à la-
trocinij: nemo enim per sylvas vicinas, aut campos deser-
tos spoliare transeuntes audebit, cum militem paratum, qui
eum cœerceat (vt faciunt Veneti & Pontifices Romani, qui
ob id ipsum leuiiores vbique equites alunt) penes munitiones
esse sciet.

Licet igitur nunc Persæ præstent equitatu, imo iam &
peditatu, quem antea nusquam habebant in vsu, Turcas nihi-
lominus, quos acie toties fundunt Armenia, Media, atque
Natolia eijcere nullatenus possunt, quòd hi excitatis mu-
nitionibus, quas antea diruere solebant, firmiter prouincias
illas possideant. Et licet Babyloniam proditione habitato-
rum

rum perdiderint, Taurim nihilominus vltra Babylonem, cum toto suo territorio, securè & pacificè possident, ex quo Ismaeli Sophio ante centum & viginti annos eripuerunt. quòd eam & forti munitione firmauerint, & gentis suæ Mulmanicæ validam coloniam eò deduxerint.

Quod autem non expediat extruere munitiones, propugnacula vrbium, & arces, negligentiores populi rerumq; suarum improuidi Principes dicunt.

It *Primo.* Quia sumptus ingens est fabricare munitiones; maior autem conseruare eas. Ac propterea Pontifices portum Ostiensem, cui olim in orbe par non erat, prodigiosum Romanorum opus Turcarum metu diruerunt, viribus suis diffidentes. Quod vrbis quidem opes imminuit, sed auxit securitatem. Nunc attamen mens est alia Urbano. VIII.

Secundo. Quia miles dissipatus propter defensionem munitionum, vires exercitus distrahit & attenuat, vt non possis deinde data occasione campo aperto configere. Et hanc ob causam Ioannes Austriacus, cum non dosset omnibus oppidis auxilia submittere, crescentibus copijs ordinum Confoederati Belgij, passimq; vrbes & munitiones occupantibus, ne distractis copijs vires suas extenuaret, satius habuit arces aliquot humi deponere, oppidaq; deserere, ac reuocatis inde præfidiarijs vnum in locum exercitum contrahere, quo viribus hostium possit securius resistere.

Tertio. Quia traditæ hostibus per proditores difficulter recuperantur. Ita nos expugnationibus vrbium non assueti, difficulter Suecos, Liuania eieceramus sub Carolo Sudermano. sub Gustavo verò nequaquam omnino, tam è Prussia, quàm è Liuania, nisi conditionibus pacis.

Quarto. Quia hostis capto vnico loco forti, toti iam provinciae dominabitur, & grauis erit nobis. Ita Gustauus capta proditorum opera Elbinga ciuitate minitissima, in reliquam Prussiam vires suas exeruerat.

Quinto. Quia languere videntur ciuium animi securitati mœ-

ti mœnium innisi, vt videre est apud Moscouitas, qui acie publica nusquam decertare audent, sed mœnibus tantum, inclusi res suas tuentur, qui antea diuersos vicinos bello aggrediebantur audacissimè. Idem legimus de Chinenfibus qui tot Reges remotè etiam à se positos armis sibi subiugauerant: at postquam à Scythis Cataiensibus muro sese præcluserunt, frequentibusq; munitionibus à Rege Siam & Cocincinæ, statim viles facti sunt animo, nec Iaponensibus per mare ad se venientibus hætenus resistere possunt.

Sexto. Quia ingens apparatus pro earum defensione requiritur; machinarum, commeatus, pulueris, hominum. quibus possis securè bellum aperto Marte peragere, & hosti tua metuendus esse, quæ illius vano timore in arces extruendas impendis.

Septimo. Quia complures populi florentes, hodiedum mœnibus non delectantur, Brittanorumq; Heluetiorum, Turcarum, Persarum, Indorum, omniumq; quotquot in Asia sunt Scytharum ciuitates, non sunt muris fortibus cinctæ. Sed olim Agesilaus quæsitus, cur Spartani urbem suam muris non cinxissent? respondit, eam esse pectoribus ciuium fortificatam. Quod etiam nunc vsurpant sibi Poloni, nullamq; prorsus munitionem habent quæ possit, & situ & arte munita dici. Quamuis nonnulli Belgicis peregrinationibus excitati cæperint nunc castella sua munire, curiositatis potius & elegantiae causa, quàm fortificationis.

Octauo. Quia plerunque munitiones subditis dant occasionem ad rebellandum suis Principibus. Sic ciuitas Gedanensis sæpius confisa suis mœnibus, audet resistere Regibus Poloniæ, prout & omnes ciuitates Imperiales, liberæ nuncupatæ, Romanorum Imperatori, & Bataui Hispaniarum Regi. Geneva Duci Sabaudiae, Rupellaq; olim Regibus Galliae. Meritò itaque arces & munimenta vocantur, à doctissimo viro Christophoro Forstnero, magnatum ambitionis aggeres. Plerumque enim artium rectores domi-

niue à sceptris deficiunt; plerique motus ex his claustris erumpunt, aut in illa tutos habent receptus, inuitante ad peccandum tot munimentis fossisq; superba rebellandi securitate. Vnde Henricus II. Angliæ Rex, omnes Procerum arces mœnibus nudauit. Quod & Græci dirutis suspectarum urbium muris, & Romani quoque facere soliti sunt. Catoq; ille Cenforius, Celtiberos, id est robur Hispaniæ, aliquot prælijs fregit, & insigni planè memorandoq; Stratagemate illos exarmauit. Quadringentis enim simul ciuitatibus, per missos ad singulas nuncios, vt omnes statò die muros suos demolirentur, iniunxit. Vnde, cum non alijs etiam sed sibi tantùm id præcipi singulæ crederent, ne si in mora essent, non à Romanis tantùm, sed etiam à vicinis, ac socijs ad id cogerentur, maluerunt parere. Nunc quoque Turcæ in Valachia, Moldauia & partibus sibi subiectis Transyluaniae atque Bulgariæ, Bosniæ & Sclauoniæ, munitiones erigere omninò prohibent. Sed & Regnum Neapolitanum olim castellorum turriumq; frequenti supercilio tumebat; erantq; Optimates tantifactione & viribus, vt, quod plerunque infelix potentiae genus est, Reges terrerent. Et nunquam penè sine motu illa alioquin felicissima regio fuit: deiecti nunc Reges, nunc Proceres: donec arcibus plerisque euersis Magnatum quoque robur varia Regum arte suppressum est.

Nono. Quia dant Principibus occasionem ad tyrannidem. Ita Castruccius Castracanis arce Lucensi occupata dominabatur pro libitu liberis ciuibus. Ita Canis Scaliger Veronam. Eccelinus Patauium, Bentiuolus Bononiam, alijq; Reguli alias Italiæ vrbes, ab Imperatoribus Præfecti tantùm ad tempus dati. Ex his igitur & contrarijs rationibus sequitur.

Conclusio. Tutius est munitiones exstruere, & mœnia adiuncta habere, quibus & impetus hostium improuisus sistatur, & mora adeo iniiciatur tardius in recessus regionum interiores penetrandi. Extruendæ autem sunt, in ijs locis præci-

præcipuè, per quæ regnum tuum posset inimicus inuadere; & ad quæ tempore periculi subditi tui possint habere suum refugium; hoc est in ipsis confinijs statim, & longè ab ipso centro Imperij, quo scilicet aduersarius remoretur vti diximus, donec te pares ad resistendum. Sic censetur esse Melita Insula valde opportunè fortificata, respectu Siciliae & Neapolis, Corcyra verò respectu Venetiarum; Rhodis respectu Peloponesi; Asouia, Oczakouia, Moncastrum, Kilia, respectu Tauricae & Byzantij. Quod si adhuc in ipso hostili solo possis eiusmodi munitionem habere, eo tibi melius foret: quia aduersarius veniens eam expugnare, fructus prouinciæ suæ consumet, tu verò cum tuis subditis remotus eris à bello. Et hoc sensu Catholicus Rex, multas in Indijs tam Orientalibus, quàm occidentalibus exstruxit munitiones: & Mauros infestare Hispanias solitos in suo officio continere volens, exstruxit in Africa munitiones firmissimas. Arsilam, Tangerim, Sittam, Pegnon, Melilam, & Oranum.

Paucæ autem sint eiusmodi munitiones, ne vires tuæ dissipentur; & situ loci naturali, non tantum arte benè munitæ, vt eò melius eas tueri possis, & subsidia recentia submittere. Nisi etenim tempore necessitatis poteris tuis præfidiarijs subuenire, ob loci remotam aut incommodam distantiam, munitiones tuæ nil aliud erunt, nisi sepulchrum militum tuorum, etiamsi fortissimi fuerint. Quapropter maximè laudantur munitiones maritimæ, quia ipsis data occasione, vel hoste inspectante subsidia dari poterunt. Quod & in lacubus magnis fieri potest, fuitq; factum Constantiæ, cum eam urbem Gustauus Hornius grauissime oppugnaret.

Cum autem quæritur, quibus potissimum modis facilius in officio retineri prouincia bello quæsitâ possit? Alij dicunt arces exstrui necesse; alij colonias deduci, aut arma subditis eripi, aut simul omnia malunt. Ego vt huic quæsito respondeam, dico necesse esse, vt prouincialium naturam.

Princeps consideret. Nam aliæ gentes sunt, quæ, nisi stricto planè imperio cœrceantur, iugum excutiunt. Aliæ, quas cum nullæ arces aut coloniæ domare possunt, domat clementia & moderatio rectoris. Ita à Pœnis Hispanos alienauit superba nimis Asdrubalis dominatio. Italos & Siculos à Gallis licentiosa victoria. E diuerso, Alphonsus Arragonum Rex, parcendo omnibus & etiam inimicissimis bona omnia & honores restituendo, occupatam armata vi, cum vniuerso Regno Neapolim sibi confirmauit. Cum igitur multi populi, non tam libertatem ament, quàm oderint seruitutem, multi quoque effrenem planè licentiam ambient, quis eos dissimiliter regendos esse non videt? Hos ergo meo iudicio arcibus, præsidijs, & quibuscunque tandem modis arctius coerceri: illos verò mitius regi oportet; & si sic visum fuerit, colonijs, quæ veræ sedes seruitutis sunt, quamuis tales esse non videantur, in officio retineri. Externis enim illæ constant, qui indigenas primùm conspirare non sinunt: & postea per nuptias inuicem & familiaritatem coniuncti id obtinent, vt à communis domini obsequio non temere discedant.

Non interim hic cupio laudare Spartanos, qui virtutem ciuium pro mœnibus esse voluerunt; quia quotidiana nos experientia docet, minori cum periculo & damno tormentorum vim munitiones excipere, quàm homines. Et ideo vel arte, vel natura, vel simul vtraque munitas ciuitates cæteris in bello præferendas neminem puto dubitare. Hoc tantùm volo, non adeo aut naturæ loci, aut arti fidendum esse, vt securitatem generent, si vigilantia deerit. Nemo enim clarius opprimitur, quàm qui nihil timet. Vnde Iauerinum Hungariæ firmissimum præsidium à quatuor millibus Germanorum Turcis in Pannonia deditum, relictis trecentis tormentis bellicis & abundante comœatu; idq; inspiciente Imperatoris Germanorum fratre, & toto cum exercitu Christiano ad soluendam obsidionem properante,

non

non debet dissuadere constructionem munitiōnū, quæ defensionis melioris causa adinuentæ sunt; cum id non militū sed Ducis culpa, & paucorum ignauia seu malitia fuerit factum. Prout & Galli Falesiorum oppidum patrū memoria, hoste vix conspecto, aut diruto muro statim dediderūt, non tamen hac sua turpi ignauia bellorum Duces in posterum à muniendis vrbibus deterruerunt.

Q V Æ S T I O X I X .

Vtrum munitiones in montibus positæ sint meliores ijs, quæ sunt sitæ in plano?

IN primis quæritur inter Politicos, ex qua potissimū materia, mœnia & propugnacula excitari debeant: postea quali in loco, vtrum in montibus an verò in planicie? Quo ad materiam itaque. qui lapidea propugnacula habere malunt, aiunt, ea, si tormentis forte resistendo non tantum valeant quantum terrea cedendo; contra cuniculos certè & ignes esse potiora. Qui terrea volunt, dicunt minori ea sūptu ac facilius, non extrui, aut refici tantum, sed etiam contra diuersos offendendi modos, diuersimode mutari. Ligneæ verò quibus maximè vtuntur Moscouitæ combustioni subiacent; licet ad repentinos incurfus sustinendos, & faciliè extruantur, & non faciliè cedant ictibus tormentorum, præsertim ex roboribus firmis compacta, & terra, lapidibusq; infarcta. Ego meliora putarem esse terrea lapidibus munita, vti communis nunc fert mos omnium Europæorum. Sed quali in loco facta. qui in montibus volunt, dicunt.

Primo. Quia difficulter ad arcem in monte positam, ad oppugnandum eam acceditur: partim ob asperitatem loci, partim ob demissas desuper trabes, lapides, globos diuersaq; missilia: præsertim vbi cauæ & præruptæ sunt petrae seu saxa.

Secundo. Quia communissime aquas perennes in montibus habere solent, quæ adimi nullo modo possunt. Vnde fame difficillimè eiusmodi munitiones expugnantur respectu potus.

Tertio. Quia aërem saluberrimum habent unde morbi ac infirmitates præfidiarios infestare non poterunt, quòd maximum inclusis adiumentum adfert. Nam in plano ut plurimum crassus aër ex aquis aut fætidus ex paludibus, solet esse inclusis nociuus.

Quarto. Quia à longe hostes arcent, & desuper omnia videre possunt, quæ hostis molitur. Nec possunt cuniculis subruì, præsertim si in rupibus sunt positæ.

Quinto. Quia plures requirit ad obsidendum homines, quam illa, quæ est in planicie posita. Difficulterq; ad eam machinæ & tormenta admoventur, partim ob saltus profundos, partim ob asperitatem saxorum.

Sexto. Quia minori sumptu extruitur munitio in monte, adiuuante laboratores ipsa natura, quæ & lapides in monte generat & fontes; & præcipitia saxorum & profunditates vallium vliginosarum habet; quæ omnia fortio rem munitio nem faciunt. Vnde pluribus in locis simul oppugnari non poterit, quemadmodum accidit munitionibus in plano sitis, quæ propterea multis necesse habent propugnaculis, & magno sumptu ad excitandos montes, qui dominantur planicie. Alias enim pauciori milite obsideri poterunt.

In plano autem munitiones laudantur hæc ob causas.

Primo. Quia in planicie potest extrui munitio in ea forma quæ tibi placuerit; in monte verò non item, sed tantum secundum loci congruitatem.

Secundo. Quia facillimè excursions obfessi possunt facere in obsidentes in plano: non item in montibus, propter difficilem receptum ob asperitatem saxorum.

Tertio. Quia facilè aquam habere possunt, siue exfluvio, siue ex fonte, siue ex puteo; in montibus autem difficul-

aquæ haberi possunt, præsertim in rupibus præcisis.

Quarto. Quia difficilior est in plano ad expugnandum, quàm, in monte, vbi tota munitio exposita est ictibus globorum, tanquam scopus aliquis, hosti verò ad radicem montis accedenti nullum nocumentum esse potest.

Quinto. Quia muri concussi, haud facilè possunt reparari, saxis durissimis in montibus existentibus; in plano autem muris corruentibus, & agger nouus & fossa potest excitari, pro rei exigentia.

Sexto. Quia in plano facilè potest inclusis, præsertim cum ad aquas positæ sunt, succurri nouis subsidijs, & conmeatu. In montibus autem ob asperitatem saxorum, difficilè & currus & animalia accedere possunt. Quapropter utrinque rationibus consideratis, sequitur.

Conclusio. Si saxum montes vicinos qui sibi nocere possent non habent, & locum ad muniendum satis commodum capit, aquisq; perennibus abundat, tum munitio talis præstat omnibus alijs arcibus in plano positis. Alias, planicies ordinariè ad fortificandum est aptior; quia & paludibus fluuijsq; communissimè alluentibus fortis esse solet: & secundum artis præscripta muniri defenderiq; potest. Mons autem cum omnibus requisitis ad fortificandum spectantibus rarenter inuenitur, vt non habeat plura incommoda, quàm adiumenta à natura.

Q V Æ S T I O . . . X X.

Vtrum numerosum, an verò mediocrè exercitum habere sit melius?

Scientia bellicæ motionis, qua secundum Polybium, homines militari ordini admittantur, decurientur, condecurentur, denique aptentur & erudiantur ad belli vsum & rationem, multum requirit laborem: vt autem commodè alantur

lantur, & ſtatis temporibus ſua ſtipendia habeant, infinitum theſaurum poſtulat. Proinde iure meritò quæritur à Politi-
cis, num copioſos præſtet habere exercitus, vti ſolent omnes
Orientales Principes; an verò mediocres, vti faciunt Euro-
pæi Reges. Qui multitudine gaudent, multas pro ſe ratio-
nes adducunt, ſed hæ præcipuæ habentur.

Prima. Quia numerofus exercitus in partes diuiſus pluri-
bus ſimul in locis poteſt bellum gerere, inſidias varijs in lo-
cis faciendo, ſuperuentibus aſſiduè inquietando, ſua multi-
tudine in acie opprimendo, diuerſas ſimul oppugnando vr-
bes, & tum infeſtationibus diuerſimodè affligendo, tum fre-
quentius cum aduerſario præliando; qui cum ſemel ſuccu-
buerit in acie cum exigua manu ſuorum, difficillimè iterato
ad conflictum prodibit.

Secunda. Quia numerofum habens exercitum, non tan-
tùm Marte aperto conſligere non extimeſcet, ſed vltro eti-
am prouocabit; & tam proprias munitiones, quàm acquiſi-
tas vrbes & loca præſidijs firmare facilè poterit. Exiguum
verò habens exercitum, nulli ſufficere poterit; quin & aci-
em ſemper detrectabit, quia reſiſtere non poterit.

Tertia. Quia ad gloriam Principis ſpectat, imò maxi-
mè conducit numerofos poſſe habere exercitus; omnibus e-
nim vicinis metuendus erit. prout nunc Turca nobis Euro-
pæis, quem nemo vltro laceſſere audet. Vera ſiquidem po-
tentia Principis in multitudine hominum conſiſtit, ex qui-
bus deinde aptiores militiæ educuntur ad bella; & ideo me-
lius eſt abundare & copioſiores exercitus habere, quàm
paucos numero & ineptos bello.

Quarta. Quia exiguus exercitus facilè morbis & con-
tagio tollitur, vel à locis paludofis, vel ab hoſte infectus, vt
difficulter eum hoſti ad pugnam prouocanti opponas. Nu-
merofi autem exercitus partes mox diuiſæ, ſi quid tale mor-
boſum accidat, per ſe quælibet reſiſtere hoſti poterit, nec ce-
det victus, etiamſi vincatur ab iniurijs cœli aut aduerſæ for-
tunæ

tunæ. Paruus autem exercitus cum peste interueniente affligitur, non poteris amplius succesus tuos etiam felicissimos promouere, quid aduersos? Vnde qui exercitum numerosum habet, insurgente peste & morbis inualescentibus, in diuersa legiones mittet, & multis in locis statim aduersarium inuadet. Sic Romani vno eodemq; tempore & in Italia, & in Sicilia, & in Gallia, in Hispania, in Sardinia, & in Macedonia bella gesserunt, & aduersus inimicos suos præualuerunt. Maioresq; nostri sæpius tribus & quatuor in locis bella gesserunt; sed & Iagellonis tempore, cum Crucigeris in Prussia, cum Moscouitis in Alba Russia, cum Scythis in Podolia, & cum Hungaris in Scepusio simul bellum sustinimus. Euenit idem & sub Cazimiro eius filio, & sub Sigismundo Primo eius Nepote. Merito igitur cum Scipione Africano dicere possumus. *Publica, cum fortuna, tum virtus desperare de summa rerum prohibet, eo fato, quo donata nobis sors est, ut magnis omnibus bellis victis, vicerimus.* Ita quoque Arabes, Indi, Ætiopes, Mauri, Saraceni, Scythæ, Hines atque Turcæ omnes suas expeditiones, multitudine exercituum perficiunt, & in bellis multitudine victores euadunt.

Quinta. Quia cum paruus exercitus deletur in prælio, non habebis quo te aduersario prosequenti victoriam defendas. Sic Spartani victi à Thæbanis ad Leutram, amiserunt Principatum Græciæ, quem tot sæculis tenebant. Et Thæbani deinde atque Athenienses victi à Philippo Rex Macedonum vno prælio, iugum debebant subire, cum non haberent amplius vires ad resistendum. Quemadmodum & Hungari fracti vno prælio ad Mohatzium à Solimano, amplius confurgere haudquaquam potuerunt.

Cæterum quia in omni conflictu non tam prodest multitudo, quam virtus utq; Tacitus ait. *Etiam in multis legionibus pauci sunt, qui prælia profligant, ideo copiosos exercitus magis propria multitudine, quam hostium virtute depræssos sæpius historijs legimus, & à paucis ordinatis forti-*

busq; militibus nostra ætate profligatos esse audiuius & vidimus. Igitur curandum est, vt bonos milites fortesq;, non multos habeamus.

Primo. Quia mediocris exercitus, melius in disciplina conseruatur quàm numerosus, qui in acie quoque ipsa difficulter disponitur, nedum in castris regitur. Nam prout hic ad seditiones pronior est, ita & ibi, territis prioribus, qui remotè à pugna loco positi sunt facilè in formidinem deuenit, & diffugit hoste non expectato.

Secundo. Quia mediocris exercitus facilius restauratur; amplior autem multitudo, naturaliter pluribus casibus subiacet, morbis, pestilentia, deceptioni, negligentia, fami & inopia. Quia & in itineribus pro mole sua semper est tardior, & in longiore agmine etiam à paucis superuentu affollet pati, & denique in locis asperis seu fluminibus transeundis, propter impedimentorum moras facilè decipitur. Apud Florum lego, quòd in campis Pharsalicis res nulla magis exitio Pompeio fuerit, quam ipsa exercitus magnitudo, cuius maior pars ex Asianis, nullumq; belli vsum habentibus constabat. Hinc Vegetius, *in omni praelio non tam multitudo & virtus indocta, quàm ars & exercitium solent prestare victoriam.* Apud Thucydidem verò lego, *sapè pauciores, dum metuunt, plures præ contemptu parum instructos profligasse.* Quadraginta millia cum Alexandro, & quidem maxima pars veteram orientem occuparunt. Pauci Hispani, sed milites, Indias obtinuerunt, quia optimè norunt foro vti, & quid in bello conducatur, aut obsit discernere; diligentia, cura, attentione, concordia, & pertinaci laborum tolerantia nullis secundi; non vis hostium, non aduersa res ingentem eorum animum subigit, adeò vt quæ virtute ceperunt, simul cum anima retineant.

Tertio. Quia mediocris exercitus minori annona nutritur, maiores autem exercitus citò rei frumentariae difficultas fatigat, ingentiq; labore numerosis animalibus atque equis

quis pabula colliguntur, nec ubique sufficiens aquatio haberi potest. Lucullus abundans commeatu, consumpsit tempore ipso Mitridatis numerosum exercitum apud Cizicum, cum ad pugnam è suis castris prodire nollet; nam & pabula ipsi & commeatus deficiebat, & miles moræ impatiens vel diffugiebat, vel morbis continuis consumebatur. Idem accidit Vladislao Iagielloni in Prussia Mariæburgum obsidenti. Turcæ verò totus penè exercitus in campis Madziarenfibus ob aquæ penuriam perijt, peritq; sæpiùs per deserta Ægypti versus Babylonem contra Persas tendenti.

Quarto. Quia mediocris exercitus fortius pugnat. iam autem de numerofo exercitu versus in fugam aciebus, necesse est multos cadere de multis, vt accidit in pugna Orfanensi cum Moschis, cum hostis non mittat tela in vanum, sed in condensatam multitudinem, quæ semel confusa ordines magis seruare nullo modo potest. Hinc veteres qui remedia difficultatum experimentis didicerant, non tam numerosos, quàm eruditos armis habere exercitus voluerunt. Et si exercitus esset pro necessitate numerosior, diuidebatur in duo castra & duos Duces, cum eiusmodi præcepto, vt prouiderent ne quid Respub. detrimenti capiat. Hinc Romanorum exercitus ordinarius, quem consularem appellabant, non amplius duabus legionibus ciuium Romanorum fuisse legimus, quæ quidem circiter sexcentos equites, & vndecim peditum millia constituebant. Erant ipsis præterea totidem equites peditesq; confæderatorum ac sociorum: & cum tali exercitu vnus Consul omnia perficiebat, & quemuis hostem adgredebatur. Nisi fortè maioribus viribus resistendum esset, tum enim bini Consules, cum binis exercitibus legebantur. Errant itaque multi, qui in exercitu numerum tantum commendant, de cæteris securi; cum tamen ingentes exercitus sua sibi multitudine obstant, & si bellum trahatur, locaq; hostium natura vel arte munita, & ab egregijs militibus defensa primum impetum eludant, tæ-

dio, morbis atque fame consumantur; suis magis & socijs, quàm aduersarijs terribiles. In omni quippe conflictu non tantum prodest multitudo, quam virtus. Vnde Frontinus. *In certamine bellorum exercitata paucitas ad victoriam promptior est, quàm rudis & indocta multitudo.* Ideo C. Marius cum ex tribus exercitibus vnum posset eligere, qui sub Rutilio sub Metello, & sub seipso meruerant, Rutilianum, quamuis cæteris minorem prætulit, non ob aliam causam, quàm quod certioris essent disciplinæ.

Conclusio. Inprouincijs, quas nec munitionibus ars, nec fluijs aut rupibus tuetur natura, timenda est hostium multitudo; obruuntur enim illæ non vincuntur. verum vbi tutæ viris murisq; vrbes sunt, aut in partibus est natura, minus terrebunt, centum hominum millia, quàm mediocris & multa præliorum experientia commendatus numerus, qui ad victoriam sufficiat, non abundet. Sæpius enim magnas copias in ordinatas à paucis ordinatis militibus profligatas legimus. Primum igitur in hac disciplina & præcipuum est, vt ex multitudine hominum, quam fusam inordinatamque acceperimus, idoneos eligamus, & locis conuenientibus instruamus, hoc est, decuriemus, & condecuriemus, atque certum numerum statuamus copiarum, qui modicè commodeq; ad belli rationem & vsum suppeditet: quippe cum & in itinere, & in castris, & in prælijs ipsis instructum haberi exercitum sit perquam vtile. Neq; enim sufficit ad conferuandum Imperium & propulsandum hostem habere numerosum exercitū, nisi fuerit & exercitatus: quia pauci fortes plus valent, quàm multi imbelles, vt testantur victoriæ Græcorum, Romanorum, maiorumq; nostrorum Polonorum, qui paruis exercitibus multas acquisuerant prouincias, & Scythas Turcas, Dacos, Moschos aliosq; quosuis multitudine præualentes vicinos, à Regni Poloniæ finibus repulerunt, Hodieq; aduersarijs nostris non tam multos, quàm strenuos milites atque Duces opponimus. Et vt Plato docet,

cet, militem debere esse ambidestrum, qui sit & eques & pedes cum necessitas postulauerit, talem equitatum habemus, qui pro rei exigentia hastatus est in planicie; his fractis in prælio est sclopetarius inter angusta, & thoracibus ferreis depositis, leuioris armaturæ eques, quem vulgo Cosachos vocamus, & tandem Duce iubente equos dimittit, & omnia pedum munia alacriter obit.

Q V Æ S T I O XXI.

Vtrum omnes, an verò plures armis tecti esse debeant?

Q Vantum agilitas conferat in bello, & in pugna aperta, nemo est qui non videat, cum ex ea nascatur victoria & hostilium acierum clades; ideo grauioribus armis impediti difficulter optatum assequuntur finem in prælio, ac propterea à multis negliguntur bellaq; omnia leuiore milite peraguntur præsertim ab illis qui celeritate valent, idq; has ob causas.

Primo. Quia leuior armatura aduersarium præuenire in bello potest, atque ita omnes illius cogitationes & acies confundere etiam instructissimas numero militum & armis. Ita Scithæ quasuis gentes insperate comparendo non tantum metu implent, sed & cædibus afficiunt: Arabibusq; ac Saracenis Romani Imperatores nequaquã resistere cum suis cathaphractis equitibus, armatisq; legionibus resistere potuerunt, qui seminudi ferè, sua agilitate, & Græciam & Italiam, & alias non Asiæ aut Africæ tantum, sed & Europæ prouincias complures debellauerant.

Secundo. Quia in pugna grauius armatum expeditius pugnando ictu conficit, aut loco sese ægrè mouentem, à tergo circumuenit, atque ita victoria potitur. Propterea Nairi Calecutenses, & Narsingani, quia à pueritia mirabili agilitati student, & in eam rem certis vnguentis ex Sisamo factis

membra inungunt, ideo grauiorem armaturam, quæ ipſos impedire poſſet, non habent, ſed Umbilicotenus omnium Indorum atque Ethiopum more, nudi arma offeſiua tantum gerunt; & ad quod genus armorum ſe à natura aptiore eſſe putat, in eo ſeſe exercet; atque ita vnius generis armorum milites, per cohortes diſponuntur; vt qui lancea vtitur, nullum iam aliud telum præter iſtud habet; qui arcu & ſagittis, ſimiliter, tum qui gladio aut ſclopō, itidem. Et ſic in uincibiles habentur, nam & aſſequi eos fugientes haur pote-
ris, quamuis pedes ſint, & fugere ipſos cum perſequi cæpe-
rint, impoſſibile ſanè: falconum enim inſtar accurrunt &
diſſipantur, occiduntq; cum minimè ſperaueris; quia & per-
niciſſimos, vt fertur, Parthorum equos, ſua velocitate ſupe-
rant, & ipſi ſeſe ita dextrè ſcutis ſuis coperiunt, vt ſit impoſ-
ſibile ferire ipſos. Cathaphracti verò noſtri, qui vix iam in
uſu nunc ſunt, prorsus inutiles eſſe videntur, quòd facie rota
armata viſui vix locus pateat, quo aptè iſtus in hoſtem deſti-
nare poſſint. Cumq; reſpirationem in defatigatione liberā
habere nequeunt, facilè ſuffocantur in labore. Qui ſi equis
deijciantur, nec reſurgere, nec quidquam dextrè gerere
poſſent.

Tertio. Quia leuis armatura hoſtem ſuperuentibus af-
fligit, commeatum præcludit, vias infeſtat, prouincias de-
populatur, in caſtra victualia conducit; quæ ſingula nunc
Croatæ, atque Coſachi Poloni in exercitibus Cæſareis præ-
ſtant: quia grauior armatura Germanorum, ob ſuam graui-
tatem, ad hæc omnia perficienda inepta eſt.

Contra, grauioris armaturæ miles præfertur nudis, aut
leuiter armatis, cum alias ob cauſas, tum ob has tres præci-
puè.

Primo. Quia & offeſiua tela, & deſeſiua arma habet: quib;
fretus, & aggredere hoſtem audacter poteſt, & aggreſſum ſuſti-
nere. Hic haſtati Polonorum maximopere laudatur, quòd & e-
quita-

quitatum quemuis instructissimum, & peditatum perumpere possunt, ipsi ab impetu hostili & læsione tuti, id est bene armati.

Secundo. Quia vbique terrarum illi felicius vincunt, qui bene armis tecti sunt, communiterq; victoriam in manibus habere dicuntur cū nudos exercitus, aut leuiter armatos, sibi oppositos vident. Vnde in pugna Mochenfi in Belgio, Nassouij copix, a grauiori armatura profligatæ fuerunt, cum lanceis armati Hispanorum equites, sclopetarios Germanorum tam equites, quam pedites perrupissent. Et ad Renteium castrum in Artesia, Cæsarianos sclopetarios, ab hastatis Gallorum equitibus superatos esse Historiarum scriptores prodiderunt.

Tertio. Quia vbique gentium grauis armatura, robur exercitus censetur esse, non tantum in pugna stataria, sed etiam in oppugnationibus vrbiū. Nam leuiter armati, leuiter pugnare solent, instantibusq; armatis resistere nullatenus possunt. Hinc sequitur.

Conclusio. Tam leuioris, quam grauioris armaturæ milites necessarij sunt, ad consequendam victoriam; sed magis tamen isti: quia impossibile est, vt non sit audentior armis tectus, quam nudus. Et si leuioris armaturæ opera necessaria erit, ijdem armis grauioribus depositis, munere illorum vtentur. Vnde nudi eminus tantum, & fugiendo potius pugnant, quam resistendo aut aggrediendo cominus; quia non possunt non timere ferrum, toto corpore discoperti. Qui multitudine potius eam ob causam obruunt, quam fortitudine vincunt, vt faciunt Scythæ, Mauri, Indi, Parthi, Arabes, & Turcæ, quorum alij Siam potentiam fregerunt, alij imperium Chinenfium lacerarunt. Ali conculcauerunt Romanorum Græcorumq; virtutem; alij cum Tamerlane ex angulo Asiæ egressi, maiorem mundi partem deuastaauerunt. Sed & olim Ificrates inter Græcos potius leuiter armatis obtinebat victorias; & propter maiorem agilitatem, thoraces

races lineos (vti faciunt nostri Cosachi hodiedum) non ferreos militibus portandos dabat, vt eò expeditiores forent. Quia & Romani in pugna Sacrouirana inimicos suos graui-ter nimium armatos securibus, inquit Tacitus, & dolabris, tanquam murum cædebant & prosternebant; qui velut cō-stricti obuertere sese nequaquam poterant. Defensiuā igitur arma debent esse expedita, ad sagittandum, iaculandum, & proiciendum, vt à longè etiam possint iuimicum offendere, & quam sæpissimè; priusquam approximetur nobis, & priusquam non modò ad manus, sed & ad iactum potuerit peruenire. Tales fuerunt & apud Romanos, sed adiuncti grauiori armaturæ, qui deinceps à Maximino Herculei vocabantur, quòd per eos Imperatores Romani infinitas victorias obtinuerint, priusquam res ad Triarios aut primipilos peruenisset. Vnde non debent nimium armis onerari, vt eo expeditius prælium exordiantur, hostem prouocent, feriant, Sautient eminus & prosteruant. Fundant quoque aciem, repellant equitem, cogant aduersarium procurfantem loco cedere, persequantur fugientem, explorent, perlustrent quæ loca suspecta, & ipsi denique locent infidias. Quapropter plures habendi sunt, quàm aut capafracti, aut hastati, quia, vti diximus, hi & primum certamen subeunt, & vna cum cæteris grauius armatis pugnant, & quanquam alij deserunt hoste abeunte, ipsi perseverant in insequendo & capiendo, quòd grauius armati propter munimina quæ gerunt, præstare non possunt, quamuis à vulneribus sunt tutiores, sed propter impedimentum & pondus armorum capi eos facile esto, & laqueis frequenter obnoxij; contra dispersos pedites, quàm contra equites in certamine meliores. Tamen aut ante legiones positi, aut cum alijs equitibus mixti, quando cominus pugnatur, hoc est, manu ad manum, acies hostium sæpe rumpunt. Inq; Pragensi celeberrima illa nostra ætate pugna, Ducis Bauariæ cataphracti multum cōtra legionarios Friderici voluerunt. Romanorumq; pedi-
 tes

tes olim erant armis ferreis & galeis, coperti, vti nunc Germanus miles facit, sed postea disciplina neglecta à Gratiano Imperatore impetrarunt, vt thoraces deponerent, deinde verò & clipeos: vnde in pugna cum Gottis facile fuerunt victi. Sed nunc communissimè iam totus peditatus nudus est: inque pugna illa Mechliniensi, quam Ioannes Austriacus habuit, cum confœderatis Belgarum, spectaculo fuere manipuli Scotorum, qui siue ostentatione audaciæ, siue potiùs æstus intolerantiâ, quem & cursus, & dies cœlo ardente flagrantissimus intendebat, reiectis vestibus, solo indusio contenti, aliqui hoc etiam exuto, atque ad fœmora contorto, nudi inter armatos volitabant. Nec erant inde pleriq; eorum minùs tuti, quàm cæteri armis tecti, atque indeo graues: quos & declinandis telis impromptos, & à casu tardiores, & in receptu postremos, sæpè hostis aut ictu cæderet, aut equo proculcaret, aut manu caperet.

Q V Æ S T I O XXII.

Vtrum expediat milites auro & argento vti?

Olim & in victu & in vestitu milites modestiam obseruabant, postea negligentia luxuriosorum Ducum, eo peruentum est, vt iam palsim inter Rerumpublicarum gubernatores disceptetur, sintne legibus coercendi milites, qui castrensem disciplinam penitus iam amiserunt? sitne victus ipsis & vestitus præscribendus, qui nulla in re modum per se seruare volunt? Nam quod de Rebuspublicis loquens Seneca ait, *Conuiuiorum luxuria & vestium, ægræ ciuitatis indicia sunt*, hoc nos de exercitibus meritò dicere possumus, conuiuiorum & vestium luxum, esse signa perditionis exercitus, imò perditionis populi, qui non nisi disciplina legum conseruari potest, prout & militia disciplina castrensi quæ dum negligitur, ne-

T t t cessario

cessario & Imperium perire debebit Vnde Alexander Seuerus Rempub. militaris disciplina contineri dicebat, quæ si dilaberetur, & nomen, & imperium Romanum amissum iri; quod & euenit, negligentia Ducum exercitus. Passim etenim videmus, qui ad militiam animum adplicuere, eos non modò vestium mox aliam rationem inire, verùm etiam in moribus, consuetudine, voce, quin etiam incessu, omnem ciuilem modum fastidire. Hinc legum contemptus, dira mòrum immanitas, effrænata violentia, prædandi sæuiendique cupiditas, insolentia, perfidia, impietas. Domum deinde reuersi, non alijs moribus esse volunt, quàm in castris consueuerunt, atque ita patriam perdunt. Nihilq; aliud nunc tota in Europa spectandum obuersatur, quàm vt videas iustitiam opprimi, Remp. impotenter vexari, mendacio licentiam palmamq; dari, veritatem abstrudi, Satyricos tacere, assentatores loqui, seditiosos dominari, pacificos seruire, & quod super omnia, pessimumq; omnium, benè cum malis, malè cum bonis agi. Cui rei prouidendo tempestiue, luxus in castris coercendus est, qui quo maior est, eo periculosior esse solet. Et qui cælata auro vel argento arma militi concedi volunt, hisce rationibus nituntur.

Primo. Quia speciosior miles sic in acie apparet, ac proinde aduersario formidolosior, cuius oculos hoc splendore perstringit. Qua ratione commotum Alexandrum, fuisse aiunt, vt Indos aggressurus equorum phaleras & militum arma argento insigniri iusserit. Idem faciebant Sertorius, atque Iulius Cæsar, qui non tantùm permittebant auro & argento vti, sed etiam iubebant pomposas vestes & varijs coloribus resplendentes habere, quod nunc faciunt Persæ, Turcæ, Poloni, Cocincinenses, Fessani, Congenses, dicendo animosiores ita fore milites, cum aduersarios suos conspiciant in acie nudos, laceros, sordidatos.

Secundo. Quia fortiores necessario ita fiunt, curando ne ista amittant quibus resplendent, neue in manus hostium

conce-

concedant, quibus illi & apud suos commendabiles, & apud aduersarios in precio & æstimatione sunt. Vnde Suetonius de Cæsare. *Milites habebat tam cultos, ut argento & auro politis armis ornaret, simul & ad speciem, & quo tenaciores eorum in prælio essent metu damni.*

Tertio. Quia utile Principi & militi habere, quæ ad vsum & victum, deficiente publico ærario, conuertas. Qui enim lacer & nudus est, fame perire debet, dum in zonula pecunia de est, ille verò qui aurum aut argentum cælatum possidet, facile & saucius & famelicus necessaria sibi conquirere poterit.

Cæterum, veteres felicitatem Reipub. non alia ex re metiebantur, quam ut multos in illa armis exercitatos reperiri possent: siquidem non splendor auri gemmarumue, sed solus armorum metus hostes tibi subigit. Quare argenti auriq; vsum in castris militi interdicebant, hæc ob causas.

Primo. Quia difficulter miles ita scribitur: cum nemo simplici veste reclus, simplicibusq; armis ornatus velit comparere inter alios hisce talibus resplendentes, ut nunc moris est in Polonia: nemoq; ita pompose indutus, vult esse contentus stipendio Reipublicæ ordinario, sed ultra decuplo à suo ductore donatium exigit, ut latius descripsimus in *Equite Polono* ad Urbanum VIII. Atque ita ditiores, si comparere in castris cum suis cohortibus, amore aut necessitate Reip. id exigente, volunt, intra breue spacium temporis suas possessiones creditoribus obligant atque ita ad paupertatem deueniunt. Interq; semetipsos sæpius ad iurgia & turbas diuersas deueniunt, dū splendidius vestitus, minus comptum aut refulgentem auro contemnit & spernit. Vnde meritò de Polonis militibus nostris, id possumus dicere, quod Tiberius Imperator olim de fæminis Romanis dicebat. *Lapidum causa pecunia nostræ ad externas, aut hostiles gentes transferuntur.* Vt enim equos nostros, arma nostra, atque nosmet ipsos gemmis & lapidibus preciosis, tum pel-

libꝫ preciosis, serico, & pennis adornemus, omnes prouentus nostros ad transmarinos populos, & maiori ex parte ad Turcas hostes nostros capitalissimos mittimꝫ; barbariꝫ; populi quibꝫ cū bella assidua gerimus, pecunijs nostris ditescunt.

Secundo. Quia excitatur sic hostis spe prædæ, fortiusqꝫ nobiscum pugnat: Ita Cosachi Zaporofenses ipsimet laceri, rudiꝫ; veste coniecti, Turcas splendide vestitos & auro argentoqꝫ; lucentes, incitati cupiditate prædæ, audacissimè semper aggrediuntur, & spolia sæpissimè referunt ditissima. Et in bello Chotimensi nocturno tempore, agmineqꝫ; silenti castra ipsorum toties inuasert, accenderuntqꝫ; animos cæterorum ad audendum facinus simile, solius prædæ amore. Sæpè etenim ignauos etiam lucri cupido ad fortiter pugnandum, & aduersa toleranda accendit.

Tertio. Quia miles spoliat prouinciales & latrocinatur ut se auro vestiatur, exhibeatqꝫ; æqualem splendore suis comilitonibus; atque sic inhiando prædæ atque rapinæ, omittit ordines, corrumpitqꝫ; disciplinam. Quod considerans Ludouicus Imperator, vñ auri & argenti militibus omnibus interdixit. Quod fecerat & Chodkieuicius contra Turcas; Imperator exercituum Polonicorum constitutus; qui legem à Repub, in comitijs Generalibꝫ hac de re statui impetrauerat. Sed & Pescennius Niger olim videns quòd nonnulli milites eius vterentur vasis argenteis ad bibendum, iussit statim omne argentum conquirere & remittere domum. Veneti quoque legibus cauent suis, ne triremium Præfecti vantur vasis & armis argenteis, ne paulatim orto luxu à militibus, tota Respub. deinde corrumpatur, quæ diligentissimè in omnibus rebus luxum prohibet, sumptuariasqꝫ; leges veterum Romanorum exemplo habet.

Conclusio. Omnia illa militibus ad vestitum & ornatum sunt permittenda, quæcunque eum animosum audacemqꝫ; reddere possunt, atque hostitus terribilem in oculis faciunt, ut sunt cristæ diuersæ, alæ pennatæ, pelles animalium rapacissi-

cissimorum, tygridum videlicet, leopardorum, ursorum, luporumq; quibus etiam equi hostiles terrentur; & quibus communissimè equites nostri Poloni, ad perterrefaciendū aduersarium in aciem descensuri vtuntur. Auro autem gemmis & argento, non deberent prælij tempore vti, sed in castris tantum & congressibus cum hoste tempore indiciarum, aut tractationis pacis: idq; non promiscuè omnes, sed vel ductores ordinum tantum, vel benemeriti, aut veterani certorum stipendiorum emeritorum. Sic Alexander Magnus quamuis valorosissimis militibus suis, quos Argiraspidas vocabat ob virtutem, non tamen concedebat vsum argenti, & vestium splendidarum, nisi deuictis Persis, & subactō Oriente. Et cum alias semper, tum vltimum cum Dario pugnaturus hortabatur milites suos, vt spernerent illam aciem auro argentoq; fulgentem, in qua plus prædæ quàm periculi sit, cum victoria non armorum decore, sed ferri virtute quæretur. Galgacus quoque Britannos monet, ne terreat eos vanus ille nobilioris metalli adspectus, quod, neque tegit, neque vulnerat. Annibal etiam repræhendebat exercitum Antiochi, quod & argento & vestibus resplenderet, incitaretq; auaritiā in famelico & talibus ornamentis carēte inimico. Similiter Mitridates, toties splendidos auro suos milites spoliatos à Romanis esse videns, ferro solummodo & corio vti iussit. Optimum itaque foret, si Dux ipse & Tribuni omnes modestia quam maxima vterentur, nec darent pessimum luxus atque luxuriæ suis militibus exemplū. quod corruptis hisce temporibus passim iam fieri videmus.

QVÆSTIO VLTIMA.

Vtrum litteræ iuuent rem militarem nec ne?

Qui omnem scientiam rei militaris in solo vsu & experientia atque exercitatione collocant, neque ad hanc

momenti quidquam afferre censent ingenij vim lectionis huc pertinentium scriptorum industria comparatam, eos vel vnus L. Luculli exemplum refellere potest, commemoratum à M. Cicerone, eo libro quem Luculli nomine inscripsit: comprobabit autem euentus belli Turcici ad Chotimi- am in Valachia, quò Osmanus numerosissimo cum exercitu, & inæstimabili cum apparatu veniens, nihil contra castra Polonorum, cum vniuersis suis Purpuratis proficere potuit, quòd nullum à literis subsidium habuerit. Quem è cōtra nos, non viribus tantum & fortitudine, à finibus patriæ repulimus, sed etiam ingenio, multis in occasionibus, exigua suorum manu superauimus, ac in sua redire in glorium coegimus. Rudes attamen & imperiti litterarum atque rerum, volentes barbariem suam promouere, hisce rationibus viros militares, à litterarum cognitione repellunt.

Primo. Quia litteræ faciunt hominem melanchonicū, vt docet Aristoteles, & experientia ipsa: melanchonia verò contraria est vigori animi, qui in milite omnino requiritur, ideo viri eruditi, vitæ sedentariæ assueti, fugiunt strepitus armorum, & nec in maximis necessitatibus volunt sese vltro immiscere bellicis tumultibus. Vnde Cato dicere solebat, *Romanos tūc Imperium amissuros, cū cæperint attendere ad studia & litteras Græcorum.* Ita enim occupant hominem litteræ, vt nulla alia re delectetur nisi sua speculatione. Hinc tot Monachi, Sacerdotes sæculares, Thæologi, Philosophi, Iurisperiti, Medici, Pharmocopolæ, Causidici, Chimici, Poëtæ, Oratores, Musici, Statuarij, pictores, architecti, Astrologi, Geometræ, vt tertia pars ferè hominum in qualibet Repub. quieti sit dedita, cœlestium vel sublunarium rerum meditatione occupata. Qui si omnes rei militari operam nauarent, potuissent multò felicius hostes suos repellere, à finibus Imperij sui, quàm dum tertia tantum, aut decima pars ciuium id satagit, reliquis agriculturam, & mœchanicas artes exercentibus. Ideo Licinius Imp. Philosophos ac
Orato-

Oratores venenum esse ac pestes Reipub. asserebat, quod ex eorum disciplina, omnes otij amantes prodirent.

Secundo. Quia litteræ faciunt hominem vilem, timidū, & assidua meditatione rerum mutabilium, meticulosum & exsanguem. Cum enim vitæ breuitatem considerant, & pericula mortis altiori mente speculantur, non libenter sese periculis belli exponunt, sed quàm diutissimè cupiunt lucis huius vsura perfrui: & quam chara sit valetudo & sanitas hominis diligenter examinando, quæ vel totiùs mundi thesauris comparari nequit, nolunt eam aliquot denarijs vendere; proq; exiguo stipendio, quod militibus & tardè, & nō ex integro exsoluitur, tot misérias, tot vulnera, famem, frigus, æstus, morbos, atque demum ipsam mortem subire. Ideo Gotti, Romanum Imperium vastando, vbique libros intactos relinquebant, quòd studijs litterarum sciebant hostes suos tantò magis fore imbelles. Turciq; nunc, & Saraceni olim legibus Machometi, à litterarum tractatione deterriti, iuuentutem ad arma semper conuertebant, & auertebant, ne cum tempore fortè fierent debiliores, (vti Græci tunc & Romani) ac per consequens imbelles. Quod ipsū olim Cato considerans, auctor Senatui fuit, vt tres Oratores, qui nuper Athenis venerant, è vestigio domum remitterentur. quippe verebatur, ne Romana iuuentus, scientiarum illecta dulcedine, à militiæ studio & laboribus abstraheretur. Semperq; apud omnes Orientales, litterarum studia, emollire atque adeò effœminare animos credita sunt.

Tertio. Quia per experienciã videmus, tot bellicosissimos fuisse populos, tot strenuissimos milites, tot gloriosissimos Duces, victoriosissimosq; Reges ac Imperatores, qui ne vnicam quidem litterulam nouerant, Manlij illi, Decij, Marij Diocletiani, Sapoires Tamerlanes, alijq; infiniti Heroes per orbem vniuersum sparsi; quos inter nostri quoque Boleslai, Præmislai, Lascones, Cazimiri, atque Vladislai numerari possunt, qui penitus litterarum ignari, bellicosissimi at-

tamen

tamen Principes fuerunt, regnumq; Poloniæ, vel inuitis ac inuidentibus vicinis Regibus, in eam quàm nunc possidemus amplitudinem dilatarunt. Nec Nobilitas nostra studia litterarum tractare cœpit nisi à Iagellone Rege Doctoribus in Academiam Cracouiensem introductis; à quo tempore statim desijt per se nobilitas bellicas expeditiones peragere, sed stipendiario milite cœpit uti: neglectoq; equitandi usu, vnde Equites appellabantur, à vicinis populis carpentorum atque rhedarum usum desumpsit. Nec quidquam restat, luxu tam ingenti introducto, quàm ut cum Sardanapalo & Heliogabalo muliebres sumamus vestes, eiuratisq; virilibus belli ac pacis artibus, colum tractemus & lanam.

E diuerso tamen, omnium prudentum opinione, *Primos summi Ducis est, scientia rei militaris*; hæc autē ut reliquæ artium, non tantum exercitatione, sed & doctrina percipitur: vnde libris & lectione opus; boniq; Duces & lectionem experientia comprobant, & experientiam lectione confirmant. Ita Iulius, qui in magnis itinerum difficultatibus, & in medijs bellorū æstibus libros fecit. Et sanè excellentissimi quique Duces, ijdē & literatissimi fuere, præcipuè Romanorum & Græcorum, qui cæteris omnibus pro exemplo sunt. Et patrum nostrum, nostraq; memoria, quibusdam Septentrionalibus, tanta fuit litteratorum copia, ut incertum diceres armisne essent, an litteris clariores. Proinde iuuare prudentiam militarem litteras, vel his rationibus probatur.

Primo. Quia excitant ad gloriam, & res domi forisque præclare gerendas: Cum etenim historias legimus, & tot Heroes in illis commendari videmus, rapimur statim ad similem gloriam, & laudibus incitamus ad famam, quæ nomen nostrum æternum posteris commendaret. Ita Themistoclem excitatum legimus Encomijs Achillis, Cimonem Themistoclis, Alexandrum, Philippi patris; Machometem II. Alphonsum Magnum, Marchionem Pescaræ, lectione
Histori-

Historiarum, aliosq; infinitos viros illustres, qui alias imbelles natura, & ignaui opum affluentia, sumpto ex lectione desiderio famæ, in valorosissimos deinceps Imperatores euasisse videmus.

Secundo. Quia prudentiam generant; sine qua miles nihil planè vi sua efficiet. Ex historijs enim casus diuersos discit, vt euitet; astus militares format, vt aduersariū decipiat; situs locorum atque prouinciarum cognoscit, vt sciat qua, & quomodo cum exercitu procedere debeat, quod præstat Geographia; temporum mutationes præfagit, ex Mathematica; locorum salubritatem, ex Physica; metationem castrorum & dispositionem acierum ex Geometria; munien- di rationem, & fabricandorum instrumentorum bellico- rum artem, ex Architectonica: Ex morali denique Philoso- phia & Eloquentia, tractandorum prouincialium modum, ex hortandorum, sedandorumq; militum methodum; pa- cis, induciarum, fœderum, pactorum, transactionum, cæ- terarumq; rerum, quæ ad regimen exercitus, & conciliandi sibi, aut circumueniendi aduersarij rationem addiscit.

Tertio. Quia docent non extimescere mortem: mori- entibus enim pro patria & Religione, cum famam immor- talem, tum vitam æternam, cælestisq; gloriæ præmia mor- talibus promittunt; quibus excitati per sanguinem & mor- tes nitimur adipisci vltimum finem nostrum & beatitudi- nem. Hinc plurimi contra barbaros pro libertate bella ges- sere, plurimi pro gloria Crucis mortem libentes oppetere. plurimi pro liberandis captiuis è seruitute Musulmanica su- is sumptibus in expeditiones iuere; inclitusq; Heros ille Go- tifredus Bullionius, plurimis occasionem præbuerat, benè merendi de Religione Catholica, suscepta expeditione pro recuperatione Terræ Sanctæ. Sed hæc iam lippis & tonso- ribus nota sunt. Sequitur.

Conclusio. Litteræ Ducibus belli sunt necessariae, non au- tem gregario militi; qui has tantum modò res duas præstare

tenetur, obedientiam suo Imperatori, & tractationem armorum expeditam. Imperator verò atque eius duces, debent habere prudentiam rerum militarium, famæq; bonæ appetitum. Hinc Ottho dicere solebat ad milites. *Vobis arma, & animus sit: mihi consilium, & virtutis vestra regimen relinquit.* Et Antonius Primus. *Diuisa inter exercitum Ducesq; munera; militibus cupidinem pugnandi conuenire; Duces, prouidendo, consultando, cunctatione sæpius, quàm temeritate prodesse.* Et ideo barbaros longè fortius pugnare videmus acie aperta, quàm Christianos, quia ignari omnium rerum, nullam aliam gloriam expetunt, quàm mori in armis, securi præmiorum futuræ vitæ ex persuasione sui Machometis. Inter Christianos verò quia plerique litterati sunt, & de pænis malorum post mortem, plurima legerunt aut audiuerunt, quia licentiosius in militia vixerunt, scelerum perpetratorum conscientia tacti, sæpissimè mortis pericula euitant, & congregari nō audentes in turpissimam sese fugem multoties conijciunt, nisi benè animentur, aut informantur ante pugnam à suis Ducibus. E contra barbarorum Duces, quia nullam ex litteris scientiam adiumento suæ peritiæ habent, ideo stratagemata litterarum euitare, aut præuidere nesciunt, nec possunt Christianos acie vincere, nisi vi & multitudine exercitus sui. Quemadmodum igitur terra cultu, sic animus bellicosorum virorum disciplina & litteris melior, vberiorq; efficitur. Et ideo Lazarus Suendius, Maximiliani II. & Georgius Basta, Rudolphi II. copiarum in Pannonia Ducatores, ita litterarum & litteratorum amantes & studiosi fuerunt, ut viros eruditos, & integram suppellectilem bonorum librorum, in castris secum circumferre soliti fuerint. Quid dicam de Francisco. I. & Ludouico XI. Regibus Galliarum. Quid de Lotthario. II. Alphonso Magno, Roberto Siciliæ Rege, alijsq; infinitis Ducibus ac Principibus in omni æuo, & in omnibus mundi partibus? Et quidem meritò litterarum enim præsidio leges condimus, iura conscribimus, pacem

cem dirigimus, bella dirimimus, morum præcepta tradimus, & oratorem componimus, qui ciuium militumq; animos impellat quò lubet, reuocet vnde vult: humanarum, præterea diuinarumq; rerum scientiam acquirimus; quæ homines multis ante nos sæculis nati senserint, gesserint, quomodouè vixerint, scimus: nostras denique aut nostrorum res præclare gestas obliuioni eripimus, ac posteris cognoscendas celebrandasq; mandamus. Quid igitur earum cognitione, vel prodesse magis hominum vitæ, vel plus afferre splendoris potest? cum non ornamenta solùm Reipublicarum sint, sed auxilia & fulcra, *quæ ab omni æuo, vt inquit Belgicæ decus Iustus Lipsius, Deus extare voluit, velut pharos, & lucentes quosdã ignes in tempestuoso mari mutationis nostræ.* Vnde non solum pulchrior comptiorq; per doctrinam virtus in Summo bellorum Duce, sed etiam fortior, cautior, & ad posteros splendidior atque commendatior, quia non colorem tantùm suæ præstantiæ à litteris ducit, sed etiam sanguinem & robur, quò suis fit amabilior, hostibus verò formidabilior.



ET hæc sunt, quæ in vsum tyro-
num, his octo libris, de Militari di-
sciplina meditati sumus. Tu autē
ô exercituum Deus, & protector
noster Aspice super humilitatem ser-
uorum tuorum. Et cogita cogita-
tiones pacis, & non afflictionis. Vt
in pace viuentes securi tibi serui-
amus Ad laudem honorem &
gloriam Tui Nominis

FIAT. FIAT.

